

O LE AOAO ATU, E LEAI SE ISI VALAUGA E SILI AI

O Se Risasi Taiala mo le Aoaina Atu o le Talalelei



O LE AOAO ATU, E LEAI SE ISI VALAUGA E SILI AI

O Se Risosi Taiala mo le Aoaina Atu o le Talalelei

Lomia e le
O Le Ekalesia a Iesu Keriso o le Au Paia o Aso e Gata Ai
Aai o Sate Leki, Iuta

Faamatalaga ma Fautuaga

E matua talisapaia a outou faamatalaga ma fautuaga e uiga i lenei tusi. Faamolemole ia auina mai i le:

Curriculum Planning
50 East North Temple Street, Floor 24
Salt Lake City, UT 84150-3200 USA
E-mail: cur-development@ldschurch.org

Faamolemole ia tusi mai lou igoa, tuatusi, uarota, ma le siteki. Ia mautinoa e ta'u mai ai le igoa o le tusi. Ona tuuina mai ai lea o au faamatalaga ma fautuaga e uiga i mea o loo matua lelei ai le tusi ma vaega e matuai moomia ai le faaleleia.

© 1999 e le Intellectual Reserve Inc.

Ua taofia aia uma

Lomia i le Lunaite Setete o Amerika

Faamaonia le faa-Peretania: 8/98

Faamaonia le faaliliuina: 8/98

Faaliliuina o le *Teaching, No Greater Call*

Samoan

Faavaa, Itulau 3: *Iesu i Totonu o le Sunako i Nasareta*, saunia e Greg K. Olsen. © e Greg K. Olsen.

Itulau 1: *Lauga i Luga o le Mauga* saunia e Carl Bloch. Ua faaaogaina ona o le faatagana a le National Historic Museum i Frederiksborg i Hillerod.

Itulau 4: *Pe Sili Mai Lou Alofa ia te Au i o Latou Nei?* saunia e David Lindsley. © e David Lindsley.

Itulau 23: *Togalaau o Paionia*, saunia e Valoy Eaton. © e Valoy Eaton.

Itulau 31: *O Iesu ma le Fafine Samaria*, saunia e Carl Bloch. Ua faaaogaina ona o le faatagana a le National Historic Museum i Frederiksborg i Hillerod.

Itulau 28: *Taimi o Tala i Kalilaia*, saunia e Del Parson. © e Del Parson.

Itulau 35: *O le Fafine o Loo Pa'i Atu i Tu'upao o le Ofu o le Faaola*, saunia e Judith Mehr. © e Judith Mehr.

Itulau 37: *O Le Leoleo Mamoe Lelei*, saunia e Del Parson. © e Del Parson.

O LE AUALA E FAAAOGA AI LENEI RISOSI TAIALA

O ai e tatau ona faaaogaina lenei risosi taiala?

O lenei risosi taiala e mo tagata uma lava e aoaoina atu le talalelei, e aofia ai:

- Matua.
- Faiaoga i potuaoga.
- Taitai o le perisitua ma ausilali.
- Faiaoga o aiga ma faiaoga asiasi.

O a mea o loo aofia ai i lenei risosi taiala?

O le Aoa Atua, e Leai Se Isi Valaauga e Sili Ai o loo aofia ai ia taiala ma fautuaga e faatatau i le aoaoina atu, e pei ona faaalua mai i ootoga nei:

Vaega A

O Lou Valaauga e Aoa Atua

O lenei vaega o le tusi o loo faamatala atu ai le taua o le aoaoina atu o le talalelei i le fuafuaga a le Atua. O loo aofia ai foi ia fesoasoaniga i le auala e mafai ai e tagata taitoatasi ona saunia e aoao atu le talalelei.

Vaega E

Mataupu Faavae Autu o le Aoaoina Atua o le Talalelei

O lenei vaega o le tusi e fesoasoani ai i le fausiaina o se faavae mo aoaoga uma o le talalelei.

Vaega I

Aoaoina Atua o Vaitausaga Eeseese

O lenei vaega o le tusi o loo tuuina atu ai faamatalaga ma fautuaga mo le aoaoina atu o le talalelei i tamaiti, autalavou, ma tagata matutua.

Vaega O

Aoaoga i le Aiga

O lenei vaega o le tusi o loo tuuina atu ai le fesoasoani mo matua ina ia aoao atu le talalelei i a latou fanau. O loo aofia ai foi ma fautuaga mo faiaoga o aiga ma faiaoga asiasi.

Vaega U

Aoaoga i Tulaga Faaletaitai

E fesoasoani lenei vaega o le tusi i taitai perisitua ma ausilali ina ia malamalama i a latou matafaioi taua o le aoao atu.

Vaega F

Auala E Fai Ai Aoaoga

O loo tuuina atu i lenei vaega o le tusi ni auala eeseese e mafai ai e faiaoga ona faaaoga e faatamaoagaina le tuuina atu o lesona.

Vaega G

O le Vasega o le Aoaoina Atua o le Talalelei

O loo aofia i lenei vaega o le tusi ni lesona se sefululua e saunia ai tagata taitoatasi e aoao atu le talalelei. Ua fuafuaina lesona ina ia aoaoina atu e avea o se vasega faatula-gaina. E mafai ona suesueina taitoatasi pe faaleaiga foi.

E faapefea ona faaaogaina lenei risosi taiala?

O le Aoa Atua, E Leai Se Isi Valaauga E Sili Ai ua fuafuaina e avea o se risosi taiala ae le na o se tusi e faitauina mai le faavaa i le faavaa. Ua faamoemoe ina ia faaaogaina e avea o se:

- Taiala suesue a le tagata lava ia.
- O se risosi mo fonotaga mo le faaleleia o faiaoga.
- Tusi lesona mo le Vasega o le Aoaoina Atua o le Talalelei.
- O se risosi mo taitai ao latou galulue ma faiaoga i a latou faalapotopotoga.

Ina ia matua aoga lenei tusi, e tatau i faiaoga ona:

- Iloilo vaega o loo lisiina atu i le faasino mataupu.
- Suesue ia tala o loo faailoa mai ai mea tonu latou te fifaia i ai po o mea foi e manaomia i lea taimi.

Mo se faataitaiga, atonu e mananao matua e faaaoga lelei ia taimi o aoaoga e fesoasoani ai i a latou fanau ina ia alualu i luma faaleagaga. Vaega O, "Aoaoga i le Aiga," e

aofia ai se tala ua faaulutalaina “Taimi o Aoaoga i le Olaga Faaleaiga,” lea e talanoaina ai pe faapefea ona iloa taimi o aoaoga ma aoao atu ia mataupu faavae ua saunia le fanau e aoaoina. Atonu e mananao faiaoga e faaoga ni auala eseese e aoao atu ai a latou lesona. O tala o loo i le Vaega E “Faaoga Metotia Lelei” o loo tuuina atu ai ni manatu e fesoasoani ai i le auala e filifilia ma faaoga ai auala eseese e aoao atu ai.

A'o faaogaina e faiaoga le [tusi] *O le Aoaogatu, E Leai Se Isi Valaauga E Sili Ai* i le auala lenei, o le a avea o se risosi aoga i a latou taumafaiga faifai pea ina ia faaleleia atili ai le faiga o a latou aoaoga.

Lomiga ua Faaleaogaina

O lenei tusi ua suia ai ia lomiga nei:

- O lomiga uma lava talu ai o le [tusi] *O le Aoaogatu, E Leai Se Isi Valaauga E Sili Ai*
- *O le Tusi o Auala e Aoaogatu Ai Fanau*
- *Tusi Fesoasoani o Fetufaaiga a le Peraimeri*

Lisi o Mea e Maua Mai Ai Faamatalaga

O se lisi faaalafapeta o mea ua gaosia e le Ekalesia o loo maua mai ai faamatalaga o lenei lomiga ua tuuina atu i lalo. O loo tuuina atu i lalo le numera o le tusi, ae lē o tuuina atu i faamatalaga o lenei lomiga.

Vaega o “Gaoioiga” o le *Tusitaulima o Faatonuga a le Ekalesia* (35710 890)

Tala o le Tusi a Mamona (35666 890)

Tusipese a Tamaiti (34381 890)

Tusitaulima o Faatonuga a le Ekalesia, Tusi 2: Taitai o le Perisitua ma Ausilali (35209 890)

Tusi o Lisi o Mea e Faaogaina e le Ekalesia (e lomiga faaletausaga faatasi ai ma se numera fou i tausaga taitasi)

Tusi Lesona o Afiafi Faaleaiga (31106 890)

Taga Ata o le Talalelei (34730 890)

Mataupu Faavae o le Talalelei (31110 890)

Vaega o le “Aoaoina Atu o le Talalelei ma le Taitaiga” o le *Tusitaulima o Faatonuga a le Ekalesia* (35903 890)

Viiga (tagai i le Tusi o Lisi o Mea e Faaogaina e le Ekalesia mo se lisi atoa o numera o tusi)

Faaleleia o le Aoaoina Atu o le Talalelei: O se Taiala a le Taitai (35667 890)

O le vaega o “Musika” i le *Tusitaulima o Faatonuga a le Ekalesia* (35714 890)

Tamaitusi *O O'u Aso o Faataunuuga* (35317 890)

Tala o Tusitusiga Paia (31120 890)

Tusitaila o Aoaoga (34595)

Fesoasoani Vaaia o Ata 'Oti'oti (vaega atoa: 08456; seti taitasi; 33239, 33242, e tau oo i le 33250)

FAASINO MATAUPU

O le Auala e Faaoga Ai Lenei Risosi Taiala iii

Vaega A: O Lou Valaauga e Aoao Atu

O le Tauga o le Aoaoina Atu o le Talalelei i le Fuafuaga a le Atua

- 1 E Leai Se Isi Valaauga e Sili Ai 3
- 2 Faafaileleina o le Agaga 5
- 3 O le Tofiga Paia o le Faiaoga. 8

Ia e Saunia Faaleagaga

- 4 Sailia o le Meaalofa o le Alofa Mama 12
- 5 Sailia o le Agaga 13
- 6 Saili ina ia Maua le Upu. 14
- 7 Faatulagaina o se Fuafuaga a le Tagata Lava
Ia mo le Suesueina o le Talalelei. 16
- 8 Ia Ola Ai i Mea o Loo e Aoao Atu 18
- 9 Valaauina, Faamanuiaina i le Tofiga, ma le
Faalauteleina 20

Faaleleia Atili o Au Taleni

- 10 Sailia o Lesona i Soo Se Mea. 23
- 11 Faia o se Fuafuaga ina ia Faaleleia Atili ai
Lou Aoao Atu. 25
- 12 Mauaina o le Lagolago Mai Ou Taitai 29

Vaega E: Mataupu Faavae Autu o le Aoaoina Atu o le Talalelei

Alofa Ia i Latou e te Aoaoina

- 1 O le Alofa e Faamaluluina ai Loto 33
- 2 Malamalama Ia i Latou e te Aoaoina 35
- 3 Aapa Atu i le Tasi 37
- 4 Fesoasoani i Tagata Fou ma Tagata le Toaaga . . 39
- 5 Aoaoina o i Latou e i ai ni Tulaga Le Atoatoa . 40

Aoao Atu i le Agaga

- 6 O le Agaga, o le Faiaoga Moni Lea 43
- 7 Aoao Atu Faatasi ma se Molimau. 45
- 8 Valaaulia o le Agaga A'o e Aoao Atu. 47
- 9 O Le Iloaina o le Agaga ma Mulimuli ai Pe a E
Aoao Atu 49

Ia Aoao Atu le Mataupu

- 10 O le Mana o le Upu 52
- 11 Tausia le Mataupu Ina ia Mama Atoatoa 54
- 12 Aoao Atu mai Tusitusiga Paia. 56

Valaaulia le A'oa'o ma le Maelega

- 13 Fesoasoani i Tagata Taitoatasi Ina ia Avea ma
a Latou Matafaioi le Aoaoina o le Talalelei. . . . 63
- 14 Taitaia o Talanoaga. 66
- 15 Faalogo. 69
- 16 Aoao Atu i Fesili. 71
- 17 Fesoasoani i Tagata o loo Aoaoina
ia Gauai Mai. 74
- 18 E Iloa Faapefea pe o Latou Aoao 77
- 19 Fesoasoani i Isi ia Ola i Mea o Loo Latou
Aoaoina 78

Faatupuina o se Atemosifia e Aoao Ai

- 20 Sauniaina o le Potua'oga 81
- 21 Aoaoina o Isi ina ia Faia ni o Latou Sao i se
Atemosifia e Aoao Ai 83
- 22 O le Auala e Mafai ai e Faiaoga Ona i ai
so Latou Sao i se Atemosifia e Aoao Ai. 85
- 23 Faaaloalo 89
- 24 Fesoasoani Ia i Latou o e Faasoesa 91

Faaoga Metotia Lelei

- 25 Aoao Atu i ni Metotia Eeseese 96
- 26 Filifilia o Metotia Talafeagai 98
- 27 Filifilia o Metotia Lelei 99
- 28 Amataina o le Lesona. 100
- 29 Faaiuina o le Lesona. 101

Saunia Mea Tatau Uma

- 30 Faaalu le Taimi e Sauniuni Ai. 104
- 31 Sauniaina o Lesona 105
- 32 Gaosia o Lesona mai Lauga o le Konafesi
ma Isi Risosi 107
- 33 Fetuunaiina o Lesona mo i Latou o loo
e Aoaoina. 109
- 34 Iloiloina o le Tuuina Atu o Lesona. 110
- 35 O Risosi a le Ekalesia mo le Aoaoina
Atu o le Talalelei. 112

Vaega I: Aoaoina o Vaitausaga Eeseese

- 1 Aoaoina o Tamaiti 114
- 2 Uiga o Tamaiti i o Latou Vaitausaga. 116
- 3 Aoaoina o Tamaiti o Vaitausaga e Fefiloi 124
- 4 Malamalama ma le Aoaoina o le Autalavou. . 125
- 5 Aoaoina o le Autalavou e ala i Gaoioiga
Faavaega. 128
- 6 Malamalama ma le Aoaoina o Tagata
Matutua 131

Vaega O: Aoao Atu i Totonu o le Aiga

Aoao Atu i Totonu o le Aiga

- 1 Tiutetauave Faafaiaoga o Matua 135
- 2 O Tama i le Avea ai ma Faiaoga 137
- 3 O Tina i le Avea ai ma Faiaoga 139
- 4 O Matua o se Paaga i le Aoao Atu 141
- 5 Aoauga e ala i Faatulagaga o le Ola ai i
le Talalelei 143
- 6 Tulaga Masani mo Aoauga i le Aiga 145
- 7 Taimi mo Aoauga i le Olaga Faaleaiga 148
- 8 O Aafiaga Faafaiaoga o Isi Tagata o le Aiga. . . 150

Aoauga i Aiga ma Asiasiga i Aiga

- 9 O le Vaega Faafaiaoga o Aoauga i Aiga. 153
- 10 O le Vaega Faafaiaoga o Asiasiga i Aiga 155

Vaega U: Aoauga i Tulaga Faaletaitai

- 1 O le Taitai, o le Aoao Atu lea 158
- 2 Aoao Atu i Fonotaga Faaleautaitai 160
- 3 Aoao Atu i Faatalanoaga. 161
- 4 Pe a Aoaoina e Taitai ia Faiaoga 163

Vaega F: Metotia Faafaiaoga

- Pepa o Gaoioiga 167
- Fuaiupu o Gaoioiga. 167
- Auala e Faaaogaina 167
- Gaoioiga e Faatosina Mai Ai (Faagauai Mai) 168
- Fesoasoani Vaaia (Kaseti vitio ma Lipine e
Faalogologo Ai). 168
- Manatu Palepalealuga 168
- Fetufaaiga Faavaega. 169
- Tulaga Faatusa e Aoao Ai. 170
- Laupapa 170
- Faitau Faatasi. 171
- Faatusatusaga ma Lesona Faatino 171
- Faatinoga 173
- Tala e Faatino i Nai Mea Faitino Laiti (Diodramas) 174
- Talanoaga 174
- Tala Faatino. 174
- Gaoioiga Tusiata 175
- Faaitaitaiga. 176
- Laupapa 'Ie Mamoe. 177
- Taaloga 177
- Failauga Faapitoa. 179
- Tautalaga. 179
- Faatatauga. 179
- Faafanua 180
- Taulotoina. 181
- Musika 181

Musika Faatasi ma Faamatalaga

- (Lagi-faaPese-se-Tala) 183
- Lesona Faatino 184
- Masini Malamalama 184
- Talanoaga Faavaega. 184
- Ata e Faatutu i Luga 185
- Ata 185
- Papeti 186
- Fesili 186
- Ata Faasolo e Faatino e le Aufaitau 186
- Faatauloto 187
- Vaega e Faatinoina 187
- Pusa e Faasolo ai Ata. 188
- Tusitusiga Paia, Makaina ma le Tusiaina o
Faamatalaga i Autafa 188
- Tusitusiga Paia, Taulotoina o. 188
- Tusitusiga Paia, Faitauina Leotele 188
- Tusitusiga Paia, Fesoasoaniga mo Suesuega. 189
- Tusitusiga Paia, Aoauga mai 189
- Lagi-faaPese-se-Tala 189
- Nofoaga e Aoao Ai 189
- Tala 189
- Fesoasoani Vaaia 191
- Laupapa Papa'e 192
- Pepa o Galuega 193

Vaega G: Tusi Lesona a le Faiaoga o le Vasega o le Aoaoina Atu o le Talalelei

- Fesoasoaniga mo le Faiaoga 196
- Suesueina o le Lesona e le Tagata Lava ia
ma le Aiga. 198
- Lesona 1: O le Taua o le Aoaoina Atu o le
Talalelei i le Fuafuaga a le Atua 199
- Lesona 2: Alofa ia i Latou e te Aoaoina 205
- Lesona 3: Aoao Atu i le Agaga 210
- Lesona 4: Aoao Atu le Mataupu 215
- Lesona 5: Valaaulia le A'oa'o ma le Maelega . . 220
- Lesona 6: Faatupuina se Atemosifia e Aoao Ai
(Vaega 1) 226
- Lesona 7: Faatupuina se Atemosifia e Aoao Ai
(Vaega 2) 233
- Lesona 8: Faaaogaina o Metotia Lelei
(Vaega 1) 236
- Lesona 9: Faaaogaina o Metotia Lelei
(Vaega 2) 241
- Lesona 10: Saunia Mea Tatau Uma 244
- Lesona 11: Faaleleia Atili o Au Taleni 249
- Lesona 12: O Atu Ia ma Aoao Atu. 253

- Faasino Upu 255

A

O LOU VALAUGA E AOA O ATU



O LE TAU O LE AOA OINA ATU O LE TALALELEI I LE FUAFUAGA A LE ATUA

I le avea ai ma faiaoga o loo outou tutu i le faatumutumuga o mea tau aoaoga, aua e leai se aoaoga faaletagata e mafai ona faatusalia lona 'anagata ma le taua, ma le o'oo'o o lona aafiaga i mea na feagai ma le tagata i le muai olaga, o le olaga faitino i le taimi nei, ma le faavavau i le lumanai. E le gata ina aafia ai le olaga nei ae faapea foi le ola faavavau.

Peresitene J. Reuben Clark Jr.

1

E LEAI SE ISI VALAAUGA E SILI AI



I sana saunoaga i le konafesi aoao, na faapea mai ai Elder Jeffrey R. Holland: “Matou te faafetai mo i latou uma o e faiaoga. Matou te alofofa ia te outou ma e matou te fiafia foi e taliaina outou, e sili atu nai lo upu e mafai ona matou ta’u atu ai. Matou te faatuatua tele outou”. Na faaaauu lana saunoaga: “Ina ia lelei le aoao atu ma maua le lagona o loo sologa manuia, o se galuega mamafa moni lava. Peitai e aoga. ‘E leai se isi valaauga maoae faapena e mafai ona tatou maua.’ . . . Mo i tatou taitoatasi o le ‘o mai ia Keriso,’ o le tausia o Ana poloaiga ma mulimuli i Lana faataitaiga e foi atu ai i le Tama, e moni o se faamoemoega aupito maua luga lea ma le paia ua ola ai le tagata. O le fesoasoani i isi ia faia foi lena mea—ia aoao, faatauana atu, ma taitai i latou ma le agaga tatalo ia savavali foi i lena ala o le togiola—atonu e moni o se tiute lona lua pito taua lena i o tatou olaga. Atonu o le pogai lena na saunoa mai ai Peresitene Tavita O. Makei, ‘E leai se isi tiute e tuuina atu i luga o soo se alii [po o se tamaitai], e sili atu nai lo le avefa ma faiaoga o fanau a le Atua’ ” (i le Conference Report, Ape. 1998, 30–31; po o le *Liahona*, Iulai 1998, 29).

O le Matafaioi o le Aoao Atu i le Fuafuaga a le Tama Faalelagi

Ina ia mafai ona faatinoina ma le atoatoa lo tatou saolotoga i le amiotonu, e tatau ona tatou aoao i le Faaola ma aoaoga faavae o Lana talalelei. Talu ai ona o lena mea, o le aoaoina atu o le talalelei e faatauaina pea i le fuafuaga a le Tama Faalelagi mo Lana fanau.

I le mua’i lalolagi o agaga, na tatou “maua ai a [tatou] uluai lesonea . . . ma sa

saunia ai ina ia o mai i le taimi o le Alii e galulue i lona tovine mo le faaolataga o agaga o le fanau a tagata” (MFF 138:56). Ina ua uma ona tuliese ia Atamu ma Eva mai le Faatoaga o Etena, ona auina atu lea e le Alii o agelu e aoaoina i la’ua i le fuafuaga o le togiola (tagai Alema 12:27–32). Ona ia poloaiina mulimuli ane ai lea o Atamu ma Eva ina ia “aoao atu nei mea” i a la’ua fanau (tagai Mose 6:57–59).

I tisipenisione uma lava o le talalelei, na faatonuina ai e le Alii le aoaoina atu o le ata o le togiola. Na ia auina mai agelu (tagai Mosaea 3:1–4; Moronae 7:29–32; Talafaasolopito o Iosefa Samita 2:30–47); valaauna perofeta (tagai Amosa 3:7); ua tuuina mai tusitusiga paia (tagai MFF 33:16); ma fesoasoani i tagata ia iloa le upu moni e ala i le mana o le Agaga Paia (tagai 1 Nifae 10:19; Moronae 10:5). Na ia poloaiina Ona soo ina ia aoao atu le talalelei i tagata o o latou aiga (tagai Teuteronome 6:5–7; Mosaea 4:14–15; MFF 68:25–28), i isi tagata o le Ekalesia (tagai MFF 88:77–78, 122), ma i latou o e latou te le’i mauaina le atoatoaga o le talalelei (tagai Mataio 28:19–20; MFF 88:81).

Ona o le taua tele o le aoaoina atu o le talalelei i totonu o le Ekalesia, o lea na saunoa ai faapea Elder Gordon B. Hinckley: “O le autu o le polokalama a le Ekalesia o le aoaoina atu lea o le talalelei i tagata o le Ekalesia. I le faataunuuina la o le matafaioi lea ua faataiatina i le Ekalesia i lona amataina, ua faavaeina ai i totonu o le Ekalesia se faatulagaga maoae o ni faalapotopotoga mo aoaoga—o korama a le perisitua, i le Mekisateko ma le Arona, o le lautele o aoga a le ekalesia, ma ausilali . . . , o nei faalapotopotoga uma e i ai so latou sao taua i le aoaoina o o tatou tagata” (i le Conference Report, Oke. 1962, 72–73).

O Faiaoga Tagata Taitoatasi o le Ekalesia

Ina ua aoaoina e le Faaola toetu ia Sa Nifae, na Ia fetalai atu: “O le mea lea ia outou sisii ai i luga lo outou malamalama ina ia pupula atu ai i le lalolagi. Faauta, o a’u o le malamalama tou te sisii i luga—o mea ua ou fai ua outou vaai i ai” (3 Nifae 18:24). I lena aoaoga e le’i faia ai e le Alii se faatusatusaga ia i latou o e na faalogo i



Lona siufofoga. Na poloaiina tagata uma ina ia aoao atu.

E faapea foi ona moni i aso nei. O le matafaioi o le aoaoina atu o le talalelei e le o faatapulaaina na o i latou o i ai ni valaauga taualoa e avea ai ma faiaoga. O le avea ai ma se tagata O le Ekalesia a Iesu Keriso o le Au Paia o Aso e Gata Ai, ua ia te oe le tiutetauave ina ia aoao atu le talalelei. I le avea ai ma se tamā po o se tina, atalii, afafine, tane, ava, uso, tuafafine, taitai o le Ekalesia, faiaoga i le potuaoga, faiaoga o aiga, faiaoga asiasi, paaga faigaluega, tuaoi, po o se uo, ua ia te outou ia avanoa e aoao atu ai. O nisi taimi e mafai ai ona e aoao atu faalauaitete ma tuusao e ala i mea e te tautala atu ai ma molimau atu ai. Ma e te aoao atu pea e ala i faataitaiga.

Na fetalai mai le Alii, “O la’u galuega ma lo’u mamalu lenei—ia faataunuaina le fao-fuina o le tagata i le tino ola pea ma le ola faavavau” (Mose 1:39). Afai e te mafaufau i le matafaioi o le aoaoina atu o le talalelei mo le faaolataga ma le faaeaina o fanau a le Atua, mata e mafai ona e manatu faale-mafaufau i se tiute e sili atu lona mamalu ma le pa’ia? E moomia ai au taumafaiga maelega ina ia faateleina ai lou mala-malama ma faaleleia ai ou tomai, i le iloaina lea o le a faalateleina e le Alii ou tomai e aoao atu ai i le ala ua la poloaiina. O se galuega o le alofa—o se avanoa e fesoa-soani ai i isi e faatino lo latou saolotoga amiotonu, ia o mai ia Keriso, ma mauaina faamanuiaga o le ola faavavau.

2

FAAFAILELEINA
O LE AGAGA

I matafaga o le Sami o Kalilaia, na fesili faatolu atu ai le Alii toetu ia Peteru, “e te alofa mai ea ia te au?” E tasi lava le tali a Peteru i taimi uma: “Ua e silafia ou te alofa ia te oe.” Na tali atu le Alii i le tautinoga a Peteru: “Fafaga i a’u tamai mamoe. . . . Fafaga i a’u mamoe. . . . Fafaga i a’u mamoe” (Ioane 21: 15–17).

O le faatonuga a le Alii ia Peteru, e faatatau foi ia i latou uma lava ua valaauina i Lana galuega. Na tusia e Peresitene Gordon B. Hinckley: “O loo i ai le fia tau-mamafa i le nuu, ma se galala moni—o se fia taumamafa i le afioga a le Alii ma se galala lē faamalieleina mo mea i la le Agaga. . . . O loo fia taumamafa le lalolagi i taumafa faaleagaga. O la tatou matafaioi ma ua ia i tatou le avanoa e faafaileleina ai ma fafaga le tagata” (“Fafaga le Agaga, Faafailele le Tagata,” *Liahona*, Oke. 1998, 2; tagai foi Amosa 8:11–12).

O le Talalelei a Iesu Keriso: O Taumafa e Umi lona Aoga mo le Agaga

E pei lava ona tatou manaomia meaai ina ia ola ai faaletino, tatou te manaomia foi le talalelei a Iesu Keriso ina ia ola ai faaleagaga. O o tatou agaga e tausia i soo se mea lava e fetalai i ai Keriso ma taitaiina atu ai i tatou ia te Ia, e tusa pe o tusia i tusitusiga paia, pe fofogaina mai e perofeta o aso e gata ai, pe aoaoina mai foi e auauna lotomauualalo a le Atua. O le Faaola lava Ia na fetalai, “O a’u nei le areto o le ola: o le sau ia te au e le laina lava ia; o le faatuatua foi ia te au e le toe fia inu lava ia” (Ioane 6:35).

O aoaoga e fafagaina ai le agaga e siiti-aina ai isi, faatupuina ai lo latou faatuatua, ma maua ai e i latou le to’a e faafetaiaia ai

luitau o le olaga. E faagauaiina ai i latou ina ia lafoai le agasala ma ia o mai ia Keriso, valaau atu i lona suafa, usiusitai i Ana poloaiga, ma tumau i Lona alofa (tagai MFF 93:1; Ioane 15:10).

O Nisi Aoaoga e le Fafagaina ai le Agaga

E tele autu e mananaia, e taua, ma e faatatau foi i le olaga ae peitai e le o fafagaina ai le agaga. E le o sa tatou aia lea le aoao atu o na ituaiga autu. Ae ao ona tatou fefaamalamalamaa’i ma aoaoina i latou i mataupu faavae lea e faatatau i le malo o le Atua ma le faaolataga o le tagata.

O aoaoga e faatupuina ai le atamai e aunoa ma le tautala atu i le agaga e le mafai ona faafaileleina pe fafagaina ai. E le mafai foi e ni mea e tupu ai ni masalosaloga i le moni o le talalelei toefuataiina po o le tulaga manaomia tatou te naunau atu ai ma o tatou loto, manatu, mafaufau, ma le malosi atoa.

Na fautua mai Elder Bruce R. McConkie: “Aoa atu aoaoga faavae o le faaolataga; ia tuuina atu meaai faaleagaga; ia tuuina atu le molimau e uiga i le tulaga paia o le Alo, o lo tatou Alii—soo se mea e le aoaoina atu ai se tasi o na mea, ua le agavaa o ia e ave ma se auauna moni o le ua valaauina e ala i faaaliga. Se’i vagana ua fafagaina le Ekalesia i le areto o le ola ona faatoa mafai lea ona faatumauiina ona tagata i ala o le amiotonu” (*Doctrinal New Testament Commentary*, 3 vols [1966–73], 2:178).

O le Lu’itau o le Faafaileleina ia Isi

O nisi tagata e foliga mai e le fiafia e faalogo i mataupu faavae o le talalelei. E tatau ona e saili ma le agaga tatalo mo se auala e aoao atu ai pea ia te i latou, ia mataupu faavae o le talalelei. E tatau ona e manatuaina pea le sini ina ia fesoasoani i isi ina ia “tausia i le afioga lelei a le Atua” (Moronaē 6:4).

O i latou e te aoaoina e mafai ona pei o le fafine Samaria o le na feiloai ma Iesu i le Vaieli o Iakopo. Ina ua faatoa fetalai atu Iesu ia te ia, sa leiloa e lenei fafine po o ai o Ia. Ae peitai, sa Ia silafiaina lelei le fafine. Sa malamalama o Ia i faanaunauga o le fafine, o ona tiutetauave, o ona popolega, ma atugaluga. Na Ia silafiaina lona manao mo le

Na faamatala mai e Peresitene Spencer W. Kimball:

“I nai tausaga ua mavae, sa ou asiasi atu ai i se atunuu sa aoaoina ai ni talitonuga ese ma o aoaoga matautia sa faalauiloaina i aso uma i aoga faapea nusipepa e pulea e le malo. O aso uma lava e faalogologo ai tamaiti i aoaoga, talitonuga, ma manatu e faamatalaina atu e o latou faiaoga.

“Sa faapea mai se tasi ‘o le sinasina pea [o matāua o le vai] o le a nuti ai le mea sili ona malo.’ O le mea lenei na ou iloa, o lea na ou fesili atu ai e uiga i tamaiti: “Pe latou te taofimau ea i lo latou faatuatuga? Pe le o lofituina ea i latou e uunaiga faifaiepa a o latou faiaoga? E mafai faapefa ona e mautinoaina o le a latou lē o ese mai le faatuatua faatauvaa i le Atua?”

“O le tali na tulai mai e faapea ‘Tatou te fonofonoina le faatanoa ua ta’e i po taitasi. Tatou te aoao atu i a tatou fanau le amiotonu ina ia le sao atu i ai ia talitonuga sese. O loo tutupu a’e a tatou fanau i le faatuatua ma amiotonu e ui lava ina toeitiiti a lofituina i uunaiiga mai fafo atu.’

“E oo lava i faatanoa vai e mafai ona fonofono ma faasaoina, ma e mafai e taga oneone ona taofia le tafe atu o le vai. Ma o le ta’uta’u atu pea o le upumoni, tatalo faafouina, aoaoga o le talalelei, faailoga o le alofa, ma le naunautai faamatua e mafai ona faasaoina ai le tamaitiiti ma faatumauina o ia i le ala sa’o” (Faith Precedes the Miracle [1972], 113–14).

“vai ola” lea e na o Ia e mafai ona maua mai ai. Na amata i Lona talosaga atu i le fafine mo sina vai se’i inu ai. Ona Ia ta’uina atu lea i le fafine, “O le inu i lenei vai e toe fia inu ia: A o se inu i le vai ou te avatu ia te ia, e le toe fia inu ia e faavavau; a o le vai ou te avatu ia te ia, e avea i totonu ia te ia o le vaipuna, e puna i luga i le ola e faavavau.” Sa televave lona naunau. Sa ia gauai atu ma le faamaoni i le mea o le a aoaoina atu ia te ia. Ina ua Ia molimau atu o Ia o le Mesia, sa talitonu le fafine ia te Ia ma ua alu atu ma molimau atu i tagata e uiga ia te Ia. (Tagai Ioane 4:1–30.)

O Sister Susan L. Warner, o le sa avea ma fesoasoani lua i le au peresitene aoao o le Peraimeri, na faamatalaina mai le mea lenei: “I totonu o lo matou aiga sa matou taumafai ai e faia a matou suesuega o tusitusiga paia i taeao po . Ae sa masani ona matou lē fiafia i le faitio mai o se tasi o atalii, ma e tautososese mai le moega. A alu ese mai o ia, e masani ona punou lona ulu i luga o le laulau. I tausaga mulimuli ane, ao auauna atu faamisiona, sa ia tusi mai ai se tusi i le aiga: ‘Faafetai mo le aoaoina mai ia te au o tusitusiga paia. Ou te manao ina ia outou iloa, o na taimi uma sa ou faafofoga ai sa ou moe, sa ou matuai faalogologo lelei ai ae o loo moeiini o’u mata.’ ”

Sa faaaau le tala a Sister Warner: “Matua ma faiaoga, o a tatou taumafaiga ina ia fesoasoani i a tatou fanau e faavaeina se tofi o manatunatuga faaleagaga tamaoiga, e le o ma’imauina. O nisi taimi o fatu tatou te totoina, atonu e le mafai ona fua mai i ni tausaga, ae e mafai ona tatou maua le mafanafana ma le faamoe-moe o le a i ai se aso o le a manatua ai e tamaiti na tatou aoaoina le auala na latou maua ma faalogo ai i mea a le Agaga. O le a latou manatuaina mea na latou iloa ma mea na latou lagonaina. O le a latou manatuaina lo latou tulaga o ni fanau a le Tama Faalelagi, o lē na auina mai i latou iinei ma se faamoemoega paia” (i le Conference Report, Ape. 1996, 109; po o le *Liahona*, Iulai 1996, 79).

Afai e te aoaoina le autalavou, atonu e i ai nisi taimi e te manatu ai latou te le mananao e talanoa e uiga i aoaoga ma mataupu faavae o le talalelei. Atonu e faasoosoina oe ina ia tau lava o le faauo atu ia i latou, ia

faafiafiaina pea i latou ma talanoa ma i latou e uiga i a latou gaoioiga faafiafia ma mea e tutupu i le aoga. O se matuai mea sese lava lenei. Na saunoa mai Peresitene J. Reuben Clark Jr.:

“O loo fia taumamafa le autalavou a le Ekalesia i mea a le Agaga; o loo latou nau-nau e aoaoina le talalelei, ma latou te mananao e tuusa’o atu, ia lē lualuagia. . . .

“O nei tamaiti pe a latou oo mai ia te oe, o loo galulue faaleagaga e agai atu i se tulaga faatagata matutua lea o le a vave ona latou taunuu atu i ai pe a outou fafagaina i latou i mea taumafa sa’o. . . .

“. . . E te le tau tolotolo atu i o [latou] tua ma musumusu atu i ai mataupu faalelotu i o [latou] taliga; e mafai ona e tulai mai, faafesagai lelei, ma talanoa ma i [latou]. E le manaomia lou faapogisaina o upumoni faalelotu i se ufiufi o mea faalelalagi; e mafai ona e aumaia nei upumoni ia i [latou] i le malamalama, i o latou tulaga o loo i ai E le manaomia ona tau faanoioi, e pei o ni tala e faamatalaina pe a momoe, pe tau faapelepele foi ona fai, pe faatalasua” (*The Charted Course of the Church in Education*, rev. ed. [tamaitusi, 1994], 3, 6, 9).

O se tasi tagata o le Ekalesia na valaauina e aoaoina le vasega a le Aoga Sa mo le au ta’i 12 ma le 13 tausaga le matutua. Sa tusia mulimuli ane e lana tane faapea sa umi se taimi o talanoa atu ia te ia e uiga i le “meaai sa’o” mo i latou o le a ia aoaoina, e tusa lava pe “latou te matuai mananao ina ia aoaoina atu le talalelei i se auala e faafiafia ai.” Na ia tusia le mea na oo i ai lana ava ao ia faafileleina ia agaga o le autalavou i lana vasega:

“Na ia aoaoina atu ia i latou le meaai o le tausiga ma le alualu i luma, ma uunaiina i latou ina ia aumai a latou tusitusiga paia ma ia mafaufau i aoaoga faavae sili o le malo.

“O se fesuaiga e alu se taimi o faatino, ae o le mea sili ona taua, sa aofia ai le faatu-atuaina lea na matuai moomia lava e tamaiti ma mananao ai i le tausiga a le talalelei ma o le faailoaina atu o le meaai e ala i tusitusiga paia ma le Agaga, o le mea tonu lava lea o le a lagolagoina ai i latou. I nai masina na lumanai ai sa amatamata malie lava ona i ai se suiga lea na amata ai ona



aumai e tamaiti a latou tusitusiga paia i taimi uma, ua amata ona saoloto le talanoaina o le talalelei ma le nau-nautai, ma amata ona i ai le lagona o le maofa i le savali.

“Na amata ona tuufesili matua ia te [ia] po o le a le mea ua tupu i le vasega, pe aisea ua tauanau atu ai pea a latou fanau ina ia ave a latou tusitusiga paia i le lotu, ma ua latou tali atu foi i fesili e tuuina atu e a latou fanau i luga o le laulau ‘ai i le Aso Sa e faatatau i aooga faavae ma mataupu faavae o le talalelei sa latou aoaina i lena aso i totonu o le vasega. Sa naunau tamaiti i le talalelei, aua sa i ai so latou faiaoga o le . . . na malamalama . . . i meaai lelei mo le tausiga ma le auala e tatau ona tuuina atu ai” (Jerry A. Wilson, *Teaching with Spiritual Power* [1996], 26–27).

Afai e te aoaina le fanau laiti, ua e iloa o lena mea e mafai ona ave ma lu’itau ina ia aoao atu ia i latou le talalelei. Ae e mananao ma fia faalogo le fanau laiti i upumoni o le talalelei. O le a latou tali atu i au taumafaiga ina ia tuuina atu ia lesone mafana, fesuisui, ma faagaetia o le talalelei. Na faamatala mai e se faiaoga Peraimeri le tulaga lenē na oo i ai:

“Ou te tautino atu, o le mea na tupu, e lē o se mea e masani ai. Ae ua faaalua ai le mea moni lava sa faatauaina i

le au ta’i iva tausaga sa ou aoaina. E aunoa ma le iloaina o le mea sa latou faia, sa faia lava e i latou le talanoaga. Sa amata ia Kate. Sa ia tali mai i se fesili o loo i totonu o le tusi lesone e uiga i le ata o le faaolataga. Ona toe tulitatao mai lea e ia lava o lana fesili. Sa ofo mai e se isi tagata o le vasega se tali na fesoasoani e faamanino ai le malamalama o Kate. Ona fesiligia lea e Ioane le mataupu lava lea e tasi lea na foliga mai ua loloto atu nai lo le tuuina mai e Kate. Na tuuina mai se tali, ona toe tulitatao mai lea e Kate i se fesili. Mo le taimi atoa o le vasega na totoe ai, sa tuufesili mai ai pea tamaiti ma latou taliina, faatasi ai ma se nau-nautaiga ma manatunatuga e sili mamao atu nai o latou tausaga. Sa leai ni faasalavei po o ni oso faalava. O o latou manatu faamaoni ma tuusa’o, sa ou lagolago atu lava i ai, na aafia uma ai lava mea na aofia i le lesone. Sa latou nau-nau; sa latou mananao i ni tali; sa latou fiafia moni lava; o mea na latou ta’ua sa manaomia ai le manatunatu ma le malamalama. Na ou iloaina ai o nei fanau a lo tatou Tama Faalelagi, ua saunia ma naunau e aoaina upumoni o le talalelei ua tuuina atu.”

O LE TOFIGA PAIA O LE FAIAOGA



“Ta outou aoao atu ma le filifiliga ma o lo’u alofa tunoa o le a mafuta ma outou ina ia aoaoina atoatoa lelei outou i teori, mataupu autu, mataupu faavae, i le tulafono o le talalelei, ma mea uma lava tau le malo o le Atua, e tatau mo outou ona malamalama ai” (MFF 88:78).

O le vaega leni o se upusii mai se lauga na tuuina atu e Elder Bruce R. McConkie i le Matagaluega o le Aoga Sa a le Ekalesia i le 1977. O le faamatalaga atoa o se saunoaga na tuusa’o mai.

I aoaga uma tatou te tuuina atu, o loo avea ai i tatou ma sui o le Alii ma ua tofiaina e aoao atu Lana talalelei. O i tatou o sui faamaonia o le Alii, ma o lea ua tatau ai ona tatou ta’uina atu na o mea ua la finagalo e ta’u atu.

O i latou ua avea ma sui, latou te suitulaga i lo latou taitai. E leai so latou lava mana. Latou te galulue i le igoa o le isi tagata. Latou te faia mea ua poloaiina ai i latou e fai. Latou te tautatala atu i mea ua faatagaina ai i latou e tautatala ai—e leai se mea e faaopopo, pe toese ai.

O i tatou o sui o le Alii. O loo fai i tatou ma Ona sui. “Ona o oulua o sui,” na Ia fetalai atu ai, “ua oulua i ai i le feau a le Alii; ma soo se mea lua te fai e tusa ma le loto o le Alii o le galuega lava lea a le Alii” (MFF 64:29).

O la tatou galuega i le avea ai ma faiaoga o le aoao atu lea o Lana mataupu ae le o se isi lava mea. E leai se isi auala e mafai ona tatou mulimuli ai pe afai o loo tatou laveaina ia agaga. E leai se mana faaola o ia i tatou lava ia. E le mafai ona tatou faatuina se tulafono po o se mataupu e togiola pe toetutu pe laveai ai se isi tagata. E na o le Alii e mafai ona faia nei mea, ma ua tofiaina i tatou e aoao atu mea ua la faaali mai i nei mea faapea ma aoaga faavae uma.

O le a la lea mea ua faatagaina i tatou e faia i le aoaoina atu o le talalelei? O le a lo tatou tofiga paia? O le tofiga paia o le faiaoga o loo aotele atu i lalo i ulutala e lima:

1. *Ua poloaiina i tatou—o se mea e leai ai sa tatou filifiliga e faia i ai; e leai ni aoaoga ese ua faaavanoaina mo i tatou—ua poloaiina i tatou ina ia aoao atu ia mataupu faavae o le talalelei.*

I le faaaliga ua lauiloa o le “tulafono a le Ekalesia,” na fetalai mai ai le Alii, “O toeaina, ositaulaga ma aoao o leni ekalesia o le a aoao atu mataupu faavae o la’u talalelei” (MFF 42:12). E anoanoa’i ia faaaliga o loo faapea mai: Talai atu la’u talalelei ma la’u upu, “a ia aua ne’i fai atu nisi mea tau lava o mea ua tusia e perofeta ma apose-tolo, ma mea e aoaoina ai i latou e le Fesoasoani i le tatalo faatuatua” (MFF 52:9).

O le mea e tulaga ese ai ona e le mafai ona tatou aoaoina atu ia ni mea tatou te lē iloaina. O se mea e moomia muamua ina ia aoaoina atu ai le talalelei o le suesue lea i le talalelei. O lea, o ni poloaiga mai le lagi e pei o le:

“Suesue i tusitusiga paia” (Ioane 5:39).

“Saili i nei poloaiga” (MFF 1:37).

“[Ia faatauaina] la’u upu” (Iosefa Samita—Mataiao 1:37).

“Aoa o la’u upu” (MFF 11:22).

“Saili i le au perofeta” (3 Nifae 23:5).

“E tatau ona outou sailiili i nei mea. Ioe, ou te tuuina atu le poloaiga ia te outou, ia outou sailiili ma le filiga i nei mea, aua ua matua sili upu a Isaia” (3 Nifae 23:1).

“Aua le saili e talai atu la’u upu, ae mua’i saili ia maua la’u upu, ona matala ai lea o lou laulaufaiva; o lea, afai e te mana’o ai, o le a e maua lo’u Agaga ma la’u upu, ioe, o le mana lea o le Atua i le faatalitoniua o tagata” (MFF 11:21).

E mafai ona tatou faitau i tusitusiga faavae o le Ekalesia i le tausaga e tasi pe afai tatou te faitauina le ta’i ono itulau i le aso. O le faia o le sailiiliga faamaoni ma le mafaufau loloto i ai, o le a tele se taimi e faaaluina ai.

E i ai le malamalama ma le atamai faaleagaga e ao ona mauaina mai le faitau, mafaufau loloto, ma le tatalo e uiga i tusitusiga paia lea e le mafai ona maua i se isi auala. E tusa lava po o le a le gauai ma le toaaga o tagata o le Ekalesia i mataupu faalepulega, o le a latou le mauaina lava ia faamanuiaga silisili lea e maua mai le suesueina o tusitusiga paia sei vagana ua latou

faia lenei taumafaiga o le suesue ma avea ia afioga tusitusia ma se vaega o o latou olaga.

2. *E ao ona tatou aoaoina atu ia mataupu faavae o le talalelei e pei ona i ai i tusitusiga faavae o le Ekalesia.*

I le tulafono a le Ekalesia o loo fetalai mai ai le Alii: “O toeaina, ositaulaga ma aoao o lenei ekalesia o le a aoao atu mataupu faavae o la’u talalelei, o i ai i le Tusi Paia ma le Tusi a Mamona, e i ai le atoatoa o le talalelei” (MFF 42:12).

Ona fetalai lea o le Alii i le tatau ona taitaiina e le Agaga, ae e toe foi mai lava i le punavai o tusitusiga paia o loo i ai nei upu moni o le talalelei: “Ia outou usiusitai foi i le faia o nei mea uma e pei ona ou poloai atu e uiga i la outou aoao atu, seia oo ina tuuina atu le atoatoa o a’u tusitusiga paia” (MFF 42:15).

Ina ua tuuina mai lenei faaaliga, sa na o le Tusi Paia ma le Tusi a Mamona ia tusitusiga paia sa mauaina e le Au Paia o Aso e Gata Ai. O lea ua tatou mauaina nei le Mataupu Faavae ma Feagaiga ma le Penina Tau Tele, ma o loo i ai foi, isi faaaliga lea o le a tuuina mai pea.

3. *E ao ona tatou aoao atu e ala i le mana o le Agaga Paia.*

I le poloaiina o faiaoga uma ina ia aoao atu ia mataupu faavae o le talalelei e pei ona i ai i tusitusiga faavae, na fetalai mai ai le Alii: “Ma o mea nei o le a latou aoao atu, e tusa ma le taitaiga a le Agaga ia i latou.”

Ona ia tuuina mai ai lea o le faasinomaga silisili: “O le a tuuina atu foi le Agaga . . . i le tatalo ma le faatuatua; ae afai tou te le maua le Agaga, ‘aia tou te aoao atu.”

Faatasi ai ma nei aoaoga, na la tuuina mai ai lenei folafolaga: “Pe a outou siitia outou leo ona o le Fesoasoani, o le a outou tautala ma vavalo atu e pei ona ou loto i ai; Aua, faauta, e iloa e le Fesoasoani mea uma, ma o molimau atu e uiga i le Tama atoa ma le Atalii” (MFF 42:13–14, 16–17).

Soo se faiaoga lava i soo se tulaga faafaiaoga atonu o le a fiafia i le vaega lenei:

Afai e i ai iinei le Alii o Iesu, o sana fetalaiga i lenei tulaga, o le a atoatoa.

Ae e le o iinei o Ia. Ae ua Ia auina mai a’u e fai ma Ona sui.

E tatau ona ou ta’u atu mea e fetalai atu ai o Ia pe ana fai o lea e iinei; e tatau ona ou ta’uina atu mea e finagalo o Ia ou te ta’uina atu.

E na o le pau le auala e mafai ai ona ou faia lenei mea o le tuu atu lea ia te Ia e ta’u mai mea e ao ona ou ta’uina atu.

E na o le mana o Lona Agaga e mafai ona oo mai ai ia te au lenei taitaiga musuia.

O lea e tatau ai ona taitaiina a’u e le Agaga pe afai ou te aoao atu i lo’u malosia atoa a’o avea ai ma sui o le Alii.

O nei mataupu faavae o le aoaoina atu o upumoni o le talalelei e ala i le mana o le Agaga o loo faamatalaina auiliili atu i le isi faaaliga lea e auala mai i fesili ma tali musuia i le auala lenei:

Fesili: “O a’u o le Alii ou te fesili atu ia te outou lenei fesili—pe na faauuina ea outou i se a? (MFF 50:13).

O lona uiga: “O le a lou tofiga? O le a le mea ua Ou faatagaina oe e fai? O le a le pule ua e mauaina mai ia te a’u?”

Tali: “Ina ia talai atu la’u talalelei i le Agaga, o le Fesoasoani lava lea, na auina atu e aoao atu le upumoni” (MFF 50:14).

O lea la: “O lou tofiga, o lou faatagana, o le mea ua faauuina oe e fai o le aoao atu lea o la’u talalelei, e le o soo se manatu o le tagata lava ia, e le o mafaufauga o le lalolagi, ae o la’u talalelei e faavavau, ma ia faia i le mana o lo’u Agaga, ia ogatasi ma le poloaiga ua ou tuuina atu: “Ae afai tou te le maua le Agaga, ‘aia tou te aoao atu.’ ”

Fesili: “O le ua faauuina ia te a’u ma ‘auina atu e talai atu le upumoni i le Fesoasoani, i le Agaga o le upumoni, pe na te talai atu ea i le Agaga o le upumoni po o se isi ala?” (MFF 50:17).

Ao le’i faalogoina le tali musuia, ia tatou maitauina o loo fetalai le Alii e uiga i le aoaoina atu o le talalelei, le upumoni, o mataupu faavae o le faaolataga. E le o talanoa e uiga i aoaoga faavae a le lalolagi ma poloaiga a tagata, ma o le mulimuli atu i ai e maimau ai le taimi ma e le tau atu ai i le faaolataga.

O le fesili, afai tatou te talaiina atu le talalelei, pe a tatou aoaoina atu le upumoni, pe a tatou aoaoina atu ia aoaoga faavae o le faaolataga, pe tatou te faia ea i le mana o le Agaga Paia pe o se isi auala? O le mea e iloga ai o le “isi auala” e aoao atu ai le upumoni e ala mai lea i le mana o le mafaufau.

O le tali musuia la lenei: “Afai foi ua faia i se isi ala e le mai le Atua ia” (MFF 50:18).

Se’i o tatou faamaninoina lava le vaega lenei. E tusa lava po o le a le moni o le mea o loo tatou aoaoina atu, e le mai le Atua ia sei vagana ua aoaoina atu e ala i le mana o le Agaga. E leai se liuaina, e leai se tulaga faaleagaga, se’i vagana ua aafia ai le Agaga o le Alii.

Fesili: “O lenei foi, o le talia le upu i le upumoni, pe talia ‘ea e ia i le Agaga moni o le upumoni po o se isi ala?” (MFF 50:19).

Tali: “Afai ua faia i se isi ala e le mai le Atua ia” (MFF 50:20).

O le mafuaaga lenei na ou fai atu ai i le amataga e faapea afai o lenei sauniuniga e i ai se mana e faaliliuina ai, e tatau ona ou tuuina atu e ala i le mana o le Agaga ma e tatau ona faalogoina ma taliaina i lea lava mana e tasi. Ona faatoa mafai ai lea “e le tala’i atu ma le talia mai, e malamalama le tasi i le tasi,” ina ia “faamanuiaina ma olioli faatasi i la’ua uma” (MFF 50:22).

4. *E ao ona tatou faatatauina ia mataupu faavae o le talalelei tatou te aoaoina atu i manaoga ma tulaga o i latou e faalogologo i ai.*

O mataupu faavae o le talalelei e le suia lava. E tutusa

uma lava i augatupulaga uma. Ma e tutusa foi mea e manaoia e tagata i le tulaga lautele i augatupulaga uma lava. E leai ni faafitauli ua faatoilaloina ai i tatou se'i vagana ai faafitauli na sese ai le toatele o tagata mai le amataga. Ma o lea e le faigata ai ona tauaveina ia mataupu faavae o le upu e faavavau ma faaaogaina i o tatou manaoga patino. Afai e mananao ina ia fua mai ni fua, pe faamanuiaina foi, e tatau ona olaola le upumoni i olaga o tagata.

Na ta'ua mai e Nifae tusi a Mose faapea tusitusiga a Isaia ma faapea mai, "Na ou faatatauina tusi paia uma ia te i matou, ina ia aoga e aoaoina ai i matou" (1 Nifae 19:23)—o lona uiga na ia faatatauina ia aoaoga a Mose ma Isaia i manaoga o tagata Sa Nifae.

5. E tatau ona tatou molimau atu e moni mea o loo tatou aoaoina atu.

O i tatou o ni tagata o loo tauaveina ni molimau, ma o le tulaga lea e tatau ona tatou i ai. O a tatou fonotaga ma sauniga e faatumulia i faamautinoaga faapea o le galuega o loo tatou i ai e moni. Tatou te faamaoniaina i le maelega ma le talitonuga o Iesu o le Alii, ma o Iosefa Samita o Lana perofeta, ma O le Ekalesia a Iesu Keriso o le Au Paia o Aso e Gata Ai e na "o le pau lea o le ekalesia ola e tasi ma le faamaoni i luga o le fogaeleele atoa" (MFF 1:30).

E lelei nei mea uma o loo tatou faia. Ae ao ona tatou faia nisi mea e sili atu. O le faiaoga musuia, o le na te aoao atu e ala i le mana o le Agaga, o loo faamoemoe e tuuina atu lana molimau e moni mea o loo ia aoaoina atu.

Na faia e Alema se faaitaiga mo i tatou i lenei tulaga. Na ia talaiina atu se lauga maoa'e i le toe fanaufouina. Ona ia faapea atu lea ua ia tautala atu ma le sa'o, ona ua tofiaina ai o ia, ua ia siitia maia mau, ma ua ia aoao atu le upumoni.

"E le gata foi i lea," na ia faaopoopo atu ai. "Tou te le manatu ea ua iloa nei mea e a'u lava? Faauta, ou te molimau atu ia te outou, ua ou iloa ua moni lava nei mea uma ua ou tautala atu ai" (Alema 5:45).

O le faatumutumuga ma le faamaoniga mulimuli lea o le aoaoina atu o le talalelei—le molimau patino a le faiaoga e moni mea na ia aoaoina atu!

O ai se na te mafai ona finau ma se molimau? Atonu e finau mai tagata e lē talitonu i la tatou aoaoga. E mafai ona latou faauigaeseina ia tusitusiga paia e tusa ai ma lo latou lē talitonu. E mafai ona latou faamatala seseina lenei aoaoga po o lona aoaoga mai se tulaga moni o loo i ai, ae le mafai ona latou faatoilaloina le mana o se molimau.

Afai ou te faapea atu o lenei valoaga po o lona valoaga a Isaia e faatatau i le Mesia na faataunuaina i lona taimi o le soifuaga o loo tatou Alii, e tele ni tagata o loo faatalitali mai e fefinauai i le mataupu ma faali mai faapea o tagata

popoto o le lalolagi e ese o latou manatu. Ae afai ou te faapea atu ua ou iloa ina e ala i faaaliga a le Agaga Paia i lo'u loto o valoaga faaMesia e faatatau ia Iesu le Nasareta, o le Alo o le Atua, o le a se mea o iai iina e ono finau ai? Ua ou tuuina atu se molimau patino e faatatau i le aoaoga faavae ua aoaoina atu, ma o soo se tagata lava e faalogo mai i ai o loo maua le Agaga na te iloa ina ai i lona loto o mea na ou ta'uina atu, e moni.

Ina ua uma ona tuuina atu e Alema le molimau e moni mea na ia aoaoina atu, ona ia fesili atu lea, "Pe ni a faoutou i le ala ua ou iloa ai ua moni nei mea?" O lana tali, lea ua maua ai se faatulagaga mo faiaoga uma, o le: "Faauta, ou te fai atu ia te outou, ua faalia mai ai ia te au e le Agaga Paia o le Atua. Faauta, na ou anapogi ma tatalo i aso e tele ina ia ou iloa nei mea mo au lava. O lenei foi, ua ou iloa mo au lava ua moni, aua ua faaalitinoia ia te au e le Alii le Atua i lona Agaga Paia, o le Agaga foi lea o le faaaliga o loo ua ia te au" (Alema 5:45–46).

Ma o lea ua i o tatou luma se faatinoga o loo tatou tulaga o le avefa ai ma sui o le Alii ma o le tofiga paia lea o le faiaoga.

Ua tofiaina i tatou:

1. Ina ia aoao atu mataupu faavae o le talalelei
2. Mai tusitusiga faavae
3. E ala i le mana o le Agaga Paia,
4. Ia faatatau pea ia aoaoga i o tatou manaoga, ma
5. Ia molimau atu e moni mea na tatou aoaoina atu.

Ma o lea ua totoe ai na o le mea lenei e tasi ou te fia ta'uina atu e uiga i nei mea, ma o le molimau atu lea e moni nei upu uma o loo tuuina atu, ma afai tatou te mulimuli i ai o le a tatou maua le mana e faaliliuina ai ma lavea'ia agaga o tagata.

Ua ou iloa:

Ua poloaiina i tatou e le Alii e aoao atu ia mataupu faavae o Lana talalelei e pei ona tuuina mai i totonu o Ana tusitusiga paia;

Afai tatou te le faia lenei mea e ala i le mana o Lona Agaga Paia, o la tatou aoaoga e le mai le Atua;

O loo Ia faamoemoeina i tatou ina ia tatou faaaogaina ia mataupu faavae o le upumoni faavavau i o tatou olaga;

Ma e tatau ona tatou tuuina atu le molimau ia i latou uma o le a faalogologo i ai faapea o a tatou aoaoga e mai ia te Ia o le e Faavavau ma o le a taitaia tagata i le filemu i lenei olaga ma le ola faavavau i le lalolagi a sau.

Ma o i tatou uma e faiaoga, ia tatou faia faapea e tusa ai ma lenei faatulagaga paia, ou te tatalo atu ai, i le suafa o le Alii o Iesu Keriso, amene.

IA E SAUNIA FAALEAGAGA

Ma o nei atalii o Mosaea . . . ua tutupu malolosi i latou i le malamalama o le upumoni; aua o i latou o tagata mafaufau lelei, ma ua latou suesueina tusi paia ma le filifiliga, ina ia latou iloa ai le afioga a le Atua.

Ae peitai ua le gata i lea; a ua latou tatalo faatauana ma ua anapogi, o le mea lea ua i ai ia te i latou le agaga o le perofetaga ma le agaga o faaaliga, ma ua latou aoao atu foi, ua aoao atu i le mana ma le pule mai le Atua.

Alema 17:2-3

SAILIA O LE MEAALOFA O LE ALOFA MAMA



I le taufaaiuiuga o le galuega i la le tino a Iesu, na Ia fetalai atu ai i Ona soo, “O le poloaiga fou ou te tuu atu ai ia te outou, ia outou fealofani; faapei ona ou alofa atu ia te outou, ia fealofani foi outou” (Ioane 13:34). O se apoapoaiga taua tele lenei mo faiaoga o le talalelei i lena taimi, ma e faapena foi mo faiaoga i le taimi nei.

Na faamamafa mai e le Aposetolo o Paulo le manaomia o le alofa, po o le alofa mama o Keriso: “Afai ou te tautala i gagana a tagata atoa ma agelu, ae leai so’u alofa, ua avea a’u ma apamemea taalili, po o se sumepalo tagitagi. Afai foi o ia te au ona perofeta ane, ma le iloa o mea lilo uma, ma le poto uma lava; afai foi o ia te au le faatuatua e aveese uma ai mauga, ae leai so’u alofa, ou te le aoga lava” (1 Korinito 13:1–3).

Afai e ia te oe le alofa faaKeriso, o le a e saunia lelei e aoaoina atu le talalelei. O le a musuia oe ina ia fesoasoani atu i isi ia iloa le Faaola ma mulimuli ia te Ia.

O le a se Mea e Mafai Ona e Fai ia Maua ai le Meaalofa o le Alofa

O le alofa o se meaalofa lea e te mauaina pe a e tatalo ina ia faatumuina oe i le alofa, pe a e tuuina atu le auanaga, ma a’o e vaavaai atu foi mo le lelei o isi.

Tatalo ina ia faatumulia i le alofa. Na apoapoi mai le perofeta o Mamona: “A o le alofa moni, o le alofa mama lea o Keriso,

e tumau ia e faavavau; o i latou uma foi ua maua ua i ai lea alofa i le aso gataaga, e lelei ia te i latou. O le mea lea, . . . ia outou tatalo atu ai i le Tama ma le malosi uma o le loto, ina ia faatumuina outou i lenei alofa” (Moronae 7:47–48). Atonu e te le lagonaina le alofa mama o Keriso i se taimi vave pe maua uma mai foi i le taimi e tasi i le tali o au tatalo. Ae, a’o e ola amiotonu ma faaauau pea ona e tatalo ma le faamaoni ma le lotomaulalo mo lenei faamanuiaga, o le a e mauaina lava.

Tuuina atu le auanaga. E faatupuina lo tatou alofa i tagata a’o tatou auanaga atu ia te i latou. Afai tatou te tuuese o tatou manaoga mo le lelei o isi i le faatulagaga na faia e le Faaola, o le a avea i tatou ma tagata sili ona gauai atu i le Agaga. A’o outou tatalo mo i latou na tou te aoaoina, ia mafau-fau loloto i o latou manaoga, ma saunia ia lesona, o le a faateleina lou alofa mo i latou. (Mo nisi auala e auanaga atu ai ia te i latou e te aoaoina, tagai i le “Aapa Atu i le Tasi,” itulau 37–38.)

Sailia le lelei o loo i totonu o isi. A’o e iloaina ia uiga lelei o loo i totonu o isi, o le a faatupulaia lou malamalama e uiga ia i latou o ni fanau a le Atua. O le a faamautu atu e le Agaga ia te oe le moni o mea na e iloaina e uiga ia te i latou, ma o le a e talisapaia ai i latou ma faateleina ai lou alofa ia i latou.

SAILIA O LE AGAGA



Na saunoa mai Elder Bruce R. McConkie, “E leai se tau e sili atu ona mauualuga, . . . e leai se tauviga e sili ona ogaoga, e leai se osigataulaga e sili atu, pe afai o na mea uma tatou te maua mai ai le meaalofa o le Agaga Paia ma olioli ai” (A New Witness for the Articles of Faith [1985], 253).

Ola i se Auala e Fesoasoani Tatou te Gauai atu ai i le Agaga

Ina ua uma ona tuuina mai ia i tatou le meaalofa o le Agaga Paia, o le a se mea e mafai ona tatou faia ina ia maua ai le mafutaga a le Agaga? Na saunoa mai Elder Dallin H. Oaks e faapea, “O le aoao atu e ala i le Agaga e moomia ai lo tatou tausia muamua o tulafono ma ia mama i luma o le Atua ina ia mafai ona oo mai lona Agaga i le malumalu o le tagata lava ia” (“Aoao Atu ma le Aoaoina e le Agaga,” *Liahona*, Me 1999, 17–18).

Ina ia “mama i luma o le Atua,” e mafai ona tatou manatuaina ai le Faaola i mea uma tatou te faia, ia galulue pea e pei o ni soo moni. E mafai ona tatou salamo mai a tatou agasala. E mafai ona tatou sailia mea mama, matagofie, logoleleia ma tauleleia” (Mataupu Faavae o le Faatuatua 1:13). E mafai ona tatou suesueina tusitusiga paia i aso taitasi ma le faamoemoega moni, o le saili lea ina ia “tausia ma le afioga lelei a le Atua” (Moronaē 6:4). E mafai ona tatou faitau i tusi lelei ma faalogo i musika e faagaetia ma faamalalama ai. E mafai ona tatou “tutu i nofoaga paia” (MFF 45:32) e ala lea i le auai i le lotu ma ‘ai i le faamanatuga ma le alu soo i le malumalu. E mafai ona tatou auauna atu i tagata o o tatou aiga ma tuaoi.

Na aoao mai Elder Boyd K. Packer e faapea “o le faaleagaga, a’o faaatoatoaina le malosi, e tali atu i soo se suiga ma’ale’ale i lona siosiomaga” (“I Say unto You, Be One,” *Brigham Young University 1990–91*

Devotional and Fireside Speeches [1991], 89).

E tatau ona tatou faato’ato’a lelei ona foiaina soo se mea lava e mafua ai ona le maua le mafutaga ma le Agaga. E aofia ai le taofia o talanoaga ma faafiafiaga e le talafeagai po o manatu e faamamasagia ai. O o tatou lavalava e le tatau lava ona faaletonu. E le tatau lava ona tatou faamanu’aina isi, e oo lava i a tatou tala faasamasamanoa. E le tatau ona tatou ta’u fua le suafa o le Alii pe faaaogaina soo se isi gagana mataga pe masoa. E le tatau ona tatou faatautee pe faitio i auauna filifilia a le Alii.

O Faamanuiaga o le Mauaina o le Mafutaga ma le Agaga

E le manaomia e le Tama Faalelagi i tatou ina ia tatou atoatoa i Ona luma ona faatoa tuu mai ai lea ia i tatou Lona Agaga. O le a Ia faamanuiaina i tatou mo o tatou faanaunaga amiotonu ma taumafaiga faamaoni ina ia tatou faia le mea sili tatou te mafaia. Na saunoa Peresitene Ezra Taft Benson i nisi o nei faamanuiaga:

“E faamatua’ia e le Agaga Paia o tatou lagona gaulofa. Tatou te atili alolofa ai ma agalelei le tasi i le tasi. E atili tofilemu ai o tatou va. E faateleina ai ona alofa le tasi i le tasi. E fia faalatalata mai ai tagata ia i tatou pe a tatou faasusulu atu i o tatou foliga ia aafiaga o le Agaga. O le a faateleina ai ona tatou amioatua. O le iuga la, o le a tatou iloa ma malamalama atili ai i musumusuga a le Agaga Paia, ma mafai ai ona tatou malamalama tele ai i mea faaleagaga” (Saili le Agaga o le Alii,” *Liahona*, Set. 1988, 5).

SAILI INA IA MAUA LE UPU



Ia Me o le 1829, ina ua faatoa maea lava le toefuataiina mai o le Perisitua Arona, na lagona ai e Ailama Samita, le uso o le Perofeta o Iosefa Samita, “se popolega tele po o le a lana galuega e fai.” Na fesiligia e Ailama ia Iosefa e tusa ai ma “lona lava tulaga i le galuega sili o le toefuataiga” (Pearson H. Corbett, *Hyrum Smith—Patriarch* [1963], 48). I le tali atu i lenei talosaga faamaulalo, na tuuina atu ai e le Alii ia Ailama se faaaliga e ala mai i le Perofeta. E faatatau foi se vaega o lenei faaaliga i a tatou sauniuniga e aoao atu le talalelei:

“Aua le saili e talai atu la’u upu, ae mua’i saili ia maua la’u upu, ona matala ai lea o lou laulaufaiva; o lea, afai e te manao ai, o le a e maua lo’u Agaga ma la’u upu, ioe, o le mana lea o le Atua i le faatalitoniina o tagata” (MFF 11:21).

Na saunoa mai Peresitene Ezra Taft Benson e faapea o lenei fautuaga ua tuuina mai ai ia i tatou le faatulagaga e ao ona mulimuli i ai ina ia maua ai le mana o le Atua i a [tatou] aoaoga. . . . Saili muamua ia maua le upu; ona oo mai ai lea o le malamalama ma le Agaga, ma le vaega mulimuli, o le mana e faatalitoni ai” (*The Gospel Teacher and His Message* (lauga na tuuina atu i faiaoga faalelotu, 17 Set. 1976), 5).

Aoao e “ala i le Suesue faapea foi ma le Faatuatua”

Ua ta’u mai e le Alii ia i tatou e ao ona tatou maua Lana upu: “Ia saili i le aoao, e faapea foi i le suesue ma le faatuatua” (MFF 88:118). Tatou te mulimuli i lenei poloaiga e ala lea i le suesueina o tusitusiga paia ma le filifiliga, faatasi ai ma se loto talitonu ma se tautinoga ina ia usiusitai i mataupu ua tatou aoaoina. Tatou te mulimuli foi i lenei

poloaiga pe a tatou suesueina ia tusitusiga paia faatasi ma le tatalo ma le anapogi.

Suesue ma le Filiga

Na fautua mai Elder Dallin H. Oaks:

“O le faitauina o tusitusiga paia e maua ai e i tatou le Agaga o le Alii. . . .

“Talu ai ona ua tatou talitonu o le faitauina o tusitusiga paia e mafai ona fe-soasoani ia i tatou e maua ai faaaliga, o lea ua unaiina ai i tatou ina ia faitau pea ma faitau pea ia tusitusiga paia. O le uiga o lea mea o le a tatou maua ai le avanoa e iloa ai mea o loo finagalo lo tatou Tama Faalelagi ia tatou iloa ma faia i o tatou lava olaga i aso nei. O le tasi lenei o mafuaaga e talitonu ai le Au Paia o Aso e Gata Ai i le suesueina o tusitusiga paia i *aso taitasi*” (“Scripture Reading and Revelation,” *Ensign*, Ian. 1995, 8).

Pe a tatou suesueina e le aunoa ma le maelega ia tusitusiga paia, ma saili ma le naunautai i le taitaiga mai le Agaga, o le a tatou nofouta foi i faamalamalama e uiga i le auala e saunia ai ia lesonea. O le a tatou saunia foi e mauaina ma mulimuli i musumusuga a le Agaga ao tatou aoao atu. A’o tatou “teu pea i o [tatou] mafaufau upu o le ola, . . . o le a tuuina mai ia i [tatou] i lea lava itula lena vaega e tatau ai mo tagata taitoatasi” (MFF 84:85).

Talitonuga

Na fautua mai Mamona faapea e tatau ia i tatou ona “aua nei masalosalo, a ia faatuatua” (Mamona 9:27). E tatau ona tatou suesueina ia tusitusiga paia ma lea uiga. Mo se faataitaiga, sa i ai le loto talitonu o Iosefa Samita ina ua ia faitauina le Iakopo 1:5, lea na tauina atu ai ia te ia ina ia ole atu i le Atua mo le pote. Sa ia faia lava e pei ona faatonuina ai e le mau, ia ole atu lea i le Alii po o le fea lotu e tatau ona auai atu i ai. Talu ai ona o lona uiga talitonu, na ia maua ai se tali i lana talosaga. (Tagai Talafaasolopito o Iosefa Samita 2:11–17).

Usiusitai

E tatau ona tatou tauivi ina ia ola e tusa ai ma mataupu tatou te suesueina, e tusa lava pe faatoa tatou malamalama atoatoa mulimuli ane i ai. A o tatou faatuatua i le mea ua fetalai mai ai le Alii, o le a faateleina



Io tatou malamalama i le talalelei. Na faailoa mai e le Alii, “Ai se tasi e fia fai le finagalo [o le Tama], e iloa ai e ia le mataupu” (Ioane 7:17).

Tatalo ma le Anapogi

O le suesueina o tusitusiga paia e ese mai le faitauina o se tala, nusipepa, po o se tusi a’oga. E tatau ona tatou tatalo muamua ae tatou te le’i suesueina ia tusitusiga paia i aso taitasi. E tatau ona tatou saili le Agaga e tuuina mai ia i tatou le malamalama ao tatou suesueina ia afioga a le Alii.

Ao tatou tatalo mo le malamalama, e tatau i nisi taimi ona tatou anapogi. O Alema o se faaitaiga lelei lea o se tasi na anapogi ma tatalo mo le aoaoina o upumoni o le talalelei. Ina ua maea ona molimau atu e uiga i le Togiola a Iesu Keriso ma le manaomia ona iloa se suiga tele o le loto, na ia faapea mai ai: “Tou te le manatu ea ua iloa nei mea e a’u lava? Faauta, ou te molimau atu ia te outou, ua ou iloa ua moni lava nei mea uma ua ou tautala atu ai. Pe ni a fa outou i le ala ua ou iloa ai ua moni nei mea? Faauta, ou te

fai atu ia te outou, ua faaalua mai ai ia te au e le Agaga Paia o le Atua. Faauta, na ou anapogi ma tatalo i aso e tele ina ia ou iloa nei mea mo a’u lava. O lenei foi, ua ou iloa mo a’u lava ua moni, aua ua faaalitoina ia te au e le Alii le Atua i lona Agaga Paia” (Alema 5:45–46). (Tagai foi i le “Saili le Agaga,” itulau “00” [13]).

Toe Faagau’iina o o Tatou Tagata i le Suesueina o Tusitusiga Paia

Na fautua mai Peresitene Benson: “Aua tatou te manatu mama i mea sili ua tatou maua mai le aao o le Alii! O lana afioga o se tasi lea o meaalofa pito sili ona aoga ua la tuuina mai ia i tatou. Ou te uunaiina outou ina ia outou toe gau’i atu outou lava, ia suesue i tusitusiga paia. Ia outou faatofu outou i ai i aso taitasi, ina ia outou maua le mana o le Agaga e faatasi ma outou i o outou valaauga. Ia outou faitau i ai i o outou aiga ma aoa atu i a outou fanau ia latou fiafia ma āuāu i ai” (O le Mana o le Afioga,” *Liahona*, Iulai, 1986, 71).

FAATULAGAINA O SE FUAFUAGA A LE TAGATA LAVA IA MO LE SUESUEINA O LE TALALELEI



Na saunoa mai Elder M. Russell Ballard e faapea: “Ma o le mea lea ua tatau ai ia i tatou taitoatasi ona faia mea uma e mafai ona tatou faia e faatele ai lo tatou poto ma le malamalama faaleagaga e ala i le suesue i tusitusiga paia ma upu a perofeta soifua. Pe a tatou faitau ma suesue i faaaliga, e mafai ona faamaonia e le Agaga i o tatou loto le moni o mea ua tatou aoaina; o le ala leni e fetalai mai ai le siufofoga o le Alii ia i tatou taitoatasi” i le Conference Report, Ape. 1998, 40–41; po o le *Liahona*, Iulai 1998, 37).

O fautuaga nei e mafai ona fesoasoani ia te oe ina ia faatulagaina se fuafuaga mo suesuega ina ia “faateleina ai [lou] atamai ma le malamalama faaleagaga,” e pei ona fautua mai ai Elder Ballard. O lau fuafuaga e le tatau ona matuai mamafa tele, ae e tatau ona fesoasoani ia te oe ina ia tumau pea lou suesueina o le talalelei. Atonu e te manao e tusia lau fuafuaga i totonu o se tusi o talaaga o le olaga po o se api ina ia lē galo ai ia te oe.

O Mea e Suesueina

Faaautu lau suesuega o le talalelei i tusitusiga paia. E mafai ona e filifili e suesue atoa se tusi o tusitusiga paia, pe e te taulai atu foi i se mataupu se tasi pe sili atu foi, ma faitau uma mea o ta’ua mai e tusitusiga faavae e faatatau i ai. E mafai ona e tuu-faatasia nei auala e lua, suesue se tusi o tusitusiga paia ma taulai i ulutala ma autu pe a e mauaina. E tatau foi ona e suesue i aoaoga a perofeta o aso e gata ai o loo i lauga o konafesi aoao ma le *Liahona*.

Afai e i ai sou valaauga o se faiaoga, o lau tusi lesona o se vaega taua lea o lau fuafuaga mo suesuega.

E tatau foi ona e mafaufauina ia mea nei i lau suesuega o le talalelei: (1) o mea mo

vasega a le Perisitua Mekisateko ma le Aualofa, (2) mau faatonuina mo le vasega o Aoaga o le Talalelei a le Aoga Sa, ma (3) tala o loo i le *Liahona*.

O le Taimi e Suesue Ai

Afai e mafai, ia faatulaga se taimi tumau e mafai ai ona e suesue e aunoa ma le faalavelaveina. Na fautua mai Elder Howard W. Hunter:


“E toatele ua latou iloaina faapea o le taimi sili e suesue ai o le taeao pe a mavae se malologa o le po lea e faamamaina ai le mafaufau mai le tele o gaogaosa faalavelave. O isi e sili ia i latou ia itula filemu pe a mae’a galuega, ma ua faataatia ese popolega ma galuega o le aso, ma faai’u ai le aso i le filemu ma le toafimalie lea e maua mai le fesootai ma tusitusiga paia.

“Ae o le mea e sili atu ona taua nai le lo le itula o le aso o se taimi tumau lea e tuueseina mo suesuega. E fetau lelei pe afai e mafai ona faaalu se itula o aso taitasi; ae afai e le mafaia lena, o se afa itula i aso uma o le a avea lena ma se taunuuga sili. O se kuata itula o se taimi laitiiti, ae e matuai maofa i le malamalama ma le atamai e mafai ona maua ai i se mataupu e matuai taua lava” (i le Conference Report, Oke. 1979, 91–92; po o le *Liahona*, Mati, 1980, 75).

E Faapefea ona Suesue

A’o le’i amata ona e suesue, ia tatalo mo le poto ma le malamalama. Mafaufau loloto i le mea na e faitauina, ma vaai ia auala e faaoga ai i lou olaga. Ia aoao ia iloa ma faalogo i musumusuga a le Agaga.

Mafaufau i le faaogaina o nai manatu po o manatu uma foi nei e faalatele ai lau suesuega:



- Faaaoga ia fesoasoaniga o loo tuuina atu i lomiga o tusitusiga paia a le Au Paia o Aso e Gata Ai, e pei o le “Ta’iala i Tusitusiga Paia, o upusii mai le Faaliliuga a Iosefa Samita o le Tusi Paia, faapea ma faafanua o loo i ai (tagai i Aoaoga mai Tusitusiga Paia,” tagai itulau 56–61), mo fautuaga).
- A’o e faitau, fesili ifo ia te oe lava, “O le a le mataupu faavae o le talalelei o loo aoaoina i lenei fuaitau? E mafai faapefea ona ou faaaogaina i lo’u olaga?”
- Ia i ai se tama’i api po o se tusi o talaaga o le olaga ina ia mafai ona e tusia ai ou mafauauga ma lagona. Ia e matua gaua’i atu i le tusitusia i lalo o mea na e aoaoina e te faaaogaina. Ia faamanatu soo mai lea taimi i lea taimi ia mafauauga na e tusia.
- A’o le’i faitauina se mataupu o tusitusiga paia, iloilo muamua le faaulutala o le mataupu. O lea faiga o le a e iloaina ai nisi o mea e te sailia i le mataupu.
- Faailoga ma tusi ni faamatalaga pupuu i luga o tusitusiga paia. I le tulimanu o le itulau, ia tusi ai ni mau e faamanino ai ia fuaiupu o loo e suesueina.
- Tauloto ia fuaiupu na e taua tele ia te oe.
- Tuu lou igoa i se fuaiupu o le mau ina ia faasino tonu ai ia te oe.
- A maea le suesuega, ona faia lea o se tatalo e faailoa atu ai le faafetai mo mea na e aoaoina.
- Ia fetufaaai atu mea na e aoaoina. A’o e faia lenei mea, o le a manino ou manatu ma o le a faateleina lou malosi e faatumau ai.

Fai le Mea e te Mafaia

Sa i ai se tasi tagata o le Ekalesia sa taumafai i le tele o taimi e mulimuli tonu i polokalama patino mo le suesueina o tusitusiga paia, ae sa faigata lava mo ia. Sa ia toe manatunatu mulimuli ane i ai:

“Na foliga mai o le taumafai e tausia se aiga ma faataunuuna o’u tiute o le Ekalesia, sa le atoatoa ai lava ona ou ausia le sini. Ou te atofaina se taimi ma se nofoaga patino e suesue ai i aso taitasi, ae faalavelave mai foi i la’u fuafuaga ia manaoga o le fanau pe a mama’i, po o nisi foi faafitauli ua masani ai i aiga faatoa tau amata. I lena taimi o lo’u olaga, ou te le’i mafaufau ai lava faapea o a’u o se tagata e lelei i le suesueina o tusitusiga paia.

“Ona oo lea i le tasi aso na alu atu ai lo’u tina i lo’u fale. Sa tilotilo o ia i luga o se laulau tele o loo faatumulia i tusi a le Ekalesia—sa i ai faatasi ma a’u tusitusiga paia—ma faapea mai, ‘Ou te fiafia tele i le auala o loo e faitauina ai au tusitusiga paia. E foliga mai a lē o susu’eina i le tasi laulau, o le isi.’

“E le’i pine ae ou iloaina loa se vaaiga fou mo lo’u lava tagata. E sa’o lelei o ia. Sa ou faitau pea ma suesue i a’u tusitusiga paia, e ui lava e le o polokalama faatulagaina lelei. Ou te fiafia i tusitusiga paia. E i ai ni fuaiupu mai tusitusiga paia o loo faapipii i le puipui o lo’u umukuka ou te vaavaai i ai pe a ou galue, o mau ou te fesoasoani i la’u fanau e tauloto mo ni a latou tautalaga po o ni lauga. Ou te ola i se lalolagi o le faitauina o tusitusiga paia, ma ua ou iloaina o loo matuai fafagaina ai lava a’u.”

IA OLA AI I MEA O LOO E AOA ATU



I sana saunoaga i se vaega o faiaoga o le talalelei, na apoapoi atu ai Peresitene Spencer W. Kimball e faapea, “O le a outou faia mea uma tou te aoaoina atu i a outou vasega ina ia faia: ia anapogi, ia molimau atu, ia totogi sefuluai, ia auai i fonotaga uma e tatau ai, ia auai i sauniga o le malumalu i taimi e tatau ai, ia tausia le Sapati ia faapaiaina, ia tuuina atu le auauuniga i le Ekalesia e auua ma le tomumu, ia faia afiafi faaleaiga ma tatalo faaleaiga, ia ta’umamaina pea, ma ia faamaoni ma ia tumu i le ta’uamiotonuina” (Men of Example, [address to religious educators, 12 Set. 1975], 7).

O faaitaiga a le tagata lava ia o se tasi lea o meafaigaluega faafiaoga e sili ona malosi o loo ia i tatou. Pe afai e liua moni i tatou, o o tatou manatu ma lagona uma e taitaiina lea e mataupu o le talalelei. Tatou te molimau atu i le upumoni e ala i mea uma tatou te faia.

Na aoao mai Elder Bruce R. McConkie e faapea, o le molimau e aofia ai uiga amiotonu:

“Ina ia lototoa i le molimau ia Iesu o le talitonu lea ia Keriso ma lana talalelei faatasi ai ma se talitonuga e le faamaluelueina. O le iloaia lea o le moni a’i-a’i ma le taua o le galuega a le Alii i le lalolagi.

“Ae le na o le pau ai lea. E sili atu nai lo le na o le talitonu ma iloa. E tatau ona avea i tatou ma tagata e anaana i le upu ae le na ona faalogo i ai. E sili atu nai lo le na o le tautala i ai; e le na o le ta’uta’u atu i le gutu o le paia o le tulaga o le Alo i le avea ai ma Faaola. Ae o le usiusitai ma le gau’i ma le amiotonu o le tagata lava ia” (i le Conference Report, Oke. 1974, 45–46; po o le *Liahona*, Ape. 1974, 38).

O Faatosinaga o Faaitaiga

O a tatou amioga e mafai ona tosina mai ai uiga o isi o i latou o loo tatou aoaoina. Na fetufaai mai e Peresitene Thomas S. Monson le vaega lenei:

“I le sauniga o le falelauasiga o se uso tauagafau o le Au Pulega Aoao, o H. Verlan Andersen, sa faia se saafiafaga e sona atalii. E i ai sona faatatauga i soo se mea tatou te i ai ma soo se mea tatou te faia. . . .

“Sa ta’ua e le atalii o Elder Andersen faapea i tausaga ua mavae, sa i ai sana uo sa faamasani i ai i le aoga, sa faamoemoe la te

malaga atu e tafafao i le po o le Aso Toonai. Sa ia faanoi i lona tama, mo le faaaogaina o le taavale a lo latou aiga. Ina ua ia mauaina le ki o le taavale ma agai atu i le faitotoa, sa faapea atu lona tama, ‘E manaomia ona utu le taavale ae le’i oo taeao. Ia mautinoa ua faatumu le tane o le taavale ae le’i foi mai i le fale.’

“Sa faamatala mai e le atalii o Elder Andersen faapea sa matagofie lava gaoioiga i lena afiafi. . . .Ona o lona fiafia tele, sa galo ai ia te ia le faatonuga a lona tama e utu le taavale ae le’i foi atu i le fale.

Ua tafa mai ata o le Aso Sa. Ua iloa e Elder Andersen ua leai se penisini i le taavale. Sa vaaia e le atalii, ua tuu e lona tama ia ki o le taavale i luga o le laulau. O le Aso Sapati i le aiga o Andersen, o le aso lea e tapuai ai ma faafetai, ae lē o se aso faatau.

“Ao faauau pea le savali o le falelauasiga, na ta’utino mai e le atalii o Elder Andersen, ‘Sa ou vaaia lo’u tama o faamauulu lona peleue, faatofa mai ia i matou, ma savali i se savaliga umi i le falesa, ina ia auai i se fonotaga e vave amata.’ Ua valaau mai le tiute. E le’i faapologaina le upumoni, ona o se mea ua tula’i mai e ao ona fai.

“I le faaiuga o lana savali i le falelauasiga, sa faapea mai ai le atalii o Elder Andersen, ‘E leai se atalii ua sili atu ona aoaoina lelei e lona tama nai lo a’u talu mai lena mea na tupu. E le gata na iloa e lo’u tama le upumoni, ae sa ia ola ai’ ” (i le Conference Report, Oke. 1997; po o le *Liahona*, Ian. 1998, 21–22).

O a tatou amioga e mafai foi ona i ai se aafiaga e le lelei. Mo se faaitaiga, ina ua alu atu ia Korianetona le atalii o Alema i se misiona e aoaoina ia tagata sa Sorama, sa ia faagalo le galuega ae faia ni agasala matuia (tagai Alema 39:3). Na faapea mai Alema, e toatele tagata na taitaiseseina ona o uiga o Korianetona. Na ia ta’u atu ia Korianetona, “Ua matua tele le amioletonu na e faaoo i sa Sorama; aua ua latou vaaia lau amio, ua le mafafai ai i latou ona talitonu i a’u upu” (Alema 39:11).

Na saunoa mai faapea Peresitene Heber J. Grant, “Ou te talosaga atu i alii ma tamaitai uma o loo umia se tiutetauave o le aoaoina atu o le talalelei a Iesu Keriso ina ia ola ai ma tausia poloaiga a le Atua, ina ia mafai e



a latou faataitaiga ona aoao atu ai” (*Gospel Standards* [1941], 72).

Ao e faatuina se faataitaiga e ala i lou ola ai i mea e te aoaoina atu:

- O au upu o le a molioo e le Agaga, ma tauaveina atu ai lau molimau i loto o i latou e te aoaoina (tagai 2 Nifae 33:1). Na tusia e Peresitene Iosefa Filitia Samita e faapea, “E leai se alii po o se tamaitai e mafai ona aoao atu e ala i le Agaga ia mea na te lē o faia” (*Church History and Modern Revelation*, 2 voluma [1953], 1:184).
- O le a e fesoasoani i isi ia iloa o afioga a Keriso e mafai ona mulimuli i ai i aso uma o le olaga.
- O le a ilogofie le filemu ma le fiafia e te lagonaina mai le ola ai i le talalelei. O le a faaalua lea i au mea e fai, i au upu, faapea ma le mana o lau molimau.
- O i latou o loo e aoaoina o le a faatuatua ina oe ma o le a latou saunia foi e talitonu i mea e te aoaoina atu.
- O le a faatupulaia lau lava molimau. “Ai se tasi e fia faia le finagalo [o lo’u Tama],” na aoao mai ai le Faaola, “e iloa ai e ia le mataupu” (Ioane 7:17). E mafai ona e lagonaina le le lava o lou malamalama i se mataupu patino o loo e sauni e aoao atu. Ae peitai, ao e suesue i ai ma le agaga tatalo, taumafai e ola ai, sauni e aoao atu, ona fet-

uafai atu lea i isi, o le a faapea ona faamalosia ma faalolotoina ai lau lava molimau.

Tauivi e Ola i le Talalelei

O le aoaoina atu o le talalelei e tele atu mea e manaomia ai nai lo le na o le faia o sauniuniga ma le tuuina atu. Na faamalalama mai e Elder Richard G. Scott:

“O lau tautinoga e aoaoina fanau faapelepele a lo tatou Tama o i le Lagi e le o tuuaunoaina ai na o oe i na itula uumi o loo faaluina i sauniuniga mo vasega taitasi, e faapea foi i le tele o itula o tatalo ma anapogi ina ia mafai ai ona avea oe o se faiaoga lelei. O se tautinoga e ola ai i itula uma o le olaga ina ia ogatasi ma aooga ma faataitaiga a le Faaola ma ana auauna. O se tautinoga e tauivi pea ina ia matuai ola faaleagaga, ia matuai gauai, ia matuai tauoagaina le avea ai ma se meafaigaluega lea e auala mai ai le Agaga o le Alii ina ia pa’i atu i loto o i latou ua e faatuatua ina e tuuina atu i ai se malamalama sili o ana aooga” (“Four Fundamentals for Those Who Teach and Inspire Youth,” i le *Old Testament Symposium Speeches*, 1987, 1).

E ui lava o le a e lē atoatoa i mea uma, ae mafai ona e faia se taumafaiga ina ia atoatoa i le ola ai i upumoni o loo e aoaoina atu. O le a e mauaina se malosiaga ma se mana sili i le aoaoina atu o mataupu o le talalelei a’o e saga tauivi pea e ola ai e tusa ma na mataupu.

VALAAUINA, FAAMANUIAINA I LE TOFIGA, MA LE FAALAU TELEINA



Na saunoa Peresitene Gordon B. Hinckley i le uiga o le upu faalau tele. Na ia faapea mai, “E pei ona ou faaliliuina ai, o lona uiga o le faalapo, ia matua faamanino, ia taufaalatalata mai, ma ia faamalositia.” Na ia saunoa faapea, afai e faalau teleina e i latou o loo umia le perisitua o latou valaauga, ua latou “faateleina le malosi o lo [latou] perisitua” (i le Conference Report, Ape, 1989, 60, 63; po o le Liahona, Iulai 1989, 46, 49).

E faatatau lea i lou valaauga e aoao atu. Afai e te faalau teleina lou valaauga “i le filiga uma . . . , i le galue ma [lou] malosi uma,” ua e faalau teleina lou malosi e faa-aafia ai isi mo le lelei.

O atalii o Liae, o Iakopo ma Iosefa o loo tuuina mai ai se faataitaiga lelei mo i latou o e ua valaauina e aoao atu. Na faapea mai Iakopo na ia “maua [lana] feau mai le Atua,” O ia ma Iosefa sa faasaina i laua, pe na faamanuiaina foi i le tofiga, e avea ma “ositaulaga ma aoao i leni nuu.” Na la “faamamalu foi o [laua] tofiga i la le Atua” (Iakopo 1:17–19).

Mauaina o le Valaauga e Aoao Atu

Afai o i ai sou valaauga o le avea ai o se faiaoga po o se taitai i le Ekalesia, e mafai ona e faamautinoaina o le valaauga e mai le Alii. Na tuuina mai e se tasi o Ana auauna filifilia, aua na Ia fetalai mai, “Pe fai atu i lo’u lava leo po o le leo o a’u auauna, ua tusa lava ia” (MFF 1:38).

O se valaauga o se avanoa paia lea e auauna atu ai. O loo tauave faatasi ai ma se faamatalaga e tuuina atu i le Alii. E tatau ona aafia ai le auala e te ola ai, puleaina ai au faaiuga ma faagauaiina ai oe ina ia avea ma auauna faamaoni ma atamai.

Afai e te mauaina se valaauga e aoao atu ai, atonu e te faapea ane ia te oe lava, “Ae le’i aoaoina a’u e avea ma se faiaoga. E leai so’u atamai e tuuina atu ai se lesone pe taitaia ai se talatalanoaga. E toatele atu isi e mafai ona sili atu nai lo a’u.” Atonu e i ai nisi e sili atu lo latou tomai faafiaoga po o le faapea foi, e sili atu lona tomai faanatura nai lo oe. Ae peitai, o oe le tagata lea ua valaauina. O le a avea oe e le Alii e fai ma meafaigaluega i Ona aao pe afai e te lotomualalo, faamaoni, ma filiga. Na aoao mai e Peresitene Thomas S. Monson:

“Afai e i ai se uso po o se tuafafine e lagonaina le le saunia—e tusa lava pe le gafa-

taulimaina—le tali atu i se valaauga e aoao atu, ina ia ositaulaga, ina ia faamanuiaina olaga o isi, ia manatua le upumoni leni: ‘Po o ai lava e valaauina e le Atua, e faaagavaaina e le Atua.’ O le na te silafia le pa’u’u ifo o manulele laiti, na te le tuu-lafoa’ia foi mea e manaomia e ana auauna” (“Loimata, Tofotofoga, Faatuatuaaina, Molimau,” *Liahona*, Iulai 1987, 43).

O le Lagolagoina ma le Faamanuiaina i le Tofiga

O le a lagonaina se malosiaga faaopoopo pe a lagolagoina oe e le faapotopotoga ma faamanuiaina i le tofiga. Pe a faamanuiaina i se tofiga, e faaee atu e taitai perisitua o latou lima i luga o lou ulu ma tuuina atu ia te oe se luitau ina ia e galue ai i lou valaauga. E tuuina atu foi ia te oe ia faamanuiaga e faamalosi ai ma taitaia oe. Na faailoa mai faapea e Peresitene Spencer W. Kimball, ‘O le faamanuiaina i le tofiga e mafai ona manatu sa’o i ai i lona faaupuina; o se faamanuiaga e aloese mai ai i le agasala, ia aloese mai le tuinanau; ia aloese mai mea uma e leaga, mauualalo, inosia, ta’umamasagia, po o uiga masoa foi; ia tuuese mai le lalolagi i se nofoaga maualuga o manatu ma gaoioiga” (The Teachings of Spencer W. Kimball, ed. Edward L. Kimball [1982], 478).

E leai se valaauga aloaia ina ia avea ma faiaoga e aunoa ma le faamanuiaina i se tofiga e le pule sa’o o le perisitua. Afai ua valaauina oe ma lagolagoina o se faiaoga ae le’i faamanuiaina oe i le tofiga, ia faafe-sootai lou taitai o le korama po o le ausilali ina ia faia fuafuaga talafeagai ina ia faamanuiaina ai i le tofiga.

Faalauteleina o Lou Valaauga ma le Faalauteleina o oe e le Alii

E pei ona ta'ua i luga, na faalauteleina e Iakopo ma Iosefa o la valaauga ina ia aoao atu ia tagata. Sa la'ua aoao atu le afioga a le Atua “ma le filiga uma . . . , ma galulue ma lo [la'ua] malosi uma” (Iakopo 1:19).

Ao e faalauteleina lou valaauga e aoao atu, o le a faalauteleina foi oe e le Alii. Na aoao mai Peresitene Ezra Taft Benson e faapea: “E le mafai ona i ai se faatoilaloina i le galuega a le Alii pe a [tatou] faia le mea sili. O i tatou o

meafaigaluega; o le galuega lenei a le Alii. O Lana Ekalesia lenei, o Lana fuafuaga o le talalelei. O ana fanau nei o loo tatou galulue i ai. O le a Ia le faatagaina lava i tatou ina ia tatou toilalo pe afai e fai la tatou vaega. O le a Ia faalauteleina i tatou e sili atu nai lo a tatou taleni ma mea tatou te mafaia pe a talafeagai ai. Ua ou iloaina lenei mea. Ou te mautinoa ua outou iloaina e pei foi ona ou iloaina. O se tasi o aafiaga e aupito sili ona matagofie e mafai ona oo mai i le tagata” (*The Teachings of Ezra Taft Benson* [1988], 372).

FAALELEIA ATILI O AU TALENI

O loo i ai se galuega tele a le Alii mo i tatou e faia. Atonu e te taumanatunatu pe mafai faapefea. Atonu e te lagona e leai se mea faapitoa pe maoa'e po o se tomai. . . .

E mafai e le Alii ona faia vavega matagofie i se tagata e faatauva se tomai ae lotomauualalo, faatuatua, ma punoua'i i le auauna atu i le Alii ma se e saili e faaleleia atili ia lava.

E mafai aua o le Atua o le sosia atoatoa o le mana.

Peresitene James E. Faust

10

SAILIA O LESONA
I SOO SE MEA

“O lenei foi, ona ua uma ona e amata ona aoao atu le upu, ou te lotu ina ia faapea lava ona e aoao atu pea, ou te lotu foi ina ia e filifiliga ma le le gaioia i mea uma” (Alema 38:10).

Ao galue o ia i sona togalaau, sa mafau-fau se peresitene o se siteki e uiga i se lauga na te tuuina atu i se konafesi a le siteki o loo loma. Na fuafua o ia e tautala e uiga i le faamalolosa o aiga.

O lona tuaoi, o le e foliga mai e i ai se tomiai faapitoa mo le faafugaina mai o fua matagofie, sa galue mai foi i lona togalaau. Sa ia valaau atu i ai ma fesili atu, “O le a lau leolilo i le faiga o lau togalaau?”

E faigofie lava lana tali na aumai. Sa ia faapea mai: “Ou te faalatalata i le togalaau. Ou te alu i lo’u togalaau i aso uma lava, e tusa lava pe le fetai. A’o o’u iai iina, ou te sailia ni faailoga laiti o ni faafitauli e ono tulai mai, o mea e pei o vao, iniseti ma tulaga o le palapala lea e faigofie pe a taulimaina vave ae e mafai foi ona avea ma mea e lofituina ai pe afai e le vaaia faalelei.”

Na musuia le peresitene o le siteki ina ia faatusatusa le tausiga e lona tuaoi o lana togalaau i le tausiga e tatau ona tatou tuuina atu i o tatou aiga. I lana lauga i le konafesi a le siteki na ia talanoa ai e uiga i le togalaau a lona tuaoi. Na ia maitauina ai afai tatou te mananao i a tatou fesoootaiga ma tagata o o tatou aiga ina ia tupu ma lauolaola, e moomia ona tatou “faalatalata atu i le togalaau”—ia faaalu se taimi ma tagata o le aiga i aso taitasi e talanoa ai ma i latou, faaali atu le agaga talisapaia mo i latou, ma saili ni faailoga laiti o ni faafitauli e ono tulai mai lea e mafai ona foiaina ae le’i faateteleina.

O se tamaitai sa faalogo i le tautalaga a le peresitene o le siteki na manatuaina ina ua ia vaai ua i ai nisi o ona laau ua amata ona mamago. Sa leai sona taimi e siaki ai lo latou tuputupu a’e i aso uma. O lea na faamanatu atu ai ia te ia lana fanau o loo tu-

tupu a’e ma e le tatau ona ia faama’imauna ia nai tausaga o loo latou faatasi ai ma i latou. Talu ai ona o le aoaoga a lona peresitene o le siteki, o lea na avea ai o ia ma se tina lelei.

Na mulimuli le peresitene o le siteki i le faataitaiga a le Faola, o le e masani ona faatusatusaina ia upumoni faaleagaga i ni mea ma ni gaioiga e masani ai. E mafai foi ona e faia le mea lava lea e tasi. E mafai ona e mauaina ni lesona o le olaga i mea e te faia ma maitauina i aso taitasi. A’o e mafau-fau loloto ma tatalo e uiga i se lesona faapea ma tagata o loo e aoaoina, o le a faatumuina lou siosiomaga i tali o fesili ma faataitaiga o mataupu o le talalelei.

O faataitaiga nei e lua o loo faaali mai ai le auala na maua ai e isi faiaoga ia ni lesona i mea latou te maitauina i le olaga i aso taitasi:

Na maitauina e se faiaoga o le Peraimeri se aiga o malaga mai i le lotu i se tasi Aso Sa. Na ia vaaia se tamaitiiti o lea aiga, ma o se tasi foi o lana vasega, o nisi taimi e amio lē mafaufau ai i isi tagata o le vasega, ae o loo fesoasoani nei i lona tuafafine. “O le faataitaiga le la ou te manaomia,” sa ia faapea ifo ai ia te ia lava. “O le a aoaoina ai le mataupu ma fesoasoani ai i le tamaitiiti.” Mulimuli ane sa ia fetuفاai atu le faataitaiga i se lesona e uiga i le agalelei. Sa aoaoina tamaiti i le faataitaiga, ma na amata ai foi ona faaleleia ia amioga a le tamaitiiti agai i isi tagata o le vasega.

Sa taaalo se tama ma sona atalii i ni poloka meataalo. Ina ua le mafaia e le tamaitiiti i ni ana taumafaiga ona fausia se fale lapoa i luga o ni faavae laiti, sa vaaia loa e le tama se avanoa e aoao atu ai. Sa ia faamatala atu i ai le taua o faavae malolosi, ma mausali. Ae le’i faaauuina le la taaloga, sa ia faitauina le Helamana 5:12, lea o loo faapea mai “o luga o le papa o lo tatou Togiola, o le Keriso lea, le Alo o le Atua, lea e tatau ona [tatou] atinae ai lo [tatou] faavae.” I se taimi mulimuli ane i lena aso, sa suesueina faatasi ai e le aiga le mau. I se lesona puupuu lea na faamalosa ai le fuaiupu na latou faitauina, sa folaina e le tama ma le atalii ia poloka ma talatalanoa e uiga i le taua o le fausiaina i luga o le faavae o Keriso.

Atinaeina o Tomai e Maua Ai Metotia Faafaiaoga i Soo Se Mea.

O fautuaga nei e mafai ona fesoasoani ia te oe e maua ai ni metotia faafaiaoga i soo se mea.

Suesue ia lesona ae le'i taitai ona tuuina atu. Afai e te masani i lesona o le a e aoaoina atu, o le a malamalama foi i mea e tutupu i aso uma e mafai ona e faaogaina e aoao atu ai na lesona. Afai o loo e aoaoina atu se vasega e i ai se tusi lesona, o se mea lelei le i ai o se malamalamaaga i mea uma o loo i ai i le tusi lesona atoa. Ona mafai lea ona e iloaina le taimi e faaoga ai se vaega patino e fetau i se lesona o le a e aoaoina atu i ni vaiaso o loo lumanai.

Tatalo i aso uma mo se fesoasoani i au sauniuniga. Ole atu i le Tama Faalelagi ina ia fesoasoani ia te oe ia e malamalama i mea o le a manino, manatua, ma musuia ai lau lesona ia i latou e te aoaoina.

Ia manatua pea i le mafaufau i latou o loo e aoaoina ma le lesona o loo sauniaina. Mafaufau ia i latou o loo e aoaoina. Manatunatu i o latou olaga, o faaiuga latou te feagai, ma itu o loo latou agai i ai. Ia mataala mo metotia e aoao atu ai, a'o e suesue i tusitusiga paia po o e maitauina foi le matagofie o le natura. E mafai foi ona e mauaina mai ni auala e aoao atu ai i gaoioiga e pei o le faamamaina o lou fale, alu i le galuega, po o le alu i le faleoloa. E toetoe lava o soo se mea e tupu e mafai ona tuuina atu ai ia te oe se faaitaiga, se tulaga faatamaoigaina, po o le faamalamalamaina o loo e moomia mo se lesona o le talalelei.

Maitauina o Lagona Faagaetia e Oo Mai

A'o e malamalama i auala e aoao atu ai o loo siomia ai oe, o le a fesoasoani tele mo oe le mata'ituina o lagona faagaetia e te mauaina. Ia e tauaveina se tamai api ma oe, ma tusi ai mea e te tau atu i ai e te lagona o ni manatu aoga mo le aoaoga. Tusi ni mea aoga mai lauga e te faalogo i ai po o ni lesona e te auai atu i ai. Tusi ni mea e siitia ai le faatuatua. A'o e faatupuina se mausa o le tusitusia o nei mea, o le a faateleina ai lou malamalama i risosi e faatamaoigaina ai le faiga o aoaoga o loo siomia ai oe.

Aua e te popole pe faapefea ona e faaogaina ia manatu. Ia na o le tusi lava i lalo. O nisi taimi o mea e te maitauina o le a faatatau i se lesona o le a e aoaoina i se taimi lata mai, ae o isi taimi o le a e vaai ai i ni faaitaiga matagofie po o ni faatinoga o mataupu o le a e le aoaoina mo ni nai vaiaso po o ni tausaga foi. E mafai ona galo ia te oe pe afai e te le faamaumauina i lalo.

Atonu e te manao foi e fai se faavaa e teu ai lesona taitasi o le a e aoaoina i isi masina o loo lumanai. Afai e oo ia te oe ia ni lesona faitino, faatusatusaga, ma isi manatu, ia tuu se faamatalaga i le faavaa e talafeagai i ai. Afai e oo mai le taimi e saunia ai se lesona patino, o le a mafai ona e iloaina ua uma ona faaputupuina se anoanoai o manatu ma gaoioiga e faatamaoigaina ai le lesona.

11

FAIA O SE FUAFUAGA INA IA FAALELEIA ATILI AI LOU A'OA'O ATU



“Ia e faasaga i le faitau, ma le apoapoai atu, ma le aoao atu. Aua ne’i e faatalale i le meaalofo na tuuina atu ia te oe i le valoaga ma le faaee atu o lima. . . . Ia e mafaufau i ia mea; ia e faamasani i ai; ina ia iloa ai e tagata uma o oe o le alualu. Ia oe lava ia te oe, atoa ma lau e aoao atu, ia e tumau pea i ai; aua a e faia lena mea, e faaolaina ai oe e oe atoa ma e ua faalogologo ia te oe” (1 Timoteo 4:13–16).

Ina ua faapupuina e Moronae ia tafafaamaumau o sa lareto, na amata ona popole o ia ona o lona vaivai i le tusitusi. Na ia manatu o le a faatauemu tagata o Nuu Ese o le a faitau i ana upu ma teena ai. Na ia tatalo ina ia maua e tagata o Nuu Ese le alofa moni ma ia aua ne’i teenaina le afioga a le Atua. Ona tuuina atu lea e le Alii ia te ia lenei folafolaga: “Afai e o mai tagata ia te au, ou te faailoa atu ia te i latou lava i latou vaivai. Ou te tuuina atu i tagata le vaivai, ina ia latou faamaulalo ai; ma ua lava lo’u alofa tunoa i tagata uma o e faamaualaloina i latou lava i o’u luma; aua afai latou te faamaualaloina i latou lava i o’u luma, ma faatuatua ia te au, ona ou faia lea o mea vaivai ma mea malolosi ia te i latou” (Eteru 12:27).

I au taumafaiga e aoao atu le talalelei, e i ai nisi taimi e te lagonaina ai le lotovaivai. Ae mafai ona e maua le lototele ona o lenei folafolaga mai le Alii. Ao e faamaualaloina oe lava, ma e iloina vaega na e te manaomia ai Lana fesoasoani, ma faatino le faatuatua ia te Ia, o le a Ia faamalosi oe ma fesoasoani ia te oe e te aoao atu i se auala e finagalo i ai o Ia.

Iloiloina o Mea e te Malosi ai ma Mea e te Vaivai Ai

E mafai ona e amata faia se fuafuaga mo le faaleleia atili e ala lea i le iloiloina po o faapefea mai oe i le taimi nei. E mafai ona e vaevaeina lenei iloiloga i ni vaega se lua: o mea e te malosi ai i le aveva ai o se faiaoga ma mea foi e te vaivai ai i le aveva ai ma se faiaoga.

O a Mea Ou te Malosi Ai i le Aveva Ai O Se Faiaoga?

Amata i le mafaufau i nisi o meaalofo a le Alii ua uma ona tuuina atu ia te oe lea e mafai ona fesoasoani ia te oe i lou a’oa’o atu. Ia lisi nei mea e te malosi ai i totonu o se tusi o talaaga o le olaga po o se api po o se siata o loo i le itulau e 26. A’o e faia, atonu e te manao e te mafaufau e uiga i ni mataupu faavae o le a’oa’o atu o loo faamamafaina i totonu o lenei tusi, e pei o le alofa ia i latou o loo e aoaoina, aoao atu e ala i le Agaga, aoaoina atu o le mataupu, valaaulia e a’oa’o ma le filiga, faatupuina o se siosiomaga e aoao ai, faaogaina o metotia lelei, po o le sauniaina o lesona.

Atonu o lou onosai e mafai ona fesoasoani ai ia te oe i le aveva ai o se faiaoga. Pe atonu foi o lou lafofoga fiafia, o lou popole mo tagata, o lou tomiai, o lou malamalama i tusitusiga paia, o lou naunau e te faalogo, o lou agaga toafilemu, o lau masani e sauni mae’ae’a, po o lou naunau moni ia lelei lou aoao atu.

E le tau manaomia ona faailoina mai se anoanoai o mea e te malosi ai; na o ni nai vaega e amata ai. O le faamoemoega o le taulai atu i nisi o mea e te malosi ai, ina ia atiae ai i luga o ia mea e faaleleia atili vaega e te lē o malosi tele ai.

O a Mea Ou te Vaivai Ai i le Aveva Ai O Se Faiaoga?

A maea ona mafaufau i mea e te malosi ai, ona toe tomanatu lea i tulaga faafiaoga na e oo i ai talu ai nei. Maufaufau i vaega na e mafai ona sili atu ona lelei se tulaga e te faataunuuna ai. E mafai foi ona e toe manatunatu i mataupu faavae o aoaoga o loo faamamafaina atu i lenei tusi. Atonu e te manao e lisi nisi mea e mafai ona sili atu ona lelei se tulaga e te faia ai, ae atonu e sili ai ona e galue i se mea se tasi pe lua i le taimi. O le mea moni, tatou te atina’e i le “upu ma le upu, o le fuaiupu ma le fuaiupu” (2 Nifae 28:30). E tatau ona tatou galulue “poto ma le auauai lelei; aua e le tatau ona momo’e vave le tagata ia silia le malosi ua ia te ia” (Mosaea 4:27).

A maea ona e filifilia se vaega se tasi pe lua foi e manaomia ona e faaleleia, ona tusi lea i lau tusi o le talaaga o le olaga po o se tamai api.

Faia o se Fuafuaga mo le Faaleleia Atili

Ina ia fuafuaina pe faapefea ona faaleleia ia le vaega po o vaega na e filifilia, ia mafau i fesili nei:

- O le a se mea e mafai ona ou faia nei ina ia faaleleia atili ai lo'u aveva ma se faiaoga?
- O a tomai e manaomia ona ou atinaeina?
- O ai e mafai ona fesoasoani mai?
- O a mea o loo maua?

O se faataitaiga leni o loo faaalua mai ai le auala e mafai ona e faaaogaina ai nei fesili. I leni faataitaiga, na fuafua ai se faiaoga o le Aualofa o loo ia moomia le faaleleia atili o lona atamai i le iloatinoina lea po o malamalama tagata o le vasega i mea o loo ia aoo atu.

O Le a Se Mea E Mafai Ona Ou Faia Nei Ina Ia Faaleleia Atili Ai Lo'u Aveva Ma Se Faiaoga?

E tatau i le faiaoga ona tagatagai i leni tusi e maua mai ai manatu i mea e mafai ona sili atu lona faia i le taimi nei. Ao ia faitau i le Auala e Iloa ai pe o Latou Aoo (itulau 77), na te iloa ai o le tasi auala e iloilo ai le malamalama o tagata o le vasega o le fai atu lea ia i latou e toe faaupu mai ia mataupu i ni a latou lava upu. E fuafua o ia e faaoga leni manatu i le isi lesona na te aoo atu. Na te tusia leni fuafuaga i totonu o lana tusi o talaaga o le olaga.

O a Tomai e Moomia Ona Ou Atinaeina?

E faitau foi le faiaoga e tatau ona ia maitauina tagata o le vasega i le taimi o lesona. Na te faapea ifo ia te ia lava, "O se tomai leni e moomia ona ou atinaeina, ae e moomia ai se faataitaiga." Na te tusia leni fuafuaga i totonu o lana tusi o talaaga o le olaga.

Ao ia mafauina lana fuafuaga, o le a ia iloina ai ua uma ona i ai e le itiiti ifo ma le tasi le mea e malosi ai, e mafai ona ia atiae ai i luga: na te suesue ma le filiga ana lesona. Talu ai ona e masani pea o ia i mea o le lesona, o le a mafai ai ona ia maitauina tagata o le vasega nai lo le tulimatai atu tele na o le tusi lesona ma ana tusitusiga.

O Ai e Mafai Ona Fesoasoani Mai? O a Mea o Loo Maua?

I le vaega mulimuli, e fesili ifo le faiaoga ia te ia pe o i ai nisi risosi e mafai ona ia faaaogaina. Ua uma ona ia faaaogaina leni tusi e aveva ma risosi. E mafau o ia i nisi risosi: "Ae a isi faiaoga? Pe mafai ona ma talanoa ma le faatonu o faiaoga po o se isi faiaoga e tomai tele i le iloilo ina o le malamalamaaga o tagata o le vasega? Pe mafai e se tasi o o'u taitai ona maitauina se lesona ou te aoo ma tuuina mai ai ni fautuaga? Pe mafai e tagata o le vasega ona tuuina mai ni fautuaga?"

Faaoga le siata leni (po o sau lava siata) e fai ai se fuafuaga e faaleleia atili ai lou aoo atu. Tusi ai au tali i fesili i avanoa o loo i ai.

<p>Po o Faapefea Mai A'u Mea o Loo Fai?</p> <ul style="list-style-type: none"> ▪ O a mea o loo ou malosi ai i le aveva ai ma se faiaoga? ▪ O a mea ou te vaivai ai? 	
<p>O Le a Se Mea e Mafai Ona ou Fai e Faaleleia Atili Ai?</p> <ul style="list-style-type: none"> ▪ O le a se mea e mafai ona ou faia nei e faaleleia atili ai le aveva o a'u ma se faiaoga? ▪ O a tomai e manaomia ona ou atinaeina? 	
<p>O a Risosi po o Puna'oa o le a Ou Faaogaina?</p> <ul style="list-style-type: none"> ▪ O ai e mafai ona fesoasoani mai? ▪ O a mea o loo mafai ona maua? 	

Faatuina o se Sini ma Faamaumau Lou Alualu i Luma

A maea ona faia au fuafuaga mo le faaleleia, ona faatutaga lea o se aso e te faamoemoe e ausia ai lau sini. Atonu e te manao e tusi i totonu o se tusi o talaaga o le olaga po o se tama'i api lou alualu i luma. Afai e te manao e toe fetuunai lau sini a'o e agaigai i luma, ia faia loa.

Afai e te lagona ua e ausia le tulaga faaleleia atili na e fuafuaina, ia amata loa ona galue i se isi vaega o le faiga o aoaoga.

Uiga e Sili Atu Ona Taua

I lau sailiga faifai pea o le faaleleia atili o oe i le avea ai ma se faiaoga, ia manatua ia uiga e sili atu ona taua.

Na faamatalaina e Peresitene Harold B. Lee se faiaoga na tele sona faatosinaga mo ia a'o tamaitiiti. Atonu e te faaao-gaina lenei faamatalaga e taitaiina ai oe a'o e iloiloina le aotelega o lou lelei i le avea ai ma se faiaoga ma atinaeina fuafuaga mo le faaleleia atili:

"I le taimi a'o o'u laitiiti, o lesona faalelotu sili ona faagaetia na ou aoaoina na maua mai vasega a le Aoga Sa. Ae peitai, e toalaiti lava nai faiaoga o le Aoga Sa o loo o'u manatuina i le taimi nei na matuai umi so latou sao i lo'u aoaoina faalelotu. O se tasi o i latou nei . . . e tulaga ese le malosi, e foliga mai e pei e mu ai ai lo'u agaga i lesona o le talafaasolopito o le Ekalesia, ola mama, ma le moni o le talalelei i se auala, lea ua toetiiti fasefulu tausaga mulimuli ane, o loo o'u manatuina pea ma ta'ialaina ai a'u i ana lesona.

"O le a se mea na ia maua ai ia uiga manaomia o se faiaoga faamanuiaina o le Aoga Sa? Sa le ia te ia se atamai tele i le poto salalau ma e le'i lelei foi ni ana aoaoga i teori ma mataupu o aoaoga faaona po nei. O ona lava foliga e masani ai—o se ava ma se tina i se tamai nuu maotua lea e manaomia ai ni itula se tele o galuega mai tagata uma o le aiga. E tolu lava ni taleni, i lo'u lava manatu, na lelei ai lana aoaoga: muamua, sa ia te ia le malosi e faagauai atu ma faafiafia atu tamaiti ia te ia; lona lua, sa ia te ia le malamalama ma se alofa mo le talalelei ma i ai le malosi e faaitaitai ai lesona taitasi ina ia faatatauina i o tatou lava olaga; ma lona tolu, sa ia te ia se faatuatua mautinoa i le Atua ma se molimau e le faamaluelueina i le paia o le toefuataiina o le talalelei a Iesu Keriso.

"E i ai se isi tulaga manaomia e tau le amanaiaina . . . ae sili ona taua mo lenei faiaoga ma soo se tagata o le a avea ma se faiaoga o le talalelei a Iesu Keriso. Na faailoa mai e le Alii le tulafono o le faiaoga i nei upu: 'O le a tuuina atu foi le Agaga ia te outou i le tatalo i le faatuatua; ae afai tou te le maua le Agaga 'aia tou te aoao atu' (MFF 42:14). . . .

"O se tagata faapea e tatalo mo le fesoasoani i lana aoao atu o le a maua le mana o le Agaga Paia, ma o lana aoaoga o le a pei ona faailoa mai e Nifae, '[molioo atu] i loto o le fanau a tagata . . . e le mana o le Agaga Paia'

"(The Teachings of Harold B. Lee, ed. Clyde J. Williams [1996], 444).

Ao e iloiloina mea e te malosi ai ma vaivai ai foi i le avea ai ma se faiaoga, ia fuafua pe o le a lelei faapefea ona e tomanatu i nei "uiga manaomia." Atonu e te manao e te mafaufau i fesili nei:

- Pe ou te faaali atu ea ia i latou o loo o'u aoaoina ou te alofa ia i latou? Pe ou te faaali atu ea lo'u fiafia ia i latou uma taitoatasi?
- Pe mafai ea ona latou lagonaina lo'u alofa mo le Alii ma Ana aoaoga? Pe ou te fesoasoani ea ia i latou ia latou iloa le faatinoina o na aoaoga i o latou olaga?
- Pe mafai ea e i latou o loo ou aoaoina ona lagonaina la'u molimau i le talalelei toefuataiina a Iesu Keriso? Pe mafai ea ona latou lagonaina lo'u faatuatua mausali i le Atua?
- Pe ou te tatalo ea i le faatuatua ina ia aoao atu e ala i le mana o le Agaga Paia?

E tusa lava pe le lava lou malamalama i le tele o vaega faatino o le aoaoga, ae mafai lava ona e taulai atu i uiga e sili ona taua. E mafai ona e alofa ia i latou e te aoaoina. E mafai ona e faaali atu pea lava pea lou alofa mo le Alii ma Ana aoaoga. Ma e mafai ona e fetufaai atu ma le naunautai lou faatuatua i le Atua ma lau molimau i le talalelei toefuataiina. E mafai ona e faamanuiaina i uiga e sili atu ona taua, e tusa lava pe o loo e atinaeina ni tomaiti faatino.

Faatasi ai ma le Fesoasoani a le Alii, E Mafai Ona Faaleleia Atili Oe

A'o e tauivi ina ia e faaleleia atili, e masani lava ona oo mai le fesoasoani a le Alii e ala mai i isi tagata. O le tala lenei o loo faamatala atu ai se alii na avea ma peresitene o le misiona a Europa i Sasae, o loo faailoa atu ai lenei mataupu faavae:

"I le taimi o le taumafanafana o le 1993, sa ou asiasi atu ai i se tasi o a matou paranesi fou na faatoa faavaeina. O le Aoga Sa sa aoaoina e se tagata fou faatoa papatisoina. Sa matuai manino lava lona le mautonu i lona tu ai i luma o le vasega. Nai lo le oo atu i se tulaga o le faia o se mea sese, sa ia faitauina le lesona o le upu i le upu. Ao ia faataupupula atu agai i le tasi, sa le mautonu le vasega.

"Ina ua maea le lesona, sa ou faamalo atu i le faiaoga mo le sa'o o aoaoga na ia tuuina mai, ma sa ou fesiligia o ia i se auala atamai pe sa ia mafaufauina le tuuina mai o ni fesili faatupu manatu ina ia faa-ala ai le talanoaga a le vasega. Sa ia tali mai faapea, o Europa, e le tuuina atu e faiaoga ni fesili. Sa ou alu ese, ma ou manatunatu po o le a se mea e mafai ona matou faia e fesoasoani ai ia te ia ma le tele o isi faiaoga foi e pei o ia i totonu o se atunuu e le'i leva talu ona faavaeina ai le Ekalesia.

"O Aokuso o le tausaga lena na tofia atu ai se ulugalii e amataina ia polokalama a le Ofisa o Aoga a le Ekalesia i lo



matou eria. Sa matou talosagaina i laua ina ia faia ni fonotaga sa ta'ua i lena taimi o fonotaga mo aoaoga faafaiaoga. O se tasi o faiaoga e ao ona la'ua galulue agai i ai o le faiaoga lea sa ou asiasi i ai i lana vasega.

"I le fa masina na lumanai ai, na ou toe foi atu ai i le paranesi. O se vavega na tupu ai iina. Sa tu o ia i luma o le vasega ua suia, ua to'a, ma mautonu. O ana fesili na saunia lelei na uunaiina ai ni tali lelei. Sa ia faamalo atu ma le faamalosiua i tali a tagata uma o le vasega. Sa ia fuafuaina se tagata se toatasi o le vasega e fetufaai atu se tulaga faalea-

gaga e uiga i le autu o le lesona ona valaaulia lea o isi e fetufaai atu. I le tau faaiuiuga o le vasega, sa tuuina atu ai le molimau a se tagata fou. Sa taofi e le faiaoga ma fesili atu ma le filemu, 'Na outou maitauina le Agaga ao tautala ia le Tuafafine o Molnar? O le Agaga lena o le Alii.' A'o matou feofofofoai i le faagaetia ma le lagona o le fiafia i totonu o lena potuaoga, sa ou faafetai atu i lo'u Tama Faalelagi mo le ulugalii na aoaoina atu ia mataupu faavae o le talalelei i se tagata fou ma fesoasoani ia te ia ia avea moni ma se tasi ua tataua ona valaauina e avea o se faiaoga o le talalelei a Iesu Keriso.

MAUAINA O LE LAGO- LAGO MAI OU TAITAI



O se vaega o le tiutetauave a se taitai o le perisitua po o le ausilali o le fesoasoani ma lagolago lea i faiaoga. O le tulaga lelei o aoaoga i le Ekalesia, o le a faaleleia atili pe a atinaeina e taitai ma faiaoga se sootaga felagolagoma'i ma fetausiai.

I faalapopotoga a le perisitua ma ausilali, e tofia ta'ita'i e galulue ma ni faiaoga patino. Mo se faataitaiga, e mafai ona tofia se tasi o le au peresitene o le Peraimeri e galulue ma i latou o loo aoaoina tamaiti mai le 8 tausaga e oo i le 11. O se tasi o le au peresitene o le korama a toaina e mafai ona tofia e galulue ma faiaoga o le korama.

Faamalamalamaga mo Faiaoga Fou

Afai o oe o se faiaoga fou faatoa valaauiina, o le a oulua feiloai ma talanoa ma lou taitai, e sili ona oulua feiloai ma talanoa a o le'i faia lau vasega muamua. O le a ia talanoa atu ia te oe e uiga i le taua o lou valaauga ma tuuina atu ni tusi po o ni mea e faaoga mo le vasega. A maea ona e aoaoina atu lau vasega muamua, e tatau ona oulua faia sina talanoaga puupuu ma lou taitai e ta'u atu i ai ou lagona ma le tulaga na i ai.

Faafesootaiina o Taitai Ina ia Outou Fefautuagai

Ia faafesootai soo lou taitai e fetufaai atu i ai ni mea na e oo i ai, talanoaina manaoga o i latou o loo e aoaoina, foia ni faafitauli, ma saili mai ai se fautuaga. O le a maua ai le avanoa e iloilo ai au fuafuaga mo le saga faaleleia atili o oe i le aveai ai ma se faiaoga.

O ia fesootaiga e sili atu ona lelei pe a fevaaia'i, ae afai e talafeagai ai e mafai ona faia i luga o le telefoni, meli, po o nisi auala. E tatau ona e amataina ia fesootaiga i soo se taimi e manaomia ai ae ia le'ititi ifo ma le faatasi i le tolu masina.

Afai e fono se taitai tamaitai ma se faiaoga alii pe fono foi se taitai alii ma se faiaoga tamaitai, e tatau ona faamatala pea le faitotoa ma fai atu i se isi tagata matua e nofo i totonu o se isi potu e sosoo atu, faapaologa, po o le fale faafiafia. E tatau ona aloese le taitai ma le faiaoga mai tulaga e ono masalomia ai.

A'o e faatalitali e fono ma lou taitai, ia sauni e talanoa e uiga i:


- Ou lagona e uiga i lou valaauga o se faiaoga.
- Mea na outou oo i ai ma lau vasega.
- Faataitaiga o auala o loo tali mai ai tagata o le vasega i lesona o loo e aoaoina atu.
- Mea patino o loo manaomia e tagata taitoatasi o le vasega.
- O au sini i le aveai ai ma se faiaoga.
- Mea e mafai e lou taitai ona fai e fesoasoani ai ia te oe ina ia ausia au sini.
- Autu e te lagona e tatau ona tautalagia i fonotaga mo le faaleleia o faiaoga.

Asiasiga i Potuaoga

O nisi taitai e auai i le vasega e tasi i vaiaoso taitasi, o se vaega o o latou valaauga. O isi taitai, e pei o au peresitene o le Peraimeri ma au peresitene o le Aoga Sa, ua faatonuina e fuafua faatasi ma faiaoga ina ia asiasi atu soo i a latou vasega (tagai i le *Faaleleia o le Aoaoina Atu o le Talalelei: O Se Taiala a le Taitai*, itulau 6). Afai e fuafua se taitai e asiasi atu i lau vasega, e mafai ona e talosaga atu ia te ia na te maitauina le vasega pe fesoasoani atu foi i nisi auala. Mo se faataitaiga, e mafai e se taitai ona tuuina atu se vaega o le lesona, fesoasoani atu i se tagata patino o le vasega, pe fesoasoani foi i gaioiga.

E

MATAUPU FAAVAE AUTU O LE
AOAOINA ATU O LE TALALELEI




ALOFA IA I LATOU E TE AOAIONA

E leai se mea e sili atu ona taitaiina ai tagata ina ia faagalo le agasala nai lo le taitaiina lea o i latou i le lima, ma vaavaaia faalelei i latou ma le agalelei. Afai e faaali mai e tagata sina agalelei ma sina alofa ia te au, e maeu le mana e oo mai i lo'u mafaufau, ao taumafai le isi itu e fafagu ia lagona leaga uma ma faalotovaivaiina le mafaufau o le tagata.

O le Perofeta o Iosefa Samita

1

O LE ALOFA E FAAMALU-
LUINA AI LOTO

“E leai se tasi e mafai ona fesoasoani i lenei galuega vagana o le a lotomauualalo o ia ma tumu i le alofa” (MFF 12:8).

Sa feagai se faiaoga fou ma ni faafitauli i nisi o tamaiti ulavavale o lana vasega. Sa ia sailia se fautuaga mai se tasi o le au peresitene o le Aoga Sa, ma fautuaina ai o ia ina ia faia se faatinoga faata’ita’i. Sa tuu atu iai na te filifilia se tagata faasoosa i le vasega ona faaali atu lea i lena tagata ia ni mea esee se lima e popole ai o ia [le faiaoga] mo lea tagata. I nai vaiaso mulimuli ane, na fesiligia ai e le taitai le faiaoga po o faapefea mai o ia. Na ia lipotiina atu faapea, o le tagata na ia filifilia ua le toe faasoosa nei, ma o loo ia tau sailia foi se isi tagata o le vasega e filifilia. Ina ua tuanai le isi foi lua vaiaso sa toe fesili foi le taitai. Sa faapea mai le faiaoga, sa faafaigata ia te ia ona sailia se tasi e galue agai i ai. Ina ua fesiligia o ia mo le taimi lona tolu, sa ia ta’u atu i le taitai faapea na ia filifilia ni tagata esee se toatolu o le vasega, e uma le isi sosoo ma le isi, ma ina ua amata ona ia faaali atu ia te i latou lona popole mo i latou, sa amata ai loa ona lē toe faasoosa. I tulaga uma lava taitasi, o le alofa lava na faamaluluina ai se loto.

O le Mamana o le Alofa o se Faiaoga

Pe a tatou faaalia le alofa ia i latou tatou te aoaoina, ona atili gaua’i atu ai lea o i latou i le Agaga. O le a latou maelega i le aoaoga ma tele atu ona faaali mai o latou manatu ia i tatou ma isi tagata i le vasega. O le tele o taimi, o le a latou malamalama ai i se lagona faafouina o lo latou taua e faavavau ma se naunautaiga sili mo le amiotonu.

Na faamatala mai e Elder Dallas N. Archibald o le Au Fitugafulu e faapea:

“O aoaga tatau e faalauteleina ai le agaga.

“Mo se faataitaiga, se’i o tatou faatusatusa se tamaitiiti i se ipu malamalama e leai se mea o i ai, ma lo tatou poto ma le malamalama na faaputupu i le gasologa o tausaga, i se pakete vai. . . . E le mafai ona tatou sasaaina atu se pakete vai tumu i totonu o se tamai ipu malamalama. Ae ui i lea, o le faaogaina o mataupu faavae tonu o le aoao atu o le malamalama, e mafai ai ona faateleina le ipu malamalama.

“O na mataupu faavae, o le tauanau atu, faapalepale, agalelei, ma le agamalu, o le alofa faamaoni, alofa, ma le malamalama mama. O le a latou faalauteleina le ipu malamalama, o le agaga lea o le tamaitiiti, ma mafai ai e lena tamaitiiti ona maua ni mea e tele nai lo le pakete tumu” (i le Conference Report, Oke. 1992, 34–35; po o le *Liahona*, Ian. 1993, 32).

Na lipotia mai e se faiaoga Peraimeri ni mea na oo i ai na tauia ai o ia ma lana vasega ina ua maea ona ia asiasi atu i o latou aiga ma faailoa atu lona fiafia i o latou olaga. O se tasi alii laitiiti e le manao e nofo i le vasega, ae afai e nofo, e lē auai o ia i faatinoga. Ae ina ua maea ona faia e le faiaoga sana asiasiga puupuu i lona aiga ma talanoa faatasi ma ia i mea e fiafia i ai, sa amata ai loa ona naunau o ia e sau i le Peraimeri. O le isi tagata o le vasega e le tautala lava o ia i totonu o le vasega ae na matuai fiafia e tautala ina ua maea ona asiasi atu i ai le faiaoga i lona fale. Ina ua maea le asiasiga, sa amata loa ona ia auai i le vasega.

Pe Faapefea Ona Aafia Lo Tatou Aoao Atu i le Alofa FaaKeriso

Na tusia e le Aposetolo o Paulo: “Afai ou te tautala i gagana a tagata atoa ma agelu, ae leai so’u alofa, ua avea a’u ma apa memea taalili po o se sumepalo tagitagi. Afai foi o ia te au ona perofeta ane, ma le iloa o mea lilo uma, ma le poto uma lava; afai foi o ia te au le faatuatua uma e aveese ai mauga, ae leai so’u alofa, ou te le aoga lava” (1 Korinito 13:1–2). I lenei augatupulaga na fetalai mai ai le Alii faapea “e leai se tasi e mafai ona fesoasoani i lenei galuega vagana o le a lotomauualalo o ia ma tumu i le alofa, o i ai le faatuatua, faamoemoe, ma le agaalofo” (MFF 12:8).

Afai tatou te mananao e faa-aafia tagata o loo aoao mo le lelei, e le tatau ona tatou na ona fiafia e aoao atu; ae tatau ona tatou alolofa i tagata uma tatou te aoaoina. E tatau ona fuafaatatau le manuia o la tatou galuega, i le alu-alu i luma o i latou tatou te aoaoina, ae lē o le lelei o la tatou faatinoga.

O le alofa e uuna’ia ai i tatou ina ia tatou saunia ma tula-laga ese lo tatou aoao atu. Afai tatou te alolofa ia i latou o loo tatou aoaoina, tatou te tatalo mo i latou uma taitoatasi. Tatou te faia mea uma tatou te mafaia ina ia iloa ai mea latou te fiafia i ai, o mea e faataunuaina, o mea e manaomia, ma popolega (tagai i le “Malamalama Ia i Latou E te Aoaoina,” itulau 35). Tatou te fetuunaia a tatou aoaoga ina ia fetau ma mea latou te manaomia, e tusa lava pe tele ai se taimi ma ni taumafaiga e alu ai. Ia tatou maitauina pe a le auai mai ma e tatau foi ona tatou faafeiloa’ia i latou pe a latou auai mai. Tatou te ofoina atu le fesoasoani pe a manaomia. Tatou te naunautai i lo latou manuia e faavavau, i le faia lea o mea uma e siitia ai lo latou manuia e faavavau ma ia aua ne’i faia se mea e faalaleagaina ai.

O le tele o uiga taua o se faiaoga faamaoni ma lelei o le talalelei e o faatasi ma le alofa. Na aoao mai le perofeta o Mamona:

“E onosai le alofa, e agamalu, e le losilosi, e le faafe-feteina, e le saili e ia ana lava mea, e le faaitaitagofie, e le mafaufau i le leaga, e le fiafia i le amioleaga, ae fiafia i le faamaoni, e faatoatoa i mea uma, e talitonu i mea uma, e faamoemoe i mea uma, e onosai i mea uma.

“O lenei, . . . afai e leai se alofa ia te outou, e le aoga lava outou, aua e le uma le alofa. O le mea lea ia outou uumau ai le alofa, ua silisili i mea uma, aua e faaleagaina mea uma—

“A o le alofa moni, o le alofa mama lea o Keriso, e tumau ia e faavavau; o i latou uma foi ua maua ua i ai lea alofa i le aso gataaga, e lelei ia te i latou” (Moronae 7:45–47).

Faamatalaga Faaopopo

Mo nisi faamatalaga e uiga i le taua o le alofa atu ia i latou e te aoaoina, ia tagai i le lesona 2 o loo i le vasega o le Aoaoina Atu o le Talalelei (itulau 205–09).

MALAMALAMA IA I LATOU E TE AOAONA



Mafaufau i le lesona mulimuli na e aoaona atu. Ao e sauniuni ma tuuina atu le lesona, o le a se mea na e mafaufau i ai? Pe sa e mafaufau i mea o le lesona? Pe sa e mafaufau ia i latou sa e aoaona? O le a se tele o lou silafia i tagata uma taitoatasi na e aoaona? Afai e te le'i iloaina i latou, o le a se suiga o le a i ai i lau lesona pe afai e i ai sina mea e te iloaina ia i latou uma taitoatasi?

Na fetufaai mai e se fautua o le Perisitua Arona le faamatalaga lenesi:

“I le avefa ai ma se fautua o le korama a tiakono, na ou aoaona ai nisi o mea e uiga i tama e ta'i 12 ma le 13 tausaga le matutua. Ua ou malamalama i lu'itau, avanoa, malamalamaaga, ma fesili e tele ina fetufaai ai nei alii talavou. Ua ou malamalama o nei alii talavou uma taitoatasi e le'i leva talu ona latou mauaina le perisitua ma o loo aoaona le uiga o le faaogaina ma le agavaa.

“Na ou iloa foi tiakono uma lava taitoatasi—o mea latou te mananao i ai, o mea e le mananao i ai, o taleni, atugaluga, ma mea o loo tutupu i o latou olaga i le taimi nei lava.

“A'o ou saunia ia lesona ma aoao atu i tama, ou te taumafai lava e aoao atu mataupu o le talalelei i se auala e faatatau ai i lo latou malamalama ma lo latou iloa. Ina ia faa-aafia se tama se toatasi, e mafai ona ou tuuina atu se fesili e faatatau i se vaega o le lesona i le taalo i le soka. Ina ia fesoasoani i se isi alii talavou ina ia auai, e mafai ona ou faamatalaina atu se mea na tupu mai se toluapiga talu ai nei lea e fesoasoani ai e faamatalaina le faaogaina o se mataupu faavae o le talalelei. O lo'u malamalama i nei tama, ua sili ai ona ou mafaia

ona sailia auala e faatatau ai lesona taitasi ia i latou.”

Aoaona o Uiga ma Tulaga Taatele o i Latou e te Aoaona

E ui lava ina tulaga ese tagata uma taitoatasi, ae o tagata uma e te aoaona, e tusa po o tagata matutua, talavou, po o tamaiti, e tele foi mea e tutusa ai. O le mea muamua ma le silisili, o tagata uma lava o se atalii po o se afafine o le Tama Faalelagi. O tagata uma e i ai sona malosiaga faalelagi. E tofu mananao i latou uma ia lagonaina le alofagia. Latou te mananao uma foi e maua le lagona o le lagolago mai o isi ma talisapaia o latou sao.

E faaopoopo atu i nei uiga taatele, o i latou o loo e aoaona atonu e i ai ni o latou aafiaga e tutusa ai. Mo se faaitaiga, o le toatele o tagata i se vasega a tagata matutua o Mataupu o le Talalelei, o ni matua ua maoae le poto masani ma ni malamalamaaga i le tausiga o a latou fanau. I korama a toaina, e toatele ua maea a latou misiona faafaifeautalai. E toatele faitaulaga sili o loo auuina atu i tofiga faale-autaitai i totonu o le uarota po o le siteki. E toatele alii ma tamaitai talavou o loo aoga i le aoga e tasi po o ni aoga foi e faapena.

O le a i ai pea lava se mea e tutusa ai i latou o loo e aoaona. E tataua ona e iloaina uiga ma mea na e tutusa ai i latou ma saili ni auala e faaoga ai na uiga tutusa. A e faia lenesi faiga, o le a latou lagonaina le pa'i atu o au lesona ma e fetau ma mea o loo latou manaomia ma mea e fiafia i ai. O le a sili atu lo latou auai i faatinoga ma o le a tele foi ni manatu latou te faaali atu e aunoa ma le popole.

Mo faamatalaga e faatatau i uiga tutusa o vaitausaga eseese, tagai i le vaega I, “Aoaona o Vaitausaga Eseese” (itulau 114–31).

O le Iloaina o Tagata Taitoatasi e te Aoaona

E ui lava o tagata e te aoaona e tele ni uiga e tutusa ai, ae latou te malaga mai i ni siosiomaga ma ni tulaga e matuai eseese lava. E leai ni tagata se toalua e tutusa lelei. E eseese mea latou te malolosi ai, o mea e fiafia i ai, ma mea e lē fiafia i ai. E ese foi mea e fiafia i ai, o avanoa, ma o latou luitau.

Ao avea o ia ma se sui risone, na saunoa ai faapea Elder Neal A. Maxwell:

“O se vaega o le Ekalesia, korama, po o se potuaoga e ono mafai ona aofia ai nisi o e ua le fiafia; o nisi o loo toe faia se iloiloga, ma le tiga, ma le taua o lo latou sootaga i le Ekalesia; o nisi e na o le faatasi ona auai mai ma o loo faavae lo latou lumanai ma uiga i le Ekalesia i mea na latou oo i ai i se Aso Sa se tasi’; o nisi ua leai so latou maelega; ma le tele . . . o tagata ua aoaina lelei o e ua latou maua le olioli ma le alualu i luma i totonu o se Ekalesia paia ua tumu i tagata augavaivai o e ua mafai ona latou taulimaina faanoanoaga.

“Ina ia lē faale-tagata pe faaoga le faiga lē faailoga tagata . . . mo taitaiga ma le aoao atu o ia ituaiga o tagata taitoatasi eseese, o loo manino mai ai e le tataua ona ‘galue ma le naunautai’ pe mātele i le faiga o le taitaiga po o le aoao atu. O le taitaiga ma le aoao atu e faalēāno i ai, o lona uiga e manatu le tagata e tau ina faataunuu tulaga faavae manaomia o lona valaauga i le avea ai ma se taitai po o se faiaoga. O sea ituaiga taitaiga e leai se aoga i eseese o tagata taitoatasi ma e leai se uiga, ma se mafanafana mo le tagata lava ia” (“ . . . *A More Excellent Way*” [1973], 56–57).

Ao amata ona e iloa ma malamalama i tagata taitoatasi, o le a sili atu ai foi ona e saunia e aoao atu au lesona lea e faafetaiaia ai o latou tulaga taitoatasi. O lenei malamalamaaga o le a fesoasoani ia te oe e saili ai ni auala e feso-

soani ai i tagata taitoatasi ia auai i talanoaga ma isi gaoioiga e aoao mai ai (tagai i le “Aapa Atu i le Tasi,” itulau 37–38). O le a e iloaina po o ai e gafatia ona taliina ni fesili patino, po o ai e mafai ona avatu ni manatu i se tala e faatupuina ai le faatuatua po o se tulaga patino faaletagata lava ia, po o se tasi e i ai se mea na oo i ai e lagolagoina ai le faamoemoega o se lesona patino. O le a sili atu ona e mafai ona iloiloia ia tali e tuuina mai i talanoaga ma fetu-unai i ai au lesona.

Manatunatu i Mea e Tutusa ma Eseese Ai A’o e Saunia Au Lesona

Mafaufau i le isi lesona o le a e aoaina atu. Taumafai e pu’e se ata i lou mafaufau i le faatulagaga ma tagata taitoatasi o e o le a i ai iina. Atonu e oo mai i lou mafaufau se tagata e nofo lava i le mea e tasi i vaiaso taitasi. O le a se mea e te iloa e uiga i lena tagata lea e mafai ona fesoasoani ai ia te oe e fuafua po o le fea vaega e faamamafaina i le lesona? O a ni mea na oo ia te ia lea atonu e fesoasoani ai i se isi ina ia malamalama lelei i se mataupu faavae o le talalelei? O lou malamalama i nei mea o le a aafia ai au faaiuga ao e saunia ma tuuina atu au lesona. O le mafuaaga lea e moomia ai lou faia ia sili atu nai lo le na ona malamalama i vaega o le lesona; e moomia ona e malamalama i tagata o loo e aoaina—o ni fanau a le Atua, o ni tagata o lo latou vaitausaga, ma o ni tagata taitoatasi.

AAPA ATU I LE TASI



O se faatonu o le faaleleia o faiaoga na ia lipoti maia le tulaga lenei:

“Na talosagaina au ina ia ou auauna atu o se faiaoga o se vasega mo faiaoga uma i le Aoga Sa. Na ou iloa o le a ou aoaoina tagata e i ai ni o latou uiga patino, siosiomaga, ma manaoga e matua eseese o le tasi mai le isi. O se tasi o i latou o se faiaoga atamai tele o le e masani ona galulue ma le autalavou. O se tasi e foliga mai e to’afilemu lava i le avefa ai ma se faiaoga, ma e na te lagonaina lelei lava lona le atoatoa. O se tasi uso sa maasiasi e oo mai ona e le tele sona iloa i tusitusiga paia.

“Na ou mafaufau ou te manaomia se auala e aapa atu ai ia i latou uma taitoatasi. Ao le’i amataina le lesona muamua, na ou tofia se tasi o uso sa faaletonu i le faaogaina o tusitusiga paia e aoao atu ai, ina ia talanoa faapuupuu e uiga i le faia o se fuafuaga faaletagata mo le sutesueina o le talalelei. Na ou maua ai se avanoa e feiloai ai ma ia i fafo o le vasega ma faailoa atu i ai lo’u lagona faatuatuaina o ia. I le gasologa o le lesona na ou uunaiina ai le faiaoga atamai e fetufaai mai nisi o ona malamalama e uiga i le aoaoina atu. Ma sa ou maua ai le avanoa ou te faafetai atu ai i le tuafafine sa tau leai sona faatuatuaina o ia lava mo le molimau faamaualalo sa ia tuuina atu i le isi vasega i nai vaiaso ua tuanai atu. Sa lelei le tali mai a i latou uma e toatolu.

“I le gasologa o lena lesona na ou maitauina ai se isi faiaoga o loo nofo ese mai le toatele. Na ou fuafua ou te asiasi atu ia te ia pe a maea le vasega, ma ou faaali atu ia te ia lo’u fiafia ia te ia ma talosagaina o ia pe mafai ona ou fesoasoani i se galuega ua ou tuuina atu i ai. O vaiaso taitasi ou te

sailia ai lava ni avanoa e aapa atu ai i tagata uma taitoatasi i totonu o le vasega.

“Ina ua amata ona solosolo lelei le vasega, na manino mai ai ia te au o se vaega tulaga ese lenei e le masani ai. Sa latou auai uma lava i ni talanoaga olaola ma le fetufaaiina o ni mea na oo i ai. Sa foliga mai sa afaatasi i latou i le alofa. Sa mafai ona ou iloaina ai, o le tele lava ona ou taumafai e aapa atu ma auauna atu ia i latou taitoatasi, o le tele foi lena o lo latou naunau e faalogo ma fetufaai ma isi. A’o o’u toe tilotilo i tua, ua ou iloaina ai le taua tele o se taumafaiga faigofie o le faalauteleina atu lea o lo’u tagata ia i latou taitoatasi ua mafai ai ona avea ma mea sili ona taua ua ou faia a’o avea ai o se faiaoga o lena vasega. E foliga mai ua musuia ai i latou ina ia faia foi faapea mo isi.”

O se vaega o lau galuega i le avefa ai ma se faiaoga o le talalelei, o le fesoasoani lea i tagata o loo aoaoina ina ia malamalama ma lagonaina le alofa o le Tama Faalelagi mo i latou. O lenei mea e le mafai ona faia na o upu. E moomia ai le aapa atu i tagata taitoatasi—o i latou e masani ona e vaai i ai, o i latou e seasea ona e vaai i ai, ma i latou e te le vaai i ai e aunoa ma ni taumafaiga faapitoa i ai. E moomia ai le aapa atu ia i latou e tusa lava pe le āno mai, pe le fiafia, pe tete. Ua apoapoi mai le Alii ia i tatou ina ia manatua “e taua tele le aoga o agaga i le silafaga a le Atua” (MFF 18:10).

Aapa Atu i Tagata Taitoatasi Pe a Outou Potopoto Faatasi

E tusa lava pe e te aoaoina ni tagata se toatele i le taimi e tasi, e mafai lava ona e aapa atu i tagata taitoatasi. Mo se faaitaitaiga, e te aapa atu i tagata taitoatasi pe a e faafeiloaiina ma le alofa i latou i le amataga o le vasega. O nai uiga laiti faapena e mafai ona faia ai se eseese taua.

E te aapa atu foi pe a e avea le auai atu o se tulaga e faatosina ma saogalemu. I afiafi faaleaiga ma totonu o vasega a le Ekalesia, e mafai ona e fesoasoani ia i latou o loo e aoaoina ina ia saunia se vaega o le lesona. E mafai ona e fuafuaina ni lipoti faapitoa, pese faapitoa, po o ni fesili e talanoaina, e iloa ma tosina mai ai taleni a tagata taitoatasi. Mo se faaitaitaiga, o se tasi uso lē

toaga e lelei lona leo sa faasolosolo malie lava ona toe malosi mai i le Ekalesia aua sa fai ma valaaulia o ia e pese i vasega ma isi faatasiga a le uarota.

E ootia tagata taitoatasi pe a faailoa aloa'ia o latou sao. E mafai ona e faia se taumafaiga faapitoa ina ia faailoa atu ai faamatalaga a tagata taitoatasi, afai e mafai, ia avea faamatalaga o se vaega o talatalanoaga a le vasega. O nisi taimi, e fesoasoani le toe tuuina atu o ni fesili ma faamatalaga a se tasi, e lagona ai ma malamalama tagata uma.

Aapa Atu i Isi Taimi

E tataua ona e sailia auala e aapa atu ai ia i latou e te aoaoina. O mea e te faia mo tagata i fafo atu o le faatula-gaga faaleaoaoga e mafai ona faia se suiga tele i o latou uiga faaalua i le suesueina o le talalelei. E mafai ona e faaaluina le taimi e faatasi ai ma tagata taitoatasi o le aiga. E mafai ona faaavanoa lou taimi e talanoa ai ma tagata o le vasega pe a e vaai i ai. E mafai ona e uunaiina ma fesoasoani ia i latou i taimi o faigata, manatua ni mea taua e tutupu i o latou olaga, asiiasi i o latou fale, ma auai i gaoioiga o loo auai atu i ai i latou.

Na faamatala mai e Peresitene Monson le tala lenei:

“O Louis Jacobsen . . . o se tama a se tamaitai Tenimaka ua oti lana tane. O ia o se tagata e puupuu, e faale foliga

lelei ma e masani lava ona fai i ai ulaga a tagata o le latou vasega. I le Aoga Sa i se tasi taeao o le Sapati, sa faapea ona ula ai tamaiti i lona ofuvae sa fonofono ma lona ofutino masaesae. Ina ua ma Louis e tagi, o lea na sola ese ai o ia mai le falelotu, ma malolo ai i fafo i le pa. . . . E tafe se vai manino lava i le alavai e pito atu i le mea sa nofonofono ai Louis. Sa ia to a'e mai totonu o lana taga se fasipepa o loo i ai se faasologa o lesonea o le Aoga Sa, ma sa tago ai loa ua fai ai se vaa, ma faatafeafea i luga o le vai. E tusa ai ma le tulaga mafatia o lona loto o se alii talavou, na faapea ai ana upu maumaututu, “Ou te le toe foi.”

“Sa faafuasei lava i le taimi a o maligi loimata o Louis, na ia vaaia ai i le vai le ataata o foliga o se tagata matua ma o loo laei lelei. Sa ea i luga ia Louis, ma sa ia vaaia ai ia George Burbidge, le ta'ita'i o le Aoga Sa.

“Sa fesili atu lenei taitai agalelei, “E mafai ona ou nofo atu i ou tafatafa?”

“Sa lue atu le ulu o Louis ma faapea atu ua lelei. . . . E tele nisi vaa na faia ma faatafeafea a'o faia le talatalanoaga. Ina ua maea sa tulai i luga le taitai, ma uumau le lima o le tama ma la toe foi atu i le Aoga Sa” (i le Conference Report, Ape. 1977; po o le *Liahona*, Oketopa 1977, 76).

4

FESOASOANI I TAGATA FOU MA TAGATA LE TOAAGA

Na apoapoi mai Peresitene Gordon B. Hinckley:

“E le o se mea faigofie le avea ai ma tagata o le Ekalesia. I le tele lava o tulaga, e aofia ai le tuuese o mausa tuai, tuua o uo ma paaga ua leva, ma le laa atu i se faalapotopopoga fou e ese ma e lē fe’alofa’ia.

“Ona o le faatupulaia o le fuainumera o tagata liliu mai, e ao ona tatou faia se taumafaiga tele naua e fesoasoani ai ia i latou pe a latou mauaina lo latou ala. E manaomia e i latou uma taitoatasi ni mea se tolu: o se uo, o se matafaioi, ma ia faafaileleina ‘i le afioga lelei a le Atua’ (Moronaē 6:4). O lo tatou tiute ma le avanoa le sauniaina o nei mea. . . .

“O se galuega leni mo tagata uma. . . .

“Ou te aioi atu ia te outou uma taitoatasi ina ia outou fesoasoani faamolemole i leni galuega. E moomia a outou taumafaiga faauo. E manaomia le faatuatuaina o outou” (i le Conference Report, Ape. 1997, 66, 68; po o le *Liahona*, Iulai 1997, 57–58).

I le avea ai ma se faiaoga o le talalelei, e mafai ona e auuuna atu i tagata e le’i leva ona auai i le Ekalesia, po o e ua faatoa toe toaaga mai i le Ekalesia. E mafai ona e mulimuli i le fautuaga a Peresitene Hinckley e ala lea i le faauo atu ia i latou, ma tuuina atu avanoa ia i latou e auai mai i lesona, ma ia mautinoa o loo tausia lelei i latou i le afioga a le Atua. O nisi nei o fautuaga e fesoasoani ai ia te oe i le faia o leni mea.

“O Se Uo”

Ua fautuaina i tatou e le Au Peresitene Sili ina ia “faalautele atu le lima faaumea i tagata sailili ma tagata fou, ma saunia ia sootaga fealofani lea e fesoasoani ai ia i latou e faia ni fesuaiga faamasani i ni uo fou ma ni fautulagaga fou o le olaga” (“Fesoasoani i Tagata Fou,” auina atu faatasi ma le tusi a le Au Peresitene Sili, 15 Me 1997).

E mafai ona e fesoasoani i isi e faia leni fesuaiga e ala lea i le valaauliaina o i latou i le vasega, faafeiloai i latou i igoa pe a latou o atu, ma faailoa atu i latou i isi tagata o le vasega.

“O Se Matafaioi”

I vasega a le Ekalesia, o tagata uma lava o le vasega ua i ai le matafaioi o le tofu sao uma atu lea i se siosiomaga o le

aoaoga (tagai i itulau 83–84). Ae peitai, atonu e manaomia e tagata fou ma tagata lē toaaga se faamalosi faapitoa ina ia taliaina ai leni matafaioi. O loo lisiina atu i lalo ni nai manatu e fesoasoani ai ia i latou ia auai i lesona:

- I talanoaga a le vasega, ia tuuina atu ia i latou ia ni fesili e te iloaina o le a mafai ona latou taliina.
- Uunai i latou ina ia fetufaai atu a latou molimau ma ni mea na latou oo i ai i le aoaoina o upumoni o le talalelei.
- Ia valaaulia i latou e faitau leotele. Ina ia lava se taimi e saunia ai i latou, ia talanoa mamao atu i ai e uiga i mau po o ni mea e te manao ia i latou e faitauina.
- Valaaulia i latou e tatalo. Ina ia aloese mai le faafe-memeaiina o i latou, ia logo mamao atu leni valaaulia.
- Afai o loo e faia ni tofiga, ia vave fai ina ia lava se taimi latou te saunia ai. Ia ofo atu le fesoasoani pe afai e i ai ni a latou fesili.

A’o auai ia tagata fou ma tagata lē toaaga i talanoaga a le vasega ma isi gaoioiga e aoao mai ai, o le a tupu lo latou malamalama i le talalelei faapea lo latou naunau atu i le Alii ma Lana Ekalesia. O le a latou faamalosi foi ia te oe faapea isi tagata o le vasega.

“Tausia ‘i le Afioga Lelei a le Atua’ ”

O tagata fou faatoa liliu mai ma tagata ua toe malolosi mai i le Ekalesia e naunau lava e aoaoina le talalelei. E mafai ona e fesoasoani ia i latou ina ia faatumauina leni maelega ma faatupuina lo latou malamalama i le talalelei. Mafaufau i fautuaga nei:

- Faailoa atu lou maelega i le talalelei.
- Ia tuuina atu lau molimau.
- Faamatala atu i ai lou fiafia i tusitusiga paia.
- Ia faaalu se taimi tou te talanoa ai ma i latou i fafo o le vasega—ina ia faauo ia i latou ma ia mautinoa o loo latou malamalama i mataupu o loo e aoaoina.
- Faamatala atu i ai ni mea na e oo i ai a’o e ola ai i le talalelei.
- Uunai i latou e suesue e i latou lava ia tusitusiga paia.

AOAONA O I LATOU E I AI NI TULAGA LĒ ATOATOA



Na fetufaai mai e Elder Boyd K. Packer le mea lenei mai lona uluai tausaga muamua lava i le avea ai o se faiaoga o le seminare:

“I totonu o la’u vasega sa i ai se teineitiiti sa faaosesa lava ia te au ma sa foliga mai e le migao lava ona uiga. E le auai o ia i le faatinoga o lesona ma e faifai pea lava lona faalavelave i le vasega. I se tasi taimi, sa ou talosaga atu ai ia te ia ina ia tali mai i le vasega i se mea e leai se sauniuniga sa alu ai. Sa ia faapea mai ma le tautalaititi, ‘Ou te le faia.’

“Sa ou faatauana atu pea, ae sa faateleina foi lona musu. Sa ou tuuina atu se faamatalaga faavalevlea e faapea ‘o tamaiti uma lava e le fia tali mai o le a lē tuuina atu i ai ni togi po o ni maka.’ Ma sa ou mapuea ma faapea atu, ‘Se’i o tatou vaai la i ai. A leai, ia o le a oo i se isi tulaga.’

“I nai vaiaso na lumanai ai i se fonotaga a matua ma faiaoga na faamatalaina ai e lona tina lenei teineitiiti e ese le matamuli ma e le fiafia e auai i le faiga o se mea. E le o le amio matamuli ma le musua lea e faalavelave ia te au; ae o le tautalaititi ma le faatautee lea ou te atugalu ai.

“Ae o le mea e laki ai, a’o le’i mafai ona ou faamatalaina atu lona tautalaititi i lona tina, sa toe faapoopo mai faapea lona tina, ‘E mafua ona o le faaletonu o lana tautala.’

“Ona o lo’u ofo tele na ou fesili atu ai po o le a lena mea. Sa faapea mai le tina, ‘Oi, e te le’i maitauina lava?’ ‘Ou te le iloa!’ ‘E toetoe lava na te faia mea uma, ina ia taofia ai o ia mai le auai i le faatinoga o ni mea i ni vaega,’ na faailoa mai ai e lona tina ia te au. ‘E maasiasi o ia i le faaletonu o lana tautala.’

“Ina ua maea le fonotaga ma lona tina sa ou lagonaina lo’u maasiasi! Sa tatau ona ou lagonaina o loo i ai se *mafuaaga* e faapea ai ona uiga. Sa ou faaluina lena tausaga e matuai faaatoatoa ai lo’u salamo. Sa ma ta-

latalanoa ma le teineitiiti ma amata ona ou faalatalata maia o ia. ‘O le a ta galulue faatasi i lenei mea,’ sa ou fai atu ai ia te ia.

“A’o le’i maea le tausaga sa tali mai o ia i le vasega ma sa auai e le aunoa i le faatinoga o mea e fai, faatasi ai ma le fesoasoani ma le lagolago mai a isi tamaiti o le vasega” (*Teach Ye Diligently*, lomiga toe iloiloina [1991], 92–93).

I le taimi o Lana galuega i la le tino nei, sa faailoa atu ai e le Faaola le alofa tele i tagata o e na i ai ni tulaga lē atoatoa o le tino ma le mafaufau. Na ia tuuina atu ia i latou le faamoemoe, malamalama ma le alofa. A’o e aoaoina ia tagata faapea, e tatau ona e mulimuli i Lana faataitaiga. Taumafai e aua ne’i i ai ni ou manatu faaletonu i ni o latou tulaga lē atoatoa. Ia e malamalama e lē tutusa tagata uma.

Faatasi ai ma le alofa ma le magafagafa, e mafai ona e fesoasoani i tagata o le vasega e i ai ni tulaga lē atoatoa ina ia auai i lesona. Atonu e manaomia ona outou galulue faatasi ma isi o loo e aoaoina ina ia fesoasoani ia i latou ia malamalama ma taliaina i latou e i ai ni tulaga lē atoatoa.

O loo tuuina atu i lalo nisi o ituaiga eseeese o tulaga o le lē atoatoa ma auala e mafai ona e fesoasoani ai i tagata o le vasega e faapea.

Faaletonu le Faalogo

O le faaletonu o le faalogo e mafai ona fesuisui mai le tau le lelei o le faalogo i le matuai logonoa atoa. O nisi tagata e mafai ona lagona lelei ma malamalama i upu o loo tautalagia i le faaaogaina lea o mea faalogo, ae o isi e tatau ona faaoga ia le gagana o taga po o le maitauina o laugutu o le tagata o loo tautala ina ia malamalama ai.

Afai e te iloina se tagata o se vasega e faaletonu le faalogo, ia matuai gauai faapi-

toa atu ma nofouta mo ia. E pei ona manaomia ai, ia feiloai ma le tagata ina ia iloilo ai po o fea le nofoaga talafeagai mo ia e nofo ai ina ia mafai ai ona mulimuli i talanoaga ma gaoioiga. Atonu e taua mo le tagata le nofo i se mea e faigofie ona ia iloaina atu ai oe a'o e tautala. Atonu e sili ia te ia le nofo i le isi itu o le potu nai lo le isi itu. Ia suesueina nei tulaga uma i se agaga o le fia fesoasoani atu ma le faauo ma se auala e faaalua ai lou naunautai mo le tagata ina ia auai i le vasega.

Faaletonu o le Gagana ma le Tautala

O le faaletonu o le gagana ma le tautala e aafia ai le malosiaga o le tagata e fegalealeai ma fesootai ai ma isi. O le le atoatoa e mafai ona itiiti pe matuia foi, ma e mafai ona aafia ai soo se vaitausaga. O tagata taitoatasi e faaletonu le gagana e le mafai ona malamalama lelei i upu e tautalagia ma tusitusia. E mafai ona i ai se faafaigata ia i latou i le fauina o upu ma fuaiupu e faailoa mai ai ni manatu. O nisi tagata e i ai ni le atoatoa i le gagana e taumafai e nana, ae o isi, aemaise lava i fanau, latou te le iloa.

Afai e te talitonu o i ai se tagata o le vasega sea ituaiga tulaga lē atoatoa, ia faaeteete i le valaauliaina o lona tagata e tu i luma o le vasega. Ia faailoa atu i le tagata lou nauautai ia te ia, ma aoao atili ina ia e iloa le malosi na te gafatia. E mafai ona e sauniaina ni gaoioiga faalea'oa'oga e fesoasoani i le tagata e tuu mai ai sona sao e aunoa ma le maasiasi, e pei o talanoaga faavaega lea e galulue faatasi ai o ia ma tagata onosai ma agalelei o le vasega. Ao faasolo ina e masani i le tagata ma a'o agaigai malie foi i luma lona lagona mautinoa, ia saili nisi avanoa mo le tagata e tuu atu ai sona sao i le vasega. Fesoasoani i le tagata e faailoa mai laasaga e naunau o ia e faia ina ia maua ai e ia faalogona lelei mo le faatinoina o mea e fai.

Tulaga Lē Atoatoa o le Mafaufau

O se tagata e i ai se tulaga lē atoatoa i le mafaufau e mafai ona telegese le atina'eina o lona malosi e fesootai mai ai, fegalealeai ai, suesue ai, galue ai, pe tutoatasi ai foi. O nisi tagata e lē atoatoa le mafaufau e moomia le lagolagoina i vaega uma lava o le olaga, ae o nisi ua na o ni nai vaega patino e manaomia ai.

Ia nofouta ma faauo i se tagata o le vasega e lē atoatoa le malosi o le mafaufau. Talanoa ia te ia i se auala masani i ni mea e masani ai. Ia valaaulia le tagata e auai i le faatinoga o mea e fai i le vasega i ni auala e lelei mo ia. E mafai ona e fesoasoani i le tagata ia sauniuni mamao atu. E mafai ona e vaevaeina le vasega mai lea taimi i lea taimi i ni vaega pe taitoalua foi lea e mafai ai e le tagata ona galulue faatasi ma tagata onosai ma loto fesoasoani o le vasega.

Faafaigata ona Faitau

O nisi tagata taitoatasi e faafaigata ona faitau. Atonu e i ai ni faafitauli e le mafai ai ona faitau po o se isi tulaga e faigata ai ona faitautusi. E mafai ona latou tauivi e faitau i se gagana e le masani ai i latou. E mafai ona faaletonu le

latou vaai mo le faitau. Ia po o le lava foi o le atamai e faitau ai.

Afai e te iloaina se tagata o le vasega e faafaigata ona faitau, ia matuai faaeteete lava i le auala e te talosaga atu ai ia te ia ina ia auai i le faatinoina o se lesona. Aua e te faatupuina le maasiasi e ala lea i lou fesili atu i le tagata e faitau leotele pe afai e le ofo mai o ia. Saili ina ia faamasani lelei i le tagata. Aoao atili ia e iloaina le tulaga e gafatia e le tagata ma lona naunau e faitau. Afai e naunau le tagata e faitau ae manaomia se taimi e sauniuni ai, e mafai ona e fesoasoani ia te ia e sauni e faitau ni fuaiupu i lesona o loo lumanai. I nisi tulaga, e mafai ona e vaai i ni auala e faaaofia ai le tagata e aunoa ma lou fesili atu i ai e faitau. Ia talanoaina nei tulaga uma faatasi ma le tagata. Ia galulue faatasi e sailia ni auala e sili ona lelei mo ia e auai ai i le faatinoina o mea e fai i le vasega.

Tulaga Faaletonu o le Vaai

O tulaga faaletonu o le vaai e mafai ona amata mai le faale-lelei o le vaai e oo atu i le matuai tauaso atoatoa lava. O nisi tagata e faaletonu le vaai e mafai ona iloa lelei mea pe afai latou te nonofo i le pito i luma o le vasega pe fai foi ni a latou mata tioata. O isi tagata e faalagolago i le faalogo ma mata'itusi patupatu mo lo latou aoaoina. Fesoasoani ia i latou na e i ai ni tulaga faaletonu o le vaai e nonofo i le mea e mafai ai ona sili atu le lelei o le latou aoao lelei ma auai ai i le vasega. Ia talanoa ma i latou i le agaga o le faauo, e uiga i o latou manaoga ma le mea e mafai ona e faia e fesoasoani atu ai.

Faamatalaga Faaopoopo

O faamatalaga na muai tuuina atu ua na o se aotelega puupuu. Afai e te iloaina se tagata o le vasega e i ai sona tulaga faaletonu po o le lē atoatoa foi, ia fefautuiai ma le tagata faapea ona matua ma uo i le auala e mafai ai ona e fesoasoani. Faauo i le tagata o le vasega. E mafai foi ona outou fefautuiai ma taitai. Saili le taitaiga a le Agaga ina ia fesoasoani ia te oe ia iloa le auala e fesoasoani ai i le tagata ia faamanuiaina ma olioli ai i lau vasega.

Mo nisi faamatalaga e tusa ai ma le auaua atu i tagata e i ai ni tulaga lē atoatoa, tagai i itulau 349-53 i le vaega o le "Aoaoina Atu o le Talalelei ma le Taitaiga" o le *Tusitaulima o Faatonuga a le Ekalesia*.

Risasi mo Tagata e I ai ni Tulaga Lē Atoatoa

O tusi ma mea e fesoasoani ai mo tagata e i ai ni tulaga lē atoatoa o loo lisiina atu i le *Tusi o Mea e Faaogaina e le Ekalesia*.

O fesili e uiga i mea e faaogaina mo tagata e i ai ni tulaga lē atoatoa e mafai ona auina atu i le:

Members with Disabilities
Floor 24
50 East North Temple Street
Salt Lake City, UT 84150-3200
Telefoni: 1-801-240-2477

AOAO ATU I LE AGAGA

Afai tatou te maua le Agaga o le Alii e taitai ai i tatou, e mafai ona tatou aoao atu soo se tagata, e tusa lava pe o le a le lelei o a latou aoaoga i soo se nofoaga i le lalolagi. E sili atu le malamalama o le Alii nai lo soo se tasi lava o i tatou, ma afai o i tatou o Ana auauna, o loo galulue i Lona Agaga, o le a mafai ona Ia tuuina atu Lana savali o le faaolataga i tagata ma agaga taitoatasi.

Elder Dallin H. Oaks

6

O LE AGAGA, O LE FAIAOGA MONI LEA



O le lagona faagaetia o le Agaga Paia i se agaga e faalogo i le afiga a le Atua o le “mana lea o le Atua i le faatalitoniina o tagata” (MFF 11:21). Na aoao mai faapea Peresitene Iosefa Filitia Samita:

“O le Agaga o le Atua o loo talanoa atu i le agaga o le tagata e i ai le mana e ta’u atu ai le upumoni ma se aafiaga malosi ma le malamalama nai lo le upumoni e mafai ona ta’u atu i fesootaiga faaletagata e oo lava i ‘au o le lagi. O le Agaga Paia e moliooina atu le upumoni i vaega uma o le tino ina ia le mafai ona faagaloina” (Doctrines of Salvation, comp. Bruce R. McConkie, 3 volumna [1954–56], 1:47–48).

“Aua pe a tautala atu le tagata i le mana o le Agaga Paia, e moliooina ai i le mana o le Agaga Paia i loto o le fanauga a tagata” (2 Nifae 33:1). E leai se faiaoga faaletino, e tusa lava po o le a lona atamai ma le poto, e mafai ona aumaia faamanuiaga o le moli-mau ma le liuaina i le isi tagata. O le matafaioi lena a le Agaga Paia, po o le Agaga. E iloa e tagata le talalelei e moni e ala lea i le mana o le Agaga Paia (tagai Moronae 10:5; MFF 50:13–14).

O le Matafaioi a le Agaga i le Aoaoina Atu o le Talalelei

A’o tatou aoaoina atu le talalelei, e tatau ona tatou iloaina ma le lotomaulalalo o le Agaga Paia o le faiaoga moni lea. O lo tatou faamanuiaga o le auauna atu lea o ni meafaigaluega e mafai ona auala mai ai le aoaoga, molimau, faamafanafanaga, ma le musumusuga a le Agaga Paia. O lea la e tatau ai ona tatou agavaa e mauaina le Agaga (tagai i le “sailia le Agaga,” itulau 13). E tatau ona tatou tatalo mo le taitaiga a le Agaga a’o tatou saunia ia lesona ma pe a tatou aoao atu foi (tagai i le “Iloaina o le Agaga ma Mulimuli ai i Lau Aoaoga,” itulau 49–50). E tatau ona tatou faia mea uma e mafaia ina ia faatupuina ai se atemosifia ina ia mafai ai e i latou o loo tatou aoaoina ona lagona le oo mai o le Agaga (tagai i le “Valaaulia o le Agaga A’o e Aoa Atua,” itulau 47–48).

Na fautua mai faapea Elder Gene R. Cook o le au Fitugafulu: “O ai o le a faia le aoaoga? O le Fesoasoani. Ia mautinoa ia ‘aua ne’i e talitonu o oe o le ‘faiaoga moni.’ O se mea matuai sese lava lena. . . . Ia faaeteete ia aua ne’i e faalavelave i le Agaga. O le matafaioi autu a se faiaoga o le saunia lea

o le auala ina ia maua ai e tagata se feuta-gaiga faaleagaga ma le Alii. O oe o se meafaigaluega, ae lē o se faiaoga. O le Alii o Ia lea na te silafia ia manaoga o i latou o loo aoaoina. O Ia lea Na te mafaia ona faagaetia ia le loto o se tasi ma faamatua’ia ai lo latou suia” (address delivered to religious educators, 1 Set. 1989).

Ia Auauna Atu ma le Lotomaulalalo o ni Meafaigaluega i Aao o le Alii


E i ai taimi atonu e faaosoosoina ai i tatou ina ia tatou manatu o le a faalatalata atu tagata i le Tama Faalelagi ona o a tatou taumafaiga na o i tatou. Atonu tatou te faapea ane o a tatou faatauanauga ua talitonu ai i latou i le upumoni. Pe tatou te manatunatu foi ona o le lelei o a tatou faaupuga ma lo tatou atamamai i se mataupu patino o le talalelei o le a musuia ma faamalamalamaina ai i latou. Afai o le a amata ona tatou talitonu i mea faapea, ua tatou “faalavelave” i le mana o le Agaga Paia lea e faatalitoniina ai. E tatau ona tatou manatua pea le poloaiga a le Alii ina ia “talai atu le talalelei . . . ma le lotomaulalalo atoa, ma le faalagolago ia te [Ia]” (MFF 19:29–30).

A’o e saunia oe faaleagaga ma faailoa atu le Alii i lau aoaoga, o le a avea oe ma se meafaigaluega i Ona aao. O le a faalauteleina e le Agaga Paia au upu ma le mana.

Na aoao mai e Elder Richard G. Scott o le Korama a le Toasefululua le eseese i le va o se tagata lotomaulalalo o lē na te faatagaina le Agaga Paia e aoao atu ma se tagata faamaualuga o lē na faalagolago i lona lava malosi:

“I nai tausaga ua tuanai sa i ai so’u tofiga i Mekisiko ma Amerika Tutotonu e tali tuta lava i se Peresitene o le Eria. . . .

“I se tasi Aso Sa, . . . sa ou asiasi atu ai i [se] lotu perisitua a se paranesi lea sa tauivi ai se perisitua Mekisiko e le’i a’oga ina ia fetufaai atu ia upumoni o le talalelei. Na ilogofie lo latou pa’i atu i lona olaga. Na ou maitauina lona matuai naunau e fetufaai atu na mataupu. Na ia iloaina lo latou taua tele i uso sa ia alofa i ai. Sa ia faitau mai le tusi lesona, ae peitai o lona mafaufau o le alofa mama o le Faaola faapea ma i latou o loo ia aoaoina. O lena alofa, faamaoni, ma lona faamoemoega mama atoatoa, na mafai



ai ona faatumulia le potu i le aafiaga o le Agaga Paia. . . .


“Ina ua mavae lena, sa ou asiasi atu i le vasega a le Aoga Sa o le uarota e lolotu i ai le matou aiga. Sa tuuina atu e se polofesa aoaoina lelei le lesona. O le tulaga na ia ai, sa matua iloga le eseese pe a faatusatusa i le vasega sa ou fiafia i ai i le sauniga perisitua a le paranesi. Na foliga mai ia te au na faaaoga e le faiaoga ma le mautinoa ni mau ma ni faaitaiga e le masani ai e faalauteleina ai lana atu na filifilia—o le soifuaga o Iosefa Samita. Na oo mai ia te au se lagona faapea ua ia faaaogaina le avanoa e aoao atu ai e faagaetia ai le vasega i lona atamai tele. . . . E le’i foliga mai na faamoe-moe e fetufaai atu mataupu faavae e pei o le taitai perisitua lotomauualalo. . . .

“ . . . O le lotomauualalo o le taitai perisitua Mekisiko na manaomia i le avea ai o se meafaigaluega mo le fesootaiga faaleagaga o le upumoni” (*Helping Others to Be Spiritually Led* [lauga na tuuina atu i faiaoga faalelotu, 11 Aok. 1998], 10–12).

Faamatalaga Faaopoopo

Mo nisi faamatalaga e uiga i le aoao atu i le Agaga, ia tagai i le lesona 3 i le vasega o le Aoaoina Atu o le Talalelei (itulau 210–14).

AOAO ATU FAATASI MA SE MOLIMAU



“O le malosiaga aupito mauualuga, faatalitonuina, ma faaliuaina o le aoaoina atu o le talalelei e iloa gofie,” na saunoa i ai ia Elder Bruce R. McConkie, “pe afai e faapea atu se faiaoga musuia, ‘Ou te iloa i le mana o le Agaga Paia, o faaaliga foi mai le Agaga Paia i lo’u agaga, e moni aoaoga na ou aoaoina atu’ ” (*The Promised Messiah* [1978], 516–17).

Na aoaoina e Peresitene Polika Iaga lenei upumoni ao le’i papatisoina o ia o se tagata o le Ekalesia. O le molimau a se faifeautalai lotomauualalo na fesoasoani ia te ia e lagonaina ai le mana faaliliu o le Agaga Paia. Na ia toe faamatalaina mulimuli ane, “Ina ua ou vaai i se tagata e leai sona tomai e tautala ai, po o ni taleni mo le tautala ai i mea faitete, o le na o le pau le mea na ia fai mai ai, ‘Ou te iloa, e ala i le mana o le Agaga Paia, e moni le Tusi a Mamona, ma o Iosefa Samita o se Perofeta a le Alii,’ o uunaiga a le Agaga Paia mai lena tagata na faapupulaina ai lo’u atamai, ma o le malamalama, malmalu, ma le tino ola pea sa i o’u luma lea” (i le *Journal Discourses*, 1:88).

Na toe faamanatu atu ia Peresitene Iaga le mana o le molimau i ona popo fou i le avefa ai ma se faifeautalai. Na ia maitauina: “Sa na o sina taimi puupuu lava na ou faimalaga atu ai ma molimau atu i tagata, ae ou te le’i aoaoina lenei mea moni, lea atonu e mafai ona outou faamaoniai mai i aoaoga mai le Tusi Paia seia oo i le aso faamasino, ma e seasea lava ona faatalitonuina ai tagata, ae o le a le faaliliuina mai ai foi i latou. Atonu ua outou faitau mai le Kenese e oo i le Faaaliga, ma faamaonia ai i aoaoga uma o loo i ai, le leai o se aafiaga o le faaliliuina mai ai o tagata. E leai se mea e sili atu nai lo se molimau e ala lea i le mana o le

Agaga Paia o le a aumaia ai le malamalama ma le iloa ia te i latou—aumaia ai i o latou loto le salamo. A aunoa ma lena, e lē aoga” (i le *Journal of Discourses*, 5:327).

O le a ea le Molimau?

E taua tele le malamalama po o le a se molimau ae o le a foi se mea e le o se molimau. Muamua, e le o se apoapoiga, e le o se valaau ina ia salamo, e le o se faamatalaga o se malaga, e le o se lauga, po o se faatonuga. O se ta’utinoga faigofie ma tuusa’o o le talitonuga—o se lagona, o se faamautinoaga, o se manatu. E masani lava ona faapuina i le tagata muamua, *Ou te*, ona sosoo mai ai lea ma le veape malosi e faailoa mai ai le talitonuga, e pei o le “Ou te iloa . . .,” “Ou te molimau atu . . .,” “Ou te tuuina atu la’u molimau e . . .,” po o le “Ou te mautinoa. . .” Atonu ua e faalogo i ni molimau faapitoa ia Iesu Keriso o faaogaina ia upu “Ou te tuuina atu ia te outou la’u molimau faapea . . .” po o le “Ou te molimau atu. . .” O molimau e masani ona mamana pe a faapuupuu, manino, ma tuusa’o.

Mafaufau i faataitaiga nei mai tusitusiga paia. Ia maitauina o nei molimau o loo aofia mai i vaega o isi savali—i le amataga, i le ogatotonu, po o le faaiuga.

“O le molimau tupito mulimuli lenei i mau uma lava, ma te faia ia te ia: O loo soifua o ia! Aua na ma vaaia o ia, i le itu tau-matau lava o le Atua; na ma faalogoina foi le siufofoga o molimau mai o ia lava lea o le Toatasi na Fanaua e le Tama—e mai ia te ia, ma ui mai ia te ia, ma o ia, na foafoaina ai lalolagi uma, o e nonofo ai foi o atalii ma afafine na fanaua e le Atua” (MFF 76:22–24; faaopoopo i ai le faatusilima).

“*Ua ou iloa lava a’u, o mea uma ou te fai atu ai ia te outou i mea e oo mai, ua moni lava ia; ou te fai atu ia te outou ou te iloa e afio mai Iesu Keriso, ioe, o le Alo e toatasi ua fanauina e le Tama ua tumu i le alofa tunoa, ma le alofa, ma le upumoni*” (Alema 5:48; faaopoopo le faatusilima).

“O lenei foi, faauta, o a’u ou te molimau atu ia te outou, ua moni ia mea. Faauta, ou te fai atu ia te outou, *ua ou mautilino* e afio mai Keriso i le fanauga a tagata, e ave i ona luga solitulafono a lona nuu, e togisala foi o ia mo agasala a le lalolagi, aua ua fetalai mai ai le Alii le Atua” (Alema 34:8; faaopoopo le faatusilima).

“Aua *ua ou mautilino*, o i latou uma o e faalagolago i le Atua, e lagolagoina i latou i o latou tofotofoga, ma o latou tiga, ma o latou puapuaga, e faeaina foi i latou i le aso gataaga” (Alema 36:3; faaopoopo le faatusilima).

O isi faataitaiga o loo maua i le Iakopo 7:12, Alema 7:8 ma le 36:30, ma le Talafaasolopito o Iosefa Samita 2:25.

O le Avea o le Molimau ma se Vaega o Lau Aoaoga

Ina ia mafai ona aoao atu e ala i le mana o le Agaga Paia e faatalitonu ma faaliliuina mai ai, e tatau ona i ai sau molimau i le mea o loo e aoaoina atu. Na saunoa mai faapea Peresitene Tavita O. Makei: “Ua ave ma ou tiute le aoao atu, o Iesu o le Togiola o le lalolagi, o Iosefa Samita o le Perofeta a le Atua, ma o ia i lenei tisipenisione sa faaalitino mai i ai le Atua le Tama ma Lona Alo. E te talitonu ea i ai? E te lagona ea lona mea? O mafai ea ona faaalina mai ia te oe lea molimau? . . . Afai o lea, o le a faapea ona ave lona tulaga o le faasusuluina atu ma mea e tuuina atu ai le ola i tagata e te aoaoina. Ae afai e le o lona le tulaga, o lona uiga o le a matua leai lava se tulaga faaleagaga o tuputupu ae ai le Au Paia. . . . E faatoa mafai lava ona lelei le tuuina atu o a outou aoaoga e tusa ai ma mea o loo outou lagonaina” (*Gospel Ideals* [1953], 190).

E mafai ona e maua se molimau ma faaauau pea ona faamalasia e ala lea i le (1) suesue i tusitusiga paia ma aoaoga a perofeta o aso e gata ai, (2) tatalo, (3) anapogi, ma le (4) usiusitai i poloaiga a le Atua. O le a e iloaina foi o lau molimau o le a faamalasia pe afai e te saga fetufaai atu pea.

Ao e sauni e aoaoina atu ia lesone taitasi, ia tatalo mo le Agaga ina ia fesoasoani ia te oe ia e iloa le taimi e fetufaai atu ai ou lagona sili ona paia. Atonu e musuia oe ina ia tuuina atu soo lau molimau i le gasologa o le lesone, ae le na o le faaiuga.

O le Molimau e Musuia ai le Molimau

O le tuuina atu o le molimau e ala i mea e te tautala atu ai ma fai, o lou fesoasoani foi lona e uunaiina isi ina ia faamalasia a latou lava molimau. Na tusia e se faifeautalaina faamisiona le tusi lenei i se alii sa ave ma ona faiaoga i le tausaga ua tuana'i ao le'i amataina lana auauaunaga faamisiona:

“Ou te iloa o oe o se tagata e le o sailia se viiga, mamalu, po o se tulaga lauiloa. Ae ou te faamoemoe o le a e faatagaina a’u e faamatala atu la’u faafetai faamaoni mo la tatou vasega lea sa tatou suesueina ai le Tusi a Mamona. Ou te manatuaina i lea taimi ma lea taimi lou molimau mai faapea e ui lava ina le amanaiaina e isi le Tusi a Mamona ona latou te manatu e le lelei le tusiaina pe mauualalo foi ona manatu, ae o le Tusi a Mamona e mau lona matagofie ma lona loloto ma e lē mafaatusalia. O totonu o le vasega ma la’u lava suesue i ai na ou fiafia ai i lenei tusi. Ou te manatuaina lo’u nofo ai i totonu o lau vasega, e na o le faatalitali i le tuuina mai o lau molimau i nisi o upumoni manino ma le faigofie. Ou te manatuaina ina ua tatou suesueina le Alema e 32 ma e tuu mai ai lau molimau i le auala e mafai ai e le fatu o le upumoni ona ola ma tupu i totonu o i tatou uma. Ina ua tuu mai lau molimau, na e faatagaina le Agaga e molimau mai ia te au i le moni o le mataupu faavae.

“O lenei la, ua tasi lo’u masina i le misiona, ma ua i ai sa’u molimau mumū i le Tusi a Mamona. O le mea na ou mauaina ua na o se tulaga faaleagaga o le a ou le ma’i-mauina. Na e taitaiina atu a’u i le laau o le ola. E pei o Liae, e leai se isi mea na e manao i ai nai lo le fesoasoani i isi ina ia tofo i ai. O le mea lona na sili ona ootia ai a’u—ua mafai ona ou vaaia ia faamanuiaga o le fua i lou olaga.”

VALAAULIA O LE AGAGA AO E AOAO ATU



I le avea ai ma se faiaoga, e mafai ona e saunia se siosiomaga e valaaulia ai le Agaga ina ia auai atu i lau aoaoga. Ona mafai lea e le Agaga ona molimau atu i le moni o mataupu o loo e aoaoina atu. O fautuaga nei o le a fesoasoani ia te oe e valaaulia le Agaga a’o e aoao atu.

Tatalo

Na fetalai mai le Alii, “Ia tatalo pea, o le a ou liligi atu lo’u Agaga i ou luga, ma o le a sili lou faamanuiga—ioe, e sili lava lenei i lo’oa e te maua o le lalolagi atoa ma mea uma e pala o i ai” (MFF 19:38). O le tatalo e uunaiina le faaaloalo ma fesoasoani ia i tatou uma taitoatasi ina ia saunia e aoaoina le talalelei. O i latou e te aoaoina e tatau ona latou auauai i le faiga o tatalo e amata ai ma faaiu ai ia lesona taitasi. I a latou tatalo, e mafai ona latou ole atu mo le taitaiga a le Agaga i le gasologa o le lesona ma a’o latou faaogaina foi upumoni latou te aoaoina.

Ao e aoao atu, ia tatalo i lou loto mo le Agaga e taitaiina oe, ina ia tatalaina loto o i latou o loo aoao, ma ia molimau atu ma musuia. Atonu e te valaaulia ia i latou o loo e aoaoina mai lea taimi i lea taimi ina ia tatalo i o latou loto mo oe i le avea ai ma se faiaoga ma mo i latou lava ma isi o e o loo tauivi e aoao (tagai 3 Nifae 20:1).

Afai e te aoaoina tamaiti laiti, e tele mea e mafai ona e faia e fesoasoani ai ia i latou ina ia lagonaina le faaaloalo ao latou saunia mo le tatalo. E mafai ona e faamanatu ia i latou ina ia nonofo ffilemu. E mafai ona e piilima e avea ma faaitaiga. E mafai ona e aoaoina atu le gagana o le tatalo, fesoasoani ia i latou e faaoga upu e pei o le *Afi*,

Afioga, e suitulaga i le *oe*. Seiloga ua mafai ona latou faaoga a latou lava upu, ona mafai lea ona e uunaiina i latou a o latou tatalo. E mafai ona e faafetai atu i tamaiti mo tatalo na latou faia ma faamalo atu i ai ma le loto e uiga i mea na latou ta’ua.

Aoao Atu Mai Tususiga Paia ma Afioga a Perofeta o Aso e Gata Ai

O aoaoga o loo i tusitusiga paia ma afioga a perofeta o aso e gata ai e i ai se mana tele e fesoasoani ai ia i tatou ia lagona ia aafiaga a le Agaga (tagai i le “O le Mana o le Upu,” itulau 52–53). Na fetalai mai le Alii:

“O nei upu e le mai le tagata e le a le tagata foi, ae a a’u lava; o le mea lea, tou te molimau atu ai e a a’u upu ia a e lē a le tagata;

“Aua o lo’u leo o loo tautala atu ai ia te outou; aua ua tuuina atu e lo’u Agaga ia te outou, ma o lo’u mana e mafai ai ona outou faitau atu ai le tasi i le tasi; ae ana le seanoa lo’u mana e le mafai ona outou maua ai;

“O le mea lea, tou te mafai ona molimau atu ai ua outou faalogo i lo’u leo; ma iloa a’u upu” (MFF 18:34–36).

Tuuina Atu le Molimau

Ao e tuuina atu lau molimau i mataupu na e aoaoina atu, e mafai e le Agaga Paia ona molimau atu i tagata taitoatasi i le moni o mea o loo e tautala atu ai (tagai i le “Aoao Atu Faatasi ma le Molimau,” itulau 45–46). Ia molimau atu i soo se taimi lava e musuia ai oe e le Agaga ina ia fai, ae le na o le faaiuga o le lesona taitasi. Ia saunia ni avanoa mo i latou o loo e aoaoina e tuu atu ai a latou molimau.

Fetufaaai Atu ni Mea Ua e Iloa

E masani ona faamalolosia a tatou molimau i ni mea na tatou oo i ai. Atonu na i ai se mea na e oo i ai na faamalosia ai lau molimau e talia e le Tama Faalelagi ia tatalo. Pe na faamanuiaina foi oe i lou usita’ia o se poloaiga. Afai e te fetufaaaiina atu na mea faapena, o oe lava o se molimau ola o upumoni o le talalelei, ma e mafai e le Agaga ona molimau atu ai i isi e moni o le mea na e tautala atu ai. E le gata i lena, e



tatau foi ona e uunaiina ia tagata o loo e aoaoina ina ia fetufaai mai foi ni mea na latou oo i ai pe a latou maua le lotomalie e fai ai (tagai i “Tala,” itulau 189–91).

Faaoga Musika

O musika e mafai ai ona faaalina mai lagona faaleagaga lea atonu e faigata ona tatou faaalina e ala i upu e tautala ai. Na saunoa mai Elder Boyd K. Packer e faapea “e mafai ona tatou lagonaina ma vave ona aoao e ala i musika . . . nisi mea o faaleagaga semanu e tuai lava ona tatou aoaoina” (“The Arts and the Spirit of the Lord,” *Ensign*, Aok. 1976., 61).

O loo aoao atu i viiga a le Ekalesia ma pese a le Peraimeri mataupu o le talalelei. E mafai ona e faaaogaina i soo se lesone e faatomua ai pe aotele ai foi se manatu. O pese a le Peraimeri e mafai ai ona tuu atu lelei i se tulaga faigofie e tamaiti a latou molimau. (Tagai “Musika,” itulau 181–83).

Mo manatu i auala e faaoga ai musika paia i sauniga po o fonotaga a le Ekalesia, i totonu o le aiga, ma lou lava olaga, ia faitau i upu tomua o loo i le tusipese (tagai *Viiga*, itulau ix–x).


Faali Atu le Alofa mo le Alii ma Isi

E mafai ona e faali atu le alofa mo i latou o loo e aoaoina e ala lea i le faalogo atu i ai ma le gauai ia i latou faapea ma lou naunau faamaoni i o latou olaga. O le alofa faaKeriso e i ai le mana e faamaluluina ai loto ma fesoa-soani i tagata ina ia gauai i musumusuga a le Agaga (tagai “O le Alofa e Faamaluluina ai Loto,” itulau 33–34).

Faamatalaga Faaopoopo

Mo nisi faamatalaga faaopoopo e uiga i le aoao atu e ala i le Agaga, ia tagai i le lesone 3 i le vasega o le Aoaoina Atu o le Talalelei (itulau 198–202).

O LE ILOAINA O LE AGAGA MA MULIMULI AI PE A E AOAO ATU



Afai na e saunia lelei oe lava, o le a faamalamalamaina ma taitaiina oe e le Agaga Paia a’o e aoao atu. E mafai ona e mauaina ni lagona faagaetia e faatatau ia i latou e te aoaoina, o mea e tatau ona e faamamafa atu i lou aoaoina o i latou, ma le auala e mafai ai ona lelei atoatoa lou aoao atu. O au taumafaiga filiga o le a faalateleina pe a e usitai ma le faamaualalo i musumusuga a le Agaga. O le a mafai foi ona e fesoasoania i latou e te aoaoina ina ia iloa ai aafiaga a le Agaga. O le a e saunia e molimauina le faataunuuiina o afioga a le Alii: “O lea, o le talai atu atoa ma le talia mai, e malamalama le tasi i le tasi, e faamanuiaina ma olioli faatasi i laua uma” (MFF 50:22).

O Le Iloaina o le Agaga

Na aoao mai Elder Dallin H. Oaks e faapea:

“E tatau ona tatou iloaina o le a fetalai mai le Alii ia i tatou e ala mai le Agaga i lona lava taimi i lana lava ala. . . . E le mafai ona tatou faamalosi mea faaleagaga.

“I le tele lava o tulaga, ‘o lana lava ala’ e le o se matuai faalavelave po o se malamalama punitia, ae o le mea o loo ta’ua e tusitusiga paia o le “leo itiiti ma le filemu’ (1 Tupu 19:12; 1 Nifae 17:45; MFF 85:6). . . . E moomia ona tatou iloa e seasea ona fetalai leotele mai le Alii. O Ana savali e toetoe lava e oo mai i se musumusu” (“Aoao Atu ma le Aoaoina i le Agaga,” *Liahona*, Me 1999, 10–24).

Pe a fetalai mai le Alii ia i tatou e ala mai i le Agaga, e mafai Ona ia “faia ia mu o [tatou] loto i totonu ia i [tatou]” (MFF 9:8). O lenei mu, na faamatalaina e Elder Oaks, e mautinoa lava “e faailoa mai ai se lagona o le mafanafana ma le filemu” (*Liahona*, Me

1999, 22). E tele lava ona tatou lagonaina le fiafia, olioli, ma le filemu (tagai Roma 15:13; Kalatia 5:22–23; MFF 6:23; 11:13).

Na faamatala mai e Peresitene Howard W. Hunter le auala e mafai ai ona tatou iloaitoina le eseese o faailoga o le Agaga:

“Ou te popole lava pe a foliga mai o lagona malolosi po o le maligi gofie o loimata e faatusatusa i le i ai o le Agaga. O le mea mautinoa lava ia o le Agaga o le Alii e mafai ona aumaia ai lagona malolosi, e aofia ai le loifofoga maligi, ae o lona faailoga i fafo e le tatau ona fenumiaia ma le i ai o le Agaga lava ia.

“Ua ou maitauina le tele o o’u uso i le tele o tausaga ma ua matou fetufaaia foi nisi o tulaga faaleagaga e le masani ai ma e le mafai ona tautalagia. O na mea na oo i ai e eseese uma lava, e faapitoa lava i lona ala, ma o na ituaiga taimi paia e mafai pe le mafai foi ona i ai ni loimata. E seasea lava ona i ai, ae o nisi taimi e o mai faatasi ma le matuai filemu atoatoa. O isi taimi e o mai faatasi ma le olioli. Ae masani lava ona aumaia faatasi ma se faailoga uiga ese o le upumoni, o se faaaliga i le loto. . . .

“Faalogo i le upumoni, ua’i atu i le aoaoga, ma tuu atu i faaaliga a le agaga ina ia oo mai i soo se ituaiga auala. Tumau i mataupu mautu; aoao atu mai se loto mama. Ona tuia lea o lou mafaufau ma le loto, ma mafaufau ma loto o au tamaiti aoga uma” (*Eternal Investments* [lauga na tuuina atu i faiaoga faalelotu, 10 Fep. 1989], 3).

E Mafai e le Agaga Ona Taitaia Oe a’o e Sauni e Aoao Atu

A’o e sauni ma le agaga tatalo e aoao atu, ao e susesueina ia tusitusiga paia, e oo lava

foi i le faia o au galuega i aso taitasi, ia tatala lou mafaufau ma lou loto i le taitaiga a le Alii. E mafai ona e maua se “taimi faafuaseia o manatu” mai le Agaga (Teachings of the Prophet Joseph Smith, sel. Joseph Fielding Smith [1976], 151). E mafai ona taitaiina oe e faamamafa atu ni mataupu patino. E mafai ona e maua se malamalama i le auala sili e tuuina atu ai manatu patino. E mafai ona e mauaina ni faataitaiga, lesona faatino, ma ni tala musuia i ni gaoioiga faigofie o le olaga (tagai i le “Sailia o Lesona i Soo Se Mea,” itulau 23–24). Atonu e te lagonaina le faagaetia ina ia valaaulia se tagata faapitoa e fesoasoani ia te oe i le lesona. Atonu e mafai ona toe faamanatu atu ia te oe se mea na e oo i ai lea e mafai ona e fetuفاai atu. Tusiitisi nei manatu i lalo, ma mulimulitai i ai ma le agaga tatalo.

Na faamatala mai e Elder C. Max Caldwell le mea lenesi: “I tausaga ua mavae na ou saunia ai e aoaoina le vasega i se mataupu na ou lagona e i ai se faigata faapitoa. I le po a o lumanai lea vasega, sa ou tatalo mo le taitaiga ona ou moe ai lea, ae sa faatalatala pea i lo’u mafaufau. Ina ua ou ala, sa oo mai se manatu faapitoa i lo’u mafaufau, ma sa ou faaali atu lena manatu i le vasega i se taimi mulimuli ane i le taeao. Ina ua uma le vasega, sa i ai se alii talavou na talanoa mai ia te a’u ma faapea mai, ‘O lena lesona sa faatatau mo a’u. O lea ua ou iloa ai nei le mea e tatau ona ou faia.’ Mulimuli ane, sa ou iloa, o lona auai i lena vasega o le taimi muamua lea na ia iloa ai le Ekalesia i le tele o tausaga. Sa taumafai loa o ia e faatulaga tatau lona olaga ma sa faia foi e ia se misiona ma le faamaoni. O le taimi nei ua iloa ai e ia le fiafia e maua mai i le tausaga o feagaiga faavavau o le aiga” (i le Conference Report, Oke. 1992, 40; po o le *Liahona*, Ian. 1993, 36).

E Mafai e le Agaga Ona Taitaiina Oe A’o e Aoa Atu

I lona tulaga lautele, o le a e aoa atu e ala i le Agaga pe a e mulimuli i mea na e saunia i ai ma le agaga tatalo ma le mafaufau atoa. I le faaopoopo atu i ai, e mafai e le Agaga ona musuia oe mai lea taimi i lea taimi ao e aoa atu. E pei ona folafola mai e le Alii, o le a tuuina atu ia te oe “i le itu-aso lava, ioe, i le minute lava, le mea e te lua fai atu ai”

(MFF 100:6). Atonu e te lagonaina se uunaiiga i se taimi ina ia tuuese se mea o se lesona pe faaopoopo atu foi se mea e te le’i sauniaina. Atonu e te lagonaina le faagaetia e tuu atu lau molimau pe valaaulia nisi e fetuفاai atu a latou molimau. Afai e tuuina mai e tagata o le vasega ni fesili, atonu e te lagonaina le uunaia o oe ina ia faataitiaese au sauniuniga ae talanoaina ma le manatunatu loloto ia na fesili. Ia mautinoa o nei musumusuga e mai le Agaga ae le mai fesili a tamaiti. Ia mulimulitai ma le faamaualalo i nei lagona. Ia faataga le Agaga e galue ia te oe ina ia pa’i atu i loto o e o loo e aoaoina.

E Mafai Ona e Fesoasoani i Isi Ina ia Iloa le Agaga

A’o e masani atili i le leo o le Agaga, o le a mafai ona e fesoasoani ia i latou o loo e aoaoina ia iloa le pa’i atu o le Agaga. Na saunoa mai Elder Scott e faapea, “Afai e leai se isi mea e te ausia i la outou fesootaiga ma tamaiti o lau vasega nai lo le fesoasoani ia i latou ina ia iloa ma mulimuli i musumusuga a le Agaga, o le a lē mafuatiaina lou faamanuaina o o latou olaga e faavavau ” (*Helping Others to be Spiritually Led* [lauga na tuuina atu i faiaoga faalelotu, 11 Aok. 1998], 3).

O Kristi, e valu tausaga le matua, sa auai atu ma lona tama i se fonotaga faapitoa a faifeautalai. O se vaega o le fonotaga, na faaali atu ai e lona tama ia ata o Iesu Keriso ma tuuina atu lana molimau i le Faaola. Ina ua maea le fonotaga, sa faliu atu Kristi i lona tama ma faapea atu, “Na toetoe a ou tagi.” Na iloa e lona tama sa lagonaina [e Kristi] le pa’i atu o le Agaga. Na ia tootuli i lalo, ma fusi mai ia te ia, ma ta’u atu ia te ia o na lagona o le malu o musumusuga a le Agaga Paia, o loo fesoasoani ina ia iloa ai e moni mea na ia faalogo i ai i lena po. Na ia tuuina atu lana molimau ia te ia faapea e mafai pea ona ia iloa se mea e moni e ala lea i lona iloina o lea lava faalogona malu e tasi.

Ia faaoga lelei soo se avanoa e fesoasoani ai i isi ina ia iloa ma ia loto faafetai mo le filemu ma le olioli lea e maua mai pe a ususitai i musumusuga a le Agaga.

IA AOAONA ATU LE MATAUPU

E le mafai ona ou faasaina oe; e le mafai ona e faasaina a'u; e le mafai ona faasaina e le isi o i tatou le isi, ae na o lo tatou faatauana o le isi ina ia maua le upumoni, e ala lea i le aoina atu. Pe a maua e le tagata le upumoni o le a faasaina ai o ia. O le a faasaina o ia ona o lona taliaina ma ola ai ae lē faapea ona ua aoina atu e se tasi ia te ia.

Peresitene Iosefa F. Samita

10

O LE MANA
O LE UPU

I le faaiuga o lana misiona e 14 tausaga i tagata sa Lamana, na faailoa atu ai e Amona e faapea, “Faauta, o afe e tele o tatou uso ua ia laveaiina ai puapuaga o seoli, ma ua aumaia i latou e vivii i le alofa togioala; o lenei foi, ona o le mana o lana afioga ua ia te i tatou” (Alema 26:13).

Ina ua iloa e Alema, le faitaulaga sili o sa Nifae, e faapea o tagata sa taua o sa Sorama ua latou vavaeeseina i latou mai sa Nifae ma ua aafia i latou i uiga amioleaga, “ona amata lea ona toe tigaina lona loto ona o le amioletonu a le nuu. Aua o le ala o le faanoanoa tele ia Alema, ua iloa le amioletonu i lona nuu.” E faapoopo atu i ai, sa auina atu e sa Sorama se autau matautia ia sa Lamana. O sa Nifae “sa matua matata’u ia sa Sorama ne’i feavea’i upu e sa Sorama ma sa Lamana, e ala mai ai le fasi tele i sa Nifae.” (Alema 31:1–4.)

I tulaga foi faapea, e toatele taitai e mananao e fetagofi i auupega ma o e tau. Ae o lona popolega mo ona uso sa Sorama, na fautua atu ai e Alema se auala e sili: “O lenei foi, ona ua aoga tele le talaiga o le upu i le taitaiina o le nuu e fai mea tonu; e moni, sa sili ona aoga ai i manatu o le nuu ai le pelu, po o se tasi mea ua oo atu ia te i latou; o le mea lea sa faapea ai Alema, e tatau ona latou tofotofoina, pe aoga i ai le afioga a le Atua” (Alema 31:5).

E mafai e le afioga a le Atua ona i ai se aafiaga mamana. O nisi taimi e faasoosoina ai i tatou e manatu faapea, o i latou o loo tatou aoaoina, e sili atu ona talatalanoa i nisi mea pe na ona faafiafia foi. Ae o matua, taitai, faiaoga o aiga, faiaoga asiasi, ma faiaoga i totonu o vasega i le Ekalesia ua latou iloa afai latou te aoao atu le mataupu e ala i le Agaga, o i latou o loo aoaoina e masani ona malamalama i se naunautaiga mo mea a le Atua.

Aisea e Tatau Ai Ona Tatou Aoaoina Atu le Afioga a le Atua

A’o talai atu ia Alema i sa Sorama, na ia lauga atu i se vaega o tagata na avea o latou puapuaga ma mea na saunia ai i latou e talia

le afioga a le Atua. Na ia aoaoina i latou e uiga i le mana o le upu. Ae o le suesueina lea na ia tautala i ai, e mafai ai ona tatou malamalama lelei i le mafuaaga tatou te faaaogaina ai le afioga a le Atua e avea ma punavai o a tatou aoaoga uma i le talalelei.

Na ia faatusatusaina le upu i se fatu lea e mafai ona totoina i o tatou loto. Afai o ia te oe se togalaau e tausia faalelei, o le a e vaaia ia fatu na e totoina, e ui lava ina laiti, e mafai lava ona totogo a’e ma ola ae le’i umi ona e faasūsūina. O le malosi i totonu o se fatu e matuai malosi lava lea e mafai ai ona uunaieseina ia ni palapala malo ina ia mafai ona oso a’e i fafo lona tatupu muamua. O le mea lena e tupu pe a tatou “tuuina se avanoa” mo le afioga a le Atua ina ia totoina ai i o tatou loto. Afai tatou te le lafoaiina le upu—po o, se isi faaupuga, afai tatou te le teenaina le Agaga o le Alii—o le a amata ona tupu ma ola le fatu. Na faapea mai ia Alema, “E amata ona tupu ai i totonu o outou fatafata. Pe a outou lagona foi le tupu o le fatu, ona amata ai lea ona outou faapea ifo, E moni o le fatu lelei lenei, po o le upu lelei, aua ua amata ona faateleina ai lo’u loto; ioe, ua amata ona faamalalamaina ai lo’u mafaufau; ioe, ua amata ona suamalie ia te au” (Alema 32:28).

Afai e tupu lenei mea i totonu ia i tatou, ua tatou iloa o le fatu, po o le afioga a le Atua, e lelei: “Ae peitai, faauta, pe a fefete le fatu, ma ua totogo, ma ua amata ona tupu, ona tatau ai lea ona outou faapea ifo, o le fatu lelei ia. . . . O lenei foi, faauta, ona ua outou tofotofoina, ma totoina le fatu ma ua fefete, ua totogo foi, ma ua amata ona tupu, tou te iloa ai lava o le fatu lelei ia” (Alema 32:30, 33). Ma sa faaaauu le saunoaga a Alema, “Afai tou te tausia le upu, ioe, tausi le laau pe a amata ona tupu, i lo outou faatua, ma le filiga tele, ma le onosai, ma le faatalitali i ona fua, e mau aa; faauta foi e avea ai ma laau e tupu ae i le ola faavavau” ma fua mai i fua e “sili ona suamalie” (Alema 32:41–42).

Na saunoa mai Elder Boyd K. Packer: O mataupu moni, afai e malamalama i ai, e suia ai uiga ma amioga. O le suesueina o mataupu o le talalelei o le a vave faaleleia ai amioga nai lo se suesuega o amioga lava ia ina ia faaleleia ai amioga” (i le Conference Report, Oke. 1986,20; po o le *Liahona*, Ian. 1987, 19). E leai ni manatu po o ni

mataupu faalelalolagi e i ai lenei mana. E leai ni aoaoga po o tautalaga e tuuina atu e faafiafia ai e mafai ona ootia ai tagata taitoatasi ina ia faaliliuina ai o latou loto ia Keriso. O le faaautuina o a tatou aoaoga i upumoni o le talalelei e na o le pau lea o le auala e mafai ai ona avea i tatou ma meafaigaluega i aao o le Atua ina ia fesoasoani e faatumau le faatuatua lea o le a taitaiina atu ai isi ina ia salamo ma o mai ia te Ia.

O le aoaoina atu o aoaoga faavae e puipuia ai i tatou mai le se ese faaleagaga. E mafai ona toe valaauina mai i tatou pe afai tatou te se ese. Na faamatala mai e Elder Russell M. Nelson:

“I tausaga ua mavae ao avea au ma se tagata talavou o loo aoga faafomai, sa ou vaai i le tele o tagata mamai sa mafatia i faamai ua mafai nei ona tineia. O aso nei ua mafai ona teena e tagata taitoatasi tulaga sa le mafai ai muamua—e oo lava [i faama’i] na oti ai. O se tasi o auala faafomai e mafai ai e tagata ona le aafia mai faamai o le faagataina lea. O le faaupuga faagata (*inoculate*) e maoae. E sau mai le upu Latina: *in*, o lona uiga “i totonu”; ma le *oculus*, o lona uiga o se ‘mata.’ O lea la, o le veape o le faagata (*inoculate*) pe a faamatalaina sa’o, ‘o le tuu i ai o se mata i totonu’—e vaai ia tetee atu i le leaga.

“O se aafiaga e pei o le ma’i pipili e mafai ona le savali pe faaleagaina ai foi o le tino. O se aafiaga e pei o le agasala e mafai ona le savali pe faaleagaina ai foi le agaga. O uiga leaga o le ma’i pipili ua mafai nei ona teena e ala i tui puipuia, ae o uiga leaga o le agasala e manaomia ai isi ituaiga puipuiga. E le mafai e fomai ona faia ni tui e tetee atu ai i le amioleaga. O le puipuiga faaleagaga e sau mai le Alii—ma i lana lava auala. E lei filifili Iesu e faagata, ae ia aoaoga atu le mea moni. O lana auala e le manaomia ai ni tui; ae faaogaina le aoaoina atu o aoaoga paia—o se mata i totonu e puleaina—e puipuia agaga e faavavau o lana fanau” (i le Conference Report, Ape. 1995, 41–42; po o le *Liahona*, Iulai 1995, 37).

Aoaoga Atu mai Tusitusiga Paia ma Afioga a Perofeta o Aso e Gata Ai

Afai tatou te faaogaina ia tusitusiga paia ma afioga a perofeta o aso e gata ai e avea ma punavai o a tatou aoaoga uma, ua tatou valaaulia le Agaga e molimau atu ai. O lenei mea e aumaia ai le “mana o le Atua i le faatalitoniina o tagata” (MFF 11:21).

Na faamatalaina atu e se epikopo lenei mea na oo i ai i se fonotaga faaleautaita a le siteki:

“E toetiiti lava 30 tausaga talu ai sa avea ai au ma se fautua o ositaulaga i la matou uarota. I a matou lesonea a le korama, matou te faamautinoa ai ua faitauina tusitusiga paia ma afioga a perofeta soifua ma ia faamamafaina ia mataupu autu. Talu ai ona sa i ai le Agaga iina, o lea sa manaia ma manatuaina pea a matou fonotaga.

“Sa aofia ai i la matou korama se ositaulaga talavou e igoa ia Paolo, e seasea lava ona alu i le fale; e masani ona leiloa e ona matua le mea e saili i ai o ia. E tau le maua se

ma fesootaiga ma ia, ma e oo atu o ia i fonotaga a le korama mai lea taimi i lea taimi. Sa matou taumafai i totonu o le korama ina ia maua se malamalamaaga lelei i mataupu o le talalelei, ma e matou te naunau i a matou lesonea mai tusitusiga paia. Ina ua oo mai ia Paolo, sa ou malamalama faaleagaga o nei upumoni o loo ootia ai lona loto e ui lava o le a mou ese atu foi o ia mai le aai mo ni vaiaso.

“I se tasi taeao o le Aso Sa na oo atu ai Paolo i le lotu, ua sele mama lana ava ma ofu atu lona suti, ofutino paepae, ma le fusiua. Sa matou fiafia uma ma ofo. Na matou iloaina mulimuli ane, sa i ai se mea na oo ia te ia i le po ua tuana, i se mea mamao ese mai le fale. Na matuai loto vaivai ai lava o ia. E tusa o le vaeluaga o le po na matala ai lona mafaufau ma iloaitino ai se tulaga faaleagaga e faapea o loo tauva le Atua ma Satani mo lona agaga, ma sa malo ai ia Satani. O le taimi lava lena, i le vaeluaga o le po, na ia ala a’e ai mai le mea sa moe ai ma savali loa i le tele o maila seia oo i lona fale, fafagu ona matua ma ta’u atu i ai le mea na tupu, ma ina ua tafa mai ata, sa ia taele loa ma sau i le lotu.

“E le’i toe tepa o ia i tua. Sa ia salamo i ana mea sese na fai ma mulimuli ane ai ona ia alofa ma faaipoipo atu i se tasi o tamaitai talavou amio solia i la matou uarota. O le taimi nei, o loo avea ai o ia o se tama amiotonu, o se tasi e umia le perisitua, ma o se tagatanuu faamaoni.

“E masani lava ona ou toe tepa i tua i mea faapea na faalogoina e Paolo i totonu o na fonotaga a le korama na tele so latou sao i le toe liuaina o lona olaga. Na ou iloaina le taimi na ootia ai o ia ao matou talanoa i upumoni o le talalelei i totonu o le korama. Ou te manatu o na upumoni sa faamanatu atu pea ia te ia po o ai moni lava o ia ma le mea o loo faamoemoe mai e le Atua mai ia te ia. Ou te manatu sa galue ai i lona mafaufau ma lona loto ma faateleina ai lona lagona le mautinoa i le ituaiga olaga sa ia filifilia. Ma o sina tamai aafiaga o upumoni i lona loto, na mafai ai ona tautala atu le Agaga ia te ia ma lapataiina o ia. E mau lo’u loto faafetai ona matou te le’i faama’imauna taimi o la matou korama matou te talanoa ai i taavale po o taaloga po o ni o’u lava manatu i auala e ao ona ola ai ia tamaiti! Ou te manatu na faalogoina e Paolo le valaau atu a le Alii ia te ia e ala i upumoni o le talalelei na matou sueina faatasi.”

E mafai ona tatou faaali atu ia i latou o loo tatou aoaoina le auala e sailia ai le mana i totonu o tusitusiga paia. Na faailoa mai faapea e Elder Boyd K. Packer: “E ao ona outou aoaoina atu ia tusitusiga paia. . . . Afai e masani tamaiti o lau vasega i faaaliga, e leai se fesili—e faatatau i le tagata lava ia pe faalauaitale pe faaupufai pe o galuega—e moomia le tuuloa e le taliina. O i ai i totonu iina le atoa-toaga o le talalelei faavavau. O totonu iina tatou te maua ai mataupu faavae o le upumoni lea o le faaleleia ai fenumi-aiga ma soo se faafitauli ma soo se faafaigata o le a feagai ma le aiga po o soo se tagata e i ai i totonu” (*Teaching the Scriptures* [address to religious educators, 14 Oke. 1977], 5).

11

TAUSIA LE MATAUPU INA IA MAMA ATOATOA



O le Moronae mataupu e 8 o loo i ai se tusi na tusia e Mamona i lona atalii o Moronae. O le ulutala o le tusi o le papatisoga o tamaiti, lea sa faatinoina e nisi i totonu o le Ekalesia. Ina ia fesoasoani i lona atalii e faasa’oina lenei aoaoga sese, na toe faamatala atu ai e Mamona le aoaoga sa’o o le malamalama ma faatonuina ia Moronae ina ia aoao atu ai i le nuu uma. Faitau le Moronae e 8 e avea o se faaitaitaiga o le tausia pea o le aoaoga faavae ma mataupu o le Ekalesia ina ia mama ma lē fesuiaia.

O se tulaga faalotomaualaloina ma musuia ina ia mafaufau loloto i osigataulaga e faia e tagata mo le upumoni. E toatele e papatisoina e ui ina teenaina e o latou aiga ona o a latou faaiuga. E toatele perofeta ma isi ua maliliu ae ua latou le teenaina a latou molimau. I le toe manatunatu i le faamaturoida o Iosefa ma Ailama Samita, na faailoa mai ai e le Susuga a Ioane Teila e faapea o le Tusi a Mamona ma le Mataupu Faavae ma Feagaiga “ua faatauina ai i le toto sili o le senituri sefulu ma le iva e aumaia ai mo le faaolataga o le lalolagi faaleagaina” (MFF 135:6).

O tagata uma taitoatasi e aoaoina atu le talalelei e manaomia ona tuufaasolo atu i isi, i le mama ma le le fesuiaia o lona tulaga, ia upumoni lea na tele ni osigataulaga na faia ai. Na faamatala mai e Perisitene Gordon B. Hinckley: “Ua ou tautala atu muamua e uiga i le taua o le tausia o le aoaoga a le Ekalesia ina ia mama atoatoa, ma ia vaaia ua aoaoina atu i a tatou fonotaga uma. Ua ou popole i le mea lenei. O nai tamai fesuiaiga i aoaoga faavae e mafai ona taitaiina atu ai i ni taufaasese faatiapolo tulaga ese” (*Teachings of Gordon B. Hinckley* [1997], 620).

O Ou Tiutetauave i le Avea ai o se Faiaoga

Ao e saunia ma tuuina atu au lesona, e tatau ona e faaogaina ia puipuiga nei ina ia mautinoa ai o loo e aoaoina atu le upumoni e pei ona faaalua mai e le Alii.

Aoao Atu e ala i le Agaga mai Tusitusiga Paia ma afioga a Perofeta o Aso e Gata Ai

Na aoao mai e Perisitene Ezra Taft Benson: “O le a le puna’oa mo le aoaoina

atu o le fuafuaga tele a le Atua e Faavavau? O tusitusiga paia, o le mea tonu lava lea, aemaise lava i le Tusi a Mamona. E tatau ona aofia ai foi i lenei aoaoga ia faaaliga o ona po nei. E tatau ona faaogaina faatasi ma afioga a Aposetolo ma perofeta ma musumusuga a le Agaga” (i le Conference Report, Ape. 1987, 107; po o le *Liahona*, Iulai 1987, 88).

Faaaoga Mea ua Gaosia e le Ekalesia mo Lesona

Ina ia fesoasoani e aoao atu mai tusitusiga paia ma afioga a perofeta o aso e gata ai, ua gaosia e le Ekalesia ia tusi lesona ma isi mea. E laitiiti lava le manaomia o isi tusi e faamalamalama ai po o nisi foi mea. E tatau ona tatou suesueina maeaea ia tusitusiga paia, o aoaoga a perofeta o aso e gata ai, ma mea mo lesona ina ia mautinoa ai ua tatou malamalama sa’o i le mataupu ae tatou te le’i aoaoina atu.

Aoao Atu Upumoni o le Talalelei ae le o Nisi Mea

Ina ua faauuina e Alema ia faitaulaga e aoao atu i latou na ia papatisoina i le vai o Mamona, “na ia poloai atu foi ia te i latou, aua latou te aoao atu se mea e tasi tau lava o mea na aoaoina ai i latou e ia, ma ua fai mai i fofoga o le au perofeta paia” (Mosaea 18:19). Ina ua aoaoina e soo sa Nifae e toasefululua o le Faaola ia tagata, sa latou “fai atu ia lava upu na fetalai mai ai Iesu” (3 Nifae 19:8). Afai e te aoaoina atu le talalelei a Iesu Keriso, e tatau ona e mulimuli i nei faaitaitaiga.

Aoao Atu ma le Manino ia Upumoni o le Talalelei Ina ia Lei se Tasi e le Malamalama I Ai

Na faamatala mai e Perisitene Harold B. Lee, “E ao ona e aoao atu mataupu tuai, e le na o le malamalama i ai o tamaiti o le vasega, ae e tatau ona e aoao atu mataupu o le Ekalesia i se tulaga faigofie ina ia aua nei i ai se tasi e le malamalama ai” (“Loyalty,” i le *Lu’itau i Faiaoga Faalelotu*, lomiga 2 [1982], 64).

Lapataiga mo Faiaoga o le Talalelei

Ao e taumafai e tausia le mataupu ina ia mama atoatoa, e tatau ona e aloese mai faafitauli nei.

Taumatemate

“I le tuuina atu o se lesonea e tele naua auala mo se faiaoga lē tapasaina e alu ese ai mai le ala lea e tau atu i lona faamoemoega. O se tasi o faaososoga taatele, o le taumatemate lea o mea e lē o tele ni fetalaiga a le Alii i ai. O se faiaoga e tapasaina lelei e i ai lona lototele e faapea mai ai, ‘Ou te le iloa,’ ma tuu ai faapena. E pei ona saunoa mai ia Peresitene Iosefa F. Samita, ‘E leai se afaina o lo tatou atamai po o lo tatou faamaoni pe a tatou tali atu ma le manino i ni fesili taumatemate se fia selau, “Ou te le iloa” [Gospel Doctrine, 5th ed. (1939), 9]” (Joseph F. McConkie, “The Disciplined Teacher,” *Instructor*, Set. 1969, 334–35).

Upusii sese

“O le faiaoga tapasaina, na te mautinoa sosia uma po o mea e aumai ai ana upusii ma o le a faia foi ia taumafaiga uma ina ia iloiloaina ai pe o sa’o le tuuina atu o se faamatalaga e atagia ai le mataupu a le Ekalesia pe ua na o se manatu lava o le tusitala ia” (*Instructor*, Set. 1969, 334–35).

E le tatau ona tatou faauigaina ia faamatalaga i taitai o le Ekalesia e aunoa ma le faamautuina o le pogai o faamatalaga. Afai tatou te siina mai ia mau, e tatau ona tatou mautinoa o lo tatou faaogaina o na mau e ogatasi lea ma lo latou tulaga (tagai i le “Aoa Atu mai Tusitusiga Paia,” itulau 56–61).

Mea e Fiafia i ai i le Talalelei

“O mea e fiafia i ai i le talalelei—o se faamamafa faapitoa pe le talafeagai o se mataupu faavae e tasi o le talalelei—e tatau foi ona aloese ai le faiaoga” (*Instructor*, Set. 1969, 334–35).

Na saunoa mai faapea Peresitene Iosefa F. Samita: “O mea e fiafia i ai e tuuina atu ai ia i latou o e uunaiina, se manatu sese o le talalelei a le Togiola; latou te faaseseina ma lē faaogatasia ma mataupu faavae ma aoaoga. E lē moni le manatu. Soo se mataupu faavae ma faatinoga e faaaliga mai e le Atua e taua i le faaolataga o le tagata, ma o le tuuina o soo se tasi o na mea e le talafeagai i ona luma, e faalafi ma faanunumi ai isi mea uma, e matuai valea lava ma matautia; e faamata’uina ai lo tatou faaolataga, aua e faapouliuligia ai o tatou mafaufau ma faanefu ai o tatou malamalama” (*Gospel Doctrine*, 116–17).

Tala Faatupu Fiafia

“Atonu o le faaososoga pito sili lea i se faiaoga o le taumafai lea e faagauai mai manatu o tagata o lana vasega i le faaogaina lea o tala faamomoi loto. O loo i ai le tele o nei tala o loo faailoga fesili po o ai na pogai mai ai, o loo faaauau pea i le Ekalesia atoa. . . . O nei mea e le o ni auupega e aoao atu ai: e leai se tulaga mautu po o se molimau

e mafai ona faavaeina pe fausia mai foi i se tala faapea. O loo tuuina mai e perofeta ia i tatou ia faatonuga e ala mai i le faasologa tatau o aoaoga ma tulaga o le perisitua. E manaoomia le utagia lelei o savali a le Au Pulega Aoa i totonu o konafesi a siteki ma konafesi aoao atoa ma le faitauina o tusi a le Ekalesia e le aunoa. O le a fiafia tagata e faalogologo ma uai atu o latou mafaufau i le faiaoga poto i mataupu tau le Ekalesia” (*Instructor*, Set. 1969, 334–35).

Toe Faaupuina o le Talafaasolopito o le Ekalesia

Na lapatai mai Peresitene Ezra Taft Benson: “Sa i ai ma o loo faaauauina pea ia ni taumafaiga ina ia aumaia i totonu [se talitonuga sese faaletagata] o le talafaasolopito o la tatou Ekalesia. . . . O loo faamamafaina ai le le amanaiaina o faaaliga ma le fesootaiga a le Atua i mea taua na tutupu ae ina ia matuai faaletagata ia perofeta a le Atua ina ia avea o latou vaivaiga faaletagata ia sili atu ona taulamua nai lo o latou uiga lelei faaleagaga” (“God’s Hand in Our Nation’s History,” i le *1976 Devotional Speeches of the Year* [1977], 310).

I le tautalagia o ia taumafaiga, na faapea mai ai mulimuli ia Peresitene Benson, “Matou te lapataiina outou faiaoga i lenei tulaga pa’u, lea e foliga mai o se taumafaiga ina ia toe faaupuina le talafaasolopito o le Ekalesia ina ia logolelei i le lalolagi” (*The Gospel Teacher and His Message* [lauga na tuuina atu i faiaoga faalelotu, 17 Set. 1976], 11).

Faaliliuga a le Tagata Lava Ia ma Manatu e le Faavaea

Na saunoa mai Peresitene J. Reuben Clark Jr. e faapea, “E na o le Peresitene lava o le Ekalesia, le Faitaulaga Sili Pulefaamalumu, e lagolagoina e avea ma Perofeta, Tagatavaai, ma Talifaaliga mo le Ekalesia, ma e na o ia foi e i ai le aia e maua ai faaaliga mo le Ekalesia, po o ni faaaliga fou pe toe fetuunai, pe tuuina mai foi ni faaliliuga faatulafonoina o tusitusiga paia lea e tatau ona faamauina i le Ekalesia, pe suia i soo se auala ia aoaoga faavae o loo i ai nei o le Ekalesia” (i le *Church News*, 31 Iulai 1954, 10). E le tatau ona tatou aoaoina atu ni a tatou lava faaliliuga o mataupu o le talalelei po o tusitusiga paia.

Na faamatala mai e Elder Spencer W. Kimball: “E i ai i latou i aso nei o e e foliga mai ua latou faaogaina le faamaualuga e le malilie ai i aoaoga mautu a le Ekalesia ma i latou o e tuuina mai o latou manatu e feteenai ma le upumoni faaaliga. O nisi e le o tele so latou afaina i le mataupu; o isi o loo fagagaina pea lava lo latou faamaoni; ae o nisi e foliga mai e matuai manatu lava i ai. E mafai e tagata ona manatu i ai e pei ona latou mananao i ai, ae leai sa latou aia e faailoa atu i ai i isi o latou manatu lē faamaoniaina. O ia ituaiga tagata e tatau ona latou iloaina o lo latou agaga ua matuai i ai lava i se tulaga matautia” (i le *Conference Report*, Ape. 1948, 109).

AOAO ATU MAI TUSITUSIGA PAIA



Ua faatonuina i tatou e perofeta o aso e gata ai ina ia faaaogaina ia tusitusiga paia e aoao atu ai aoaoga faavae o le talalelei. Na saunoa mai Peresitene Ezra Taft Benson: “Ia manatua pea, e leai se tulaga faamalieina e suitulaga ai mo tusitusiga paia ma afioga a perofeta soifua. O nei mea e tatau ona avea ma a outou puna’oa o aoaoga. Faitau ma mafaufau loloto atili i ai i mea ua fetalai mai ai le Alii, ae ia faaitiitia i mea ua tusia e isi e faatatau i mea ua fetalai mai ai le Alii” (*The Gospel Teacher and His Message* [lauga i faiaoga faalelotu, 17 Set. 1976], 6).

Na saunoa mai Peresitene Gordon B. Hinckley: “Ae ua na o tusi lava nei, tusi faavae ia o le Ekalesia, e maua ai afioga moni a le Alii. O tusi ia o loo i ai mataupu e ao ina tatou tumau ai pe afai e faataunuaina le taunuuga paia o lenei galuega” (i le Conference Report, Ape. 1982, 67–68; po o le *Liahona*, Iulai 1982, 76).

O fautuaga nei e mafai ona fesoasoani ai ia te oe ina ia e aoao atu mai tusitusiga paia.

“Saili ina ia Maua [le] Upu”

Ae tatou te le’i aoao atu mai tusitusiga paia, e tatau ona tatou suesue muamua e i tatou lava ia tusitusiga paia (tagai i le “Saili Ina ia maua le Upu,” itulau 14–15; Faatulagaina o se Fuafuaga a le Tagata Lava ia mo le Suesueina o le Talalelei,” itulau “16–17).

Taitai Talanoaga ma Faaoga ia Fesili

Ao e aoao atu mai tusitusiga paia, e matuai taua lava le taitaia o talanoaga ma faaoga ia fesili aua o nei auala e faamalosi-auna ai i latou o loo e aoaoina ina ia mafafau e uiga i mau ma fetufaai mai ai ni

malamalamaaga. Afai e talanoaina e tagata o loo aoao ia ni mataupu mai tusitusiga paia, ua latou atinaeina ni tomai latou te manaomia mo a latou lava suesuega o tusitusiga paia. (Mo fesoasoaniga e aofia ai le taitaia o talanoaga ma le faaaogaina o fesili, tagai i itulau 66–68 ma le 71–73.)

Ia Tuuina Atu le Faapogai

O le faatulagaga po o le vaega o loo aofia ai i se mau mai tusitusiga paia e taua lena o le faapogai. O le a sili atu ona malamalama ia tagata o loo aoaoina i le mea o loo tupu pe o loo tautalagia i se mau pe a latou iloa le mea e faapogai mai ai.

Ina ia sailia la le faapogai, ia tuuina atu ia fesili nei:

- O ai o loo tautala?
- O ai o loo tautala i ai lena tagata?
- O le a le mea o loo ia tautala agai i ai?
- O le a le mea o loo ia tali atu i ai?
- Aisea ua ia tautala atu ai i lena mea?

Mo se faataitaiga, Luka 15:11–32 o loo aofia ai le faataoto a le Faaola i le atalii faama’imau oa. Na faapea mai le Perofeta o Iosefa Samita na ia maua lona malamalama i lenei faataoto e ala lea i lona sailia o lona faapogai:

“E i ai sa’u auala na ou malamalama ai i tusitusiga paia. Na ou sailia, po o le a le fesili lea e maua mai ai le tali, pe na mafua ai ona tautalagia e Iesu le faataoto? . . . Ao aoaoina e Iesu ia tagata, sa faalatalata atu le au telona uma ma e agasala e faalogologo ia te Ia; ‘ma sa muimui le Au Faresaio ma le au tusiupu, ma faapea ane: “Ua talia e lenei tagata o e agasala, ua aai faatasi foi o ia ma i latou.’ O le upu autu lenei e tatalaina ai le faataoto i le atalii faama’imau oa. Na tuuina atu e tali ai le muimui ma le tuufesili o le Au Satukaio ma le Au Faresaio, o e sa tuufesilisili, e saili sese, ma faapea ane, ‘E faapefea i lenei tagata maoae e pei ona Ia faafoliga i ai, ona aai faatasi ma telona ma e agasala?’ ” (*Teachings of the Prophet Joseph Smith*, sel. Joseph Fielding Smith [1976], 276–77).

E pei ona faasino mai e le Perofeta o Iosefa, o le faapogai o le faataoto i le atalii faama’imauoa e amataina i le Luka 15:1–2, e tele ni fuaiupu o loo muamua ona faatoa

amata lea o le faataoto. O se tasi auala e sailia ai le faapogai o le faitauina lea o fuaiupu i luma atu ma tua mai o le fuaitau o loo e suesueina.

O lenei faiga e fesoasoani tele e tusa lava po o le tagata o loo tautala i se mau o loo tali atu e le gata i tagata ae o ni mea taua na tutupu i le aso. O se faataitaiga o lenei mea o loo tauaofai i le amataga o le “O le Mana o le Upu” (itulau 52). Afai tatou te malamalama po o ai sa Sorama, ma le tulaga mataga faaleagaga sa latou i ai, ma le taufaamata’u sa latou faia ia sa Lamana, ona mafai lea ona tatou malamalama lelei i le taua o le faamatalaga a Alema e faapea e tatau ia te ia ma ona uso ona “latou tofotofoina le aoga o le afioga a le Atua” ia latou taumafaiga ina ia faaliliu mai sa Sorama mai o latou ala (Alema 31:5).

O nisi taimi e fesoasoani tele lava le suesueina o talafaasolopito faaupufai, faalauaitete, po o le tulaga tau le tamaoiga i taimi e tuuina mai ai se mau. Mo se faataitaiga, ina ia maua se malamalama i le faamafanafanaga ma folafolaga a le Alii o loo i le Mataupu Faavae ma Feagaiga e 121 ma le 122, e fesoasoani tele le iloaina o mafatiaga na mafatia ai le Au Paia i Misuri i lenei taimi faapea ma tulaga na onosa’ia e le Perofeta o Iosefa ma ana soa i le Falepuipui o Liperati. Ina ia faateleina lo tatou malamalama i tusi a Paulo, e mafai ona faamanuiaina ai i tatou mai se malamalama autu i le vaega na femalagaai ai ma tulaga o aulotu o le Ekalesia na ia tusi atu i ai. O le Taiala i Tusitusiga Paia e mafai ona avea ma se puna’oa lelei tele mo lenei mea ma isi faamatalaga o mafuaaga o fuaitau o loo i le Tusi Paia.

I le sauniaina o le faapogai, e taua tele le aua ne’i aveesea ai lona faamoemoega, o le saofaga atu lea i se malamalamaaga lelei o se fuaitau faatusipaia patino. Ia faaeteete ia aua ne’i liliuina le faapogai—e pei o talafaasolopito, faaupufai, tamaoiga, po o le gagana a tagata o loo i tusitusiga paia—e avea ma vaega autu e taulai atu i ai se lesona.

Fetufaai Atu Tala Faatusipaia

E masani ona faigofie ona malamalama i se mataupu faavae o le talalelei pe a faamatalaina o se vaega o se tala faatusipaia. O tala e aofia ai le fiafia o tagata ma faaalua ai le auala e faaoga ai ia mataupu faavae o le talalelei i le olaga i aso uma. E faaopoopo atu i ai, o tala e masani ona faigofie ona manatua nai lo faamatalaga o mataupu faavae. (Mo fautuaga i le fetufaaiina atu o tala, tagai i “Tala,” itulau 189–91.)

O se tala faatusipaia e mafai ona aofia ai ni mataupu faavae se tele ma ni ona faaogaina (o se tasi faataitaiga o le tusi a Enosa, lea e na o le 27 ia fuaiupu ae o loo faailoa mai ai le tele o mataupu faavae o le talalelei). O le a moomia ona e fuafua po o le fea o nei mataupu faavae o le a faasililiina i tala e te faaogaina.

E masani ona fesoasoani tele mo tagata aoao le faitauina leotele faatasi o se tala, ae feauaua’i i le faitauina (tagai i le “Faitau Leotele,” itulau 58). Afai e umi le tala, e masani lava ona sili atu ona fai se aotelega, ma tuu atu i tagata o loo aoaoina e faitauina ni nai fuaiupu autu i vaega taua o le tala. O mataupu po o ulutala o vaega e mafai ona fesoasoani tele pe a e sauni ma tuuina atu ia aotelega.

Fetufaai Atu Faamatalaga E Faatatau i Tagata Taitoatasi

Afai tatou te suesueina ia olaga o tagata taitoatasi o loo i totonu o tusitusiga paia, e masani ona tatou iloa ai ia mataupu faavae o le talalelei o loo aoga i se vaitaimi umi. Mo se faataitaiga, o le tala atoa ia Sesoroma i totonu o le Tusi a Mamona o loo faaalua ai se tagata e mafai ona salamo ma alu atu e auuina i le Alii i le amiotonu. Afai e te faitauina ia fuaiupu o loo i le Taiala i Tusitusiga Paia i lalo o le upu “Sesoroma,” e mafai ona e mulimuli i le tala a Sesoroma i lona osofaia o le Ekalesia, o lona liuaina, ma mulimuli ane, o lana auunaga lototoa i le avea ai ma se faifeautalai ma faiaoga o le talalelei. O isi faamatalaga e uiga i tagata taitoatasi e aofia ai ia Ruta, Tupu o Tavita, Samuelu, Eseta, o le Aposetolo o Paulo, Alema le Matua, Tupu o Peniamina, Alema le Itiiti, Korianetona, Mamona, ma Moronae.

Faaoga le “Vaavaai mo” ma le “Faalogo mo” Ni Manatu e Aumai

Afai e te aoao mai tusitusiga paia, e masani lava ona fesoasoani tele mo tagata o loo a’oa’o le vaavaai ma faalogo mo se mea patino. O nisi nei o faataitaiga o mea atonu e te fesiligia ai i latou e “Vaavaai mo” po o le “Faalogo mo.”

O mataupu faavae o le talalelei o loo faaalua i olaga o tagata. Faataitaiga: “Ao tatou faitauina le Mose 5:4–9, saili ia faamatalaga o loo faaalua ai le ususitai o Atamu, e tusa lava pe le’i atoatoa ona malamalama o ia i mataupu faavae o loo aofia ai.”

Fesili. Faataitaiga: “Ao tatou faitauina le Alema 5:14–32, faalogo mo fesili na faia e Alema.”

Lisi. Faataitaiga: “Ao tatou suesueina le Mataupu Faavae ma Feagaiga 25, vaavaai mo uiga lelei o se ‘tamaitai filifilia.’ ”

Uiga o upu po o manatu. Faataitaiga: “Vaavaai mo uiga o le upu *Siona* o loo i totonu o le Mataupu Faavae ma Feagaiga 97:21 ma le Mose 7:18.”

Faafoliga ma faailoga. Faataitaiga: “I le Ioane 15:1–6, vaavaai mo faatusatusaga a le Faola o Ia lava i se vine ma Ona soo i lala.”

Faamatalaga faavaloga i se mataupu faavae po o se mea na tupu. Faataitaiga: Ao ou faitauina le Alema 30:60, faalogo mo faamatalaga a Mamona i le taunuuga o Kori’oa.”

“*Afai o lena*” ia o fesoootaiga. Faataitaiga: “Faalogo mo folafolaga a Isaia ia i tatou pe afai tatou te tausia le Sapati ia faapaiaina.” (Tagai Isaia 58:13—14.)

Amioga e fiafia pe le fiafia i ai le Atua. Faataitaiga: “Ao tatou faitauina le Alema 39:1—9, vaavaai mo fautuaga patino na tuuina atu e Alema i lona atalii o Korianetona.”

Faagasologa o mea e tupu, uiga, po o faatinoga. Faataitaiga: Ao tatou suesueina ia nei fuaiupu, ia vaavaai mo faagasologa e faaalai mai ai le manaomia o naunautaiamiotonu ao tatou sailia le upumoni.” (Tagai 1 Nifae 10:17—22; 11:1—23; MFF 11.)

Ao e vaavaai ma faalogo mo nei mea i au lava suesuega ma sauniuniga, o le a sili atu ona mafai ona e taitaia ia gaoioiga o le “vaavaai mo” ma “faalogo mo” faatasi ma i latou e te aoaoina.

“Faataitau Tususiga Paia Uma ia i Tatou”

Tagai i le “Faataitau,” itulau 179–80.

Faitau Leotele

O le faitauina leotele o tusitusiga paia e tagata o loo aoaoina e aofia ai lo latou naunautai, e faamaai lo latou taula’i atu i ni fuaiupu patino, ma fesoasoani ia i latou ina ia gauai i aafiaga a le Agaga. Afai e faitau leotele se tagata e toatasi, e tatau ona e uunaiina ia isi ina ia mulimuli i a latou tusitusiga paia. Ia valaaulia i latou e faalogo ma vaavaai mo mataupu faavae po o ni manatu patino. Ia tuu atu se taimi mo i latou e sue ai fuaiupu taitasi ao lei faitauina. Afai o se fuaiupu o loo aofia ai ni upu po o ni fuaitau faigata pe le masani ai foi, ia faamalamalama nei fuaiupu ao lei faitauina. Afai e i ai se tasi o le vasega e i ai se faafaigata i le faitau, ia talosaga atu mo ni tagata e ofo mai nai lo le faitau feauaua’i. Ia galulue taitoatasi ma i latou e i ai ni faafitauli i le faitau seia oo ina ua mafai ona o mai saunia i latou e faitau se fuaiupu.

Faaaoga ia Fesoasoaniga mo Suesuega o Loo i Totonu o Tusitusiga Paia

Na saunoa mai Peresitene Howard W. Hunter e faapea: “E manaomia ona i ai sa tatou Ekalesia e tumu i tamaitai ma alii o e latou te iloa lelei ia tusitusiga paia, o e latou te suesue ma faailogaina, o e latou te atinaeina ni lesona ma lauga mai le Taiala i Tusitusiga Paia (Topical Guide), ma e ua latou maitauina ia faafanua, o le Lomifefiloi o le Tusi Paia (Bible Dictionary), ma isi fesoasoaniga o loo aofia ai i totonu o lenei faatulagaga o tusi faavae. E manino lava le tele na’ua, ma e le mafai ona tatou vave iloina uma. E mautinoa lava o le faatoaga faatusitusiga paia ‘ua matua ma ua saunia e selesese ai’ “ (*Eternal Investments* [lauga i faiaoga faalelotu, 10 Fep. 1989], 2–3).

Taiala i Tusitusiga Paia

O le Taiala i Tusitusiga Paia e aofia ai se vaega filifilia o ni mau patino ma ni faamatalaga e faamalamalama ai. O lenei vaega ua faatulagaina i tala pupuu e silia ma le 1,000 o ni autu faatusipaia, ua lisiina faaalafapeta. O autu e aofia ai aoaoga faavae, mataupu faavae, tagata, ma nofoaga o loo maua i tusi faavae. O se risosi lelei tele lenei mo le taliina o fesili, o le sauniaina ma le faatamaoigaina o lesona ma lauga, ma le suesueina o tusitusiga paia e tagata taitoatasi ma aiga.

Faamatalaga i le Pito i Lalo ma Mau po o Mea e Maua Ai Faamatalaga

O itulau o faamatalaga faatusi paia e masani lava ona aofia ai ni faamatalaga i le pito i lalo. I le lomiga tuufaataasi e tolu a le Au Paia o Aso e Gata Ai, o faamatalaga i le pito i lalo o loo aofia ai le tele o ituaiga faamatalaga. Mo se faataitaiga, o loo aofia ai le faaliliuga FaaEleni (el) po o le FaaEperu (ep) mo upu filifilia. O loo aofia ai faamatalaga e talafeagai i ai i le Taiala i Tusitusiga Paia (tt). O loo aofia ai foi ia faamatalaga o upu e fetui i ai ma fausaga faigata (ff). O faamatalaga i le pito i lalo e i ai le “jst” o manatu ia mai le faaliliuga musuia a Iosefa Samita o le Tusi Paia. O le Faaliliuga a Iosefa Samita o loo i ai i se vaega faapitoa o le Taiala i Tusitusiga Paia.

O le ituaiga faamatalaga pito i lalo taatele lava o se faamatalaga lea i isi fuaiupu mai tusitusiga paia o loo i totonu o tusi faavae. O nei fuaiupu faaopoopo e masani ona faamanino pe faaopoopo atu i ai lo latou malamalama i le fuaiupu o loo e faitauina. Mo se faataitaiga, sue le Mataupu Faavae ma Feagaiga 11:21. Faitau le fuaiupu, ona faitau lea o faamatalaga a o loo i le pito i lalo. E faapefea ona faateleina lou malamalama i le fuaiupu na faitauina i nei fuaitau?

Pe afai e aoaoina atu se fuaitau o tusitusiga paia, e mafai ona e faaaogaina ia faamatalaga i le pito i lalo ma faamatalaga o mau e talafeagai i ai e fesoasoani ai i tagata o loo aoaoina ina ia malamalama lelei i le fuaiupu.

Ulutala o Mataupu ma Vaega

O se ulutala e tuuina mai ai se vaaiga lautele o se mataupu po o se vaega o loo mulimuli mai ai. E mafai ona aofia ai faamatalaga e uiga i le aoaoga faavae, o le talafaa-solopito, po o tagata. O le ulutala o le 2 Nifae 27, mo se faataitaiga, o loo faamatala mai ai faapea o le mataupu e tutusa ma le Isaia 29 ma o loo aofia ai se valoaga e uiga i le oo mai o le Tusi a Mamona.

Atonu e te manao e valaaulia ia tagata o loo aoaoina e faailoga ia fuaiupu o a latou mau e tusa ai ma mea taua o loo aofia ai i le mataupu po o le vaega. Mo se faataitaiga,



The United States of America in 1847

o mataupu faavae autu lava o loo i ai i le Upu o le Poto o loo faamatalaina i le ulutala o le Mataupu Faavae ma Feagaiga 89. E mafai ona e tuuina atu i tagata o loo aoaoina e faitau i nei mataupu faavae o loo i le ulutala ona faailoga lea i le mau.

Atonu e te manao e talosaga atu i tagata o loo aoaoina ina ia faitau lemu le ulutala o le mataupu po o le vaega ao le'i aumaia ni manatu i ni mau filifilia. E mafai ona fesoasoani lea ia i latou ia malamalama lelei ai i le aano o le mau.

Itulau Tomua

O tusi faavae uma taitasi e tofu ma le itulau tomua, o loo aofia ai ni faamatalaga aoga e uiga i le faamoemoega ma le pogai o le tusi. Mo se faaitaiga, o itulau tomua o le Tusi a Mamona o loo aofia ai molimau mai ia Iosefa Samita ma isi ma faamatalaga e uiga i le pogai o le tusi. O itulau tomua i le Mataupu Faavae ma Feagaiga o loo faamatala mai ai pe faapefea ona mauaina ia faaliga o loo i totonu o le tusi ma le tuufaatasiga.

O lenei vaega e mafai ona faaogaina e aoao atu ai le talaaga, talafaasolopito, faasologa o mea na tutupu, ma le faatulagaina o tusitusiga paia. O lesona uma e mafai ona faatulagaina e faaoga ai vaega mai nei itulau. Mo se faaitaiga, o le faamatalaina o upu tomua i le Mataupu

Faavae ma Feagaiga o loo aofia ai se aotelega puupuu o le Toefuataiina o le talalelei ma lisi o mau e faatatau i le mataupu.

Faafanua

O le Taiala i Tusitusiga Paia a le Au Paia o Aso e Gata Ai o loo aofia ai faafanua o nofoaga faatusipaia ma vaega taua o loo i totonu o le talafaasolopito o le Ekalesia. O le iloaina o lafanua o loo talanoaina, e mafai ai e tagata o loo aoaoina ona malamalama atili i mea na tutupu o loo faamatalaina mai i mau.

Faailogaina o Mau ma Faamatalaga e Tusia i Autafa o le Itulau

E fesoasoani tele le makaina o mau, faailogaina o laina o tala, autu, ma mataupu faavae ina ia faigofie ai ona sue. O lenei faiga e mafai ai ona pei o se faatulagaga o faila a le tagata lava ia. Ao e aoao atu, e mafai ona e uunaiina tagata o loo aoaoina ina ia makaina a latou mau e ala lea i le faia o se faaupuga faapea, "O lenei fuaiupu o loo aofia ai se mataupu faavae taua. Atonu e te manao e maka."

E leai se auala patino e tasi e maka ai mau. O le makaina o mau a le tagata lava ia e tatau ona atagia ai lona latalata atu i tusitusiga paia. Afai e te aoaoina ia tagata matutua po o le autalavou, atonu e te fuafua e talosaga atu



i tagata o loo aoaina e fetufaai mai ni a latou auala o loo latou faaogaina.

O auala i le makaina o mau e aofia ai ia vaega nei, ae ua le faatapulaaina foi i ai:

- Valivali, vasevase, puipui, po o le faataaliolio o se fuaiupu atoa po o se vaega o fuaiupu i se penitala po o se penivali.
- Vasevase na o lalo o ni nai upu autu o fuaiupu taitasi o le mau. O lenei faiga e faailoga ai ia vaega o se mataupu po o se vaega e mafai ona tilotilo vave i ai ma aumai ai ia manatu autu.
- Li'oina po o le vasevaseina o upu autu i laina sasao ma sosoo faatasi ia upu na e felataai i le isi.
- Makaina o se fuaiupu atoa po o se poloka o fuaiupu ma sosoo ia upu autu i totonu o lena fuaiupu.
- Ia maitauina pe afai o se faasologa o manatu o loo ta'ua mai ma faanumera na manatu i totonu o le fuaiupu po o autafa o le itulau.

Fesootaiga o Mau

O le tele o mataupu faavae o le talalelei o loo faamatalaina i le tele o fuaiupu eseese o mau, faatasi ai ma le tofu lava o le mau ia ma lana faamalamalama. E mafai ona e mauaina se malamalama atoatoa i se mataupu faavae pe a e suesueina ni fuaiupu se tele e uiga i ai. O se tasi auala e fai ai lenei faiga, o le tuufaatasia lea o se lisi i se mataupu

ona tusi lea o lena lisi i luga o au tusitusiga paia. E fuafua lava po o le a le autu, e mafai ona umi le lisi pe puupuu foi pe tusa ma le lua po o le tolu ia fuaiupu. O lenei auala, e faaigoaina i nisi taimi o le fesootaiga o mau, e mafai ona avea ma se meafaigaluega taua i le suesueina o tusitusiga paia ma le aoao atu mai ai. E mafai ona e faafesootaia ia fuaiupu o mau i le auala lenei:

I autafa o itulau o mau taitasi, tusi ai le isi mau o loo i le lisi. Faaauau pea lea faiga seia e oo atu lava i le fuaiupu mulimuli. I autafa o le fuaiupu mulimuli, tusi ai le mau e faatatau i ai o le fuaiupu muamua. Ona mafai lea ona e amata i soo se vaega lava o le lisi ma faaauau ai pea i le faasologa seia oo lava ina ua e faitauina uma ia fuaiupu.

E mafai ona e faia ni lisi lea e manaomia ona tuuina i se isi faasologa ina ia tuuina atu ai se malamalamaaga atoa i o latou mataupu. Ina ia iloa pea po o fea e amata ai sea ituaiga faasologa, e mafai ona e tusia le mau e faatatau i ai i le fuaiupu muamua i totonu o puipui i lalo o mau taitasi e faatatau i ai. Po o le mafai foi ona e tusia na o le mau e faatatau i ai i le fuaiupu muamua i tafatafa o fuaiupu taitasi, ma luga o le itulau o loo faailoa mai ai le fuaiupu muamua, e mafai ona e tusia ai le lisi atoa.

Faamatalaga i Autafa o le Itulau

O le tusia o faamatalaga i autafa o le itulau o au tusitusiga paia e mafai ona avea ma se auala aoga tele e maitau gofie ai ia tusitusiga paia. O ia ituaiga faamatalaga e saunia

ai se auala e faamaumau ai malamalamaaga, iloa ai mau e fetai i ai e taua ia te oe, ma faamaumau ai auala e mafai ai ona faatatau ia mau o tusitusiga paia i lou olaga i aso taitasi.

Atonu e te manao e uunaia i latou o loo aoaoina ina ia tusia ni faamatalaga i autafa o itulau. Atonu e te mafai ona e faapea atu, “Ou te fia fetufaai atu se manatu i lenei mataupu. Ua ou tusiaina i autafa o le itulau” pe faapea atu foi “O se fuaiupu lelei tele lenei e faatatau i le salamo. Atonu e te manao e tusi le upu salamo i autafa o le itulau e sosoo atu i ai.”

Fautuaga mo le Faaaogaina o Tusitusiga Paia mo le Aoaoina o Fanau

E mafai ona e faamanuiaina olaga o fanau e ala lea i le fesoasoani ia i latou ia lagona le toamalie i le gagana o tusitusiga paia. Afai e te aoaoina ia le fanau, e tataua ona e faaaogaina soo ia tusitusiga paia ma sailia ni auala e toamalie ai tamaiti i le faaaogaina o tusitusiga paia. O nisi nei o faaitaiga atonu e te faia:

- Fesoasoani i tamaiti ia masani i igoa ma le faasologa o tusi o loo i totonu o tusitusiga paia. Faaaoga le pese “O Tusi i le Tusi a Mamona,” mai le *Tusipese a Tamaiti*, itulau 63.
- Fesoasoani i tamaiti ia malamalama i le gagana o tusitusiga paia. Afai tou te faitauina faatasi ia tusitusiga paia, ia faamatala atu le uiga o upu taua. Fesoasoani atu i tamaiti e faaleo ni upu po o ni igoa faigata. Ia tuu atu ia i latou e faalogo mo ni upu, fuaitau, po o ni manatu patino.
- Afai e te manao i tamaiti e sailia se fuaitau faatusipaia patino, ia tuu atu ia i latou le numera o le itulau o le fuaitau faapea ma ni mau e talafeagai i ai.
- Ia fetufaai atu se tala faatusipaia i au lava upu. Fesoasoani i tagata o loo aoaoina e vaai faalemafaufau i mea na tutupu faapea ma tagata ao loo e faamatalaina atu le mea na tupu (tagai i “Tala,” itulau 189–91. Ona faitau leotele lea o fuaiupu autu faatusipaia.
- Tuu atu i tamaiti e faitau leotele mai tusitusiga paia. Ia nofouta i tulaga gafatia o tamaiti taitoatasi, ma fesoasoani ia i latou e auai lelei.
- Afai o tamaiti e laiti tele mo le faitau, ia valaaulia i latou e vaavaai ao e faitauina ia se mau ma faasino i ai ia upu. E mafai foi ona e faaaogaina tamaiti matutua e fesoasoani i tamaiti laiti i le sueina ma le faitauina o mau.
- Fai atu i tamaiti e faitau tala faatusipaia mai tusi ata o tala faatusipaia na lomaiaina e le Ekalesia, e pei o Tala o le Tusi a Mamona.
- Fesoasoani i tamaiti e talanoaina ia tala faatusipaia. Aoa o latou e tuuina atu fesili pe a latou faitau, e pei o le, “O le a le mea o loo tupu? Aisea ua tupu ai lenei mea? O ai o loo tautala? E faapefea ona faatatau lenei mea ia te au?”
- Faaaoga ia auala o loo faamatalaina atu i le vaega F o lenei tusi (itulau 167–193). Mo se faaitaiga, o se tala mai tusitusiga paia, e mafai ona e faaaogaina se laupapa ‘ie mamoe, ata faigofie e tusia i luga o le laupapa, po o ata foi na tusia e tamaiti. E mafai foi ona e tuu atu i tamaiti e toe faamatala se tala faatusipaia pe toe usu se pese e faatatau tonu lava i ni mau patino.
- I le faaiuga o nisi o lesona a le Peraimeri, e i ai se vaega e taua o “Tusi Faitau Fautuaina i le Fale.” Ia valaaulia tamaiti o le vasega e faitau faatasi ma o latou aiga ia mau o loo ta’ua ai iina.

VALAAULIA LE AOA MA LE MAELEGA

O i tatou uma taitoatasi e fitoitonu i ai le aoaona o le talalelei e ala i taumafaiga maelega. Ua faamanuiaina foi i tatou i nisi o taimi i le auauna atu o ni faiaoga—ina ia musuia ma fesoasoani i isi i lo latou tiutetauave ina ia aoaona le talalelei.

Tatou te tuuina atu leni tautua taua e ala lea i le faia o mea uma tatou te mafaia ina ia:

1. Faamataala ma faatumauina le fiafia o i latou o loo e aoaona.
2. Ia uunaiina lo latou auai ma le atoatoa i lesona.
3. Faaali atu ia i latou le auala e ola ai e tusa ma upumoni latou te aoaona.

E ao ona tatou faia nei mea i le alofa ma le mana o le Agaga.

O lona uiga e le tatau ona tatou taulai tele atu i la tatou faatinoga ae ia taulai tele atu i le lelei ona tatou fesoasoani atu i isi e aoaona le talalelei ma le maelega ma ola faamaoni ai.

FESOASOANI I TAGATA TAITOATASI INA IA AVEA MA A LATOU MATAFAIOI LE AOAOINA O LE TALALELEI

O le Matafaioi a Tagata Taitoatasi Uma le Aoaoina o le Talalelei

I se tusi e faataata i le suesueina o le talalelei, na tusia ai faapea e Elder Bruce R. McConkie: “Se’i o tatou oo atu la . . . i se faaiuga o le a i ai sona sao taua i lo tatou faaolataga faavavau. O lea faaiuga o le tatau lea i tagata uma taitoatasi ona aoaoina ia aoaoga faavae o le talalelei mo ia lava. E leai se isi e mafai ona faia mo ia. O tagata uma lava taitoatasi e tutu lava na o i latou pe a oo mai i le tulaga o le malamalama i le talalelei; o tagata uma ua i ai le aia i tusitusiga paia lava e tasi ma ua i ai le aia i le taitaiga a le Agaga Paia lava e tasi; e tatau i tagata uma ona totogiina le tau e pei ona faatulagaina mai e le Tamaoiga Paia pe afai e ao ona ia mauaina le penina tautele.

“O lea lava mataupu faavae e tasi o loo puleaina ai le aoaoina o le upumoni ma le ola e tusa ai ma ona faatulagaga. E leai se tasi e mafai ona salamo mo le isi; e leai se tasi e mafai ona ia tausia ia poloaiga mo le isi; e leai se tasi e mafai ona faasaoina i le igoa o le isi. Ma e leai se tasi e mafai ona maua se molimau pe alualu i luma i le malamalama ma le upumoni i le mamalu faavavau mo soo se tasi ae mo ia lava. O le malamalama o le upumoni ma faamanuiaga e oo mai ia i latou e gauai i mataupu faavae moni o ni mea ia e patino lava i le tagata ia. Ma ona o le Atua o se Atua faamaoni ua ia tuuina mai le faaolataga i agaga uma o e o loo ola i tulafono lava e tasi, o lea ua ia ofoina mai ai le malamalama lava e tasi o ana upumoni faavavau ia i latou uma o e o le a totogiina le tau o le tagata e sailia le upumoni.

“O le faatulagaga a le Ekalesia mo le mauaina o le malamalama i le talalelei e faapenei:

“a. O le matafaioi o loo i luga o tagata taitoatasi ina ia maua se malamalama o le upumoni e ala i ana lava tau-mafaiga.

“e. O le isi, e tatau i aiga ona aoaoina tagata o o latou lava aiga. Ua poloaiina matua ina ia tausia a latou fanau i

le malamalama ma le upumoni. O le aiga e tatau ona avea ma nofoaga tutotonu o aoaoga i le olaga o se Au Paia o Aso e Gata Ai.

“i. Ina ia fesoasoani i tagata taitoatasi ma aiga, o lea ua avea ai le Ekalesia ma sui, e tuuina atu le tele o avanoa e aoao atu ai ma aoao mai ai. Ua poloaiina i tatou ina ia “aoao le tasi i le tasi i mataupu o le malo’ (MFF 88:77). O loo faia lea vaega i sauniga faamanatuga, i konafesi ma isi sauniga, e faiaoga o aiga, i vasega a le perisitua ma ausilali, e auala atu i seminare ma aoaoga faalelotu, ma auala atu i aoga a le Ekalesia” (“Finding Answers to Gospel Questions,” i le *Charge to Religious Educators*, lomiga lona 3 [1994], 80).

O le Matafaioi a le Faiaoga le Fesoasoani Atu i Tagata Taitoatasi ia Aoaoina le Talalelei

O le iloaina e gafa tagata taitoatasi ma le aoaoina o le talalelei, ua mafai ai ona tatou fesili ifo, “O le a le matafaioi a faiaoga? O le fesoasoani lea i tagata taitoatasi ina ia gafa ma le aoaoina o le talalelei—ia fafagu i totonu ia te i latou le naunautaga e suesue, malamalama, ma ola i le talalelei ma faaali atu ia i latou le auala e faia ai.

O Sister Virginia H. Pearce, o le sa avea ma fesoasoani muamua i le au peresitene aoao o Tamaitai Talavou na faapea mai:

“O le sini a se faiaoga e sili atu nai lo le na o le tuuina atu o se tautalaga e uiga i le upumoni. O le valaauliaina lea o le Agaga ma faaoga ia auala o le a faalauteleina ai le mafaia e le tagata o loo aoaoina ona iloaina le upumoni [ma] ia faagauaiina o ia ina ia faaaogaina. . . .

“ . . . Mafaufau i le fia selau afe o potuaoga i Aso Sa taitasi, o loo tofu ma le faiaoga o le ua malamalama ‘o le aoaoga e ao ona faia lea e le tamaitiiti aoga. O lea la, o le tamaitiiti aoga lea e ao ona faagaoiina. Afai e taulai uma mea i le faiaoga, ma avea o ia ma tama autu o le ata, e na te avea le taimi uma o le talanoaga, pe na te faia foi na o ia

le gaioioga, e toetoe lava a mautinoa lona aia fua i le aoaoina o tagata o le vasega' [Ashael D. Woodruff, *Teaching the Gospel* (1962), 37].

“O se faiaoga tomai e le mafaufau faapea, “O le a se mea e tatau ona ou faia i le vasega i lenei aso?” ae fesili, “ O le a se mea o le a fai e tamaiti o la’u vasega i lenei aso?”; e lē o le, ‘O le a le mea o le a ou aoaoina atu i lenei aso?’, ae ia fesili, ‘O le a faapefea ona ou fesoasoani i tamaiti o la’u vasega ia iloa le mea e moomia ona latou iloa?’ [*Teaching the Gospel: A Handbook for CES Teachers and Leaders* (1994), 13]. O le faiaoga tomai e le manao i tamaiti o le vasega e tuua le vasega ae o loo talanoa i le maoae ma le tulaga ese o le faiaoga. O lea faiaoga e manao i tamaiti o le vasega ina ia o ese ae o loo talanoa i le maoae o le talalelei!” (I le Conference Report, Oke. 1996, 13–14; po o le *Liahona*, Ian. 1997, 14).

O faiaoga e malamalama i lo latou tiutetauave moni e faaalologia le saolotoga o tagata uma latou te aoaoina. Latou te fiafia pe a suesueina e i latou o loo latou aoaoina ia tusitusiga paia e i latou lava, iloaina ia mataupu faavae o le talalelei mo i latou lava, ma tuuina mai ni sao aoga i talanoaga. E sili atu ona faamanuiaina ia faiaoga pe afai e suesue ma le maelega ia tagata o loo aoaoina ma alualu i luma i le talalelei ma maua mai le malosi mai le Atua.

O faiaoga lelei latou te le aveina le faaamuiia mo le aoaoina ma le alualu i luma o i latou o loo latou aoaoina. E pei lava o tagata fai togalaau o e toto ma teuteu i laau, latou te taumafai ina ia faatulagaina ni tulaga sili ona lelei mo le aoaoga. Ona latou tuu atu lea o le faafetai i le Atua pe a latou vaai le alualu i luma o i latou o loo latou aoaoina. Na tusia e Paulo, “O lenei, e le o le toto, e le o le faasusu, ae peitai o le Atua o le na te faatupuina” (1 Korinito 3:7).

Uunaia o le Ola Faalagolago o le Tagata ia te Ia Lava i le Aoaoina o le Talalelei

O fautuaga nei e mafai ona fesoasoani ia te oe e uunaia ai isi ina ia tauaveina le tiutetauave mo le aoaoina o le talalelei:

- Tausia pea lou maelega mo le suesueina o tusitusiga paia ma aoaoga a perofeta o aso e gata ai. O lou maelega e mafai ona musuia ai i latou o loo e aoaoina ina ia mulimuli i lau faaitaiga.
- Ao e aoao atu, ia e taulai atu pea i tusitusiga paia ma aoaoga a perofeta o aso e gata ai. O le a fesoasoani lenei faiga i tagata o le vasega latou te talisapaia ai ma iloa le aoga tele o le afioga a le Atua.
- Ia tuuina atu ni fesili e moomia ai ona sailia e tagata o loo aoaoina ia ni tali i totonu o tusitusiga paia ma aoaoga a perofeta o aso e gata ai. Talu ai ona o nisi taimi e lelei ai le fesili atu i tagata o loo aoaoina po o le a so

latou manatu i ni mataupu patino, ae masani lava ona sili atu le fesili atu ia i latou po o le a se mea o loo aoao mai ai ia tusitusiga paia ma afioga a perofeta o aso e gata ai.

- Faaali atu i tagata o loo aoaoina pe faapefea ona faaao-gaina ia fesoasoaniga o loo i totonu o tusitusiga paia. O tusitusiga paia e mafai ona avea ma se mea e maofa ai nisi, aemaise lava ia i latou e le’i tele se malamalama i totonu o le Ekalesia. E mafai ona e fesoasoani e ala lea i le aoaoina o i latou i le auala e faaaoaga ai faamatalaga o loo i le pito i lalo, o le Taiala i Tusitusiga Paia, o upusii mai le Faaliliuga a Iosefa Samita, faapea ma faafanua (tagai i le “Aoa Atua Mai Tusitusiga Paia,” itulau 56–61, mo ni manatu ma’oti). O tagata taitoatasi o e latou te aoaoina pe faapefea ona faaao-gaina nei fesoasoaniga e sili atu ona mautinoa lo latou mafaia ona suesueina ia tusitusiga paia.
- Ia tuuina atu ni galuega fai e moomia ai le suesueina o tusitusiga paia ma aoaoga a perofeta o aso e gata ai. Mafaufau i le faaiuina o se lesonea e ala lea i le tuuina atu o se fesili po o le tuuina atu o se galuega fai e man-aomia ai i latou o loo auai atu ona sailili i tusitusiga paia ma aoaoga a perofeta o aso e gata ai. E oo lava i tamaiti laiti e mafai ona tuuina atu i ai nei ituiga galuega. Mo se faaitaiga, a maea se lesonea e uiga i le tatalo, e mafai ona e fai atu i tamaiti e faitau faatasi ma o latou matua se tala faatusipaia po o se lauga o le kon-afesi aoao e uiga i le tatalo.
- Fesoasoani i tagata o loo aoaoina ina ia malamalama o tagata o loo i totonu o tusitusiga paia o ni tagata moni lava o e na oo i ai faigata ma fiafiaga i a latou tau-mafaiga ina ia auuina atu i le Alii. E olaola mai tusi-tusiga paia pe a tatou manatuaina o perofeta ma isi tagata o loo i totonu o tusitusiga paia na latou oo i le tele o nei mea o loo tatou oo foi i ai.
- Ia faaali atu i tagata o loo aoaoina le auala e sailia ai ia tali i lu’itau o le olaga i totonu o tusitusiga paia ma aoaoga a perofeta o aso e gata ai. Mo se faaitaiga, e mafai ona e fesoasoani ia i latou e faaaoaga le Taiala i Tusitusiga Paia po o le faasinoupu i lomiga o le konafesi aoao o le mekasini a le Ekalesia e saili ai mo fautuaga autu e pei o le faamafanafanaina, salamo, faamagaloga, faaaliga, po o le tatalo.
- Ia uunaiina faalauaitale i latou o loo e aoaoina ina ia suesue i tusitusiga paia ma aoaoga a perofeta o aso e gata ai. O nisi e le’i malamalama lava i la latou matafaioi i le aoaoina o le talalelei. O nisi ua galo. Na faailoa mai e se epikopo faapea na ia auai i se tasi fonotaga faaleaoaoga a se Peraimeri lea na tuuina atu ai le lu’i ina ia suesueina ia tusitusiga paia i aso uma. O se

taunuuga o lena mea na tupu, e na o le tasi le aso na misi ai lana suesue i le isi 13 tausaga na sosoo ai. Na ia faapea mai o lenei suesuega na suia ai lona olaga.

- Ia tuuina atu le molimau i le Faaola e avea ma totonu-galemu o mea uma o loo aoaoina atu tusitusiga paia ma aoaoga a perofeta o aso e gata ai. Ia matuai faapitoa lava le faamamafa atu o lau molimau i le Faaola. Ao vaai atu i latou o loo e aoaoina i le Faaola i totonu o tusitusiga

paia ma aoaoga a perofeta o aso e gata ai, o le a faateleina lo latou naunautaiga ma o le a faamalosia a latou molimau.

Faamatalaga Faaopoopo

Mo nisi faamatalaga i le fesoasoani atu i tagata taitoatasi ina ia tauaveina le matafaioi mo le aoaoina o le talalelei, tagai i le lesona 5 o le vasega o le Aoaoina Atu o le Talalelei (itulau 220–25).

TAITAI A O TALANOAGA



O talanoaga e aanoa e faavaea ai le tele o aoaoga o le talalelei. Tatou te valaaulia le Agaga pe a tatou aoao atu le talalelei i le isi ma gaua'i atu ma le faaloalo le tasi i le isi.

O talanoaga e mafai ona aumaia ai taunuuga e seasea ona tupu e aunoa ma ni talanoaga. Mo se faataitaiga, e mafai ona latou:

- Siitia ai le aoaoina ma le maelega. E auala mai i talanoaga e faatinoina faalelei, e faatupuina ai le naunautai ma le gauai o tagata o loo aoaoina. O tagata uma e auai e mafai ona uunaia ina ia aofia faalelei i le aoaoga. Ao e tuuina atu ma tuuina mai e i latou o loo e aoaoina ia ni fesili, suesue faatasi ia mau, ma faalogo le tasi i le isi, o le a mafai e tagata uma o loo auai ona mauaina ni tomai ma faatosinaga e mafai ai ona fesoasoani i suesuega taitasi o le talalelei.
- Uunaia le lotogatasi i tagata uma o loo e aoaoina. Ao latou fetufaai mai ni o latou malamalamaaga ma mea na oo i ai ma faalogo atu ma tali atu i isi i le agaga faaloalo, o le a mafai ona sili atu ona lotogatasi i latou ma faatupuina se sioiomaga lelei mo le aoaoina.
- Faateleina ai le malamalama. O talanoaga lelei e sili atu nai lo ni talanoaga faaleuo lea e fetufaai ai ni manatu. E faalateleina ai ma faalolotoina ai le malamalama o tagata taitasi o loo auai i mataupu faavae o le talalelei.
- E faaititia ai le lē malamalama. O faamatalaga a tagata o loo aoaoina e atagia mai ai le lelei o lo latou malamalama i mataupu faavae na aoaoina. E mafai e lenei faiga ona fesoasoani ia te oe e te

iloa ai le taimi e faalatele ai, faamamafa ai, pe tauaofai ai foi ni mataupu faavae ma'oti.

Fautuaga mo le Faia o Talanoaga

Faaaoga Fesili

O fesili e mafai ona uunaia ai i latou o loo auai ina ia auai i le faatinoga o talanoaga. E mafai ona fesoasoani i tagata o loo aoaoina ia malamalama i se mataupu faavae, mafaufau loloto e uiga i ai, ma faatatau i o latou olaga. E mafai ona latou taitaiina ia tagata o loo aoaoina ina ia liliu atu i tusitusiga paia mo tali.

O le tele o tusi lesona o loo tuuina atu ai fesili mo le amataina o talanoaga ma le faaauuina pea. E mafai ona e faaaogaina nei fesili ma saunia ni au lava fesili. Ia tuuina atu fesili e uunaia ai ni tali 'anoa ma fesoasoani ai i tagata taitoatasi e mafaufau loloto moni i le talalelei. (Mo fesoasoaniga faaopoopo, tagai i le "Aoa Atua i Fesili," itu-lau 71–73.)

Filifili Auala e Aoa Atua Ai e Fetau i le Talanoaina o Lesona

A maea ona e fuafuaina ia fesili, ona e fesili ifo lea ia te oe lava ia, "O le a le isi mea e mafai ona ou faia? O a auala e mafai ona ou faaaogaina e faatamaoigaina ai le talanoaga?" E mafai ona e faaaogaina le tele o auala eseese e aoao atu ai ina ia amata ai talanoaga ma faaauuina ai pea. Mo se faataitaiga, e mafai ona e amataina se lesona i le faamatalaina atu o se tala, faaaogaina o se lesona faatino, po o se usuina faatasi o se viiga ma tuu atu ia i latou o loo auai mai e vaai i totonu o le viiga mo le tali i se fesili.

Ia Nofouta i le Faatosinaga a le Agaga Ia i Latou o Loo Auai

E mafai e le Agaga Paia ona musuia se toatasi po o le sili atu foi o i latou o loo e aoaoina ina ia tuu atu ni o latou tomai o loo moomia ona faalogo iai isi. Ia malamalama i musumusuga e te mauaina ina ia valaauina ni tagata patino. E te lagona foi lava le faagaetia e talosagaina se tagata e le'i ofo mai e faailoa mai ona manatu.

Sailia Auala mo Tagata Uma Ina ia Auai i le Faatinoga

O i latou e te aoaoina o le a faamanuiaina mai le auai o isi. Ae peitai, e mafai ona e iloaina lou talosagaina o ni tali mai na o i latou lava e sii mai o latou lima. E le masani ona filifili tagata e aua ne'i auai ona e leai ni o latou manatu e uiga i le autu pe manatu foi e tuu le avanoa i isi e tautatala ai. Pe latou te lagona foi le fefe ne'i te'i ua sese pe manatu foi e le mafai ona latou tuuina lelei mai o latou manatu e pei o isi. Atonu latou te lagonaina e le taliaina i latou e le vasega.

Ia nofouta ma nofo tatalo ao e mafaufau i tagata uma taitoatasi. E mafai ona e fuafua ina ia talosagaina se manatu o se tagata e uiga i se autu nai lo le tuuina atu i ai o se fesili tuusa'o lea e le mafaia e ia ona taliina. Mo se faaitaiga, nai le fesili atu, "O a meaalofo a le Agaga na lisiina mai e Paulo i le 1 Korinito?" ae mafai ona e fesili atu, "Aisea e te manatu ai o le alofa o le meaalofo sili lea o meaalofo uma a le Agaga?" E mafai ona e talosaga atu i se tasi e tuuina mai sina sauniuniga laitiiti mo se lesona; e mafai foi ona e fesoasoani ia te ia e sauniaina. Atonu e te manao muamua lava e te faauo atu i nisi o tagata taitoatasi, ia iloa ai e i latou e te faatauaina mea latou te fai mai ai.

Faatumauina o le Taulai Atu i Lesona

E seasea ona fetufaai mai e tagata o loo aoaoina ni manatu e le talafeagai i le lesona. Afai e te lagonaina o se faamatalaga ua tuuina mai e ese mai se lesona, e mafai ona e tataia le talanoaga i tua i vaega autu o le lesona e ala lea i lou fai atu o se mea faapea, 'O se manatu lelei tele lena, ae ou te talitonu ua tatou agai ese atu i se isi vaega. E mafai ona tatou faataatia lena talanoaga mo se isi taimi ae toe foi mai i le tatou fesili muamua?" Pe mafai foi ona e faapea atu, "Ou te manatu ou te le'i saunia e talanoa e uiga i ai i lenei aso. Atonu e mafai ona tatou talanoaina lena manatu i se isi taimi."

Atonu foi e i ai taimi e te leiloa ai le tali i se fesili. Afai e tupu mai lenei mea, e faigofie lava ona e faapea atu e te le iloa. Atonu e te manao e te fai atu o le a e taumafai e sailia le tali i le fesili. Pe e te manao foi e valaaulia tagata o loo aoaoina e sailia le tali, ma tuuina atu ia i latou se taimi i le isi lesona e lipoti mai ai po o le a se mea ua latou aoaoina.

Faatumauina le Faatulagaga

O nisi taimi e toatele nisi o tagata e aoaoina e naunau e aumai ni manatu i se mataupu. Ia uunaiina i latou e sii mai o latou lima pe a latou mananao e aumai ni o latou manatu ma faatasi seiloga e te valaau atu ia i latou. Ia faamanino atu le tele o mea e mafai ona latou aoaoina mai isi o i latou, ma valaaulia i latou e faalogo ma le faaaloalo i manatu o isi.

E seasea ona mafai e se tagata e toatasi ona faaleagaina se lesona e ala lea i le finau ma oe ma isi, tautala lē faaaloalo, pe aumaia foi ni mataupu e feeseeseai ai. O sea ituaiga tagata e faaulufaleina mai se agaga o le fefinau, lea e faigata ai ona aoa atu ma mafai ai ona fafaguina le faatuatua o nisi. Mo fautuaga i le auala e galulue ai ma tagata faapena, tagai i le "Fesoasoani Ia i Latou o e Faasoesa," itulau 91–93.

Aua le Tautala Soo

O faiaoga o e tautatala atu i le tele o le taimi pe taliina ia fesili e i latou lava ua latou faamoemoe e faalotovaivaiina ia tagata o loo aoaoina mai le auai. E tatau ona e faaeteete e aua ne'i sili atu lau tautala nai lo le mea e manaomia pe faailoa soo atu foi ni ou manatu. O nei uiga e mafai ai ona faatupuina le le fiafia o tagata o loo aoaoina. Mafaufau ia te oe lava ia o se taiala i se faigamalaga o le aoaoga o le na te tuuina atu ni faamatalaga talafeagai e taofiofia ai pea i latou o loo e aoaoina i le ala sa'o.

O lou popolega sili lava e tatau ona i ai o le fesoasoani atu lea i isi e aoaoina le talalelei, ae le o le tuuina atu o ni lesona e maoae le matagofie. E aofia ai le tuuina atu o avanoa mo tagata o loo aoaoina e aoa ai e le tasi le isi. Afai e tuuina mai e se tasi se fesili, mafaufau e valaaulia isi e taliina nai lo lou taliina e oe lava ia. Mo se faaitaiga, e mafai ona e faapea atu, "O se fesili manaia tele lena. O le a se manatu o le toatele o outou?" po o le "E mafai e se tasi ona fesoasoani mai i le fesili lenei?"

Aua le Vave Momotuina ia Talanoaga

Ia faaeteete ia aua le vave momotuina ia talanoaga i se taumafaiga e folasia uma atu ai ia mea na e sauniaina. E ui lava e taua le aofia o mea uma na saunia, ae sili atu ona taua le fesoasoani i tagata o loo aoaoina ina ia lagonaina le faatosinaga a le Agaga, foiaina ni a latou fesili, faateleina lo latou malamalama i le talalelei, ma faamausaliina la latou tautinoga i le tausua o poloaiga.

Faalogo

Ia faia taumafaiga uma e faalogo atu ai ma le faamaoni i manatu o tagata o loo aoaoina. O lau faaitaiga o le a uunaia ai i latou e faalogo lelei i isi. Afai e te le malamalama i le manatu o se tasi, ia tuu atu se fesili. E mafai ona e faapea atu, "Ou te mautinoa ou te le'i malamalama. E mafai ona e toe faamalamalamaina mai le mea lena?" po o le "E mafai ona e tuuina mai se faaitaiga o le mea lena e te fai mai ai?" (Mo fesoasoaniga faaopoopo, tagai i le "Faalogo," itulau 69–70.)

Faafetaia Manatu Uma na Aumai

E mafai ona e fesoasoani ia i latou o loo e aoaoina ina ia lagonaina atili le toamalie e uiga i lo latou mafaia ona auai



i se talanoaga pe a e tali faalelei atu i ai i soo se manatu faamaoni e tuuina mai. Mo se faataitaiga, e mafai ona e faapea atu, “Faafetai mo lau tali. O se tali lelei tele lena” po o le “O se manatu manaia tele! Ou te le’i mafaufau muamua lava i ai i lena mea” po o le “O se faataitaiga lelei tele lena” po o le “Ou te talisapaia mea uma na outou tautalaga i lenei aso.”

Aua lava ne’i e ulagiaina pe faitioina soo se fesili po o se manatu, ae ia faaali atu le amio solia ma le alofa ao e tau-mafai i le mea sili e tali atu i ai. Afai e lagonaina e tagata o loo faatauaina o latou manatu, o le a faateleina ona latou fetufaai mai mea na latou oo i ai, o o latou lagona, ma molimau ma le saoloto (tagai i le “Aoaoina o Isi Ina ia Faia ni o latou Sao i se Atmosifia e Aoao Ai,” itulau 83–84; ‘O le Auala e mafai ai e Faiaoga Ona I Ai no o Latou Sao i se Atmosifia e Aoao Ai,” itulau 85–88).

Fesoasoani i Tagata e Tuuina Mai ni Tali Sese

E seasea lava ona tuuina mai e se tasi se mea e le sa’o. E mafai ona e fesoasoani i le tagata o loo aoaoina i se tali e pei o le “Ou te le’i mafaufau i ai i lena auala muamua.” Po o lou fai atu foi faapea, “Atonu o loo e mafaufau i se isi mea” po o le “Ua ou fiafia lava ua e lagaina mai le mea lena.” I nisi vaega, atonu e te tauaveina ai le tiutetauave mo se tali sese. Mo se faataitaiga, e mafai ona e faapea atu, “E le’i manino ona ou faamalalamaina atu, a ea? Ou te faamalie atu.”

Faaiuina o Talanoaga

E taua tele le faaiuina o talanoaga i le taimi sao. O le tele o le agaga o se talanoaga faagaetia e mou atu pe a umi naua. O fautuaga nei e mafai ona fesoasoani ai ia te oe:

- Ia puleaina le taimi. Ia iloa le mea e tatau ona uma ai le lesona. Ia lava se taimi e te aoteleina ai mea na e tautalaga ma tuuina atu ai lau molimau.
- Tuu atu i tagata o loo aoaoina se taimi faatapulaaaina. E mafai ona e faia se faamatalaga faapea, “O loo lava le taimi mo nisi manatu se lua ona lava ai lea.” E mafai foi ona e faapea atu, “O le a tatou faalogo atu i le faamatalaga lenei e tasi, ona ou faaiuina ai lea i se mafaufauga mulimuli.”

I le faapoopo atu i le aumaia o talanoaga i se faaiuga i le taimi sa’o, e taua tele le faaiuina o talanoaga i le auala sa’o. Afai e te faaumaina se talanoaga, ia faafetai atu i tagata o loo aoaoina mo le auai mai iai. Ona aotele lea o manatu autu na e aofia ai i le taimi o le talanoaga pe valaaulia se tasi na te faia. Ia faamamafa atu ia mataupu faavae o le talalelei na talanoaina. Iloilo soo se manatu fou e maua mai le talanoaga, ma uunaiina i latou o loo e aoaoina ina ia faaogaina o latou malamalamaaga loloto e faaoga ai mataupu faavae i o latou olaga. E pei ona musuia ai e le Agaga, ia tuuina atu lau molimau pe valaaulia foi se tasi e tuuina atu lana molimau.

FAALOGO



O le faalogo o se faailoga lea o le alofa. E masani ona manaomia ai le ositaulaga. Pe a tatou faalogo moni atu lava i isi, e masani ona tatou tuuese mea tatou te mananao e fofogaina atu ina ia mafai ona faaalua mai o latou lava lagona.

O le Auala e Mafai Ai e le Faalogo Lelei Ona Fesoasoani Ia i Latou o Loo e Aoaoina

I le avea ai ma se faiaoga, e tele se lelei e mafai ona e faia e ala lea i le faalogo. Afai e te faalogo, o loo taulai atu lau aoaoga i manaoga ma mea e fialia i ai tagata taitoatasi. E te faali atu ai lou faaloalo mo o latou manatu, auala, ma mea na oo i ai. E te faali atu ai lou popole mo i latou uma taitoatasi. Afai latou te iloa e taua ia te oe o latou malamalamaaga, o le a sili atu ona latou:

- Gauai mai ma le maelega.
- Fetufaai atu manatu ma mea na oo i ai.
- Aoaoina ma le filiga.
- Ola i mea na latou aoaoina.

O nisi e manatu faapea o le faalogo atu ma le naunautai i se tasi tagata o se vaega o lona uiga o le le amanaiaina lea o isi ma o se le naunau lea ia i latou. E le o le tulaga lea. O le faalogo lelei i se tagata e toatasi e fesoasoani lea i isi ina ia latou iloa e te popole mo tagata uma taitoatasi. Ma a'o e faalogo atu taitoatasi i tagata o le aiga po o tagata o le vasega, ua e faia se faaitaiga mo isi ina ia faia foi faapea.

O le Auala e Mafai ai e le Faalogo Lelei ona Fesoasoani ia te Oe i le Avea ai ma se Faiaoga

O lou faalogo lelei o le a fesoasoani ia te oe i le avea ai ma se faiaoga. Ao e faalogo

atu ma le alofa ma le faaloalo i manatu o tagata o loo aoaoina, o le a mafai ai ona e:

- Iloiloina ai le malosi o le aafia o tagata o loo aoaoina i le aoaoga.
- Iloiloina ai le tele o mea o loo latou aoaoina.
- Malamalama lelei ai i o latou manaoga.
- Iloatino ai ma aveesea ni faafaigata lea e mafai ona faatapulaaina ai lo latou aoaoina, e pei o le lotovaivai po o le aafia i nisi mea.
- Malamalama lelei ai i fesili o loo faafitauli ia i latou ina ia mafai ona e taitaiina atu i latou i ni tali.
- Iloa ai le taimi e toe faaauau ai se manatu o loo taua ia i latou.
- Iloa ai le taimi latou te manaomia ai se avanoa e tautatala ai.
- E fuafua ai le taimi e toe faamatala atu ai ni mataupu faavae patino pe tuu atu ai foi se isi faamalamalamaaga.
- Iloa ai le taimi e fetuutuunai ai se lesona.

O le faalogo o le a aumaia ai foi faamanuiaga e tele ia te oe lava ia. Ao e faalogo atu ia i latou o loo e aoaoina, o le a e vaia le tele naua o mea latou te aoaoina mai ia te oe.

Fautuaga mo le Faateleina o le Faalogo Lelei

E mafai faapefea ona iloa e i latou o loo e aoaoina o loo e faalogo atu? E mafai ona e faaitaia o loo e faalogo atu e ala lea i lou faaliina atu o se faailoga o le naunau. E mafai ona e vaai i le tagata o loo tautala nai lo mea o le lesona po o nisi mea o loo i tonu o le potu. E mafai ona e uunaiina le tagata o loo tautala e faauma ona manatu e aunoa ma le faalavelaveina. E mafai ona e aloese mai le faasalaveia o talanoaga ae le'i taitai i ni fautuaga po o ni faaiuga. Afai e te malamalama i le mea o loo ta'u mai, e mafai ona e tuuina atu ni faamatalaga e faaalua ai lou malamalama. Afai e te le malamalama, e mafai ona e tuuina atu ni fesili.

Mafaufau i manatu nei ao e taumafai e faateleina lou mafaia ona faalogo.

Tuuina Atu Fesili

O fesili e pei o nei e mafai ona faaalua ai e te popole e uiga i manatu ma lagona o tagata taitoatasi.

- E mafai ona e faamatala atili mai e uiga i le mea lena?
- O le a sou lagona ina ua tupu lena mea?
- Ou te le mautinoa pe ua ou malamalama. O e fai mai . . . ?
- E mafai ona e faamatalaina mai le mea lena ia te au?

Faatali

Aua e te fefe i le leai o se pisa. E masani ona mananao tagata i nisi taimi e mafaufau e uiga i fesili ma tali atu i ai pe faailoa atu ai po o a o latou lagona. Atonu e te faatali pe a mavae ona tuuina atu se fesili, pe a maea ona fetufaai mai se tulaga faaleagaga na oo i ai, pe i ai foi ni faafaigata i se tagata e faamatala mai ai ona lagona. Ia mautinoa ia tuu atu i le tagata o loo tautala se taimi e faamaea mai ai ona manatu a e te le'i tali atu i ai. O le mea moni lava ia, e le tatau ona e faatali umi, aemaise lava pe afai e le o lelei se faalogona a se tasi pe o loo faamalosi foi e tautala.

Ia Gauai Atu i le Mea o Loo Tautala Mai Ai le Tagata

O nisi taimi e i ai le faanaunaga o tagata e mafaufau i mea o le a latou tautatala mai i ai nai lo le faalogo atu i mea o loo fai mai ai isi. Ia mautinoa o loo e matuai nau-nau i le failauga nai lo le fuafuaina o lau tali.

Gauai Atu i Savali e Le'i Fofogaina Mai a le Failauga

E masani ona fesootea mai e tagata o latou lagona e ala i le auala latou te nonofo ai, o o latou foliga vaai, o mea latou te faia i o latou lima, o o latou siuleo, ma le fe'avea'i solo o o latou mata. O nei savali e le o fofogaina mai, e mafai ona fesoasoani ia te oe e te malamalama ai i lagona o i latou o loo e aoaoina.

Toe Faaupu Atu Mea na Tautalagia e le Failauga

A maea ona faalogo atu i savali na tautalagia ma savali foi e le'i fofogaina, atonu e te manao e toe faaupu atu mea ua e malamalama i ai. Ia tauaofai atu ia savali i ni au lava

upu e vaai ai pe ua malamalama lelei. A maea lena, e mafai ona e siakiina i le tagata i lou fesili atu i ai, "O le mea lena na e fai mai ai?" po o le "Mata e tatau ona tatou talatalanoa atili i ai i lena mea?" Afai e te faia lena mea, ia mautinoa ia aua ne'i e tautala atu i se tulaga faatautee.

Aoao Tagata o Loo Aoaoina Ina ia Faalogo le Tasi i le Isi

Faamanatu atu i tagata o loo aoaoina e faapea o le faalogo o se tasi lea auala e faaalua ai lo tatou alolofa. O fautuaga nei e mafai ona fesoasoani ai ia te oe ina ia uunaiina ia tagata o loo aoaoina ina ia faalogo le tasi i le isi:

- A maea ona tuuina mai e le tasi tagata le tali i se fesili pe tuuina mai sona malamalamaaga, ona valaaulia lea o isi e faaopoopo atu i ai i le faamatalaga pe faailoa mai foi se isi manatu e ese mai ai.
- Afai e tuuina atu e se tasi se fesili, ia toe tuuina atu i isi nai lo le taliina e oe lava. Mo se faataitaiga, e mafai ona e fesili atu, "Pe i ai se tasi e manao na te taliina lena fesili?"
- Ia talosaga mamao atu i se tasi po o ni nisi foi e sauni e tauaofai ia manatu o loo fetufaaiina i se talanoaga.

Sa faafofoga ma silasila pea le Faaola ia i latou na Ia aoaoina, ma fetuutuunai Ana aoaoga i manaoga na Ia mauaina. Mo se faataitaiga, ina ua maea ona aoaoina tagata sa Nifae, na Ia fetalai atu, "Ia outou o atu ai i o outou aiga, ma mafaufau i mea ua uma ona ou fai atu ai" (3 Nifae 17:3). Ae peitai, ina ua amata ona Ia tuumuli ese atu, "na toe silasila solo o ia i le motu o tagata, ua silafia foi ua maligi o latou loimata, ma ua latou pulatoa mai ia te ia, e peiseai ua latou ole mai ia te ia, latou te nonofo teisi ma i latou" (3 Nifae 17:5). Na Ia silafiaina o latou manaoga ma nonofo teisi ai ma i latou e auuina atu ma aoaoina i latou. Afai e te faalogo lelei ma tali atu faalelei ia i latou o loo e aoaoina, e mafai ona e fesoasoani e faafetaiaia o latou manaoga mo le aoaoina i le talalelei.

AOAQ ATU I FESILI



O Iesu Keriso, le Matai o Faiaoga, e masani ona ia tuuina atu fesili e uunaiina ai tagata ina ia mafaufau loloto ma faaoga ia mataupu faavae o le talalelei na Ia aoaoina atu (tagai, mo se faataitaiga, Mataio 16:13–15; Luka 7:41–42; 3 Nifae 27:27). O ana fesili e faatupu manatu, e sailia ai le agaga, ma le naunautai.

Taiala Lautele mo le Sauniaina o Fesili

O tusi lesona ua gaosia e le Ekalesia o loo fautuaina atu ai le tele o fesili e mafai ona e faaogaina i le lesona. Faitau lelei i ai ma fuafua pe o le a faapefea ona sili atu ona fesoasoani mo i latou o loo e aoaoina. E mafai foi ona e sauniaina ni au lava fesili. Ao e mafaufau i fesili e faaoga i se lesona, ia fesili ifo ia te oe lava ia, “Pe o le a fesoasoani ea ia i latou o loo o’u aoaoina ia malamalama i manatu autu o le lesona? Pe o le a fesoasoani ea nei fesili ia i latou o loo o’u aoaoina ina ia faaoga ai ia mataupu faavae o le talalelei na aoaoina?”

O manatu nei e mafai ona fesoasoani ia te oe i le sauniaina o au fesili.

O Fesili e Mafai Ona Taliina i le Ioe po o le Leai

O fesili e mafai ona taliina i le *ioe* po o le *leai* e faatapulaa lona faaogaina i aoaoga o le talalelei. E tatau ona e faaogaina ina ia maua mai ai na o ni tautinoga pe fuafua ai foi pe malie se tasi pe le malie foi.

Fesili Moni

O fesili moni e faaoga e faavae ai ni vaega moni o se mau, mea na tupu, po o se mataupu faavae. E i ai o latou fesili ma’oti. E mafai ona fesoasoani ai i tagata o loo aoaoina ina ia suesueina ia mau mai tusi-

tusiga paia, malamalama i manatu autu, iloilo ina o manatu, ma foia ai ni manatu sese. Mo se faataitaiga:

- Ina ua talosaga ia uso o Nifae e faamagalalo i latou ona o le saisaia o ia i maea, o le a lana tali vave atu i ai?
- O anafea ae o fea foi na faavaeina ai le Ekalesia?

Ia mautinoa ia aua ne’i e tuuina atu na o fesili sa’o. E le tau manaomia ai ni manatu se tele i ai, ma e mafai ona faalotovaivaiina ai i latou e leiloa le tali. Afai e te faaogaina, e tatau ona e mautinoa o loo maua faamatalaga o tali mo i latou o loo e aoaoina.

O fesili sa’o, e mafai ai ona e fesoasoani ai i tagata uma e amataina faatasi se talanoaga. Ona e see atu loa lea i fesili e uunaia ai mafaufauga loloto ma fesoasoani ai i tagata o loo aoaoina ia iloa pe faapefea ona faaogaina ia mataupu faavae o le talalelei i o latou olaga.

Fesili e Faatupuina ai Mafaufauga Loloto

O nisi fesili e faamalosi ai tagata o loo aoaoina ina ia mafaufau loloto e faatatau i le uiga o ni mau ma mataupu faavae o le talalelei. O nei fesili e masani ona amataina i upu o le a, e faapefea, po o le aisea. E le mafai ona taliina i le ioe po o le leai, ma e msani lava ona sili atu ma le tasi le tali sa’o. Mo se faataitaiga:

- O le a sou manatu aisea na oo mai ai leni faaaliga i lea taimi o le talafaasolopito o le Ekalesia?
- O le a se mea e mafai e leni tala ona aoa mai e uiga i le auala e fesoasoani ai le Alii ia i latou o e o loo manaomia le fesoasoani?
- E faapefea ona e faauigaina le faatuatua?
- O le a le uiga o le agamalu?
- E faapefea ona pei leni mea o le mataupu faavae o le talalelei sa tatou talanoaina? (O se fesili lelei leni e tuuina atu i se lesona faitino.)
- Na faapefea ona ese uiga faaaliga o Lamana ma Lemuelu mai uiga faaaliga o Nifae?

Afai e tuuina atu fesili faapena, ia nofo malamalama i tali uma lava (tagai i le “Faalogo,” itulau 69–70). Ia uunaia tagata o loo aoaoina ina ia mafaufau loloto i tusi-

tusiga paia ma mataupu faavae o le talalelei sa talanoaina ma ia faaali mai o latou manatu. Aua le taumafai ina ia latou tuuina mai ni tali ma'oti i fesili; o le a vave lava ona latou malamalama i le mea o loo e faia ma e mafai ai ona taofia le auai pe amata ai foi ona taumatemate nai lo le mafaufau. Afai e te manaomia se tali ma'oti, e sili atu le tuuina atu o se fesili sa'o pe tuuina atu le faamatalaga i soo se isi lava auala.

Fesili e Fesoasoani ai i Tagata o Loo Aoaoina ia Faaogaina Mataupu Faavae o le Talalelei

E taua tele le tuuina atu o fesili o le a fesoasoani ai i tagata o loo aoaoina ina ia faaogaina mataupu faavae o le talalelei i o latou olaga. Mo se faataitaiga:

- O faapefea ona faataunuuna leni folafolaga mai le Alii i lou olaga?
- E faapefea i nisi taimi ona tatou faia le mea sese lava e tasi e pei o tagata o loo i le tala?
- E mafai faapefea ona avea le aoaiga a le Atua ma se faamanuiaga ia i tatou?
- O a nisi o mea o loo tutupu i aso nei e tutusa ma mea o loo tutupu i le tala faatusipaia?
- Afai o oe o le tagata lea, o le a sau mea e fai?

Fai atu i tagata o loo aoaoina e fetufaai faataitaiga i auala na faaogaina ai e i latou po o isi ia mataupu faavae o le talalelei na talanoaina. E pei ona musuia ai e le Agaga, ia uunaia i latou e tuuina atu a latou molimau i mataupu faavae na latou talanoaina.

Taiala Lautele mo le Tuuina Atu o Fesili

Tuu Atu Fesili e Mafai e Tagata o Loo Aoaoina Ona Taliina

Aua le faaogaina fesili e faaalua ai lou lava atamai. Ia tuu atu fesili e faatupuina ai ni tali e mafaufauina mai ia i latou o loo aoaoina.

Tali Atu ma le Faaaloalo ma le Migao i Tali Sese

E seasea lava ona tuuina mai e se tasi se tali sese po o se tali e faaalua ai le laitiiti o lo latou malamalama. O isi i le vasega atonu e talie i se tali faapea. O leni mea e mafai ai ona maasiasi ai le tagata ma avea ma mea e ono musu ai o ia e toe auai i le lumanai. E mafai ona faalavelave ai i lana aoao.

Ia tali atu i tali sese i le faaaloalo ma le migao. Ia mautinoa o loo lagona pea e le tagata le fiafia e auai. E mafai ona e filifili e te tauaveina le tiutetauave i lou tuuina atu o se faamatalaga faapea, "Ou te faamalie atu. Ou te manatu e le'i manino lo'u tuuina atu o lena fesili. Se'i toe taumafai atu." Pe e te laveiina foi le tagata i le faapea atu, "Atonu e ese se isi mea o loo e mafaufau i ai" po o le "Faafetai mo le aumaia o le vaega lena, ae ou te le o mautinoa pe o manino la'u fesili." O tali faapea o le a fesoasoani ai ia i

latou o loo e aoaoina e lagona atili ai le fiafia e auai e ui lava latou te manatu atonu e matautia le tuuina atu o se tali sese.

Faatali mo Tali

Aua e te popole pe afai e filelemu mo ni nai sekone ia tagata o loo e aoaoina pe a uma ona e tuuina atu se fesili. Aua e te taliina lau lava fesili; tuu atu se taimi mo tagata o loo aoaoina e mafaufau ai i ni tali. Ae peitai, o le faaumi-umi o le lei o se pisa e faailoa mai ai latou te le o malamalama i le fesili ma e manaomia ai la lou toe faaupuina atu.

Faaaoga Fesili e Toe Tullitatao Ai

O fesili toe tullitatao e mafai ona fesoasoani ai i tagata o loo aoaoina e mafaufau loloto ai e uiga i se mataupu faavae o loo latou talanoaina. Mo se faataitaiga, afai e fautua mai e tagata o loo aoaoina se tasi auala e mafai ai e se tala faatusipaia ona faatatau ia i latou, e mafai ona e fesili atu, "O a nisi mea e mafai ona tatou aoaoina mai leni tala?"

Tuu Atu le Avanoa i Tagata Uma e Tautatala Ai

Ina ia uunaiina tagata o loo aoaoina e auai, atonu e te manao e tuu atu sa'o nisi o fesili toe tullitatao ia i latou e le'i tuuina mai ni o latou manatu i le taimi o le lesonea.

Afai e toatele ni tagata e i ai ni o latou manatu e uiga i se mataupu, atonu e te manao e tuuina atu se faamatalaga faapenei, "O le a tatou faalogo muamua atu i ou manatu, ona sosoo ai lea ma oe." Ona nonofo lelei ai lea o i latou o loo e aoaoina aua ua latou iloa o le a latou maua se avanoa e tautatala ai.

Fesoasoani i Tagata o Loo Aoaoina e Sauni e Tali i Fesili

Ina ia fesoasoani i tagata o loo aoaoina e tali i fesili, atonu e te manao e ta'u atu muamua ia i latou se mea a'o le'i faitauina pe aoaoina atu, o le a e talosagaina ai ni a latou tali (tagai i le "vaavaai mo" ma le "faalogo mo" ni manatu i le "Aoa Atua Mai Tusitusiga Paia," itulau 56-57). Mo se faataitaiga, e mafai ona e faapea atu, "Faalogo a'o o'u faitauina atu le fuaitau leni ina ia mafai ona outou fetufaai mai ai ni mea e sili ona outou fiafia i ai" po o le "Aofaitauina leni mau, vaai pe mafai ona outou malamalama i le mea o loo ta'uina mai e le Alii e uiga i le faatuatua."

Aveese Fesili e Faatupuina ai le Feeseeseai pe Mafua ai foi ni Finauga

Na fetalai mai le Faaola, "O le ua i ai le agaga o le finauga, e le mai ia te au lea" (3 Nifae 11:29; tagai foi fuaiupu 28 ma le 30). Ia faateete ina ia aua ne'i tuuina atu ni fesili e faatupu ai ni finauga po o ni mataupu ma'ale'ale. Aua le tuuina atu fesili e faatupuina ai le masalosalo pe oo atu ai i ni talanoaga e le mafai ona faamalamalamaina. Ia mautinoa o au fesili e taitaiina atu ai tagata o loo aoaoina i se lo-

togatasi i le faatuatua ma le alofa (tagai Mosaea 18:21). Afai e i ai se feeseeseaiga, taumafai e faamamafa atu ia vaega e taufai malilie i ai ma faasa'o le aoaoga.

Ia Tuuina Atu Mai Lea Taimi i Lea Taimi ia Fesili e Uunaia ai le Mafaufau Filemu I Ai

E mafai ona e filifili mai lea taimi i lea taimi e tuuina atu fesili ia e tataua ona mafaufau loloto i ai tagata o loo e aoaoina nai lo le taliina i se talanoaga faalauaitete. Mo se faaitaitaiga:

- O le a se mea na e faia i lenei aso na taitai atu ai oe i le ola e faavavau?
- Ua e toilalo ea e faia se mea i lenei aso lea e ono taitai atu ai oe agai i le ola e faavavau?

Faaogaina Lelei o Fesili

Atonu e te manao e faaoga fesili i nisi o auala nei:

- Tusi fesili i luga o ni fasi pepa, ma faapiii fasi pepa i le pito i lalo o nofoa. I taimi talafeagai o le talanoaga, ia talosaga atu ai i tagata taitoatasi e aveese le fesili mai lona nofoa. Ona tuuina atu lea ia te ia na te faitauina le fesili ma tali i ai.
- Fai atu i tagata taitoatasi o loo aoaoina e tusi se fesili se tasi e faavae i se mataupu faavae o le talalelei po o se fuaiupu o se mau. Ao mai fesili ma talanoaina.
- Fai atu i tagata taitoatasi e faatino mai ia ni tagata o loo i totonu o le lesona latou te filifilia, ma tuu atu i isi e fesiligia ia fesili lava ia e tasi (tagai i le "Faatinoga," itulau 173). E lelei tele le vaega leni i tamaiti.

- I le gasologa o le vaiaso ao le'i faia le lesona, ia tuuina atu fesili i nai tagata o loo aoaoina. Fai atu i ai e sauni e tali i na fesili e avea o se vaega o le lesona o le a sau.
- Faaoga fesili nei e talanoaina ai se mataupu faavae: "O le a se mea ua uma ona tatou iloa e uiga i leni mataupu faavae?" "O le a se mea tatou te mananao ia iloa?" "O le a se mea ua tatou aoaoina i leni aso?" E mafai ona e faatulagaina le faavae o le lesona e ala lea i le taliina e tagata o loo aoaoina o nei fesili ona tuu atu lea ia i latou e tusia a latou tali i ni koluma se tolu i luga o le laupapa.
- Tusi se fesili i luga o le laupapa a'o le'i amataina le vasega ina ia mafai ai e tagata o loo aoaoina ona amata ona mafaufau loloto i ai i le taimi lava latou te taunuu atu ai.
- Tuu atu i tagata o loo aoaoina e sailia ma faitauina mau po o viiga talafeagai. Ona fai atu lea i tagata o loo aoaoina e tali i fesili e ala lea i le fetuفاai mai o ni faaitaitaiga mai o latou lava olaga.
- Vaevae le vasega i ni vaega laiti. Tuu atu i vaega taitasi ni nai fesili e mafaufau loloto i ai. Ona tuu atu lea i vaega taitasi e lipoti atu a latou tali i le vasega.

Faamatalaga Faaopoopo

Mo fesoasoaniga faaopoopo, tagai i le "Fuafua ma Taitaia Talanoaga 'Anoa," itulau 303–4 i le vaega o le "Aoaoina Atu o le Talalelei ma le Taitaiga" o le *Tusitaulima o Faatonuga a le Ekalesia*.

FESOASOANI I TAGATA O LOO AOAONA IA GAUAI MAI



Na fetufaai mai e se faiaoga o le Aoga Sa le malamalamaaga lenei e uiga i se lesona na ia aoaoina:

“Na ou lagonaina e pei o loo o’u aveina atu le vasega i se savaliga i le vaomatua. Ao amata ona matou savavali faatasi atu i lalo o le auala, sa ou faailoaina atu ni mau matagofie lava ao matou laasiaina. Na ou faamatalaina atu ma le faaeteete ia manatu o le lesona, e pei o se tagata taiala o loo faamatalaina atu ituaiga lau laau eseese e maua i le auala i le vaomatua.

“I se tasi tulaga, na ou faliu atu ai, e foliga mai, o loo o’u sailia tagata o la’u vasega. Na ou iloaina ai o loo taumamao mai lava i tua i le auala o tusitusiga paia. E leai ma se tasi o taulalata mai ia te au. O nisi ua le fia auai; o nisi ua le toe gaioi; o isi ua o ese mai le auala ma ua leiloloa ai. E foliga mai e ao ona ou toe foi atu i lalo i le auala, ma toe faapotopoto mai le vasega, ma taumafai e toe o faatasi i luma .”

E pei ona faaalua mai i lenei mea, e mafai e le faiaoga i nisi taimi ona “vavamamao” mai tagata o loo aoaoina i le taimi o lesona. O nisi taimi e le maua ai le fiala po o le le fia auai o tagata o loo aoaoina.

E mafai faapefea ona fesoasoani faiaoga i tagata o loo aoaoina ina ia tumau pea le mataala? E leai se tali se tasi i lenei fesili, ae e i ai mea e mafai ona e faia o le a tulai mai ai se eseese.

Maitau ma Faalogo Atu Ia i Latou o Loo e Aoaoina

E masani lava ona e mafai ona iloaina pe ua amata ona “taumamao” i latou o loo e aoaoina mai ia te oe. E mafai ona e

maitauina ua sili atu ona latou le fia auai nai lo le mea e masani ai, ua latou le faitau faatasi pe a faitauina leotele e isi ia ni mau mai tusitusiga paia, pe o loo latou talatalanoa foi ma isi e uiga i nisi mea e le faatatau i le lesona. E mafai ona e lagonaina se leai o se manatunatu po o se filiga i a latou tali i fesili e te tuuina atu.

Ia faaeteete pe a e faamatalaina atu ni faamatalaga tau faaataata i le gauai mai o tagata o loo aoaoina. O nisi e foliga mai o loo “taumamao” atonu o loo mulimulitai i se lesona. Mo se faaitaiga, o se tagata o le vasega e le o vaai atu ia te oe atonu o loo mafaufau i se isi mea sa ta’ua i le lesona po o mafaufau loloto foi i se musumusuga na ia mauaina mai le Agaga Paia.

Afai e te aoao atu i le Agaga, o le a faamanuiaina pea oe e le Agaga i le iloatinoina lea o le mataala o i latou o loo e aoaoina. E i ai taimi e mafai ai ona musuia oe ina ia faia ni suiga i se lesona ina ia fesoasoani ai i le toe faagau’i mai o tagata o loo aoaoina.

O le Auala e Fesoasoani ai i Tagata o Loo Aoaoina Ia Gauai Mai

O fautuaga nei e mafai ona fesoasoani ai ia te oe a’o e fesoasoani atu i tagata o loo aoaoina ina ia mataala:

- Ia fetau mea o loo faaoga. Fesoasoani ia i latou o loo e aoaoina ina ia iloa pe faapefea ona faatatau ia mea o loo faaoga i le lesona i o latou olaga. Afai e le mafai ona latou iloaina pe faapefea ona faatatau mea o loo faaogaina ia i latou, o le a le fiala foi i latou ma o le a le mataala.



- Fesuisui ai lou leo e te aoao atu ai. Pe telegese tele lau tautala, saosasoa tele, pe leotele foi? Pe e te faaaogaina lou leo lava e tasi, e aunoa ma sina fesuisui ai? Pe e te naunau tele i le mea e te aoaoina atu? O le auala e te faaaogaina ai lou leo e mafai ona aafia ai le tulaga o le mataala o i latou o loo e aoaoina.
- Ia faatumauiina pea le taulai atu o lau vaai i mata o tagata o loo aoaoina. Ia avea le faataupupula atu i mata o i latou o loo aoaoina e avea ma auala e faatosina mai ai i latou i lesona. Afai e te aoao atu i le faaaogaina o le faataupupula atu i o latou mata, o loo taulai atu lou naunautai ia i latou o loo e aoaoina nai lo mea o loo faaaogaina i le lesona. O le pupula sa'o atu i mata a'o e faalogo atu i a latou faamatalaga ma fesili e fesoasoani latou te iloa ai o loo e naunau i mea o loo latou fai mai ai. Ia faaeteete ia aua nei vaavaai solo i totonu o le potu ao e tautala. Ia faatulaga nofoa i totonu o le potu ina ia mafai ai ona e vaai atu i mata o tagata taitoatasi ma ia

mafai e tagata taitoatasi ona vaai mai i ou foliga. O tamaiti laiti o le a sili atu ona mataala pe afai e te nofo latalata ia i latou ma talanoa atu ia i latou i le mauuluga o o latou mata.

- Faaoga ia taga. Taumafai e fesavalaii solo i totonu o le potu ao e aoao atu, ae aua e te alu i luma ma tua. O le agai atu ma faalatalata atu i tagata o loo aoaoina pe a tuuina atu se fesili e faaalai ai lou naunau ma valaaulia ni tali. O gaoioiga talafeagai a le lima e mafai ona fesoasoani e faamamafa atu ai se vaega o le lesona. Ia gaoioi i se tulaga e masani ai, ia le fesuisui ai ou uiga. Afai o au gaoioiga e le fesuisui ai, e le masani ai, pe soona fai foi, e mafai ona faalavelaveina ai i latou o loo aoaoina ma mafua ai ona latou le fiafia i le lesona.
- Fesuisui ai le saosasoa o lesona. O le saosasoa e te faaaofia ai mea o loo faaaogaina i le lesona e mafai ona aafia ai le mataala o tagata o loo aoaoina. Afai e vave tele le lesona, e mafai e tagata o loo aoaoina ona fenu-

miai. Afai e telegese lou aoaoina o mea o le lesona, e mafai ona le fiafia i ai. O nisi vaega o se lesona e mafai ona foliga mai e faatelegese pe faalemu foi i le talanoaga po o tala. O nisi mea e mafai ona taua ae le talafeagai nai lo isi mea mo i latou o loo e aoaoina. E tatau ona e taulimaina vave mea faapea ina ia mafai ai ona agai vave atu i vaega autu o le lesona.

- Faaaoga ni auala eseese e aoao atu ai. O auala eseese e aoao atu ai e mafai ona fesoasoani ia te oe e fesui ai le saosasoa o se lesona, e taulai atu ai le naunau o tagata o loo aoaoina i le amataga o le lesona, toe pu'e mai ai lo latou naunautai i le taimi o le lesona, pe faia ai foi se fesui ai se tasi vaega o le lesona i le isi. Mo se faataitaiga, o talanoaga i vaega toalaiti e mafai ona vave

aafia ai i latou o e foliga mai ua vave ona mou atu le fiafia ma le naunautai.

O le Matafaioi a Tagata Taitoatasi Ina ia Auai

Ao e saili ina ia fesoasoani i tagata o loo aoaoina ina ia mataala atili, ia manatua o i latou lava e gafa mo lo latou lava auai. Afai e le auai se tasi i le faatinoga o mea e fai i le vasega, aua ne'i taumafai e faamalosi lenei tagata ina ia auai. Nai lo lenei, ia faaauau pea ona naunau atu i ai, faaaloalo i ai, ma fesoasoani i ai, ia manatua le fautuaga lenei mai le Alii i e o loo tauaveina le perisitua: "E le tatau ona faatumauiina se mana po o se uunaiina . . . , tau lava i le tauanau atu, i le faapalepale, le agalelei, ma le agamalu, ma le alofa faamaoni" (MFF 121:41).

E ILOA FAAPEFEA PE O LATOU AOAQ

Sa tuuina atu e se faiaoga Peraimeri se lesona i se vasega o le au ta'i iva tausaga le matutua. O mataupu faavae atu o le lesona e faapea o le Peresitene o le Ekalesia na te mauaina faaaliga mo le Ekalesia atoa ma e mafai foi e tagata taitoatasi ona mauaina ia faaaliga faaletagata e taitaiina ai o latou lava olaga. Sa matuai fuafuaina lelei lava le lesona. Na aofia ai le makaina o mau, talanoaga i le laupapa, o gaoioiga o loo fautuaina atu i totonu o le tusi lesona, ma se iloiloiga.

I le taufaaiiuga o le lesona, sa tuuina atu ai e le faiaoga se fesili e toe iloilo ai: "O ai e i ai le pule e maua ai faaaliga mo le Ekalesia?" Sa sii uma i luga lima o tamaiti. Sa latou iloa uma lava le tali: "O le Peresitene o le Ekalesia.

Ona fesili atu lea o le faiaoga, "O a ituaiga mea e mafai ona e mauaina i faaaliga?" Sa leai se tali. Talu ai ona sa latou talanoaina lenei atu i le taimi o le lesona, sa matuai maofa le faiaoga ona e leai ma se tasi na taliina le fesili lona lua. Sa toe faaupu e le faiaoga le fesili, ae sa leai lava se tali. Ona sii lea o le lima o Sara, o se tasi o le vasega ma fesili atu, "O le a le uiga o le faaaliga, pe afai la o lea?"

Talu ai ona sa ta'u atu e le vasega ia tali sa'o, sa leiloa ai e le faiaoga latou te le'i malamalama i mataupu faavae o le lesona. Ana le seanoa le fesili a Sara, semanu e le atoatoa le lesona mo ia faapea foi ma le vasega. Semanu latou te aoaoina na o sina mea laitiiti lea e aoga tele mo i latou. E mafai faapefea e le faiaoga ona faamautinoa muamua i le lesona ua malamalama tagata uma?

O le Auala e Iloa ai Pe Ua Malamalama Tagata o Loo Aoaoina

Na aoao mai Elder Boyd K. Packer e faapea: "O mata o le faiaoga mataala e vaavaai solo i luma ma tua o le vasega, ma maituaina gaoioiga uma taitasi, ma manatuaina ia uiga faaaliga, ma tali vave atu i ni tulaga le fiafia po o ni fenumi-aiga. O mata o le faiaoga mataala e vave lava ona iloaina ia foliga vaaia o se tasi ua le mautonu pe lagonaina foi i se taimi vave lava ua aoaoina se tasi" (*Teach Ye Diligently*, rev. ed. [1991], 164–65).

O le maituaina o le alualu i luma o i latou o loo e aoaoina, e mafai ai ona e nofouta i le faia o ni fesui-aiga i le tuuina atu o le lesona. Mo se faataitaiga, e mafai ona e toe ta'u atu pe faamamafa atu ai ni manatu, taofi mo se talanoaga, fetufaai atu se tala, pe tuuina atu foi lau molimau. E mafai foi ona e iloaina le taimi e aapa atu ai i se tagata e toatasi. Ina ia mataala ma mafai ona taulai atu i tagata o loo aoaoina, e tatau ona e saunia lelei ina ia e le soona faalagolago i au mea na tusia poo le tusi lesona.

O nisi auala e aoao atu ai e mafai ona fesoasoani ai ia te oe ia e iloaina pe o malamalama ia tagata o loo aoaoina i mataupu o loo e aoaoina atu. Ia manatunatu i fautuaga nei:

- Fai atu i tagata o loo aoaoina e toe faaupu mai ia mataupu faavae i ni a latou lava upu. O le a fesoasoani lenei ia te oe e te iloa vave ai i le lesona pe o latou malamalama i ni upu po o ni manatu patino. Afai latou te le o malamalama, e mafai ona e tuuina atu i ai ni faamalamalama na o le a avea ai le vaega o totoe o le lesona ma se vaega taua ia i latou.
- Faaoga ni nai vaega pupuu e iloiloaina. Fuafua ia vaega pupuu e iloiloaina ina ia mafai ai ona faaaliga sa'o mai ai ia mataupu faavae o loo e aoaoina faapea ma isi e le mafai ai. Fai atu ia i latou o loo e aoaoina ina ia faailoa mai ia vaega e iloiloaina e fetautu tonu i mataupu faavae. (Tagai i "Vaega e Iloiloaina," itulau 171–72.)
- Ia tuu atu fesili e manaomia ai ona faailoa mai e tagata o loo aoaoina o latou malamalama i mataupu faavae o loo aoaoina. O tali a tagata o loo aoaoina e mafai ona atagia mai ai le manaomia ona toe iloiloaina o nisi vaega o le lesona ma fetuunai ai le fuafuaga o le lesona.
- Ia taitaia se talanoaga. Ao e faalogo atu ma le faaeteete i faamatalaga a tagata o loo aoaoina, o le a e iloa ai pe o i ai so latou malamalama sa'o i mataupu faavae o loo e aoaoina atu. Ia sue i tusitusiga paia, aoaoga a perofeta o aso e gata ai, po o le tusi lesona e faasa'o, faamanino, pe faamalosalia ai ni vaega taua. (Tagai i le "Taitaia o Talanoaga," itulau 66–68.)

FESOASOANI I ISI IA OLA I MEA O LOO LATOU AOAONA



Na aoao mai Iesu, “E le sao atu i le malo o le lagi i latou uma o e fai mai ia te au, Le Alii e, le Alii e; na o le na te faia le finagalo o lo’u Tama o i le lagi” (Mataio 7:21). E le lava le na o le iloaina o le talalelei; e tatau ona tatou ola ai.

Na fetufaai mai e se tasi faiaoga le faatusatusaga lenei: “Na ou aoaoina se lesona taua mai mataitusi o le alafapeta. . . . E mafai ona tatou taulotoina mai luma agai i tua e faapea foi mai tua agai i luma, ae afai tatou te faia faapena e leai sona uiga tele aua foi e le’i tuuina faatasi uma ma se faamoemoega ma se taitaiga. Afai tatou te tuufaatasia i latou ma se faamoemoega moni ma le taitaiga ona tula’i mai ai lea o ni viiga paia, o ni tusitusiga paia, o ni solo ma ni tauloto matagofie, o ni pese mananaia, ma isi. E pei ona i ai i mataitusi o le alafapeta, e faapea foi i o tatou olaga. . . . O le faatinoga e sili atu ona taua, ae manaomia ona tatou maua le ituaiga gaoioiga tonu—gaoioiga e i ai se faamoemoega” (William H. Bennett, i le Conference Report, Konafesi Faa-Eria i Toga, 1976, 15).

I le aveai ai ma se faiaoga, e mafai ona fesoasoani i isi ina ia aveai ma “e anaana i le upu, ae aua le na ona faalogologo i ai” (Iakopo 1:22). Ina ia faataunuuna lenei mea, e tatau ona e aoao atu i se auala o le a fesoasoani ai i tagata o loo aoaoina ia faaaogaina ia mataupu faavae o le talalelei i o latou olaga.

Ia Mautinoa o Loo Malamalama Tagata o Loo Aoaoina i Mataupu Faavae o Loo e Aoaoina Atu

E mafai ona e fesoasoani i tagata o loo aoaoina ia malamalama i mataupu faavae o le talalelei i se auala o le a mafai ai e i latou ona faaaogaina i o latou olaga. Mo se faataitaiga, afai e maua pe tuuina atu i se tamaitiiti se tupe, e mafai e se tama ona faamatala atu i ai le mea o loo aoao mai e tusitusiga paia ma perofeta o aso e gata ai e uiga i le sefuluai ma le auala e faaoga i ai. E mafai ona ia fesoasoani i le tamaitiiti e ave le 10 pasene o le tupe, faatumu se lisiti o foai, ma tuu le tupe ma le lisiti i totonu o se teutusi o le sefuluai, ma tuuina atu le teutusi i le epikopo.

Fesoasoani i Isi ia Aoao e Ala i le Agaga

E le lava le na o le malamalama i mataupu faavae o le talalelei. Mo tagata ina ia ola moni i mea na latou aoaoina, e tatau ona latou maua se molimau e moni. E faatoa tupu lenei mea pe a e aoao atu e ala i le Agaga ma latou aoao e ala i le Agaga (tagai i le “Valaauliaina o le Agaga A’o e Aoao Atu,” itulau 47–48).

E tele ituaiga auala eseese e mafai ona faaaogaina e fesoasoani ai i isi ia aoaoina e le Agaga. Mo se faataitaiga, afai o oe po o i latou foi o loo e aoaoina e fetufaaiina ni tala moni e uiga i le faatoilaloina o ni lu’i-tau, e mafai e le Agaga ona fesoasoani i

tagata o loo aoaoina ia maua le lototele e ola ai i le talalelei. I se tasi vasega a le Perisitua Arona, na matuai faamatala manino ai e le faiaoga se tasi o ona uso, na ia tuueseina le ulaula tapaa ma mauaina ai se faamanuiaga silisili ona o le faia o lea mea. O lea tala na ootia ai se alii talavou i totonu o le vasega ma musuia ai o ia ina ia tuuese lana amio o le ulaula tapaa.

Ia Uunaiina Tagata o Loo Aoaoina “Ina alu ia, ma ia . . . faapea ona fai”

Ina ua maea ona fetufaai atu e le Faola le faataoto i le Samaria agalelei, ona ia poloaiina lea o i latou sa faalogol-

ogo ia te Ia, “Ina alu ia, ma ia faapea ona fai” (Luka 10:37). E tatau ona e valaauliaina pea lava pea ia tagata o loo aoaoina ina ia faaoga mataupu faavae na latou aoaoina. O ia galuega faatino e tatau ona moni ma mafai ona ausia. Mo se faataitaiga, i se lesona e faatatau i le tatalo, e mafai ona e uunaiina ai tagata o le aiga poo tagata o le vasega ina ia tatalo i taeao uma ma po. I se lesona e uiga i le auauna atu, e mafai ona e uunaiina i latou ina ia fesoasoani i se tuaoi o loo moomia le fesoasoani.

E tatau ona e tulitataoina pea valaaulia na e tuuina atu; o le a fesoasoani foi lea i tagata o loo aoaoina e talisapaia le taua o mea o loo talosagaina ai i latou.

FAATUPUINA O SE ATEMOSIFIA E AOA O AI

O le faatulagaina ma le puleaina lelei e manaomia mo le aoaoga. O le ala aupito sili e faavae ai nei uiga o lo tatou fealofani lea ma mananao e taufai fesoasoani le tasi i le isi ina ia alualu i luma. Afai tatou te magafagafa, migao, ma faaaloalo, o le a sili atu ona tatou tulimatai atu i le aoaoina o le talalelei. O le a tele atu ona faatasi le Agaga ma i tatou.

E tau leai foi ni faalavelave.

I le avea ai ma faiaoga, e tele mea e mafai ona tatou faia e faatupuina ai se atemosifia o mafaufauga tonu. E tatau foi ona tatou aoa o isi tagata e fesoasoani i le faatupuina o se atemosifia e aoa o ai. O lea tulaga, tatou te aoa o ai i latou e avea ma soo sili atu o le Faaola, ma avea ai foi i tatou lava ma soo sili atu.

SAUNIAINA O LE POTUAOGA



O se atemosifia logoleleia ma faatosina loto e aoao ai, e mafai ona saofagā i le loto pulea o le tagata o loo aoaoina, o le naunau e ua'i atu i lesona, ma talia le Agaga. Pe o oe o se faiaoga i totonu o le potuaoga po o se matua o loo sauni mo le afiafi faaleaiga, e tatau ona e faia mea uma e te mafaia ina ia faaleleia ai le siosiomaga faaletino e te aoao atu ai.

Fautuaga mo le Sauniaina o le Potuaoga

Tumama

Ia mautinoa o loo mama lelei le vaega o le a fai ai le aoaoga. Atonu e manaomia lou saluina, piki i luga pepa, pe solo foi le laupapa. Ia mautinoa foi o loo e tumama ma aulelei i ou foliga.

Vevela po o le malulu

Afai e mafai, ia mautinoa e le o vevela tele pe malulu tele foi le potu. Afai o loo e aoao atu i totonu o se potuaoga a le Ekalesia, e moomia lo outou galulue faatasi ma taitai ina ia mautinoa o loo mālū lelei.

Moli

Ia mautinoa ia lava le malamalama i totonu o le potu. Ia faatulaga nofoa ina ia aua nei susulu atu le la i mata o se isi.

Teuteuga a le Tagata Lava Ia

Ia faatupuina le mafanafana ma le fialia e ala lea i lou aumaia mai lea taimi i lea taimi o se mea e faaleleia atili ai foliga vaaia o le potu. Mo se faataitaiga, e mafai ona e aumaia se teu fugalaau pe faaali ni ata po o ni mea e fetai i le lesona.

Mea e Faaaogaina i le Lesona

Ia mautinoa ua e maua uma mea e te manaomia e faaaogaina i le lesona, e pei o se penisina, se solo laupapa, penivali, mea faapipii, po o ni fesoasoani vaaia. Afai e te faaaogaina se masini, ia faataitai muamua ae le'i faaaogaina i se lesona. O lea tulaga, o le a lava ai le taimi e suia ai au fuafuaga pe afai e lē ola lelei le masini.

Nofoa

Ia faatulaga nofoa ina ia mafai ai e tagata o loo aoaoina ona vaai ma faalogo atu ia te oe faapea ma isi. Taumafai ina ia mafai ona e vaai atu i mata o tagata taitoatasi. Ia mautinoa foi o le faatulagaina o nofoa o le a mafai ai e tagata uma ona iloa atu le laupapa ma isi mea e mafai ona vaaia.

Afai e mafai, ia vaai po o lelei ia nofoa. O fanau laiti e sili atu ona mananao i nofoa faamomoe po o nofoa uumi e mafai ona pa'i ai o latou vae i le fola. Atonu latou te fialia e nonofo i luga o le fola i nisi taimi. O nofoa mo tagata matutua ma le autalavou e tatau ona fetai lelei le lapopoa ma e tatau ona faatulagaina ina ia faigofie ai ona fesavaliai, ia lava le avanoa e faaloloa ai o latou vae.

Pe a talafeagai ai, ia faatulaga ia nofoa i se auala o le a tuueseese ai tamaiti e faalavelave atu i le isi. Mafaufau i le tusia o igoa o tamaiti i luga o ni fasi pepa ma tuu fasi pepa i le pito i tua o nofoa po o luga o le fola i luma o nofoa ao le'i amataina le vasega.

Afai e sili atu ma le tasi le vasega e tatau ona fai i totonu o le potu e tasi, ia faatulaga nofoa ina ia faasaga ese ai le isi vasega mai

le isi i itu faafeagai o le potu. Afai o i ai ni pupuni e to va ai potu, ona faaoga lea.

Avanoa

Ia lava se avanoa mo gaoioiga e te fuafuaina. Mo se faataitaiga, afai o loo e fuafuaina se faatinoga o se tala, ia mautinoa ia lava le avanoa o le potu mo tagata o loo auai e tutu ai i luga ma fesavalaii solo ai. Mo gaoioiga faapea i le aiga, e moomia lou toe faatulagaina o meaafale.

Talosaga Atu i Tagata o Loo e Aoaoina e Fesoasoani atu ia te Oe

I le avea ai ma faiaoga, o oe lava e gafa ma le siosiomaga faaletino o le vaega o le a e aoao atu ai. Ae lē faapea o le a e faia na o oe au tapenaga. Ia faataga i latou o loo e aoaoina e fesoasoani i le faaleleia atili o le siosiomaga o loo aoao ai. Atonu e te manao e tuuina atu i ai ni matafaii patino, e tusa pe mo taimi uma pe na o sina taimi foi e faia ai.

AOAOINA O ISI INA IA FAIA NI O LATOU SAO I SE ATEMOSIFIA E AOA O AI



“Ia tofia mai ia te outou lava le faiaoga, ma aua ne’i failauga uma faatasi; a ia tuuina atu i tagata taitoatasi e lauga ma ia faalogo uma i ana upu, ina ia faamalamalamaina uma i lauga a tagata uma” (MFF 88:122).

Uiga Vaaia o se Atemosifia e Aoao Ai

Pe a tatou mafuta faatasi e aoaoina le talalelei, tatou te le o mai faatasi ua na o ni faiaoga, tamaiti aoga, ma ni uo. Tatou te o mai faatasi o ni uso ma ni tuafafine—o ni fanau a le Tama Faalelagi. O a tatou feagaiga o le papatisoga e faatasia ai i tatou, aua ua tatou fetufaaaina faatasi ia matafaioi ia na faamatalaina e Alema i le Au Paia o e e le’i leva ona papatisoina i le Vai o Mamona: e tatau ona tatou “faamoemoe i le mea e tasi, ona ua tasi le faatuatua ma le papatisoga ua tasi, ma ua fusifusia faatasi o [tatou] loto i le lotogatasi ma le fealofani” (Mosaea 18:21).

O lenei malamalama i la tatou feagaiga o le papatisoga e tatau ona musuia ai i tatou uma ina ia fesoasoani le tasi i le tasi i le aoaoina ma ola ai i le talalelei ina ia mafai ona tatou toe foi uma atu e mau faatasi ma lo tatou Tama o i le Lagi. O se tasi auala e mafai ai e tagata o loo aoaoina ma faiaoga ona faia lenei mea o le faatupuina lea o se atemosifia e aoao ai.

I totonu o se atemosifia e aoao ai, tatou te (1) faamalamalama e le tasi le isi e ala i lo tatou auai e faatino mea e fai, (2) alofa ma fesoasoani le tasi i le isi, ma (3) naunau e saili faatasi le upumoni.

O faiaoga ma tagata o loo aoaoina e faamalamalama e le tasi le isi e ala i lo latou auai e faatino mea e fai. Tatou te taufai fefaamalamalamaai pe a tatou faalogo atu ma le faateete i faamatalaga a tagata taitoatasi, auai i talanoaga ma gaoioga e aoaoina ai, fesili atu ni fesili ‘anoa, tatalo faatasi, ma tuu atu ni mea na oo i ai po o ni manatu, ma tuuina atu ia molimau (tagai MFF 88:122).

O faiaoga ma tagata o loo aoaoina e alolofa ma fesoasoani le tasi i le isi. E sili atu ona

lelei le aoao a tagata pe a latou lagonaina o loo faatasi i latou ma ni uo e alolofa mo i latou. Afai latou te lagonaina e ono ulagia pe faalumaina i latou, o le a foliga mai e tau leai foi so latou sao i lesona ma tau le alu-alu i luma i le talalelei. E mafai ona tatou faaali atu e ala i a tatou upu ma mea e fai tatou te alolofa mo i latou ma tatou te mananao ina ia latou alualu i luma. O le fautuaga lenei mai ia Elder Henry B. Eyring e faatatau i le alofa e tatau ona tatou lagonaina pe a tatou faatasitasi e aoaoina le talalelei: “E finagalo lo tatou Tama Faalelagi ina ia fusia faatasi o tatou loto. O lena tuu-faatasia i le alofa ua le na o se mea ua talafeagai i ai. O se mea e manaomia” (i le Conference Report, Ape. 1998, 85; po o le *Liahona*, Iulai 1998, 69).

O faiaoga ma tagata o loo aoaoina e nau-nau uma e saili le upumoni. Ao tatou faatasitasi uma ma isi i le faamoemoega silisili o le aoao ina ia malamalama ma ola i le talalelei, o le a faateleina o tatou avanoa mo le aoaoina. Pe a tatou faateleina lo tatou au-faatasi i la tatou sailiga mo le upumoni, tatou te valaaulia foi le Agaga o le Alii ina ia saga faatasi pea ma i tatou.

Aoaoina o Isi e Uiga i se Atemosifia e Aoao Ai

O se vaega o lau matafaioi i le avea ai ma se faiaoga o le fesoasoani lea i tagata o loo aoaoina ina ia malamalama i le mea e mafai ona latou faia ina ia faatupuina ai se atemosifia saogalemu e aoaoina ai. O tagata aoaoina uma taitoatasi e gafa mo le fesoasoani atu i isi ina ia maua se tulaga lelei e aoaoina ai. Ao e taumafai ina ia faatupuina se atemosifia e aoao ai i totonu o lau vasega, ua lē na ona e faasa’osa’oina o

amioga po o le faamautinoa o lau sauniuniga o le a tuuina atu e leai se tasi e faalavelave i ai. O loo e faataunuuina lou tiute paia o le fesoasoani lea i isi ina ia avea ma ni soo lelei o le Faaola.

Ina ia aoaoina tagata o le aiga po o tagata o le vasega e tofu sao atu i se atemosifia e aoao ai, ia mafaufau e taitai-ina se talanoaga e faaoga ai fautuaga nei:

- Faailoa atu ou lagona e uiga i le talalelei, ma faamatala atu e te manao e te fesoasoani i isi ia aoaoina ia upumoni o le talalelei.
- Ia talanoaina le matafaioi o loo ia i tatou ina ia fesoasoani le tasi i le tasi i le aoaoina o le talalelei (tagai i le itulau 78).
- Talanoa e uiga i le taua o le auai i le faatinoina o mea e fai i lesona.
- Fai atu ia i latou o loo auai mai e fautua atu ni mea e mafai ona latou faia e fesoasoani ai e faatupuina se atemosifia e aoao ai.

O se faiaoga na valaauina e faiaoga i le au ta'i fitu ma le valu tausaga le matutua i le Peraimeri, na ia taitaia se itu-aiga talanoaga faapena i le taimi muamua lava na feiloai ai ma le vasega. "A'u uo pele e," sa ia faapea atu ai i lena taeao o le Aso Sa, "ua valaauina au e le epikopo e avea ma outou faiaoga. Na ia faaee ona lima i luga o lo'u ulu ma faamanuia a'u ina ia mafai ona ou malamalama ia te outou, alofa ia te outou, ma aoaoina outou i mea moni. O le mea lea ua ou matuai fiafia ai lava. I totonu o la tatou vasega o le a ou taumafai e saunia lesona e manaia ma moni. O le a ou mautinoa o le a ou tuuina atu avanoa tou te fesili ai ma tali mai foi, e pepese ai, e faalogo ai i tala, ma faamatala mai ai ia te au mea tou te iloa e moni."

Na faaauau le tala a le faiaoga: "Ae tatou te le'i fananau mai, sa tatou nonofo uma lava ma lo tatou Tama Faalelagi. O i tatou uma lava o Ana fanau, ma o lea o i tatou ai o uso ma tuagane. I totonu o la tatou vasega tatou te mananao ina ia fesoasoani le tasi i le tasi ia aoaoina ina ia mafai ona

tatou toe foi atu ma mau faatasi ma lo tatou Tama Faalelagi. O a nisi o mea e mafai e i tatou uma taitoatasi ona fai ina ia fesoasoani ai i isi i totonu o le vasega ia aoaoina mea taua o le a tatou talanoa i ai? Tatou mafaufau uma i se mea e mafai ona tatou faia."

Sa lisiina e le faiaoga ia manatu o tagata o le vasega i luga o le laupapa. Sa aofia ai i le lisi ni mea e pei o le fetausiai ma le agalelei, auai i le faatinoina o mea e fai i lesona, fetufaai atu o mea na oo i ai ma molimau, faalogo, ma le taumafai malosi ia malamalama i mataupu faavae o le talalelei.

Ona fesili atu lea o le faiaoga, "E mafai ona outou mafaufau i soo se mea lava o le a faalavelaveina ai lo outou aoaoina?" Sa ia toe faia se isi lisi i luga o le laupapa. O le lisi na aofia ai mea e pei o le taufaalili i le isi ma le talanoa ao tautala le isi.

Mai nei lisi e lua na faia ai loa e le faiaoga ma le vasega ia ni nai tulafono a le vasega e faamatalaina ai mea e tatau ona latou faamoemoeina mai le isi.

E le na o le pau lea o le taimi na talanoa atu ai le faiaoga e uiga i nei mataupu faavae. Sa ia talatalanoa taitoatasi atu i ai i tagata o le vasega mai lea taimi i lea taimi, pe a manaomia, faatasi ma le vasega atoa.

Ao e sauni e aoao atu, ia mafaufau pe faapefea ona e fetuutuunaia le auala a lena faiaoga po o le faaoga foi o isi manatu e fesoasoani ai i isi ina ia i ai so latou sao i se atemosifia e aoao ai. Afai e mata'ituina ma le agaga tatalo o le a e mauaina ni avanoa se tele e aoao atu ai faapea o le aoaoina e sili atu ona tupu pe a tatou (1) fefaamalamalamaai e ala i lo tatou auai i le faatinoina o mea e fai, (2) alofa ma fesoasoani le tasi i le isi, ma (3) naunau e saili faatasi le upumoni.

Faamatalaga Faaopopo

Mo nisi faamatalaga e uiga i le faatupuina o se atemosifia e aoao ai, ia tagai i lesona 6 ma le 7 i le vasega o le Aoaoina Atu o le Talalelei (itulau 226–35.)

O LE AUALA E MAFAI AI E FAIAOGA ONA I AI SO LATOU SAO I SE ATEMOSIFIA E AOA O AI



“Aua ua le sili le tala’i i le faalogologo, ua le sili foi le aoao atu i le aoaoina e ia, ma ua faapea ona tutusa i latou, ma ua galulue uma, e taitasi le tagata e tusa ma lona lava malosi” (Alema 1:26).

I le faaopoopo atu i le fesoasoani atu i tagata o loo aoaoina ina ia malamalama i le auala e mafai ai ona i ai so latou sao i se sio-maga e aoaoina ai (tagai itulau 83–84), e i ai nisi mea e mafai e oe o se faiaoga ona fai ina ia tofua sao atu ai i se atemosifia faapea.

Ia Saunia Oe Faaleagaga

O lau lava sauniuniga faaleagaga e tele sona sao i le atemosifia mo le aoaoina ai i totonu o le aiga po o le potuaoga. Afai e te saunia faaleagaga, e te aumaia se agaga o le filemu, alofa, ma le faaaloalo. O i latou e te aoaoina o le a sili atu ona lagonaina le malupuipua i le mafaufau loloto ma le talanoaina o mea e faaavau le aoga. Afai e te le fiafia, felefele solo lou mafaufau, matua faaletonu, ma e te le’i saunia faaleagaga, o le a le mafai foi ona latou aoao i le Agaga. (Mo fautuaga i le sauniaina o oe i le faaleagaga, tagai i itulau 12–22.)

Alofa ma Aapa Atu i Tagata Uma Taitoatasi

Na fetalai mai Iesu, “O le poloaiga fou ou te tuu atu ai ia te outou, ia outou fealofani; faapei ona ou alofa atu ia te outou, ia fealofani foi outou” (Ioane 13:34). E tatau ona e saili ia alofa ia i latou o loo e aoaoina—e le gata pe a faigofie ona alofa ia i latou, ae faapea foi i taimi latou te tofotofoina ai lou onosa’i (tagai i le “Saili le Meaalofa o le Alofa Mama,” itulau 12).

E pele tagata uma taitoatasi e te aoaoina i le silafaga a le Alii, ma e tatau foi ona pele i lau vaai tagata uma taitoatasi. Saili auala e te aapa atu ai i tagata uma taitoatasi e te

aoaoina (tagai i le “Aapa Atu i le Tasi,” itulau 37–38). Pe a iloaina e i latou o loo e aoaoina lou alofa ia i latou, ma e te popole foi mo i latou, o le a latou faatuatuaina oe. O le a faateleina lo latou aoao gofie ma o le a le avea foi i latou ma ni tagata faalavelave (tagai i le “O le Alofa e Faamaluluina ai Loto,” itulau 33–34).

Fai Faalelei Laei

O ou laei ma ou foliga e le tatau ona faasala ese mai le lesona. Afai e te aoaoina le autalavou, e le manaomia lou laei e pei o i latou ina ia latou faatalitonuina ai i latou.

Faafeiloai Faalelei ia Tagata o Loo Aoaoina

Afai o oe o se faiaoga i le potuaoga, ia e laumata fiafia a’o ulufale mai tamaiti aoga i totonu o le potu. Faatalofa ma lululima ma tagata taitoatasi. Ta’u atu ia i latou ua e fiafia lava e vaai ia i latou. Ia faailoa atu lou talisapaia o i latou. O se fuaiupu se tasi pe lua foi o le faafeiloai atu ma le alofa, o le a mafai ai ona faanofa leleia i latou ma fesoasoani e saunia ai i latou e aoao.

E mafai foi ona e faia afiafi faaleaiga ma suesuega faaleaiga o tusitusiga paia ma ni faatasiga faapitoa e ala lea i le tuuina atu i ai o se faafeiloaiga mafana i tagata uma taitoatasi o le aiga pe a e amataina.

Amata i se Tulaga e Valaauliaina ai le Gauai Mai

E masani lava ona i ai ni talatalanoaga faasamasamanoa ma ni gaoioiga e faia ae le’i aoaoina atu le lesona. O se tasi o au matafaioi o le faaumaina lea o lena gaoioiga



O tamaiti e masani lava ona ola e tusa ai ma mea o loo latou lagonaina o loo faamoemoeina mai e isi mai ia i latou. Afai e te faailoa atu ni lagona lelei ia i latou, ua e fesoasoani foi e faatumauiina se atemosifia lelei mo le aoaoina ai. O loo lisi atu i lalo nisi o faataitaiga o faamatalaga lelei e mafai ona e faia:

- *E taua outou uma taitoatasi. O outou uma lava o se atalii po o se afafine o le Atua. E leai se isi e faapei o outou i soo se mea o le lalolagi.*
- *Ua outou fesoasoani ina ia aveia la tatou lesona ma lesona matagofie e ala lea i le faamatalaina mai o mea na outou oo i ai.*
- *E tupu lo'u fiafia pe a tatou galulue faatasi lelei.*
- *Ou te iloa ua fiafia le Tama Faalelagi ia i tatou uma taitoatasi i lenei aso.*
- *Ou te talisapaia mea lelei uma ua outou faia. O loo tatou taumafai e fai le mea sa'o.*
- *E tatau ona tatou feauaua'i e tautatala. E tofu tagata uma ma manatu lelei, ma e manaomia ona tatou faalogo atu i tagata uma.*

ma fesoasoani i tagata taitoatasi ina ia taulai atu o latou manatu i le aoaoga. E mafai ona aofia ai le taitaina atu o tagata o le vasega i o latou nofoaga pe ta foi se lipine o se viiga ua pu'eina. Atonu e moomia ai le tilotilo sao atu i mata o tagata taitoatasi ao lei talosagaina se tasi e faia se tatalo amata. E te ofo atu mai lea taimi i lea taimi e te faia le tatalo amata e oe lava ia. (Tagai "Amataga o le Lesona," itulau 100.)

Faamalosia le Fefaaaloaloai

Ia valaaulia tagata o loo aoaoina e mafafafau i mea e mafai ona latou faia e fesoasoani ai i isi ia latou lagonaina le alofagia ma le talisapaiaina. O mea e te faia ma tautala ai, e mafai ai e i latou o loo e aoaoina ona faali atu le faaaloalo i isi. O au tali i fesili e mafai ona faaalai ai ia i latou le auala e tali atu ai ma le faaaloalo i manatu ma fesili a isi (tagai i le "Faalogo," itulau 69–70). Ia toe faamanatu atu ia i latou e talia fesili faamaoni uma. O fesili a se tasi tagata e mafai ona fesoasoani ai ia te oe e faamanino ni mataupu faavae e le o malamalama ai foi nisi.

Ia Uuna'ia le Naunautai mo le Aoaoina o le Talalelei

E mafai ona o mai tagata o le vasega mo ni mafuaaga eseese. Ae peitai, pe a latou taunuu mai e tatau ona e fesoasoani ia i latou ina ia taulai atu ma le maelega i le faamoemoega e tasi: o le aoaoina lea o le talalelei. E mafai ona e faia lea i lou fesoasoani ia i latou ina ia iloa o le a fesoasoani le talalelei latou te foia ai o latou faafitauli, faatamaoigaina o latou olaga, ma faateleina lo latou fiafia.

Ia unaiina i latou o loo e aoaoina ina ia o mai i le vasega ia saunia e aoaoina ma auai i le faatinoina o mea e fai i lesona. Pe a latou taumafai taitoatasi e aoaoina le talalelei, o le a sili atu ona latou faamalosia se atemosifia e aoaoina ai i taimi o lesona (tagai i le "Fesoasoani i Tagata Taitoatasi Ina ia Avea ma a Latou Matafaioi le Aoaoina o le Talalelei," itulau 63–65).

O nisi taimi e fesoasoani tele ai nai gaoioiga faigofie e faia i fafo atu o le vasega, aemaise lava pe a unaiina ai tagata o loo aoaoina ina ia faaogaina ia mataupu o le talalelei i le olaga i aso faisoo (tagai i le

"Fesoasoani i Isi ia Ola i Mea o Loo Latou Aoaoina," itulau 78). Afai e te tuuina atu ni tofiga e faia i fafo atu o le vasega, e tatau pea ona e tuuina atu i tagata o le vasega se avanoa e lipoti mulimuli atu ai. O le a fesoasoani foi lea ia i latou ina ia malamalama i lou faatauaaina o mea ua latou aoaoina ma faataunuaina.

Aoao Atu e Uiga ia Keriso

O mea uma tatou te aoao atu e tatau ona faasino atu ai tagata o le aiga ma tagata o le vasega ia Keriso—ona o Lana misiona togioola, o Lana faataitaiga atoatoa, o Ana sauniga ma feagaiga, ma Ana poloaiga. Ia manatua lenei mea a'o e saunia ma tuuina atu au lesona. O le a aumaia ai se agaga o le lotogatasi ma le faamoemoe i le atemosifia e aoao ai.

Faaaoga ni Auala Eseese e Aoao Atu Ai e Valaaulia ai le Auai Mai

E faalateleina le atemosifia e aoao ai pe a fiafia uma i latou o loo i ai i le lesona ma auai i le faatinoga o talanoaga ma isi gaoioiga. Ina ia fesoasoani e faatumauiina pea se tulaga maualuga o le fiafia ma le auai i le faatinoga o mea e fai, ia faaoga ni auala eseese e aoao atu ai (tagai "Aoao Atu ini Metotia Eseese," itulau 96–97).

Fetufaai Atu ou Lagona, O Mea na e Oo I ai, ma le Molimau

Ao e fetufaaiina atu ou lagona, o mea na e oo i ai, ma le molimau, e mafai ona musuia ai isi ina ia faia foi faapea. O le a faamalosia ai i latou e fetufaai atu e faapea foi i latou e faalogologo. Atonu e manaomia tele e tagata fou faatoa liliu mai le iloaina, o totonu o le Ekalesia e aoao ai e le tasi le isi, e tusa lava po o le a le maualuga o le tulaga o le malamalama o i ai. E tofu tagata uma ma se mea na te tuuina atu. Tatou te faalogo atu i manatu o isi e tuuina mai ina ia "faamalamalamaina uma i lauga a tagata uma" (MFF 88:122).

Fautuaga Faaopoopo mo i Latou e Aoaoina Fanau Laiti

Faailoa Atu Lagona Lelei i Tamaiti

Afai e faitioina tamaiti pe tautala atu i ai i se auala e le lelei, e masani ona latou lagoonu.

'Otegia	Malamalama
E te faatupu vevesi lava oe i totonu o le vasega. Ua ou fiu ia te oe.	Ou te iloa o nisi taimi e faigata ai ona nofo sa'o, ae ia outou taumafai ia faia le mea sili mo sina taimi. Mata e fesoasoani pe a e nofo mai i o'u tafatafa?
Aisea e le mafai ai ona aveese ou lima mai isi tamaiti?	E taufaaosooso tele le fia taufaalili i isi tagata, ae e le tatau ona tatou taufaalilili. E taofiofia ai i tatou uma lava mai le aoaoina.
E faapefea ona e le manatunatu i isi?	O nisi taimi e mafai ai ona e lagonaina le fia fai atu o ni upu lē lelei i isi, ae o totonu o la tatou vasega tatou te taumafai ma le malosi ina ia agalelei ma mafaufau mo isi. Se'i o tatou taumafai ina ia fesoasoani i isi ia lagonaina foi le tulaga lea tatou te faalogoina.
E te le o ano mai lava ia te au. Fāliu mai nei loa!	E faigata tele ia te au ona ou aoao atu pe a ou le vaai i o outou mata, o lea ou te manaomia la outou fesoasoani e ala lea i lo outou gauai mai.
Tuu loa lenei lē mafaufau! Ou te le toe lavā onosa'i!	E foliga mai ua vaivai ma le lavava tagata uma. Tatou tutu i luga mo sina minute ma falolo.

naina le lē mautonu po o le teenaina. E mafai ona latou taumafai ia amanaiaina i latou e ala lea i le faalavelave i isi tamaiti pe ulavavale foi. I le isi itu, o faamatalaga lelei o le a fesoasoani ia i latou ina ia malamalama ai o loo e faamoemoeina mai mea silisili mai ia i latou. Faailoa atu ma faafetai atu ia i latou mo mea lelei ua latou faia, ae faatuaatuaia ia faafitauli laiti. Afai e te faia faapea, o le a amata ona latou lagonaina le taliaina, alofagia, ma le malamalama ia i latou.

Faatulaga ma Tausisia Tulaga Faatonuina

E manaomia ma talisapaia e tamaiti ia tulafono ma tuaoi. Galulue faatasi ma tamaiti o loo e aoaoina ina ia faavaeina ni nai tulafono manino ma faigofie (ia aua ne'i sili atu ma le tolu po o le fa). O le a fesoasoani lea ia i latou e puleaina ai i latou lava. Ia faamatala atu o tulafono nei e fesoasoani ai i tagata uma lava e fafia faatasi e aoao. Ia talanoaina foi pe o le a le mea e tupu pe a solia ia tulafono.

Atonu e te manao e fuafua faatasi se faailoga mo le toe faamamaluina o le tulafono, e pei o le tu o le faiaoga ma ona lima o loo piilima.

A maea ona faavaeina e oe ma tamaiti ia ni nai tulafono, ona fai lea o se siata e lisi ai tulafono. Afai e le mafai e tamaiti ona faitauina, ona faaoga lea o ata e faaali ai po o a o latou uiga e tatau ona fai. Soo se taimi lava e solia ai e se tamaitiiti se tulafono, ona taofi lea o le lesona ma fesili atu ma le filemu, "O le a le tulafono?" Ia faatali ma le onosai ao toe faamatala mai e le tamaitiiti le tulafono. Fesili atu i ai e fautua mai pe faapefea ona mulimuli i le tulafono. Ona faaauau lea o le lesona.

Fesoasoani i Tamaiti ia Auai i le Faatinoina o Mea e Fai

Ia faapisi pea ia tamaiti ma faafiafia i le tuuina atu o lesona e aofia ai ni gaoioiga fesuisuia. Atonu o le auala sili lea e taofia ai ni uiga faaosesa. Afai e te aoao atu, ia vaai lelei i foliga o le tamaitiiti; afai e te faitau atu mai le tusi

lesona, e mafai ona e le toe mauaina lo latou gauai mai. Afai ua le lavava ia tamaiti, ia faia ni faaupuga e pei o le “Matou te manaomia lou mafaufau sili i le taliina o lenei fesili” po o le “E mafai ona e uuina le ata lea i luga ina ia mafai ai ona vaai uma mai i ai le vasega?” Ia le amanaiaiaina ia le tele o nai faaosesa laiti, ma taumafai e sui le gauai mai o tamaiti i se isi mea. Mo se faataitaiga, e mafai ona e faapea atu, “O le a outou fiafia lava i le isi mea lea o le a sosoo ai” po o le “Faamolemole ia sii mai lou lima pe afai e te iloina le tali.”

Ia e Malamalama

Ia mautinoa ua iloa e tamaiti e te malamalama ma e alofa ia i latou. Ia mautinoa e sili atu ona latou manaomia

le malamalama nai lo le otegia, o lea ia onosai ai ma ia migao ia i latou. Ao e faia nei mea, e mafai ona e fesoasoani e liliuina ni tulaga faigata e avea o ni avanoa mo i latou e aoao ai. O le siata o loo i le itulau lenei o loo faaalua ai le eseesega i le va o le ote ma le malamalama.

Aua ne’i e faamoemoeina se tulaga atoatoa mai ia te oe po o tamaiti. Ia i ai se uiga lelei lea e fesoasoani ai i tamaiti latou te iloa e te alofa ia i latou. Fesoasoani i tamaiti ia latou iloa e mafai ona foia faafitauli i le lotogatasi.

Faamatalaga Faaopopo

Mo nisi faamatalaga i le faatupuina o se atemosifia e aoao ai, ia tagai i lesona 6 ma le 7 o le vasega o le Aoaoina Atu o le Talalelei (itulau 226–35).

FAAALOALO



Na aoao mai Elder Boyd K. Packer:

“Pe a tatou feiloai faatasi e aoaoina mataupu o le talalelei, e tataua ona faia i se agaga o le faaaloalo. . . .

“O loo faatuputupulaia pea le pisapisao o le lalolagi. . . .

“O lenei tulaga o le faateleina o le pisapisao, faateleina le sagisagi fiafia, faateleina le feeseeseai, tau leai se taofiofi, tau leai se faamamalu, tau leai se faatulagaina lelei e le o se mea e te’i lava ua tulai mai pe tupu fua pe le afaina ai foi.

“O le faatonuga muamua lava e tuuina atu e se taitaiu i se vaegaau o le taofia lea o auala uma lava o fesootaiga a i latou o loo ia taumafai e faatoilalo.

O le lē faaaloalo e fetau lelei lava ma faamoemoega o le tiapolo e ala lea i le taofiofia o auala o faaaliga e le gata i le mafauafau ae faapea foi i le agaga. . . .

“. . . O le faaaloalo e valaaulia ai faaaliga” (i le Conference Report, Oke. 1991, 27–28; po o le *Liahona*, Ian. 1992, 22–23).

Na saunoa mai Peresitene Tavita O. Makei e faapea “o le faaaloalo o le migao lea e fefiloi ma le alofa” (i le Conference Report, Ape. 1967, 86; po o le *Improvement Era*, Iuni 1967, 82).

Na maitauina e Elder L. Tom Perry e faapea, “O le faaaloalo e sau lea mai lo tatou ava ma le migao mo le Silisiliese” (i le Conference Report, Oke. 1990, 90; po o le *Liahona*, Ian. 1991, 70).

Na fautua mai Peresitene Spencer W. Kimball e faapea: “O le faaaloalo o se uiga taua lea ae peitai o se tasi lea o uiga ua vave ona mou atu mai le lalolagi a o faateleina e au a le tiapolo lo latou malosi. Tatou te le mafai ona matua malamalama i le mana o mea lelei uma tatou te mafai ona faia pe

afai o le a avea le miliona ma miliona o tagata o le Ekalesia moni a Iesu Keriso ma faataitaiga o uiga faaaloalo. Tatou te le mafai ona mafauafau atu i ni numera faaopoopo o olaga o tagata e mafai ona tatou pa’i atu i ai. Ae peitai, atonu e sili atu foi lona taua, e le mafai ona tatou mua’i vaaiia le aafiaga faaleagaga o le a oo i o tatou aiga pe afai e avea i tatou o ni tagata faaaloalo e pei ona tataua ai” (*The Teachings of Spencer W. Kimball*, ed. Edward L. Kimball [1982], 224–25).

O nei saunoaga mai perofeta o aso e gata ai, o ni tagatavaai, ma tali faaaliga o loo faaaliga ai o le faaaloalo e sili atu nai lo le na o le filemu ma nofo e le gaioioi i le taimi o se lesona. O se uiga e atagia ai amioga amiotonu uma. E faaaliga i lo tatou migao ma le alofa i le Atua ma isi. O loo aoao mai se pese a le Peraimeri e faapea:

Tele le ava nai lo le le pisa:
Ia mafauafau i le Tama,
O ana faamanuiaga ia te au.
Aua o le ava o le alofa.
[*Tusipese a Tamaiti*, 12]

Faatuina o se Faataitaiga o le Faaaloalo

Ina ia mafai ona aoao atu i isi ia faaaloalo, e tataua lava ona tatou faaaloalo. E tataua ona atagia atu ia i tatou le faauigaina e Peresitene Makei o le faaaloalo: “o le faaaloalo o le migao lea e fefiloi ma le alofa.” O fautuaga nei e mafai ona fesoa-soani ia te oe ina ia fuafua i ai au tau-mafaiga ina ia faaaloalo.

- Tausia feagaiga o le faamanatuga ina ia manatua pea le Alii ma tauaveina i o tatou luga Lona suafa (tagai MFF 20:77, 79). Taumafai pea e mafauafau ia te ia ma Lona agalelei ma ia “tutu atu e avea ma [se molimau] a le Atua i taimi uma ma mea uma, ma nofoaga uma” (Mosaea 18:9).
- Faaoga lelei ma le faaaloalo ia suafa o le Aigaatua. Na aoao mai Elder Dallin H. Oaks e faapea: “Afai e faaaogaina ia suafa o le Atua le Tama ma lona Alo, o Iesu Keriso ma le faaaloalo ma le pule, la te tuuina mai se mana i luga o le tagata e na te le mafaia ona malamalama i ai. E tataua ona matuai manino i soo se tagata ua talitonu, o nei igoa silisili—lea e tu-tupu mai ai vavega, lea na foafoaina ai le

lalolagi, lea na foafoaina ai le tagata, ma lea e mafai ona faasaoina ai—e paia ma e tataua ona taulimaina ma le matuai faaaloalo e gata mai ai” (i le Conference Report, Ape. 1986, 67; p o o le *Liahona*, Iulai 1986, 51).

- Faaali atu le migao e talafeagai ai mo le Au Pulega Aoao, Fitugafulu Pule Eria, sui o au peresitene aoao o ausilali, ma taitai o le perisitua ma ausilali i le iunite. Ia faaaoga pea o latou faalaniga, e pei o le “Peresitene,” “Susuga,” “Epikopo,” po o le “Tuafafine,” pe a faailoa atu i latou pe talanoa foi e uiga ia i latou. Ia faailoa ma talanoa e uiga i isi tagata matutua i le Ekalesia o le “Uso,” ma le “Tuafafine.”
- Aloese mai le faaaogaina o gagana masoa po o upu e ta’ufaatauvaina ai, pe faamanu’a ai, pe faitio ai foi i isi. Faaaoga le gagana faaaloalo, e pei o le “faamolemole,” “faafetai,” ma le “tulou,” i tagata o le aiga faapea foi ma isi.
- Faaaoga le migao e tataua ai pe a taulimaina ia tusitusiga paia ma faaaogaina meatotino a le Alii (e pei o fale ma fanua, meaafale, ma tusi).

Auala Patino e Aoao Atu ai Amioga Faaaloalo

E ui lava o lau faataitaiga e masani lava o le mea lena e sili atu ona manaomia ina ia fesoasoani ai i isi ina ia sili atu ona faaaloalo, ae e i ai taimi e manaomia ai le matuai aoao atu o amioga faaaloalo. O lenei tulaga atonu e sili atu ona talafeagai mo tamaiti ma le autalavou.

O se faiaoga o teineiti e ta’i 10 ma le 11 tausaga le matutua na ia iloina e manaomia ona tuuina atu o ni aoaoga patino e uiga i le faaaloalo. I le gasologa o se lesonea e uiga i le misiona ma le faamaturoida o le Perofeta o Iosefa Samita, sa tautalaiti ai teineiti ma sa lē faaaloalo. Sa faalogo atu le faiaoga ma le le talitonu ma le le fiafia i faamatalaga lē faaaloalo ma sa ia faaaluina ai sina taimi e mafaufau ai po o le a le mea o le a fai. Faatasi ai ma lagona ootia na iloa i lona leo, sa ia faasilasila atu ai ma le mautino e faapea o a latou tala ma taliega sa le talafeagai, ma o a latou upu e faatautee i le faaaloalo loloto sa ia lagonaina mo Iosefa Samita ma mea na ia oo i ai. Sa vave lava ona latou fifilemu. Sa ia ta’u atu iai e alofa ia i latou ma e fiafia foi e aoaoina le latou vasega ae na te le toe faatagaina lava se ituaiga amioga faapea. O se tulaga ootia sa oo iai e le gata mo le faiaoga ae faapea foi i tagata o le vasega.

O fautuaga nei atonu e fesoasoani ia te oe e uunaiina ai isi ina ia faaaloalo.

- Faatulaga ni tapulaa. Ia faamatala amioga e taliaina ma amioga e le taliaina. Mo se faataitaiga, aua e te faatagaina le gagana e ulagia ai mea paia po se gagana e mataga, masoa, pe le lelei foi. Ia taofia amioga le faaaloalo, e pei o le aai po o le o i fafo ma o mai i totonu o le potu i le taimi o le lesonea. Afai e fesoootai i latou o loo e aoaoina ma isi o i latou faapea foi ma oe,

ia uunaiina i latou ina ia faalogo i le isi e aunoa ma le faalavelave i ai. Ia uunaiina foi i latou ia faaoga le gagana faaaloalo, e pei o le “faamolemole,” “faafetai,” ma le “tulou.”

- Faatulaga ma saunia ina ia tau leai se fenumiai. Afai o oe o se faiaoga i le potuaoga, ia e vave taunuu i le potuaoga.
- Ia amata i le taimi ma faauma foi i le taimi. O le a faaalua ai foi le faaaloalo mo i latou o loo e aoaoina.
- Tautala atu i se leo mālū, ma le faaaloalo. Ia faafeiloai atu i taimi uma i le laufofoga fiafia i latou o loo e aoaoina.
- Ia faaaloalo i manatu faaalua mo talanoaga e tagata o loo aoaoina.
- Afai e te aoaoina tamaiti, mafaufau i nai mea laiti e mafai ona faia e faamanatu atu ai ia i latou ina ia faaaloalo. E mafai ona e toe aumaia se agaga o le faaaloalo e ala lea i le usuina lemu po o le hamuina o se pese faaaloalo, faali atu o se ata, po o le faaaogaina o se faailoga i lima e iloa ai e tamaiti o se faamanatu lena ia faaaloalo.
- Ia manatua e matuai faigata lava i tamaiti ona nonofo mo ni taimi uumi. Fesoasoani i tamaiti ina ia faalogo ma auai ma le atoatoa i le faatinoina o mea e ai i lesonea. Tuu atu i ai nai taimi pupuu e malolo ai.
- Ia faaalu se taimi e faamatala atu ai le taua o le faaaloalo, aemaise lava i tamaiti. Ia faamatala atu ai le faamoe-moega o le musika e tata a’o le’i amataina le vasega. Talanoa atu i ai i le mafuaaga e taua ai le faalogo, auai i le usuina o pese, ma talanoa filemu. Fesoasoani i tamaiti ia malamalama o le amio faaaloalo e fiafia i ai le Tama Faalelagi. Ia faamatala atu i ai, afai latou te faaaloalo, o le a latou lagonaina se faalogona lelei i totonu ma o le a faatupulaia ai foi a latou molimau.
- Aua nei e faia ni tauai o amioga faaaloalo pe tauai foi i ni meaai. Aua ne’i faia ni tauvaga e iloa ai po o ai e mafai ona sili atu ona faaaloalo. O nei faiga e tulaui atu ai i mea sese. Ia aoao atu e uiga i tauai moni lava o le faaaloalo, e pei o le faateleina o le malamalama ma le malosi o le faatasi mai o le Agaga.
- Faaaoga musika. Na saunoa mai Elder Boyd K. Packer: “O le musika e mafai ona faatulagaina se atemosifia o tapuaiga lea e valaaulia ai [le] agaga o le faaaloalo, ma molimau” (i le Conference Report, Oke. 1991, 28; po o le *Liahona*, Ian. 1992, 23). Faaaoga musika e muai tataina e aumaia ai se agaga o le faaaloalo. Faaaoga musika i lesonea e te aoaoina atu.
- Fesoasoani i tagata o loo aoaoina ia iloa le malosi o le Agaga. Ia tuuina atu lau molimau pe a uuna’ia ai oe.
- Ia faaautu uma au aoaoga i le Faaola. Ia faali se ata o le Faaola i totonu o le potuaoga.

FESOASOANI IA I LATOU O E FAASOESA



Na aoao mai Elder Boyd K. Packer:

“E taua tele mo se faiaoga le malamalama, e lelei lava tagata. E taua le iloaina o le latou faamoemoega o le faia lea o le mea e sa’o. O sea ituaiga manatu faaeaina o se taunuuga lea o le faatuatua. E matuai iloa ai lava le eseese pe a tatou tutu atu i luma o a tatou lava fanau pe tutu atu foi i luma o se vasega o ni tagata talavou e aoaoina i latou.

“... Afai e ao ona tatou aoao atu, e tatau ona tatou faamanatu ifo pea ia i tatou lava o loo tatou feutagai ma atalii ma afafine o le Atua ma o i latou uma taitoatasi, o Ana fanau, e i ai se avanoa e ave ai faapei o Ia” (Teach Ye Diligently, rev. ed. [1991], 89).

O le siosiomaga i totonu o le aiga, na saunoa mai ai faapea Peresitene Gordon B. Hinckley: “Afai e tulai mai ni faafitauli laiti, e mautinoa lava o le a i ai, ia faato’ato’a lelei lou tagata. Ia manatunatu i le atamai o le faataoto anamua: “O le tali filemu e liliueseina ai le ita.’ (Faataoto. 15:1.) E leai se a’oa’iga i le lalolagi atoa e pei o le a’oa’iga o le alofa. E i ai ona lava vavega” (“O le Siosiomaga o o Tatou Aiga,” *Liahona*, Oke. 1985).

E pei ona maitauina e Peresitene Hinckley, o le a tulai mai lava ia ni faafitauli laiti. E tusa lava pe o e aoao atu i totonu o le aiga po o le lotu, o au lesona o le a faalavelaveina ai i nisi o taimi e amioga a i latou o loo e aoaoina. I au taumafaiga la ina ia fesoasoani ia i latou o e faasoesa, ia manatua e le tatau lou na ona taumafai e faasa’oina se amioga le talafeagai po o le mautinoa ua ffilemu uma tagata; e tatau ona e fesoasoani i tagata o loo aoaoina ina ia ave atili e pei o ni soo o le Faaola. O faamatalaga nei o le a fesoasoani ai ia te oe e taulimaina ni faasoesa i se auala faaKeriso.

Ia Manatua le Taua o Agaga

Na aoao mai le Alii, “Ia manatua e taua tele le aoga o agaga i le silafaga a le Atua” (MFF 18:10). O i latou o loo e aoaoina e i ai ni o latou uiga paia ma ni taunuuga paia. O au tali i a latou mea e faia e mafai ona fesoasoani ia i latou e manatua ai lo latou taua e le mavae i le ave ai ma ni atalii ma ni afafine o le Atua. O lau faataitaiga, e te mafai ai ona fesoasoani ia i latou ia faateleina lo latou naunau ina ia fesoasoani le tasi i le isi ia aoaoina le talalelei ma ola ai e tusa ma ona mataupu faavae.

Saili Ina ia Malamalama Ia i Latou e te Aoaoina

Ao e mafaufau e uiga i ni auala e fesoasoani ai ia i latou o e faasoesa, ia mafaufau i mafuaaga uma lava e mafai mo a latou amioga, e aofia ai le siosiomaga o le potuaoga. Tatalo mo le taitaiga a le Agaga. O nisi taimi e faaalai ai e tagata ni uiga faasoesa ona o se mea na e faia poo se mea na faia e se isi tagata. O nisi taimi latou te tautatala ma faia uiga le talafeagai ona e i ai se mea e le o fiafia ai, ita, lē lava, po o le lē mautonu foi. E tatau ona e iloiloaina ma le faaeteete nei mea e ono tulai mai ao e mafaufau i le mafuaaga o faafitauli. Afai e te malamalama ia i latou o loo e aoaoina, o le a mafai foi ona e fesoasoani ia i latou ia latou tofu sao atu i lesona i ni auala lelei. (Tagai i le “Malamalama Ia i Latou e te Aoaoina,” itulau 35–36. Ina ia iloiloaina manaoga o tagata o loo aoaoina i vaitausaga eseese, ia tagai i le “Aoaoina o Tamaiti,” itulau 114–15; “Uiga o Vaitausaga o Tamaiti,” itulau 116–23; “Malamalama ma le Aoaoina o le Autalavou,” itulau 125–27; “Malamalama ma le Aoaoina o Tagata Matutua,” itulau 131–33.)

Iloiloaina o Au Lava Taumafaiga

Pe afai e amio faasoesa i latou o loo e aoaoina, e faigofie lava ona tulaia atu i a latou amioga ma e lē iloiloaina ai au lava amioga. Ae na fetalai mai le Faaola: “Pe mafai faapefea ona e fai atu i lou uso, Tuu mai ia, so’u eu ese le fasi laau i lou mata—faauta foi, o i lou lava mata le utupoto? . . . Ia e muai tiai le utupoto i lou lava mata, ona e iloa lelei ai lea ona eueseina atu le fasi laau i le mata o lou uso” (3 Nifae 14:4–5).

I au taumafaiga ina ia faaleleia faafitauli ona o le faasoesa, ia mafaufau muamua lava pe le o le mafuaaga tonu lava o le faafitauli o se mea na e faia. Ia e fesili ifo ia te oe, “Pe o o’u faatumauina ea le Faaola ma Lana aoaoga i le totonugalemu o a’u aoaoga? Pe o o’u faia uma ea mea ou te mafaia ina ia aoao atu ai e ala i le Agaga? Pe ua ou fesoasoani ea ia i latou o loo o’u aoaoina e tauaveina le tiutetauave mo lo latou aoaoina? Pe ua ou fesoasoani ea ia i latou ia i ai so latou sao i se atemosifia e aoao ai? Pe ua ou tuuina atu ea le avanoa e aoao ai le



tasi mai le tasi? Pe mafai ona ou faaleleia atili le sauniaina o a'u lesona? Pe o o'u faaauau ea ona ou saili ina ia faaleleia atili lo'u avea ai ma se faiaoga?"

Ia iloiloina au auala faafiaoga o loo e faaogaina. Ia fesili ifo ia te oe lava, "Pe o fesoasoani ea ia i latou o loo o'u aoaoina ia malamalama ma faaogaina upu moni o le talalelei? Pe o o'u faaogiana ea ia auala ina ia fesoasoani ai ia i latou o loo o'u aoaoina ia tumau le fiafia ma auai ma le atoatoa?"

Iloilo Ou Faamoemoega

Na aoao mai le Alii e faapea o i latou o e ua i ai le manao e lagolago i Lana galuega e tatau ona "lotomaulalo ma tumu i le alofa, o i ai le faatuatua, faamoemoe, ma le agaalofo" (MFF 12:8). E na o i latou ua uunaiina e le alofa o le a i ai se malosiaga lelei, ma le mamana i tagata latou te aoaoina. Tatalo ina ia faatumulia i le alofa faaKeriso tagata uma e te aoaoina, aemaise lava i latou e amio le talafeagai i nisi o taimi. (Tagai "Saili le Meaalofa o le Alofa," itulau 12; "O le Alofa e Faamaluluina ai Loto," itulau 33).

Ia e fesili ifo ia te oe lava, "Pe o sili atu ea lo'u popole i le fesoasoani atu i isi ia aoaoina le talalelei pe ou te popole i le tuuina atu o a'u lesona e aunoa ma le faalavelaveina?" Mafaufau i mea o loo aoaoina e tagata o le vasega nai lo mea e te aoaoina e oe. Ao e faaauau pea ona aapa atu e sili atu nai lo ou lava manaoga i loto o i latou e te aoaoina, o le a sili atu lo latou auai ma le mautinoa i ni auala e faamalalamaina ai.

Fesoasoani i Tagata Uma o le Vasega ia Tofu Sao Atu i se Atmosifia e Aoao Ai

Mai lea taimi i lea taimi, atonu e te manao e iloiloina faatasi ma tagata o loo aoaoina ia mataupu faavae na o le a fesoasoani ia i latou ia tuuina atu ai so latou sao i se atmosferifia e aoao ai (tagai "Aoaoina o isi Ia Tuuina Atu so Latou Sao i se Atmosifia e Aoao Ai," itulau 83–84). Faamanatu atu ia i latou lo latou tiutetauave ina ia auai i i le faatinoina o talanoaga, ia faatagaina i latou uma taitoatasi ia tuuina mai ni manatu, faalogo atu i le isi, ma aumai a latou tusitusiga paia. Ia ta'u atu foi ia i latou o le a faia foi e oe le faiaoga lou sao i lenei atmosferifia e aoao ai. Ia faamautinoa atu ia i latou o le a e saunia lelei e aoaoina i latou ma o le a e taitaia ia talanoaga ma isi gaoioga o le a tuuina atu ai ia i latou le avanoa e auai mai i ai.

Tali Atu i ni Auala Faigofie i ni Faasoesa e Seasea Ona Tupu Mai

O nisi taimi e sili atu le le amanaiaina o nai faasoesa laiti ae taula'i atu i amioga lelei. Pe a manaomia ona e tali atu i se faasoesa e seasea ona tulai mai, ia mafaufau i fautuaga nei:

- Ia e filemu. Faatali ma le filemu seia maea ona tautala le tagata pe se'i uma foi lona faasoesa.
- Ia faalatalata atu i le tagata o loo faasoesa. O lenei uiga faigofie e mafai ona avea o se faamanatu filemu ina ia matuai gauai mai.
- Faaoga sina mea malie laitiiti. Faatasi ai ma sina faatosinaloto, e mafai ai ona e toe faaliliuina mai le

tagata i le lesona, Ae peitai, e le tatau lava ona e faa'amu'amu pe faaaogaina ni tala malie e faamaasiasi ai pe faatonuina ai.

- Fesoasoani i le tagata ina ia auai lelei i le faatinoina o mea e fai. Mafaufau e talosaga atu i ai e faitau, toe faaupu mai se mea, tuu mai se faataitaiga, pe tali mai foi i se isi auala. O le autu o lenei manatu o le aua lea ne'i faalumaina le tagata ae ia valaaulia o ia e auai.
- Fesoasoani i tagata uma ia auai i le faatinoina o mea e fai. Afai ua fuao e se tagata e toatasi le talanoaga, ia taumafai e valaaulia isi e le'i tuuina atu ni o latou manatu. Ia tuuina atu ia i latou le avanoa muamua e tali ai i fesili. Afai e le aoga lenei faiga, ona liliu malie ese lea o le taulai atu i le tagata lea e toatasi ae toe foi atu i le vasega ma faapea atu, "Se'i o tatou faalogo atu i se isi" po o le "Ua tele manatu lelei ua e aumaia. E i ai se tasi e manao e faaopoopo atu i mea ua uma ona ta'ua?" (Mo fautuaga patino e uiga i le taitaia o talanoaga, tagai i le "Taitaia o Talanoaga," itulau 66–68; Aoa o Ati i Fesili," itulau 71–73.)
- Toe faatonutonu ia talanoaga na e le o maua ai le Agaga. Afai e finau mai se tasi ia te oe po o isi foi, pe tautala ma le le faaaloalo, pe na te aumaia ni mataupu e feteenai ai, ia faaoga le alofa ma le agamalu pe a fuafuaina le auala e tali atu ai. Atonu e faigofie le na ona e faapea atu, "O se manatu manaia tele lena, ae atonu o le a aveeseina ai i tatou mai le lesona o lenei aso."
- Ia faailoa atu se gaoioga ese. Ia fai se malologa e ala lea i le fesuiatu i se gaoioga e manaomia ai se isi ituaiga faiga e faatino ai.

Ia Faia ni Taumafaiga Faapitoa e Fesoasoani ai Ia i Latou o e Avea Pea ma Faasoesa

E ui lava i au taumafaiga e faatupuina se atemosifia e aoao ai, e i ai lava se tagata e tumau pea ona faasoesa i lesona e te aoaoina atu. Afai ua matuai faalavelave tele se tasi i le aoaoina o isi, e le tatau lava ona e le amanaiaina le faafitauli pe faaalua atu foi ni uiga agaleaga. I se tulaga faapea, ia manatua lava le fetalaiga a le Alii ina ia faatumauiina pea le uunaiiga i le na o le "tauanau atu, faapalepale, agalelei ma le agamalu, ma le alofa faamaoni;

"I le agalelei ma le malamalama mama, e matua faalauteleina ai le agaga e aunoa ma le pepelo, e aunoa ma le faa'ole'ole—

"I le a'oa'i faamalosi atu i aso e tatau ai, pe a uunaiina e le Agaga Paia; ae faaali atu mulimuli le alofa faateleina i le ua e aoaiina, ina ne'i fai oe e ia mona fili;

"Ina ia na iloa ai o lou faamaoni e sili atu ona malosi i lo noataga o le oti" (MFF 121:41–44).

I le faaaogaina o lenei fautuaga, e fesoasoani tele le malamalama i upu *aso e tatau ai* ma le *faamalosi*. O le uiga o *aso e tatau ai* o le taimi talafeagai po o se taimi lelei. I le

fuaupu lenei, o le *faamalosi* e faatatau lea i le manaomia ona faamanino atu, faamatala lelei atu ia faatonuga.

E tatau ona e lē gaoia ma agamalu pe a faasa'oina se tasi. Ia manatua o le a'oa'i e tatau ona faia "pe a uunaiina ai e le Agaga Paia" ma e tatau ona mulimuli mai ai se alofa ua faateleina.

O fautuaga nei e mafai ona fesoasoani ia te oe pe afai ua faasoesa pea se tasi o loo e aoaoina. E mafai ona e sailia ni auala e fetuunai ai nei fautuaga mo le faaaogaina i le fale.

Talatalanoa na o Oulua ma le Tagata

O nisi taimi e fesoasoani tele le talanoa na o oulua ma le tagata o loo faia pea le faasoesa. E tatau ona e faia ma le pototo ma le alofa. Ia faamatala atu o le amioga e faasoesa ma ia faamatala atu foi i le taimi lava lea lou alofa ma lou faaaloaloga o le tagata. Talosaga atu mo le lagolago mai a le tagata, ma taumafai e saili faatasi ni faaiuga. Ona e faia lea o mea uma e te mafaia e faailoa atu ai le faalauteleina o le alofa. E pei ona fautua mai ia Polika Iaga, "Aua le aoaiina se tasi i se tulaga e te le gafatiaina ona toe aumaia ai lagona lelei" (i le *Discourses of Brigham Young*, sel. John A. Widtsoe [1941], 278).

Sailia le Fesoasoani mai Isi

E mananao ou taitai ina ia fesoasoani ia te oe i ou luitau i tulaga faafiaoga. E mafai ona faamanuiaina oe mai o latou manatu ma le fesoasoani mai. Mo se faataitaiga, atonu latou te talosagaina se isi e fesoasoani i ni gaoioga patino pe nonofo e latalata atu i se tamaitiiti e le o ususitai. I a oulua fesoataiga faifai pea ma se taitai i lau faalapotopotoga, e mafai ona oulua talanoaina ni auala e fesoasoani ai i tagata taitoatasi i lau vasega (tagai i le "Mauaina Mai o le Lagolago mai Ou Taitai," itulau 29–31).

Atonu e te manao e fesili atu i se tasi o ou taitai e susu atu i lau vasega e maitauina le atemosifia o loo aoao ai le lesona. A maea le vasega, ia oulua talanoaina ma le taitai le faafitauli ma faia faatasi ni faaiuga. Ia faaaauu pea ona fafautuaai ma ou taitai a'o e faatinoina ia faaiuga.

Afai o se tamaitiiti po o se talavou e faifai pea lana amio faasoesa, ia sailia le fesoasoani a ona matua. E mananao matua e fia iloa amioga a a latou fanau, ma e naunau foi e fesoasoani mai. Afai e mafai, ia aofia ai le tamaitiiti i nei talanoaga; o le a faaalua ai lou faaaloaloga o lona salotoga po o lona tagata matua. E mafai ona outou faia faia faatasi ni fuafuaga patino ona iloiloina ai lea mulimuli ane le tulaga o le alualu i luma.

Afai o le tagata o loo faasoesa ona e i ai ni manaoga faapitoa, ia e aoao po o le a le mea e te mafai ona faia mo ia ia aoao atili ai ma le atoatoa ma atili ai ona faia amioga e tatau ai (tagai i le "Aoaoina o i Latou e I ai ni Tulaga Lē Atoatoa," itulau 40–41; tagai foi i le "Auauna Atu i Tagata e I ai ni Tulaga Lē Atoatoa," itulau 310–14 i le vaega o le "Aoaoina Atu o le Talalelei ma le Taitaiga" o le *Tusitaulima o Faatonuga a le Ekalesia*).



Ia Onosai

Ia manatua o le suia o se tasi e umi se taimi e alu ai. Ia galue pea i ai ma le onosai, ma aua lava nei fiu i se tasi o loo i ai ni faafitauli. Ia e faalatalata atu pea i ou uiga lelei i le tagata. Aua e te lotovaivai pe afai e i ai ni ona uiga faatautee i totonu o le vasega. E tusa lava pe foliga mai e laitiiti se mea e maua mai e le tagata i lesona o loo e aoaoina atu, o loo maua pea e ia le avanoa e aoao ai e uiga i le talalelei a Iesu Keriso ma lagonaina le aafiaga a le Agaga. O loo i ai foi ia te ia le avanoa e faatasi ai ma se faiaoga alofa ma ni taitai ma ni uo e popole mo ia.

Fautuaga Patino mo Faiaoga o le Peraimeri

Afai e faasoese se tamaitiiti, ia talosaga atu i ai ma le agalelei e tuu. Mo se faataitaiga, afai o se tagata o le vasega e igoa ia Lina o loo faalavelave i se isi tagata o le vasega, e mafai ona e faapea atu, “Lina, faamolemole aua e te faia lena mea.” Faafetai atu ia te ia pe afai e ususitai. Afai e leai, ia toe faamautu atu lau talosaga, ae ia faia pea ma le agalelei: “Lina, e moomia le tuu nei loa o le mea lena e te faia.” Faafetai atu ia te ia pe afai e ususitai.

Afai lava e le usitai mai, ona fuafua lea e talanoa atu i ai na o ia e uiga i le mea o loo faamoemoeina i totonu o le vasega. Ta’u atu i ai le mea o loo faalavelave ia te oe ma le mafuaaga. Mo se faataitaiga, e mafai ona e faapea atu, “Lina, sa faalavelave lava ia te au le mea na tupu i le vasega i lenei aso. E le mafai ona aoaoina i tatou pe afai e le o faaloalo le vasega.” Ona mafai lea ona e fesili atu ia te ia po o le a ni ona lagona e uiga i lea tulaga. A maea ona faalogo atu i ai ma le naunautai i lana tali, e mafai ona e

faailoa atu ia te ia o loo e malamalama i ona lagona. Atonu e te mafai ona faapea atu, “Ou te malamalama o loo e lē lava ma o se mea foi lena e faigata ai ona nofo filemu.” Ona fesili atu lea, “E mafai la faapefea ona ta foia faatasi lenei faafitauli? O le a se mea e mafai ona ou faia e fesoasoani ai? O le a se mea o le a e faia? Ia oulua talanoaina faatasi se faaiuga:


A maea ona talanoa atu ia Lina, e moomia lou faatula-gaina o sau lava fuafuaga e fesoasoani ai ia te ia ma le vasega pe afai e toe faasoese. O le fuafuaga e mafai ona aofia ai mea nei:

- Aveese se nofoa mai isi tamaiti. Ona tuu atu lea o Lina e nofo filemu ai iina mo sina taimi puupuu, e pei o se lua minute. O le taimi lea, aua ne’i oulua fesootai ma le tamaitiiti. Ia valaaulia o ia e faatasi mai ma le vasega pe afai e filemu o ia mo le taimi na atofaina.
- Talosaga atu i se sui o le au peresitene o le Peraimeri po o se isi taitai e ave le tamaitiiti i se potu o loo avanoa po o se nofoaga tofilemu i totonu o le falelotu ina ia mafai ai ona fesoasoani atu i ai ona matua. E mafai ona e faapea atu, “Ou te faamalie atu ona ua e le tausisia ia tulafono a le vasega, Lina. O le a ave oe e Sister Davis tou te talanoa ma ou matua. Ou te faamoemoe o le a e toe foi vave mai. A e manatu loa e te tausisia tulafono, e mafai ona e toe foi mai i le vasega.” E tataua ona nonofo pea le isi taitai ma le tamaitiiti. Afai o le a pulea lelei le tamaitiiti, e mafai ona toe valaaulia o ia i totonu o le vasega. Ia faailoa atu ia te ia e alofagia o ia ma o ia o se vaega taua o le vasega.

FAAAOGA METOTIA LELEI

Ina ia fesoasoani i isi ia mananao e aoao, e tatau ona manaia le faiga o a tatou aoaoga. Ina ia fesoasoani ia i latou ia malamalama, e tatau ona manino a tatou aoaoga. Ina ia fesoasoani ia i latou e faatumauiina ma mafaufau loloto i mea na latou aoaoina, e tatau ona manatuaina a tatou aoaoga. O mafuaaga nei mo le filifilia ma le faaeteete o auala e aoao atu ai ma le faaogaina ma lelei: ina ia manaia lesona, manino, ma manatuaina pea.

AOAO ATU I NI METOTIA ESEESE



Na saunoa mai Peresitene Tavita O. Makei, “O faiaoga uma lava ua i ai le matafaioi e fuafua ai po o le a le auala e sili e aoao atu ai tagata o le vasega ina ia avea ai ia valaaulia ma ni valaaulia e tumau” (Gospel Ideals [1953]. 439).

O le Faaogaina o ni Metotia Eeseese mai lea Lesona i lea Lesona

Afai e fuafua e se tagata kuka le lisi o le faasologa o ana meaa i mo le vaiaso atoa, e na te le fuafuaina ia saunia ia tutusa uma meaa i po sosoo e fitu. E tusa lava pe utiuti lana seleni ina ia saunia ai na o pateta lava i po uma taitasi, o le a le pine ae ona ia iloaina e tele naua ia auala eeseese e kukaina ai pateta.

E faapena foi le talalelei e mafai ona tuuina atu i le tele o auala eeseese. E le tatau ona i ai se faiaoga e lapelapea lana aoao atu e ala i le tasi o se auala e tuuina atu ai le ituaiga lesona e tasi i lea vaiaso ma lea vaiaso. Afai e te faaogaina ni gaoioiga eeseese e aoaoina ai, o le a sili atu foi ona malamalama tagata o loo aoaoina i mataupu o le talalelei ma tele ni mea latou te teuina. O se auala e filifilia ma le faaeteete e mafai ona faamaninoina ai se mataupu, o le a sili atu ona lelei, ma faagalo gata.

Ao e sauniuni e aoao atu, ia mautinoa o loo e faaogaina ni auala eeseese mai lea lesona i lea lesona. O lona uiga o lenei faiga e faaoga i ai se mea faigofie e pei o se pepa lautele felanulanuai po o se siata i le puipui i le tasi lesona ae o se lisi o fesili i luga o le laupapa i le isi lesona.

Faaogaina o Metotia Eeseese i Lesona Taitasi

E faaopoopo atu i le faaogaina o auala eeseese mai lea lesona i lea lesona, e tatau ona fesuisui ai foi lou aoaoina atu o lesona taitasi. O tamaiti, faatasi ai ma lo latou nautai e masani ai, e tali faalelei atu lava i ni gaoioiga e fesuisui ai—e masani lava e ta’i

lima pe ta’i fitu i le lesona. E tali lelei atu foi le autalavou i ni auala fesuisui ai. E tusa lava foi pe ete aoaoina le tagata matutua, e tatau foi ona e fuafua e faaoga ia lē itiiti ifo ma le tolu ni auala i lesona taitasi.

Filifilia ma le Sauniaina o ni Metotia Eeseese e Aoao Atu Ai

E tele naua ia risosi o loo maua e fesoasoani ai ia te oe e te filifilia ai auala pe a saunia au lesona. Ia mafaufau i manatu nei a’o e fuafuaina poo a auala e te faaogaina i se lesona patino:

- Manatunatu muamua i fautuaga o loo tuuina mai i totonu o le tasi lesona. Afai e talafeagai, ia fetuutuunai ia fetau ma manaoga o i latou o loo e aoaoina.
- Ia i ai se faamoemoega ma’oti mo le faaogaina o se auala. Ia filifilia auala e lagolagoina ai ma faamalositia le faamoemoega atu o le lesona.
- Filifili auala e talafeagai ma lelei. O nisi auala, e pei o tala ma le faaogaina o le laupapa, o le a tele atu ona faaogaina nai lo isi, e pei o talanoaga faavaega ma taaloga. (Tagai i le “Filifilia o Metotia Talafeagai,” itulau 98; “Filifilia o Metotia Lelei,” itulau 99.)
- Afai e talafeagai, ia filifilia auala e lelei ai le auai o tagata o loo aoaoina, mo le faatinoina o mea e fai. E taua tele le vaega leni mo tagata uma o loo aoaoina, aemaise lava mo tamaiti.
- Faataitai le faaogaina muamua o auala ae e te le’i aoaoina atu le lesona. E taua tele le vaega leni pe afai e te le’i faaogaina muamua se auala patino.

Ia Faaseese le Faiga o Au Lesona

O le siata o loo i le itulau e 97 e mafai ona fesoasoani ia te oe e fuafua ai pe ua lava le faiga eeseese i au lesona. Atonu e te manao e fai se siata faapea i totonu o lau tasi o talaaga o le olaga poo se tamai api. I luga o le pito i luga o koluma o loo avanoa, tusi ai ia ulutala o isi au lesona e lima ia o le a sosoo ai. Ao e sauniaina au lesona, ia tuu se togi i le koluma o “lesona” o loo faafeagai ma auala taitasi e te faaogaina.

O auala o loo lisiina atu i le pito i luga o le siata o loo faaogaina tele i le aoaoina o

le talalelei. Atonu e te iloaina ai lou faaaogaina e oe lava ia o nisi o nei auala i le tele o au lesona. O isi auala o loo lisi-ina atu e mafai foi ona aoga e faalagolago lava i le mea o loo e aoaoina atu ma manaoga o i latou o loo e aoaoina.

Ao e faaaogaina lenei siata, o le a mafai ona e vaai i faat-
ulagaga o au lesona. Atonu e i ai nisi auala e te faaaogaina i
lesona uma lava a o nisi foi e seasea ona e faaaogaina.

O METOTIA PO O AUALA E MAFAI ONA OU FAAAOGAINA	Lesona	Lesona	Lesona	Lesona	Lesona
Metotia e Masani Ona Faaogaina					
Laupapa					
Faatatusatusaga ma Lesona Faatino					
Talanoaga					
Faataitaiga					
Tautala atu					
Faatatauga					
Musika					
Fesili					
Tusitusiga paia					
Tala					
Fesoasoani vaaia					
Isi Metotia					
Fuaiupu o Gaoioiga					
Auala e Faaaoga Ai					
Gaoioiga e Faatosina Mai Ai					
Mea mo Fesoasoani Vaaia					
Manatu Palepalealuga					
Talanoaga Fesagisagia'i					
Tulaga Iloiloina					
Faatinoga					
Ata vali					
Faatinoina o se tala					
Gaoioiga Tusiata					
Laupapa Ie mamoe					
Taaloga					
Failauga Faapitoa					
Faafanua					
Tauloto					
Masini Malamalama					
Talanoaga Faavaega					
Ata Pepa e Faatutu i Luga					
Ata					
Ata Faasolo e Faatino e le Au Faitau					
Tala Faatino					
Pusa e Faasolo ai Ata					
Lipoti Faapitoa					
Nofoaga o Faamatalaga					
Pepa o Galuega					

FILIFILIA O METOTIA TALAFEAGAI

I le avea ai ma se faiaoga, e te tu atu e avea ma sui o le Alii i luma o i latou o loo e aoaoina. E tatau ona mautinoa o mea uma e te faia ia tusa ai lea ma Lona finagalo ma o lesona uma taitasi ia faaalai ai le faaaloalo mo upumoni o le talalelei.

Na fetalai mai le Alii, “Ia manatua o mea mai luga e paia, e ao foi ona tautala i ai ma le faaeteete, ma le uunaiga a le Agaga” (MFF 63:64). O auala e te faaaogaina e aoao atu ai le talalelei o le a fesoasoani lea e atinae ai le nofouta o tagata o loo aoaoina i mea paia. O lea la, e tatau ona e mautinoa o nei auala e talafeagai mo mataupu faavae o loo aoaoina atu ma o loo tausua ai foi faatulagaga a le Ekalesia. Talu ai atonu e tele nisi auala e mafai ona fesoasoani ia te oe ia faaaua atu ai se savali patino, o nisi o nei auala e mafai ona lē talafeagai mo se lesona patino ona o le mataupu autu po o le matutua po o aafiaga foi o i latou o loo e aoaoina.

Soo se taimi lava e te fuafua ai e faaoga se auala patino, ia fesili ifo ia te oe lava i fesili nei ina ia mautinoa ai e talafeagai le auala.

Pe o le a valaaulia ea i lea metotia le Agaga?

E tatau ona i ai le Agaga mo se savali o le talalelei ina ia molioo atu ai i loto o i latou o loo e aoaoina. O lea la, e tatau ona e faaaogaina ia auala o le a maua ai le agaga tonu mo le lesona ma valaaulia ai le Agaga (tagai 2 Nifae 33:1; MFF 42:14). Mo se faataitaiga, o se tasi faiaoga o Mataupu o le Talalelei na faaaogaina musika e talanoaina ai le faamaturoida o le Perofeta o Iosefa Samita. I le sauniuni atu mo le lesona, na valaaulia ai e le faiaoga se tagata o le uarota na te usuina le “Se Tagata Mativa Faanoanoa” (Viiga, nu. 16). I totonu o le vasega, na taitaiina atu manatu ma lagona o tagata o le vasega i le taimi ae le'i leva ae alu atu loa le osofaiga a tagata leaga, ina ua usuina e Ioane Teila lenei viiga i ona uso i totonu o le Falepuipui i Karefasi. Na moliooina atu e le Agaga le matagofie ma le mata'utia o lenei taimi i loto o tagata o le vasega.

Pe fetai le metotia ma le paia o le mataupu faavae o loo o'u aoaoina atu?

O nisi auala e aoao atu ai e sili atu ona manatu mama i ai ma faalē aloa'ia nai lo isi, ma e na o nai lesona e talafea-

gai i ai. Mo se faataitaiga, e matuai le talafeagai lava ona faaaogaina se tala faatino e talanoaina ai le Toetu. Ae peitai, o se tala faatino atonu o se auala talafeagai lea e aoao atu ai pe faapefea ona avea ma tuaoi lelei.

Pe o le a faamalamalamaina ma faamalosia e lea metotia i latou o loo o'u aoaoina?

O le aoaoina o le talalelei e tatau ona avea ma se tulaga lelei, ma faafiafiaina lea e fesoasoani ai i tagata o loo aoaoina ia iloaina lo latou natura paia. O i latou o loo e aoaoina e tatau ona latou lagona e te alofa ma e te faaaloalo ia i latou.

O mea e feteenai pe faafiafia e le fausiaina ai le faatuatua ma le molimau, e le tatau ona faaaogaina. Aua lava nei faaaogaina se auala e mafai ona faalumaina ai pe faamaasiasi ai se tasi.

Pe ua faamaonia e le Ekalesia mea e faaaogaina?

Faaoga ia lomiga lata mai nei o tusitusiga faavae ma mea e faaaogaina i lesona na faasalalauina e le Ekalesia. Fuafua ia auala o loo fautuaina atu i totonu o le tusi lesona ao le'i mafaufau i isi risosi mo ni auala. Soo se mea lava e faaaogaina po o ni manatu e te faaaogaina e le o maua i totonu o le tusi lesona, e tatau ona faamamafa atu ai le upumoni ma le lelei. Ina ia lagolago atu i mea e faaaogaina i lesona ma tusitusiga paia, e mafai ona e faaaogaina ia lauga o konafesi aoao, mekasini a le Ekalesia, ma fesoasoani vaai o loo gaosia e le Ekalesia faapea ma ata.

Pe ua ou mulimulitai ea i faasologa sa'o e saunia ai mo le faaaogaina o lea metotia?

O nisi auala e manaomia ai ni sauniuniga faapitoa. Mo se faataitaiga, e tatau ona e maua mai le faamaoniga mai le epikopo e valaaulia ai ni failauga faapitoa, faatasi ai ma le faamaoniga a le peresitene o le siteki e manaomia mo le valaauliaina o failauga faapitoa mo fonotaga ma sauniga a le siteki (tagai i le *Tusitaulima o Faatonuga a le Ekalesia, Tusi 2: Taitai o le Perisitua ma Ausilali* [1998], 325)

Faamatalaga Faaopoopo

Mo nisi faamatalaga i le filifilia o auala, ia tagai i lesona 8 ma le 9 i le vasega o le Aoaoina Atu o le Talalelei (itulau 236-43).

FILIFILIA O METOTIA LELEI



Na aoao mai Elder Boyd K. Packer: “Afa’i tatou te aoao atu ia tulaga taua mama ma faaleagaga, ua tatou aoaoina atu mea manino. Atonu e leai se aoaoga e matua faigata naua ona faataunuuina, e tauia foi pe afa’i e faamanuiaina. E i ai auala e faatinoina ma meafaigaluega e faaaogaina ai. E i ai mea e mafai e faiaoga ona faia e saunia ai i latou lava ma a latou lesona ina ia mafai ona aoaoina a latou vasega, ma e mafai ai ona molimoli atu a latou molimau mai le tasi i le tasi” (Teach Ye Diligently, rev. ed. [1991], 62).

O auala lelei e aoao atu ai e manino, fialia, ma faagalo gata ai lesona. Soo se taimi lava e te faaaogaina ai se auala patino, ia e fesili ifo ia te oe i fesili nei ina ia mautinoa ai o le a lelei.

Pe o le a fesoasoani ea lea auala i tagata o loo aoaoina ia malamalama lelei ai i mataupu faavae o loo o’u aoaoina atu?

E mafai ona faaoga auala lelei e faamalalama atu ai ia mataupu faavae ma faamalolosia ai lesona. Mo se faataitaiga, sa aoaoina e se faifeautalai talavou se tagata sailiili e uiga i le tulaga na tatau ai ona toefuatai mai le talalelei i le lalolagi. Na tali atu le tagata sailiili e faapea na aoaoina o ia e lana lotu i le tele o upumoni taua ma sa lava lea ma totoe mo lona aiga. Ina ia fesoasoani i le tagata sailiili ia malamalama lelei i le uiga o le Liliuese ma le moomia o le Toefuataiga, sa aumai ai e le faifeautalai se laau e tusa ma le iata lona umi i le isi lesona. Sa ia faamatala atu i ai faapea o le laau e tusa ma le iata lona umi. Afa’i e aveese ni nai inisi, o le a aoga pea le vaega e totoe o le laau e fua ai sina va, ae o le a le toe mafai ona toe fuaina ai se iata. Ina ua mavae le maliliu o Aposetolo, o nai vaega o le upumoni sa faapea ona leiloloa solo i lea vaega ma lea vaega. Na oo mai fesuiaiga i aoaoga faavae ina ua leai se perofeta e saunoa mai e fai ma sui o le Alii. O se vaega o le upumoni sa i ai lava, ma sa lelei lava, ae sa le i ai le atoatoa o le upumoni. Mo se lotu la ina ia avea ma Ekalesia a Iesu Keriso, e tatau ona i ai uma ia upumoni sa ia aoaoina atu. A leai, e na o se vaega e aoaoina atu o le mea e tatau ona i ai.

Pe o le a faaoga tatau ai ea le taimi i lea metotia?

O le toatele o faiaoga latou te lagonaina e

tele lava le taimi i le amataga o se lesona. O le mea la e tupu mai ai, e mafai ona latou faaaogaina ma le le faautauta ia minute muamua e faaluina ai le tele o le taimi i se auala e aoao atu ai e fialia i ai. Ona oo atu lea i le ‘afa o le taimi o le lesona, ae o latou iloaina ai e manaomia ona latou aoaoina atu le tele o le vaega o le lesona. Ina ia tau pu’epu’e mai le taimi ua ma’imau, latou te faatatope, ma misimisi ai vaega taua o le lesona. E mafai ona latou faanatinati i le faaiuga nai lo le faaaogaina o le avanoa e aumaia faatasi ai manatu ma fesoasoani ai i tagata o loo aoaoina ia iloa pe faapefea ona faaoga ia mataupu faavae na latou aoaoina.

Ia fuafuaina ma le faaeteete ia auala o le a e faaaogaina i le lesona ma le taimi o le a e faaluina ai. O le a fesoasoani lea ia te oe e faaoga ai ni auala eseese lelei e aunoa ma le avea ma mea e taulai i ai le lesona.

Ia mautinoa o auala o loo e faaaogaina e le uumi naua mo mataupu faavae o loo e aoaoina. Mo se faataitaiga, o le galulue i vaega toalaite e mafai ona avea ma se auala aoga e aoao atu ai se mataupu faavae faigata, ae talu ai ona e tele se taimi e alu ai o lea e le talafeagai ai ona avea ma se metotia lelei e aoaoina atu ai se mataupu faavae faigofie.

Pe o le a fetui ea lea metotia ma manaoga o i latou o loo o’u aoaoina?

O auala e te faaaogaina e tatau ona fesoasoani i tagata o loo aoaoina ina ia malamalama i le mataupu faavae o loo aoaoina ma le faateleina o le naunautai ina ia ola ai. Ia aoao e uiga i tulaga o tagata o loo aoaoina, o mea na ausia, o sini, ma isi mea ina ia mafai ona e filifili mai ai ni auala o le a aoaoina ai, manatuaina, ma musuia mo i latou. Afa’i e te malamalama ia i latou o loo e aoaoina, e mafai ona e lē faaaogaina ni auala e ono faatiga ai pe fenumiai ai foi i latou.

Pe o o’u faaaogaina soo ea le metotia lava e tasi?

E oo lava foi i se auala faatauana e aoao atu ai, e mafai foi ona fiu ai pe a faaoga soo. Ia mautinoa ua e faaaogaina ni auala eseese e aoao atu ai.

Faamatalaga Faaopoopo

Mo nisi faamatalaga i le filifilia o ni auala, ia tagai i lesona 8 ma le 9 i le vasega o le Aoaoina Atu o le Talalelei (itulau 236–43).

AMATAINA O LE LESONA



A'o le'i amataina se faaili, e masani ona faalogo tagata e malaga atu e faalogologo i ai i ni leo fenumiiai. E taufai sauni uma le au faaili mo le konaseti i le taimi e tasi e ala lea i le kiina o a latou mea faifaaili ma faataitai a latou musika. Ae peitai, o le taimi lava e savali atu ai le taitai i luga o le tulaga ma sii i luga le laau e taimi ai, ona fifilemu uma lava lea, gauai, ma sauni e galulue faatasi e taina se musika matagofie.

E pei o se taitai faaili o le na te aumaia faatasi le au faaili i le amataga o se konaseti, e tatau ona e aumaia faatasi tagata o lou aiga po o tagata o le vasega i le amataga o se lesona. Ae e te le'i amataina se lesona, o nisi tagata atonu o loo faitau, o isi atonu o loo nonofo fifilemu, ma isi o loo talanoa atu le tasi i le isi. E mafai ona e faalogoina ni talatalanoaga i le taimi e tasi. E oo lava foi pe a uma se tatalo amata, o i latou o loo i ai atonu e le mafai ona taulai i le tuuina atu o ni manatu i le lesona. Ma e ui lava e tele atu nisi mea nai lo na o le siiina i luga o se laau fuataimi, e tele nisi auala faigofie e taulai uma atu i ai tagata i se lesona.

Taiala mo le Amataina o se Lesona

O faatomuaga i lesona e tatau ona tele atu se mea na te faia nai lo le na o le faatosina mai o tagata o le vasega. Afai e le fetai se faatomuaga ma le lesona, atonu o le a tele atu ona faasalae ai nai lo le lago-lago mai. Mo se faataitai, afai e faamatala atu e se faiaoga o le Aoga Sa se tala malie i le amataga o se lesona, e mafai ona gauai atu i ai tagata o le vasega, ae e mafai ai foi ona taitaiina atu i latou ina ia mafaufau i isi mea na o le a taofia ai latou mai le taulai atu i mataupu faavae e ao ona aoaoina. E tatau ona e aloese mai ni 'alofaga (e pei o le

“Ua ou lagonaina lo'u le saunia”) ma isi faamatalaga e le talafeagai i le lesona.

Ao e aoaoina atu lesona eseese, aua e te amataina i le auala e tasi i taimi uma. O le fesuisui ai o le a faaopoopo atu i ai le fiafia ma o se elemene foi o le tulaga maofa. Atonu e te mana'o e fuafua nisi o auala o loo faamatalaina atu i totonu o lenei tusi i itulau “167–94. Mo taiala i le filifilia o auala talafeagai ma le lelei, ia tagai i itulau 100.

Faataitai o Amataga Lelei o Lesona

Faaaogaina o se Lesona Faitino

E mafai ona e faaogaina ni mea faitino e aoao atu ai mataupu faavae o le talalelei (tagai i le “Faatusatusaga ma Lesona Faitino,” itulau 171–72). Mo se faataitai, ina ia amataina se lesona e uiga i le filifilia o ni mea e sili atu ona aoga mo le agaga, e mafai ona e faaliina atu se tupe moni i tafatafa o se tupe e faafoliga po o se fasi pepa e tutusa lelei lona lapoa ma se tupe pepa. Ona fai atu lea ia i latou o loo e aoaoina po o le fea o na mea latou te aveina e fai ma totogi mo le galuega na latou faia. O lenei faiga e mafai ona tau atu i se talanoaga e sailia ai po o fea aoaoga e moni ae po o fea aoaoga e faafoliga.

Tusia o Fesili i luga o le Laupapa

O fesili e tusia i luga o le laupapa ae le'i amataina le vasega o le a fesoasoani i tagata o loo aoaoina e amata ona mafaufau e uiga i autu ao le'i amataina le lesona. Mo se faataitai, i se lesona e uiga i le tauaveina o le suafa o Keriso i o tatou luga, e mafai ona e tusia ia fesili nei i luga o le laupapa:

- O a nisi o mea e te faia ona ua e tauaveina le suafa o Keriso i ou luga?
- O a nisi o mea e te le faia ona ua e tauaveina le suafa o Keriso i ou luga?

Faamatala se Tala

O tala e mafai ona fafaguina ai le fiafia o i latou o loo aoaoina. E masani ona sili atu ona tatou aoaoina atu se mataupu faavae ma le aoga pe a tatou faamatala atu mua-mua se tala e faamalamalama ai. E fesoasoani foi lea i tagata o loo aoaoina ia malamalama i le mataupu faavae i le tulaga o mea e tutupu i aso uma.

FAAIUINA O LE LESONA



“Oi, ua uma lo’u taimi, ae o lea e le’i uma le lesona. Na o sina taimi lava. O le a faavavevave atu le vaega mulimuli lenei.” E toetoe lava o tagata uma ua faalogo i se faamatalaga faapea mai se faiaoga. O ia itu-aiga faamatalaga e faailoa mai ai ua le maua e le faiaoga se avanoa taua e aoao atu ai: o le avanoa e aumaia ai se lesona i se faaiuga lelei.

Uiga Tauga o ni Faaiuga Lelei

O faaiuga lelei e le te’i lava ua tupu; e tataua ona sauniaina lelei e avea o se vaega o le lesona. E sili atu ona lelei faaiuga pe afai e i ai nisi o uiga nei:

- puupuu, tuusa’o, ma patino. I lona tulaga lautele, e le tataua ona aofia ai ni mea e te le’i aoaoina atu i le lesona.
- E aotele ai ma fesootea mataupu faavae na e aoaoina atu.
- E faamamafa mai ai vaega taua na faia e i latou na auai.
- E fesoasoani ai i tagata o loo aoaoina e faaoga ia mataupu faavae i o latou olaga.
- E faagaetia, faagaua’i, ma lelei.
- E aofia ai le taimi mo molimau.

O nisi nei o faaitaiga o auala e faaiu ai se lesona:

- Toe ta’u atu le faamoemoega o le lesona. Fesili atu ia i latou na e aoaoina pe o le a faapefea ona latou faaogaina i o latou olaga i le vaiaso o loo lumanai.
- Ao le’i amataina le lesona, ia tofia se tagata se toatasi pe toalua e faalogologo lelei ma sauni e fesoasoani e faia se aotelega o se manatu taua o le lesona po o le lesona atoa.

- Talosaga atu ia i latou na e aoaoina po o le a sa latou tala e fai pe afai ua manao se tasi e fia iloa po o a mea na latou aoaoina mai le lesona.
- Faaoga se pepa o galuega e fesoasoani ai ia i latou na e aoaoina e aotele ai ia manatu autu o le lesona (tagai i “pepa o Galuega,” itulau 193).

Faatotoe se Taimi mo le Faaiuga

Ina ia tuuina atu se faaiuga lelei, e moomia ona e mataala ma fetuutuunai i lou faaogaina o le taimi. E oo lava i lesona e sauniaina lelei e le faataunuaina e pei ona fuafuaina. O manaoga o i latou o loo e aoaoina e mafai ona taitaina atu ai oe ina ia faaalu se taimi tele i se vaega patino nai lo le mea na e fuafuaina.

Afai e tupu lenei mea, e moomia ona e nofouta i le taimi. Faauma le talanoaga ae le’i uma le taimi. Ia e faia mea uma e te mafaia ina ia faia ai se fesuiaga sologa lelei mai le mataupu o loo talanoaina e ala lea i le faaafia ai i totonu o se aotelega faavave o le lesona. Ona faaiu lea o le lesona.

Fesui ai Au Faaiuga Ua Uma Ona Saunia

E i ai taimi e moomia ai ona suia au faaiuga ua uma ona saunia ona o se talanoaga patino, manatu patino, po o musumusuga mai le Agaga. O le tala lenei o se faaitaiga o se faiaoga na ia faaogaina lelei se avanoa e le lau maua e faaiuina ai se lesona:

I le tau faaiuiuga o se vasega a le seminare i le taeao po, na naunau ai lava le faiaoga e faaiuina se talanoaga. O le manatu autu o le lesona e faapea, tatou te o mai ia Keriso pe a tatou ususitai i poloaiga. Sa talanoaina e le vasega mea e uiga i mea o loo faia e nisi o talavou o loo taofia ai i latou mai le o mai i le Faaola ma maua ai le atoatoaga o faamanuiaga o Lana Togiola.

Na fuafua le faiaoga e faaiu e ala lea i lona faaogaina o se lisi o loo i luga o le laupapa. Ae na ia maituaina se ata vali ua uma ona tusia e se tamaitiiti aoga mo se galuega faatusiata a le aoga. O se faatusa o se tamai mamoe o loo autilo mai i se pa laupapa. Na talosagaina e le faiaoga le faatagana e faaali atu ai le ata i le vasega, ma ia faamatala atu ai le mea o loo ia vaaia i totonu o le ata. “Ina ua matou talanoaina i



totonu o le vasega,” na ia faapea mai ai, “o le Faaola o le Tamai Mamoe a le Atua, o le na tuuina atu Lona soifua ina ia mafai e i tatou uma ona o mai ia te Ia ma e ala mai ia te Ia le ola faavavau. O le pa o loo i le ata e pei o ni papupuni ia o loo tuueseeseina ai i tatou mai ia te Ia.”

Na ta’u atu e le faiaoga le faamoemoe ina ia aveeseina e tamaiti o le vasega ia “papupuni” ia o loo taofiofia ai i latou mai le faalatalata atu i le Faaola. Na ia molimau atu i le valaaulia a le Faaola: “O mai ia te au, . . . o a’u e malolo ai outou” (Mataio 11:28). Na maea le vasega, ma na toe faafoi atu e le faiaoga le ata vali. Na i ai pea le Agaga i tamaiti ina ua latou tuua le potu.

SAUNIA MEA TATAU UMA

A o tatou tuuina atu i tatou mo le galuega a le Alii, e tatau ona tatou aofia ai i le galuega faigata ua taua o le sauniuniga. . . . O le faatonuga a le Alii e aoao atu i le Agaga, e lē tuu faasaolotoina ai i tatou i sina iota mai le tulaga e tatau ona faia o sauniuniga faaletagata. . . .

E tatau ona tatou suesue i tusitusiga paia. E tatau ona tatou suesue i aoaoga a perofeta soifua. E tatau ona tatou aoaoina mea uma e mafai ona tatou faia ina ia mafai ai ona malamalama a tatou fanau ia i tatou, o tamaiti o a tatou vasega, ma a tatou tagata sailiili. . . . O le sauniuniga o se vaega taua lea ma moomia e aoao atu ai i le Agaga.

Elder Dallin H. Oaks

FAAALU LE TAIMI E SAUNIUNI AI

Ina ua maea ona faaaluina e le Faaola toetu se aso e aoaoina ai sa Nifae, na Ia poloaiina i latou ina ia faaalu se taimi e sauniuni ai mo aoaoga o le a Ia tuuina atu i le isi aso e sosoo ai. Na Ia fetalai atu, “O le mea lea, ia outou o atu ai i o outou aiga, ma mafaufau i mea ua uma ona ou fai atu, ia outou ole atu foi i le Tama i lo’u igoa, ina ia malamalama ia te outou, ma ia sauniuni o outou manatu mo le aso a taeao” (3 Nifae 17:3). E mafai ona e faaaogaina lenei mataupu i au sauniuniga i le avea ai ma se faiaoga. Ao e faaaluina le taimi e sauniuni ai ma le mafaufau ma le agaga tatalo, o le a faamanuiaina oe i le malamalama tele. O le a sili atu ona e gauai atu i le taitaiga a le Agaga.

Vave Amata le Sauniuniga o le Lesona

Atonu e seasea ona e mauaina ni tofiga faa-faiaoga e moomia ai ona faia ni sauniuniga i le taimi mulimuli. Ae o le a e mafai pea ona e amata sauniuni mamao atu au lesona. O se vaega taua lenei o le aoao atu. O le vave ona amata ona e tatalo i ai, mafaufau loloto i ai, ma saunia mo le isi au lesona, o le tele foi lena o le taimi o le a e maua e taitaiina ai e le Agaga ma saili ai ia ni faataitaiga, faatusatusaga, ma isi manatu e faatamaoigaina ai le lesona (tagai “O le Iloaina o le Agaga ma Mulimuli ai Pe a E Aoas Atu,” itulau 49–50; “Sailia Lesona i Soo Se Mea,” 22–23; “Faatusatusaga ma Lesona Faitino,” itulau 171–72). O le a lava le taimi e te fesili atu ai ia i latou o loo e aoaoina e saunia mai ni tofiga faapitoa, e pei o ni musika e usuina (tagai itulau 181–82). O le a lava foi le taimi e sue ai ma sauni e faaaogaina ia risosi o loo maua i le potutusi o le falelotu (tagai i “Risosi a le Ekalesia mo le Aoaoina o le Talalelei,” itulau 112).

E masani lava ona fesoasoani tele le mafaufau e uiga i se lesona o le a oo mai i le taimi lava e maea ai ona e aoaoina atu le lesona ua tuanai. Atonu o le a sili atu ai ona e manatunatu ia i latou o loo e aoaoina ma o latou manaoga ma mea e fiafia i ai i le taimi lava ua uma ai ona outou faatasi ma i latou. O le a sili atu ai foi ona e malamalama i la latou tali mai i lau aoao atu. E mafai ona e iloiloaina lau aoao atu ma auala e te faaaogaina ao loo fou pea i lou mafaufau.

Mauaina o le Olioli i le Sauniuniga

Na faamatalaina e se tasi faiaoga le olioli na maua mai pe a tatou faaaluina le taimi e sauniuni ai:

“E toatele ua latou iloaina le olioli o le aoao atu o le talalelei, ae e i ai le isi olioli maualuga atu e maua i le aoao atu—o le olioli ile saunia. E masani, tatou te vaai atu i le saunia o le lesona o se feau ma faatuutuu ai lava seia oo i le minute mulimuli. E pei lava o le tatalo faatopetope, e faapena le papa’u ma le le logoleleia o le saunia i le minute mulimuli.

“Ua ou iloaina e a’u lava ia lena ituaiga sauniuniga. E lē lelei, ma e lē fausiaina ai le talitonuina. Ua ou iloaina foi le tele naunau o le fiafia e maua i le saunia. E mafai ona avea ma ni taimi o tatalo ‘anoa ma mafaufauga maua’i. Ua ou iloaina o se taimi lelei tele o tapuaiga, suesue ifo o le tagata ia te ia lava, malamalama, ma musumusuga.

“. . . A o ou mulimuli i nei laasaga, e masani ona ou iloaina ai penina tautele o le atamai ma le malamalamaaga. Ua ou iloaina e tele atu mea ou te aoaoina mai a’u sauniuniga nai lo mea e mafai ona ou aoaoina atu. . . .

“Soo se mea lava e aoao atu ai le upumoni, e talitutusa uma lava le tulaga manaomia o le sauniuni. O i latou ua atinaeina se auala e tau atu i le saunia lelei o le a mauaina le olioli o loo faatalitali mai mo i latou” (Random Sampler: Planning to Teach,” *Liahona*, Set. 1996, 26).

Faaaluina o le Taimi mo Sauniuniga a le Tagata Lava Ia

Ia manatua o au taumafaiga ina ia aoao atu le talalelei a Iesu Keriso, e lē lava le tau ina na ona saunia o au lesona. E moomia foi lou saunia o oe lava ia. Faaalu se taimi e suesue ai i fautuaga o loo i totonu o lenei tusi e uiga i mea e te mafai ona fai e saunia ai oe i le faaleagaga e aoao atu le talalelei (tagai itulau “00” [11–20]). Ae le gata foi i lea, ia fua-fua e auai atu i fonotaga mo le faaleleia o faiaoga. I totonu o nei fonotaga o le a faatasitasi ai oe ma isi faiaoga ma taitai e aoaoina auala o le aoaoina o le talalelei lea o le a fesoasoani ia te oe e faateleina lou tomai ma lou mautinoa.

SAUNIAINA O LESONA



O si taimi puupuu lea e te faaalaina e aoao atu ai se lesona i le fale po o le lotu e mafai ona i ai sona aafiaga e faavavau ia i latou o loo e aoaoina. O lesona uma taitasi e mafai ona fesoasoani ai ia i latou ia lagonaina le aafiaga a le Agaga, tuputupu ae i le alofa mo le Tama Faalelagi ma Iesu Keriso, ma faateleina lo latou naunautaiga ina ia ola i le talalelei. Ia teu i lou mafaufau lenei mea ao e sauniaina au lesona. O lou faamanuiaina i le avea ai ma sui o le Alii ma le aoao atu e ala i le Agaga, o le a afua mai i lou naunau e sauniaina au lesona.

Vave Amata ona Saunia Lesona

O le fuafuaina o se lesona e tele se taimi ma tapenapenaga e alu ai. A maea loa lava le isi lesona, ona amata loa lea ona sauniuni mo le isi. Atonu o le a sili atu ai ona e iloa i latou o loo e aoaoina ma o latou manaoga ma mea e fiafia i ai pe a uma ona outou mafuta ma i latou. O le a e malamalama ai foi i a latou tali i au aoaoga.

O Fesili e Tolu e Taiaina ai le Sauniaina o Lau Lesona

Ao amata ona e saunia lau lesona, ia iloiloaina ma le agaga tatalo mea e faaaogaina i le lesona, manatunatu i manaoga ma mea e fiafia i ai i latou o loo e aoaoina. Ona mafaufau loloto lea i fesili nei o loo lisiina atu i lalo. E tatau ona taiaina oe i nei fesili i le sauniaina o lau lesona.

1. O le a le mea e tatau ona tupu i olaga o i latou ou te aoaoina ona o se taunuuga o lenei lesona?
2. O a mataupu faavae patino e tatau ona aoaoina atu?
3. E tatau faapefea ona aoaoina atu nei mataupu faavae?

O nisi nei o auala ma'oti e faaaogaina ai fesili nei e tolu e amata ai ona saunia lau les-

ona. Ao e iloiloaina se lesona i le auala lenei, tusi i lalo ni manatu e tupu ane ia te oe. O le a e maua ai se fausaga a o e mafaufau loloto pea i ai ma le agaga tatalo i le lesona.



1. O le a le mea e tatau ona tupu i olaga o i latou ou te aoaoina ona o se taunuuga o lenei lesona?

Suesue ma mafaufau loloto i mea e faaaogaina i le lesona ma mau o loo faapea ona o faatasi ai. Manatunatu i mea e tatau ona malamalama i ai, lagonaina, naunau i ai, pe faia e i latou o loo e aoaoina, e avea o se taunuuga o le lesona. Mo se faataitaiga, i le sauniaina o se lesona e uiga i le tatalo, e mafai ona e fuafua e tatau ona malamalama tagata o loo aoaoina i le taua o le tatalo ma e tatau ona latou faia nei se faaiuga ina ia tatalo i taeao taitasi ma le po. I le sauniaina o se lesona e uiga i tiutetauave o le aiga, e mafai ona e fuafua i le avea ai ma se taunuuga o le lesona, e tatau i tagata o le aiga ona matuai filiga i le faataunuuga o o latou tiute i le fale. I le aoaoina o se lesona e uiga i le suesueina o tusitusiga paia, e mafai ona e fuafua faapea o le lesona e tatau ona musuia ai i latou o loo e aoaoina ina ia suesue i tusitusiga paia i aso taitasi.

O le tele o lesona i totonu o tusi lesona ua saunia e le Ekalesia o loo aofia ai faamatalaga o faamoemoega. O nei faamatalaga e mafai ona fesoasoani ia te oe e iloa ai pe faapefea ona faa-aafiaina e lesona taitasi i latou o loo e aoaoina.

2. O a mataupu faavae patino e tatau ona aoaoina atu?

Ia teu pea i le mafaufau ia manaoga ma tulaga o i latou o loo e aoaoina. Ia e fesili ifo ia te oe, "O a mataupu faavae o loo i le lesona o le a fesoasoani ia i latou o loo o'u aoaoina e faafetaiaia ai luitau o loo latou feagai?"



Iloilo ia ata nei e lua. O le fea o nei ata e sili atu ona iloa ai foliga o se pato? Ia maitauina o le ata muamua o loo tele ni auiliiliga o le pato o loo aofia ai ma e le o aofia ai isi vaega e ese mai le pato. Ao e fuafua e taulai atu i se mataupu faavae se tasi po o se lua i se lesona, ia mautinoa ia aua ne'i aofia ai ni manatu e ese mai na mataupu faavae. Ia saunia lesona e pei o le ata muamua: faigofie, tuusa'o, ma patino.

E masani lava ona tele atu ia mea e faaaogaina i le lesona nai lo le taimi ua tuuina atu ia te oe. I tulaga faapea, e tatau ona e filifilia na o mea e sili atu ona fesoasoani i tagata o loo e aoaoina.

O le tele o mea e te faaafiaina e le taua atu lena nai lo o latou aafiaga i olaga o i latou o loo e aoaoina. Talu ai ona e tele naua ia manatu i le taimi e tasi e mafai ona fenu-miai ai tagata o loo aoaoina, e sili atu ai ona taulai atu i ni mataupu faavae se tasi po o se lua. Ona mafai lea ona e iloaina ia manatu faapoopo e lagolago ai mai le tusi lesona.

Aloese mai le taumafai e aoao atu mea uma lava e mafai ona tautalagia i se mataupu e tasi. O i latou o loo e aoaoina atonu ua i ai so latou malamalama i le mataupu. O lau lesona e tatau ona lagolago, faamanino, ma faamautu ai le mea ua latou iloaina. Ia manatua o lau lesona e le na o le pau lea o le taimi o le a latou aoao ai e uiga i le mataupu.

3. E tatau faapefea ona aoaoina atu nei mataupu faavae?

E tatau ona e filifilia auala faafiaioga o le a fesoasoani i tagata o loo aoaoina ia malamalama ma faaaogaina mataupu na e aoaoina atu (mo faamatalaga i le filifilia o auala talafeagai ma lelei, tagai i itulau 110).

I le filifilia o auala, e tatau ona e iloiloaina muamua ia fesili o talanoaga, tala, ma isi gaoioga e aoaoina ai, o loo fautuaina atu i le tusi lesona. Afai e te lagona o nei auala o le a fesoasoani e faafetaiaia ai manaoga o i latou o loo e aoaoina, ia e faamasani loa i ai i auala. Afai e te lagona e tatau ona e faaaogaina isi auala, ia amata vave ona e fuafuaina pe faapefea ona aoao atu ia nei auala. Mafaufau i le faaaogaina o faataitaiga, faatinoga, faatusatusaga, po o mea na oo i le tagata lava ia na o le a fesoasoani ai e aoao atu ia mataupu faavae autu o le lesona.

O auala e te fuafua e faaaogaina e mafai ona moomia ai ni mea e faaaogaina mai le potutusi o le falelotu, e pei o ata, mea faitino, tusipese, po o kaseti vitio.

Atinaeina o Ou Manatu

A maea ona i ai ni ou uluai manatu i le auala e aoao atu ai se lesona, e mafai ona e atinaeina ma toe faaleleia atili. Afai na e

vave sauniuni, o le a sili atu ona e malamalama i mea e oo i ai, o tala, ma mau na o le a fesoasoani ia i latou o loo e aoaoina. E mafai ona oo mai mafaufauga ia te oe a'o e mafaufau loloto i mataupu faavae e ao ona aoaoina atu faapea ma manaoga o i latou o loo e aoaoina. O se tasi lena o auala e mafai ai e le Agaga ona taitaiina oe i lau sauniuniga. Atonu e te manao e tauaveina se tamai api ina ia mafai ai ona tusitusia i lalo ia manatu pe a oo mai ai te oe.

E fesoasoani tele le tulaga lena i lau fuafuaga pe a toe suesue tasi i mau na o le a faaaogaina i le lesona. O le a fesoasoani lea ia te oe e te malamalama lelei i ai ma faatatauina ia i latou o loo e aoaoina.

Fetuunai ma Toe Iloiloia Pe a Manaomia

Ao taulalata mai le taimi e aoaoina atu ai le lesona, o le a tulai mai ni nai toe fetuunaiga mulimuli e faia. E pei lava le mea lena o le toe teuteuina e se faitogalaau o laau po o se pa ina ia foliga sa'o. O le taimi lea e tatau ai ona:

- Manino lelei i lou mafaufau le mea e tatau ona tupu i olaga o i latou o loo e aoaoina e ave ma taunuuga o lena lesona. Fesili ifo ia te oe lava, "Pe a o le a aumaia ea e le lesona nei taunuuga?"
- Iloiloia ia manatu faapitoa e te manao e aoao atu mai le tusi lesona: o mataupu faavae autu ma manatu e lagolagoina ai. Ia faatulaga lelei se oototoga manino. Ia mautinoa e fuafua lelei se amataga manino ma se faaiuga malosi ma tuamu (tagai i le "Amataina o le Lesona," itulau 100' "Faaiuina o le Lesona," itulau 101).
- Faamautu ia auala faafiaioga o le a e faaaogaina. Ia mautinoa o auala ua e filifilia o le a fesoasoani i tagata o loo aoaoina e faaaogaina mataupu faavae e te aoaoina atu.
- Faamautu au filifiliga o mea o le a e faaaogaina.

Atonu e musuia oe e le Agaga ina ia faia ni fesuiaga i le taimi mulimuli lava. E ono musuia foi oe e faia ni fesuiaga i le taimi lava o loo e aoao atu ai. Ia e mataala i nei musumusuga uma, ma ia iloaina o lau sauniuniga maeaea ua e mafai ai ona mauaina le taitaiga faifaipea a le Agaga.

GAOSIA O LESONA MAI LAUGA O LE KONAFESI MA ISI RISOSI



E le o saunia se tusi lesona ua faatula-gaina mo soo se tulaga e aoao atu ai i totonu o le Ekalesia. E i ai nisi tulaga e mafai ai ona e aoao atu mai tala i mekasini a le Ekalesia po o lauga o konafesi aoao. O isi tulaga e mafai ona e aoao atu mai se tusi o loo aofia ai ia ni fesili e suesue ai, ae leai ni lesona fuafuaina.

Afai e te sauniaina ia lesona mai nei risosi, e tatau ona e mulimuli i fautuaga o loo i le “Sauniaina o Lesona,” (itulau 105–06). A’o e faia, o le a taitaiina oe e le Agaga i au faaiuga e uiga i le mea e aoaoina atu ma le auala e aoao atu ai.

Faataitaiga o le Auala e Fuafua ai se Lesona mai se Lauga o le Konafesi Aoao

Mafaufau i upusii nei mai se lauga a Elder Joseph B. Wirthlin i le konafesi aoao:

“O le vaega mulimuli o le mataupu faavae e sefulutolu o le faatuatua o loo faapea mai, ‘Afai o i ai nisi mea mama, matagofie, logoleleia, ma tauleleia, matou te sailia ia mea uma.’

“O le upu *saili* o lona uiga o le alu atu ma sue, taumafai e vaai, taumafai ia maua. E moomia ai se alualu i luma malosi, ma le mataala i le olaga. Mo se faataitaiga, o Aperaamo “na saili ia maua faamanuiaga a ona tama . . . ma ia avea ma se tasi e mulimuli i le amiotonu’ (Aperaamo 1:2). O le faafeagai o le faatalitali mo se mea lelei e oo mai ia i tatou e aunoa ma ni taumafaiga i la tatou pitolaau.

“E mafai ona tatou faatumuina o tatou olaga i le lelei, e aunoa ma se avanoa mo se isi mea. E tele naua le lelei mai ia i tatou e ao ona filifili mai ai lea e le manaomia ai

ona tatou faia o le leaga” (i le Conference Report, Ape. 1992, 120; po o le *Liahona*, Iulai 1992, 88).

O faataitaiga nei o loo faaalua ai se tasi auala e saunia ai se lesona e faatatau i lenei faamatalaga.

1. Faitau le saunoaga a Elder Wirthlin.

Manatunatu ma le agaga tatalo ia i latou o le a e aoaoina, mafaufau loloto i ai pe o le a faapefea ona faatatau lenei fuaitau ia i latou.

2. Fuafua pe o le a le mea e tatau ona tupu i olaga o i latou o loo e aoaoina ona o se taunuuga o le lesona.

Mo se faataitaiga, afai o loo e aoaoina le autalavou, atonu e te mana'o ia i latou e faatutuina ni sini o le a fesoasoani ia i latou e saili mea e lelei. E mafai ona aofia ai sini o le suesueina o tusitusiga paia, faafiafiaga atoatoa, po o ni gaoioiga e faagaetia ai faatasi ma uo.

3. Fuafua le mataupu faavae autu po o mataupu faavae autu o le a e aoaoina atu, faatasi ai ma manatu e lagolagoina ai.

O le mea e te fuafuaina e faamamafaina, e tatau ona faalagolago lea i manaoga o i latou o loo e aoaoina. A o e maelega ma tatalo, o le a e maua le taitaiga mai le Agaga i le faia o lenei faaiuga.

Mo se faataitaiga, ina ia aoaoina le autalavou i le taua o le sailia o mea e lelei, atonu e te taulai atu i le saunoaga a Elder Wirthlin e faapea “e tele naua le lelei mai ia i tatou e ao ona filifili mai ai, e le manaomia ai ona tatou faia o le leaga.” O manatu e lagolagoina ai e mafai ona aofia ai le tatau



ona tatou matuai saili i mea lelei ma e mafai ona tatou sailia le fesoasoani a le Alii pe a tatou faia.

Ao e sauni e aoaoina atu nei mataupu faavae, atonu e te sue i le Mataupu Faavae ma Feagaiga 6:7, lea o loo faapea mai ai “aua le saili i ‘oa a o le poto,” ma le Mataupu Faavae ma Feagaiga 46:8, lea o loo faapea mai ai “ia matua saili atu i meaalofa sili.” Ao susesueina ia nei fuaiupu, o le a iloaina ai vaega na o le a sili atu ona fesoasoani i le aoaoina o mataupu faavae i le lesona.

4. Mafaufau pe e te manao faapefea e aoao atu ia manatu autu ma manatu lagolago ua e filifilia.

Saili ma le faaeteete e ala i auala e aoao atu ai o loo faa-matalaina mai i itulau 167–192. O le a oo mai manatu ia te oe ao e fuafuaina pe faapefea ona aoao lau vasega.

Mo se faataitaiga, atonu e te taitaia se gaoioiga i luga o le laupapa lea o le a lisiina ai e tagata o loo aoaoina ni auala eseese e mafai ai ona latou faaaluina o latou taimi. E mafai ona tau atu lenei gaoioiga i se talanoaga e fuafua ai pe o latou faataunuuna le fautuaga a Elder Wirthlin ina ia

“tatou faatumuina o tatou olaga i le lelei, e aunoa ma se avanoa mo se isi mea.”

Ao e fuafua e taitaiina ia ituaiga o talanoaga, ia amata i le mafaufau i fesili e tuuina atu (tagai i le “Aoa Atua i Fesili,” itulau 71–73). Mo se faataitaiga, ao e talanoa atu e uiga i le taua o le ola ai e tusa ma le fautuaga a Elder Wirthlin, e mafai ona fesili atu, “O a suiga e mafai ona tatou faia o le a fesoasoani ia i tatou e faatumuina o tatou olaga i le lelei?”

O le tele ona e mafaufau loloto ma le faaeteete i man-oaga faapitoa o i latou o loo e aoaoina ma le tele ona e susesue i auala eseese e aoao atu ai i totonu o lenei tusi, o le tele foi lena o lou mautinoa ma lou magafagafa o le a i ai i le atinaeina o manatu mo aoaoga.

O le sauniaina o lesona mai lauga o konafesi aoao ma isi risosi o le a manaomia ai le faatupuina o ou lava manatu. Ao e saunia ma le filiga ma saili atu i le Agaga, o le a musuia oe i le sauniaina o lesona faapena. O le a faa-manuiaina oe ma i latou o loo e aoaoina ona o se taunuuga o lau sauniuniga.

FETUUNAIINA O LESONA MO I LATOU O LOO E AOAOINA



O tusi lesona ua gaosia e le Ekalesia ua saunia ma le faaeteete ina ia mautinoa o loo tausia pea le manino o aoaoga faavae o le Ekalesia. Ua latou faavaeina foi ni taiala mo le aoao atu i totonu o tulaga faale-Ekalesia, ma ua latou faamautinoaina foi se tulaga laugatasia o le aoaoina o autu o le talalelei ma mataupu faavae. E tatau ona e faamaoni i aoaoga ma taiala o loo i totonu o nei tusi lesona. Ae peitai, e le moomia ona e tuuina atu lesona ia pei lava ona i ai i totonu o tusi lesona. E mafai ona e fetuunaiina ia lesona e tusa ai ma manaoga ma tulaga o i latou o loo e aoaoina.

Po o le a lava le mea e te faia ina ia fetuuna'i ai ia lesona, ia manatua o au fetuunaiga e tatau ona fesoasoani ai i tagata o loo aoaoina ia malamalama ma ola ai i mataupu o le talalelei. O lea la, o fetuunaiga e tatau ona faia i le na o le suesue ma le agaga tatalo i mea e faaaogaina i le lesona ma manatunatu i tagata uma o loo e aoaoina. Ao e saili ina ia fetuunaiina se lesona, e tatau ona taitaiina oe e le (1) tusi lesona ua tuuina atu ia te oe; (2) fesili autu e tolu na talanoaina i le itulau 105–106 o le tusi lenei; ma le (3) faatulagaga o le oototoga o le aoao atu o loo i totonu o lenei tusi, e pei o le alofa ia i latou o loo aoaoina, aoao atu e ala i le Agaga, ma le aoaoina atu o le aoaoga faavae.

Faaitaiga o Fetuunaiga o le Lesona

O tulaga nei o loo faaalua mai ai ni nai auala e mafai ona e fetuunaiina ai lesona mo i latou o loo e aoaoina.

Faaogaina o Mea mai Mekasini Talu ai a le Ekalesia

Ao e faitauina se tala i se lesona e uiga i le auuauna atu, o loo faamanatu atu ai ia te

oe se tala faapena i se mekasini talu ai a le Ekalesia. E te lagona e fetau tonu lava i tamaitai talavou o lau vasega le tala o loo i le mekasini, o lea ia e faaaogaina ai lena tala nai lo le tala lea e i le tusi lesona.

Faatupuina o Au Lava Gaoioiga e Aoao Mai Ai

Ao e sauniaina se lesona mo se vaega o tamaiti o le Peraimeri, e te faitauina le gaoioiga e faatosina mai ai o loo i le amataga o le lesona. E te lagonaina atonu o lea gaoioiga o le a lē fesoasoani i tamaiti o loo i lau vasega. E te mafaufau loloto e uiga i manaoga o tamaiti ma faatupuina ai se gaoioiga e tulaia atu ai i mataupu faavae o le a e aoaoina atu.

Aluese Mai le Faalautelega Fautuaina o le Lesona

O loo e sauni e aoaoina ia le au tiakono i totonu o lau uarota. O le tusi lesona a le au Perisitua Arona o loo fautua mai ai le faaaogaina o le tala faatino e faaoga ai mataupu faavae o loo aoaoina, ao e mafaufau e uiga i alii talavou o loo e aoaoina, o loo faamanatu atu ai ia te oe ni mea na tutupu ia te i latou talu ai nei. E te lagonaina o se talanoaga faigofie e uiga i na mea na oo i ai, o le a sili atu ona aoga nai lo le faatinoina o se tala.

Fetuunaia o Lesona mo Vaitausaga Eeseese

Mo manatu e uiga i le fetuunaia o lesona mo vaitausaga eeseese, ia tagai i le vaega o lenei tusi o loo faaulutalaina “Aoaoina o Vaitausaga Eeseese” (itulau 114–124).

ILOILOINA O LE TUUINA ATU O LESONA



Ina ua maea ona aoaoina atu se lesona, sa fememeai se faiaoga o Mataupu o le Talalelei i se tulaga na oo i ai i lana aoao atu. O nisi vaega o le lesona sa sologa lelei, ae o isi vaega sa faanoanoa ai. “Aisea na sologa lelei ai isi mea ae faaletonu isi?” na ia fesili ai ia te ia lava. “O le a se mea ou te faia pe a toe tuuina atu le lesona?” O le a se mea o le a ou suia?” Sa tumau pea le fesili ia te ia ao ia mafaufau loloto i le auala e aoao atu ai i tagata o lana vasega ina ia aoaoina le talalelei. O nei fesili na fesiligia e lenei faiaoga ia te ia lava e toetoe lava taatele i faiaoga uma.

I le faaopoopo atu i le iloiloina o i latou o loo tatou aoaoina (tagai i le “E Iloa Faapefea pe o Latou Aoaoina,” itulau 77), e taua foi le iloiloina o lo tatou lava faamanuiaina i le tuuina atu o lesona. Na aoao mai e Peresitene Spencer W. Kimball le taua o le iloiloina o i tatou lava ma le saili ina ia faaleleia: “Tatou te iloiloina ma faavaeina ni faatulagaga e taliaina o le atoatoa . . . ma fua faatatau i ai la tatou galuega. E tatau ona faaitiitia lo tatou fiafia i le faaalualuina i luma o isi ae ia sili atu ona popole i le iloiloina o i tatou lava” (The Teaching of Spencer W. Kimball, ed. Edward L. Kimball, [1982], 488).

E tatau ona tatou faaalua se taimi pe a maea lesona taitasi tatou te mulimuli ai i le fautuaga a Peresitene Kimball ina ia “iloiloina la tatou galuega.” O lenei faiga o le a fesoasoani ai ia i tatou ia saunia mo le isi lesona ma faaauau ai pea ona faaleleia atili le avea ai ma faiaoga.

Po o a lava suiga e musuia ai oe e fai, ia manatua o le iloiloina o lau aoao atu e tatau ona avea ma se tulaga lelei, ae le o se tulaga e faalotovaivaiina ai. Soo se taimi


lava e te iloaina ai se auala e faaleleia ai lou aoao atu, ua e mauaina foi se auala fou e fesoasoani ai i isi ia aoaoina le talalelei ma ola e tusa ai ma ona mataupu faavae.

O Fesili e Fesoasoani Ia te Oe e Iloiloina ai le Tuuina Atu o Lesona

O le faamanuiaina o se lesona e fuaina lea i lona faatosinaga ia i latou o loo e aoaoina. Ao e iloiloina ia lesona taitasi e te aoaoina atu, taumafai e toe tomanatu i tali a tagata na aoaoina i vaega eseese o le lesona. E sili atu ona manino ma mafai ona e manatuaina a latou tali pe afai e te iloiloina le oototoga na e faaaogaina e tuuina atu ai le lesona.

O fesili o loo tuuina atu i lalo e mafai ona fesoasoani ia te oe ao e iloiloina ia lesona. Ia maitauina o fesili muamua e fesoasoani ai ia te oe ia iloiloina mea na e lelei ai. E mafai lava pea ona e aoao atili e uiga i auala e faaleleia ai e ala lea i le taulai atu muamua i mea na faamanuiaina ai nai lo mea e faalotovaivaiina ai. Ao e faailoaina ma le lotomauualalo mea e te malosi ai, e mafai ona e atinae mai ai ma faaaogaina e faaleleia atili ai lou aoao atu. A maea ona iloiloina mea na e lelei ai, ona e iloiloina lea o mea e mafai ona sili atu lou faia.

- O a vaega o le lesona na foliga mai na sili atu ona naunau ai tagata na ou aoaoina e auai i ai? O le a le taimi na foliga mai ai na latou tau le fia auai ai?
 - O a vaega o le lesona na latou foliga mai ai na latou maua le malosi o le pa’i atu o le Agaga? O a taimi na foliga mai na latou tau le maua ai le malosi o le pa’i atu o le Agaga?
 - O a vaega o le lesona na foliga mai na latou matuai mafaufau ai? O a taimi na foliga mai latou te le’i mafaufau loloto ai?
 - O a vaega o le lesona na foliga mai na latou matuai faatatauina i o latou olaga? O le a le taimi na foliga mai na misia ai faatatau o le lesona i o latou olaga?
- Ao e mafaufau i fesili taitasi o loo lisiina atu i luga, mafaufau i fesili toe tulitatao nei:
- O a tulaga o le tuuina atu o le lesona na foliga mai na i ai so latou sao i na tali?
 - O le a se mea o loo ta’u mai ai ia te au e uiga ia i latou o loo o’u aoaoina?



- E mafai faapefea e leni malamalamaaga ona fesoasoani ia te au a'o o'u saunia mo le isi lesona?

I lou fesili ifo ia te oe lava ia o nei fesili, ia mafaufau i le tusiaina i lalo o au tali ina ia aua ai ne'i galo ia te oe ia atamai ma musumusuga na e mauaina. Atonu o le a e maofa i le tele o mea ua e aoaina.

Ao e mafaufau ma le agaga tatalo mo auala e te aapa atu ai ia i latou o loo e aoaina, e mafai e le Agaga ona fesoasoani ia iloa atu ai vaega o loo moomia ona e faaleleia. Atonu e te suesueina ni vaega patino o leni tusi. Mo se faaitaiga, e mafai ona e iloiloia ia faamatalaga e uiga i le tuuina atu o fesili e faatupuina ai ia talanoaga (tagai i le "Taitaia o Talanoaga," itulau 66–68; "Aoao Atu i Fesili," itulau 71–73). E mafai ona e lagonaina le taua o le aoao ia iloa ona amataina ia lesona i se auala e sili atu ona olaola (tagai i le "Amataina o le Lesona," itulau 108) po o le atinaeina o ni faaiuga malolosi mo lesona (tagai i le "Faaiuina o le Lesona," itulau 101–102).

Mo fautuaga i le atinaeina o se fuafuaga mo le faaleleia, ia tagai i le "Faia o se Fuafuaga Ina ia Faaleleia Atili ai Lou Aoao Atu," itulau 25–28).

O RISOSI A LE EKALLESIA MO LE AOAONA ATU O LE TALALELEI



Ua saunia e le Ekalesia le tele o risosi e fesoasoani ai i matua, faiaoga, ma taitai e aoaoina atu ai le talalelei. O tusitusiga paia o lesona aoaoina ia a le Ekalesia ma o le vaega sili atu foi lea ona taua o nei risosi uma. O isi risosi e aofia ai:

- *O le Aoa Atu, e Lei Se Isi Valaauga e Sili Ai*
- *Tusitaiala mo le Aoa Atu*
- O le vaega o le “Aoaoina Atu o le Talalelei ma le Taitaiga” o le *Tusitaulima o Faatonuga a le Ekalesia*
- *Tusi Lesona mo Afiafi Faaleaiga*
- *Mataupu Faavae o le Talalelei*
- *Tala Mai Tusitusiga Paia*
- Tusi Lesona
- Mekasini a le Ekalesia (ia siaki e le aunoa ia nei mekasini mo tala ma isi manatu)
- Pusa o Ata o le Talalelei (o se tuufaatasiga o ata e aofia ai ata o tala mai tusitusiga paia ma mea na tutupu ai, o Peresitene o le Ekalesia, ma faatinoga o le mataupu faavae o le talalelei)
- Isi ata ma pepa lautetele [ua tusia ai ni savali po o aoaoga]
- O le Tusi o Viiga a le Ekalesia
- O le *Tusipese a Tamaiti*
- Vitio kaseti ma kaseti faalogologo e gaosia e le Ekalesia


Potutusi o le Falelotu

Afai e i ai se potutusi o la outou falelotu, atonu o loo aofia ai le tele po o risosi uma nei. Ina ia iloa atili e uiga i mea e faaaogaina o loo maua i le potutusi o la outou falelotu, ia talanoa ma le tagata e vaaia le potutusi o le falelotu.

O le tagata o loo vaaia le potutusi o le falelotu po o le failautusi e tataua ona i ai se tusi o Lisi o Mea e Faaaogaina e le Ekalesia lea e mafai ona e faaaogaina. O leni tusi e faasalalauina i tausaga taitasi o loo lisiina atu ai mea o loo maua mai faletusi tutotonu o le Ekalesia. I le faaopoopo atu i nei mea o loo lisiina atu i luga, o loo lisiina atu i le tusi leni ia isi mea e faaaogaina e lagooni ai tagata o le Ekalesia.

I

AOAOINA O VAITAUSAGA ESEESE



1

AOAONA O TAMAITI



Ina ua fesoasoani ma aoao atu le Faaola toetu i tagata sa Nifae, sa Ia faailoa atu Lona alofa tele mo fanau laiti:

“Ua ave foi e Ia o latou tamaiti taitoatasi, ma faamanuia ia te i latou, ma ua tatalo i le Tama mo i latou. . .

“Na Ia fetalai atu foi i le motu o tagata, ua faapea atu ia te i latou: Vaai ia i o outou tamaiti!

“Ua latou vaai atu, ona tetepa ae ai lea o i latou i le lagi, ma ua latou iloa le lagi ua avanoa, ua latou iloa foi agelu ua ifoifo mai le lagi, e peiseai ua i totonu o le afi. Ua latou o ifo ma ua siosio na tamaiti, ma ua siosiomia foi i latou i le afi; ma ua auauna atu agelu ia te i latou.” (3Nifae 17:21, 23-24).

I le faatatauaga o lea mau, sa saunoa mai ai Elder M. Russell Ballard e faapea, “Ua manino mai, o i tatou ua tuuina mai i ai fanau pele, ua tuuina mai i ai se tiute paia, mamalu, aua o i tatou ia ua tofia e le Atua e siosioina fanau o aso nei i le alofa ma le afi o le faatuatua ma ia malamalama po o ai i latou”(Liahona, Oketopa 1994, 40). O le faaitaiga a le Faaola ua avea lea ma ata faaitaitai mo tatou a’o tatou aoao atu, tausia, ma faaaafiaina fanau.

O se matafaioi paia le aoaoina o fanau i le talalelei a Iesu Keriso ma fesoasoani ia te i latou e aoao ina ia ola ai. E tataua ona tatou aoao atu ia te i latou mataupu faavae moni, e pei ona faia e le perofeta o Nifae, sa ia faapea mai, “Ua matou tautalatala ia Keriso, ua matou olioli ia Keriso, ua matou tala’i atu Keriso, ua matou vavalo atu foi ia Keriso, ua matou tusitusi e tusa ma a matou valoaga, ina ia iloa e a matou fanau le mea latou te faamoemoe ai mo le faamagaloina o a latou agasala.” (2 Nifae 25:26).

Ao outou aoaoina fanau, o le a outou iloa ai tou te maua faamanuiaga faapitoa. O

le a aumaia e fanau le olioli i tou agaga ma musuia ai outou ia avea ma faaitaiga lelei. Ao amata ona tou iloa ina le faatuatua, alofa, faatuatua, ma le faamoemoe o fanau, o le a outou ola latalata ai i le Alii ma malamalama lelei ai i Lna poloaiga “ia avea ia pei o tamaiti.”(Mataio 18:3) Faatasi ai ma le Agaga e taitaina outou, e mafai ai ona outou alolofa ma aoaoina fanau i auala faa-Keriso. E mafai ona outou fesoasoani i tamaiti taitoatasi ina ia maua le filemu o loo folafola mai ia i latou o e mulimuli i le Faaola. “E aoaoina lau fanau uma lava e le Atua; ma e tele foi le manuia o lau fanau”(3 Nifae 22:13).

O Taiala mo se Malamalamaaga i Fanau ma le Aoaoina

O faamatalaga o loo taua i lalo e mafai ona fesoasoani ai e faalelei ai lou malamalama i aga, uiga ma amioga a fanau o loo e aoaoina (tagai foi i le “Uiga o Tamaiti o Vaitausaga” itulau 116–123, ma, afai o loo e aoaoina le Peraimeri, tagai i uluai upu tomua o itulau o lau tusi lesona o le Peraimeri).

E talitonugofie tele fanau. E talitonu i latou i mea e te fai atu ai. E faigofie ona latou talia le mea moni. O loo ia te oe se tiutetauave o le aoaoina lea o i latou i mataupu faavae sao faigofie ma le manino, i le gagana ma faaitaiga e mafai ai ona latou malamalama.

E mafai e fanau ona latou iloa ina le faatosinaga a le Agaga. Ia aoaoina i latou e faapea o lagona o le filemu, alofa, ma le mafanafana o loo ia i latou pe a latou tautatala ma pepese e uiga ia Iesu Keriso ma Lana talalelei e sau mai le Agaga Paia. Fesoasoani ia te i latou ina ia malamalama o na lagona o ni vaega ia o se molimau.

E faaitaitai e fanau mea uma e te fai. O mea uma lava e sao ma moni ia te i latou. Afai ete faaaogaina upu poo fuaiupu fou e faauigaina ai upu taatele e aoao ai aoaoga faavae paia o le talalelei, o le a ono le malamalama ai ma fenumiai i latou. Fesoasoani i fanau ina ia aoao le talalelei e ala i le talatalanoa i mea na tutupu, ma gaoioiga e masani ai latou: i le aiga, auaiga, ma le lalolagi o loo siomia ai latou. Ia mautinoa lelei e le o malamalama sese i latou i mea o loo e aoaoina.

E fia iloa ma fia aoao tamaiti. E fiafia i latou e aoao e auala i malamalamaaga es-



eese ma fou. E latou te mananao e feminoia'i solo, faa'aoaga o latou mafaufau uma, maua ma faataitai ni mea fou. O fanau matutua e mananao e lu'i le taliina o fesili ma le foiaina o faa'fitauli. O fanau i totonu o a outou vasega o le a sili atu ona naunau ma fiafia i le aoaoga pe afai e te faaaogaina metotia eseese ma gaoioiga e aoao atu ai mataupu faavae o le talalelei (tagai "Aoa'atu i ni Metotia Eseese," itulau 96–97).

E loto alofa fanau ma e mananao ina ia alofagia ma taliaina i latou. Vaai i avanoa e matua faa'aoaga ai le agalelei ma uiga alofa na e tutupu mai ma fanau. Talu ai e mananao fanau ia faamalieina oe ma fiafia e fesoasoani i isi, ia tuuina atu le avanoa ia te i latou e auauna atu ai. Fai atu i ai na te tauavea au tusi, uuina ata, pe tali foi i ni fesili. Faamalosi'au atu ia te i latou e fesoasoani i isi. Faaali atu lou alofa mo i latou. Ia atina'e lo latou lotomau e auala i le faailoa atu i ai o lou agaga faamalo ma le faafetai i mea latou te faia i soo se taimi. Ia faalogo atu ma le gauai ia te i latou.

E amata atu nei ona sauniuni fanau mo le lumanai. Ao mamao ese atu le avea ai o fanau ma ni tagata matutua, o loo saunia nei i latou mo o latou tiutetauave i le lumanai i totonu o o latou aiga, o le Ekalesia, ma fale falefaigaluega. E mafai ona e fesoasoani ia te i latou ina ia latou iloina le auala e mafai ai ona avea lo latou malamalamaaga o loo maua i le taimi nei e saunia ai i latou. Mo se faataitaiaga, e mafai ona e faapea, "Maria, sa ou vaai o e fesoasoani ia Keli i le ala e sueina ai lena mau. Sa e onosai ma lotoalofa. Pe a avea oe ma se tina i se aso, ou te mautinoa o le a e aoaoina au fanau i mea lelei e tele." Pe e te fai atu foi faapea, "Mataio, o le a avea lava oe ma se faifeautalai lelei tele, aua ua e aoao e faatutu au sini ma faataunuuna. Ua matuai ou mitamita lava ia te oe!"

O le a mulimuli fanau i au faataitaiaga. O loo e aoao atu pea lava pea e oo lava i le taimi e te le o mafaufauina. E masani ona tele mea e te aoaoina atu i au amio, ma au faataitaiaga nai lo au upu. Mo se faataitaiaga, o le a maitauina e fanau pe e te faaaogaina ma le faaaloalo tusitusiga paia. O le a latou maitauina pe faapefea ona e tautala e uiga i le Tama faa-le-Lagi ma Iesu Keriso. O le a latou vaavaai ia te oe pe faapefea ona e ola i mataupu faavae o loo e aoaoina. O au

faataitaiaga amiotonu o le a fesoasoani ia te i latou e atina'e ai lagona silisili o le alofa ma le faaaloalo mo le Tama Faalelagi ma Lona Alo.

O fanau laiti e fiafia puupuu lava, ma e le mafai ona nonofo filemu i se taimi umi. Ia aua nei faamoemoe tele i ni mea mai ia te i latou. Ia malamalama o uiga lē filemu lelei e ono mafua ona o le lē lavā, poo le fiaai, o le lē malamalama i se mea o loo e fai atu ai, ona feminoia'i ai lea, poo ua lē fia faalogo. O le auala lelei lava e aumai ai o latou agaga ma fesoasoani ai ina ia latou aoaoina, o le taumafai lea ia faaauai i latou i le les-ona. Talu ai o fanau e matuai tele lava lo latou malosi, fuafua ni auala e faataga ai i latou e feminoia'i ma vaai, faalogo, sogisogi, ma tago atu i se mea e avea ma ni vaega o lesona taitasi. E fiafia tele i latou e aoao i le fai ma toe fai, o tala faigofie, o pese, ma gaoioiga.

O le Faamalolosia o Aiga

Afai o oe o se faiaoga poo se taitai, e mafai ona e fesoasoani i matua ia latou taumafaiga o le aoaoina o le talalelei i a latou fanau. Ta'u i matua mea o loo e aoaoina i totonu o lau vasega ina ia mafai ai ona latou toe faamalosi ia mataupu faavae o le talalelei i totonu o o latou aiga (tagai "Tulaga Masani e Aoa'atu ai i Totonu o le Aiga," itulau 145–47). Ia unaia fanau e fetufaai ma o latou aiga mea o loo latou aoaoina. I totonu o afiafi faaleaiga, e mafai ona latou fetufaai pese, mau, taaloga, ma ni mataupu faavae o loo latou aoaoina i vasega poo gaoioiga a le Peraimeri. Mai lea taimi i lea taimi, e te auina atu ai se lipoti o lesona po o gaoioiga na latou auai e fesoasoani ai e faamalosi mea sa aoaoina e le tamaitiiti. E mafai foi ona e faailoa atu i matua pe afai na fesoasoani lea tamaitiiti ia te oe, pe afai foi na tofia lea tamaitiiti e tatalo pe lauga. E mafai ona valaaulia matua e fetufaai mai o latou poto masani poo ni molimau o se vaega o le lesona.

Ia manatua afai e te fesoasoani i fanau ina ia maua se molimau ma ola i le talalelei, o le a mafai ona latou faatosina mai o latou aiga mo le lelei. Ao e aoaoina fanau i le talalelei ma fesoasoani ia i latou e aoao i le ala e ola ai, ua e fesoasoani lava lea e faamalolosi o latou aiga.

2

O UIGA O TAMAITI I O LATOU VAITAUSAGA

E faaauau pea le suiga o fanau i o latou tulaga faaletino, faalemafaufau, faale-vafealoai, faalelagona, ma le faalea-gaga. Latou te mulimulitai i se faatulagana masani o le tuputupu'a'e ma le atinaeina. O matua ma faiaoga ua silafia uiga masani o vaitausaga eseese, o le a sili atu ona latou gafataulimaina lelei amio a le fanau, ma sili atu foi ona lelei lo latou aoaoina o i latou.

O nisi fanau atonu e vave pe tuai foi lo latou tuputupu a'e nai lo isi tamaiti o lo latou vaitausaga. Mo se faaitaiga, o se tamaitiiti patino e ono tausaga, ae ua sili atu ona pei o uiga o le lima tausaga le matua poo le fitu tausaga foi. Ia manatua foi o fanau e ono toe foi i tua mo sina taimi a latou amio pe a mafatia i lagona po o le ita.

Ua saunia tusi lesona a le Ekalesia ma le mafaufau i le tuputupu a'e o uiga o le fanau. A'o e suesue ma saunia les-ona taitasi, ia e silafia lelei le auala e mafai ai ona fesoasoani vaega taitasi o le lesona e te foia ai faafetaia'ia ai tulaga manaomia o le fanau.

Tusa lava po o le a le matutua o i latou o loo e aoaoina, ia mautinoa lelei e te onosai, faaloalo, alofa ma gauai atu i tamaiti taitoatasi. Ia aua nei faamoemoe i fanau e fai ni mea e sili atu nai lo mea e mafai ona latou faia.

E mafai ona fesoasoani nei faamatalaga ma fautuaga ia te oe e te malamalama lelei ai i fanau o loo e aoaoina.

O le Sefuluvalu Masina le Matua

O Uiga o le Tamaitiiti

- E savalivali, e aeae, e tolotolo ma tamoemoe. E fiafia e toso ma tulei le tele o mea. E sili atu ona faigofie ona ia talaia ni mea nai lo le tuu faatasia. E le mafai ona ia faamaopoopoina. E lē lavā gofie. E le'i iloa foi faaoga le fale lē ta'ua.
- E tele ituaiga leo na te faia. Ua amata ona atia'e tomai o gagana. Na te faaogaina le upu e tasi e fai ma fasi fuaitau, e pei o le "o au" ma le "leai." Na te mauaina lona malamalama ma le atamai e ala i le vaai, leo, tago, sogisogi ma le tofo. E tele atu mea e malamalama ai nai lo mea e mafai ona ia faamatala mai.

- E fiafia e taalo i tafatafa o isi tamaiti, ae peitai e masani ona le faifai mea faatasi ma i latou. E faigata ona ia fetu-faai atu.
- E tagi gofie, ae peitai e vave ona suia ona lagona.

Fautuaga mo Matua ma Faiaoga

- Fesusuia gaoioiga e faatumau ai le fiafia o le tamaitiiti. Faaoga gaoioiga e aofia ai le savali, tulei, ma le toso. Faaoga tala e faaoga ai tamatamailima, ma gaoioiga faamusika.
- Ia saunia ni avanoa se tele mo talatalanoaga, ma le faaauai i le faatinoina. Aoa atu le faaloalo i le taimi o tatalo. Faaoga ni mea faitino pe a faia ni tala. Ia saunia ni meataalo e mafai ai e le tamaitiiti ona faafeminoiai ma maua mai ai sona malamalamaaga, e pei o mea taalo e faaputupu i luga, o polo, o paso faigofie, pepe taalo, ma faatagata o tagata ma meaola.
- Ia saunia meataalo ma gaoioiga e faataga ai ona taalo toatasi le tamaitiiti. Ia fesoasoani i le tamaitiiti e aoao e fetufaai ma fegalegaleai lelei ma isi.
- Ia taofi pe sii le tamaitiiti pe afai ua le fiafia pe lagona le fefe.

O le Lua Tausaga Le Matua

O Uiga o le tamaititi

- E tafitifiti tele. E osooso, savalivali, ma tamoe. E mafai ona pati lima, ma kiki le polo. E mafai ona ia faia nai mea laititi, ae le mafai ona ia faamauina pe toso se sipi o se ofu, pe tausia o ia lava i se isi itu. E itaitagofie ma lē to'a pe a le lavā.
- E mafai ona ia tuufaatasia upu e lua pe tolu, i se fuaiupu. E masani ona fai mai "Leai", e tusa lava pe le o mafaufau i ai. E faigofie lava ma tuusao ona manatu. E le mafai ona ia faauigaina se mea. E mafai ona ia faia ni filifiliga faigofie. E fiafia e faisoo se mea. E fiafia puupu'u (lua i le tolu minute). E fiafai. E oso atu i le tasi

gaoioiga i le isi. E fiafia i meataalo faigofie, tusi ata, tusi tala pupuu, ma gaoioiga faamusika.

- E manao e taalo na o ia. Ua atiae sona fiafia e taaalo ma isi, ae peitai e sili atu ona fiafia e taalo i tafatafa o i latou nai lo le taaalo faatasi. E masani ona feeseeseai ona o meataalo. E faigata ona ia fetufaai ma galulue faatasi. E fesili atu i tagata matutua mo mea e manao ai mai se isi tamaitiiti.
- E lotoalofa ma agalelei. E fiafia e sii i luga o vae ma uu lima o tagata. E manao e latalata atu i lona tina. E faaalua lona faalii e ta'u mai ai ona lagona, ina ia maua ai se mea e manao ai, ma faaali mai ai lona ita ma le le fiafia. E i ai ana amio ma aga e vave ona sui. E fiafia e tutoatasi.
- E fiafia e tatalo. E malamalama e alofa le Tama Faalelagi ma Iesu ia i tatou, ae peitai e faigata ona ia malamalama i le tele o mataupu faaleagaga.

Fautuaga mo Matua ma Faiaoga

- Faaaoga gaoioiga malolo e pei o tala e faaoga ai tamatamailima, ma isi e faaoga ai musika. Ia saunia gaoioiga e pei o le fetogia'i o le taga fatupi, gaoioiga savali, ma le osooso. Aua le faia ni gaoioiga e manaomia ai le atamai ma le faamaopoopoga, e pei o le tipitipi pepa ma le faapipii ata.
- Ia faafaigofie le faia o talatalanoaga. Fesoasoani i le tamaitiiti ina ia faaauai mai i le faatinoina o mea e fai. Faaaoga le toe fai ma saga fai. Aua nei tuua le tamaitiiti na o ia; o tamaiti i le vaitausaga lea, e faigofie ona oo atu i latou i ni tulaga e le saogalemu. Ia saunia ni avanoa mo le tamaitiiti e fai ai ana filifiliga.
- Ia saunia avanoa mo le tamaitiiti e fegalegaleai ai ma isi, ae aua nei faamalosa le tamaitiiti e faia lona mea. Tuu atu i ai le filifiliga e auai ai i gaoioiga. Ia fai atu i ai ni faatonuga mafana, ma le alofa. Tata'i ese mai le amio lelelei.
- Faaali atu le alofa ma le agalelei. Ia tata'i ese le mafaufau o le tamaitiiti e taofia ai le amio e le manaomia. Ia uunaia le tamaitiiti ina ia fai lava ana ia mea, ae ia tuuina atu i ai le fesoasoani pe a manaomia. Faataga le tamaitiiti e faataitai le faia o filifiliga.
- Faataga le tamaitiiti e tatalo. Ia taula'i atu mataupu faaleagaga i aiga ma le alofa o le Tama Faalelagi ma Iesu.

O le Tolu Tausaga le Matua

O Uiga o le Tamaitiiti

- Ua savali ma tamoe, ae peitai e lei mafai lava ona ia faamaopoopoina. E fiafia e fai mea e faaoga ai ona lima e tusa lava pe le fetau.

- Ua ia te ia isi tomai i le gagana. E manao e talanoa ma aoao upu fou. E fiafia puupuu. E naunau ma fiailoa. E tele taimi e lē malamalama ai ma faia ni tala e ese mai le mea o loo talanoaina. E fiafia e faafoliga i se mea. E fiafia i tala e faatino i tamatamailima, o tala, ma gaoioiga faamusika. Na te le mafai ona iloa le eseese o le mea le moni mai le mea sao.
- E fiafia e galue na o ia. E le umi se taimi e taaalo faatasi ai ma isi, ae e manao i ni ana uo. E manao lava ia na o ia. E faigata ona ia fetufaai. E sili atu ia te ia le latalata i tagata matutua, aemaise lava le aiga, aua o loo i ai lona malu puipua.
- E manao e faamalie tagata matutua. E manaomia le latou faamaoniga, alofa, ma faaviiviiga. E vave ona afaina ona lagona pe a fefe pe popole foi. E tagivale. E faigofie ona aafia i lagona o isi. O loo atinae nai vaega o le tutoatasi. E ia te ia ni lagona malolosi pupuu.
- E fiafia i mataupu faavae faigofie o le talalelei e pei o le tatalo ma le ususitai. E sili atu ona ia iloaina le Tama Faalelagi ma Iesu Keriso, ma e laitiiti lona faatuatua ia te i La'ua.

Fautuaga mo Matua ma Faiaoga

- Faaaoga gaoioiga e aofia ai le tuuoso, tafue, savaliga, ma le punou. Faaaoga gaoioiga tusi ata faigofie e pei o le faapipiina o pepa, o le faatinoina o le kelei (Clay), ma valivaliga. Taofi gaoioiga e manaomia ai tomamoni ma le faamaopoopoga, e pei o le nonoaina ma le tipitipi pepa. Ia saunia e faamama le otaota.
- Ia aoao atu aitia ise auala faigofie ma le manino. Faaaoga ni faaupuga pupuu ma ni ata e faamalosa ai aitia. Ia uunaia fesili ma tali i lesona, ae ia tuu atu i le tamaitiiti e feauauai ma isi tamaiti. Faaaoga ni metotia eseese e aoao atu ai, e pei o tala, pese, talanoaga, faatinoina oni tala, tala e faaoga ai tamatamailima, ma taaloga faigofie. Ia feauauai i gaoioiga fai lemu ma gaoioiga tiotio.
- Ia saunia avanoa e taaalo ai ma isi. Faaaoga gaoioiga e uunaia ai le fetufaai, feauauai, ma le galulue faatasi. Ia atina'e se masaniga vavalalata ma le tamaitiiti, ma ia tuu ni avanoa i le tamaitiiti i nisi taimi e talanoa ai e uiga i lona aiga.
- Faaali atu le taliaina ma le talitonu lelei i le tamaitiiti. Aua le faitio. Ia faamamafa atu i le tamaitiiti lou alofa ma le alofa o lona aiga ia te ia. Ia fesoasoani i le tamaitiiti ia malamalama i lagona o isi, ma iloa foia ni feteenaiga. Ia uunaia le tamaitiiti ia faalagolago ia te ia lava.
- Ia aoao atu le talalelei i ni auala tuusao faigofie. Ia aoao atu o loo soifua le Tama Faalelagi ma Iesu Keriso ma e

agalelei ma agaalofa i Laua. Tuu atu sau molimau faigofie. Fesoasoani ina ia iloa le matagofie o foafoaga a le Atua.

O le Fa Tausaga le Matua

O Uiga o le Tamaitiiti

- E ese le tiotio. E vave le gaioi. E fialia e tafue, osooso, taututuu, aeae, ma togitogi.
- E fialia e talatalanoa ma aoao upu fou. E tele fesili. Ua mafai ona ia faauigaina ni nai mea laiti, ae tele lava e le tutusa ma le fetau. E faigata ona ia iloa le eseese o le mea sao mai le mea lē moni. E fialia puupuu. Na te faaaogaina ata e faaali atu ai ona lagona. E fialia foi e faatagafai se mea ma faatino se tala.
- Ua mafai ona taaalo faatasi ma isi. O isi taimi e fia faaali ai lona malosi, e fia fai faatonuga, e le mafaufau, le fautuaina ae e mafai foi ona faauoina. O loo aoao e fetu-faai, talia tulafono, ma feauauai. E tali atu i faaviiviaga moni.
- E masani lava ona tofotofoina le malosi o tagata. E gugutu, aemaise lava ia te ia lava ma lona aiga. E mafai ona ioe nei ae faamisamisa i le isi taimi. Ua sili atu ona talitonu ia te ia lava. Atonu e i ai le atuatuvaale ma ni lagona o le le malupuipua.
- Ua amata ona iloa le sao ma le sese, ma e masani ona manao e fai le mea sao. E tuuina isi i lona faia o le mea sese. E i ai lona lava alofa ma le faaaloalo i le Tama Faalelagi ma Iesu Keriso, ma e tele foi ana fesili e uiga ia te i Laua. E fialia e tatalo, ma manao ia lelei. Ua amata tele ona fialia i mataupu faavae o le talalelei.

Fautuaga mo Matua ma Faiaoga

- Ia feauauai gaioiga e fai lemu ma gaioiga tiotio. Ia fesoasoani i le tamaitiiti e aoao ia lotopulea ma ave ma ana matafaioi le vaaia o ana mea e fai. Aoao atu i ai auala talafeagai e faaali atu ai lagona.
- Ia faaoga talatalanoaga ma gaioiga e uunaia ai le faaaogaina o le mafaufafau, e pei o tupua ma tala tau-mate faigofie. Ia faamalalalama lelei mea e le o malamalama ai. Faaoga ata, mea faitino, ma mea moni sa tutupu. Faailoa atu upu fou. Tuu atu i le tamaitiiti e tusa ata e faatatau i lesone. Ia talia ma faamalosi atu i tau-mafaiga a le tamaitiiti e fai se mea fou. Ia faataga le tamaitiiti e suesue i lona siosiomaga. Faaoga gaioiga e faatinoina ai tala.
- Ia saunia avanoa mo le tamaitiiti e taaalo ai ma galulue faatasi ma isi. Aoao atu i ai le agalelei, onosai, ma le amiolelei. Ia fesoasoani i le tamaitiiti e mulimuli i nai tulafono faigofie e pei o le feauauai i le faiga o mea. Ia

fesoasoani i le tamaitiiti e aoao amioga faavafealoai e aunoa ma le faasalaina pe otegiaina.

- Ia fausiaina ma mulimuli tonu i mea e gata mai ai. Faataga le tamaitiiti e talanoa e uiga ia te ia ma lona aiga. Aoao le tamaitiiti e taua ma faapitoa ia i le Tama Faalelagi ma Iesu. Ia tau atu lou alofa ma le alofa o ona matua mo ia.
- Ia fesoasoani i le tamaitiiti ia pulea e ia ana lava amio, ma aoao atu i ai le taua o le faia o filifiliga lelei. Ia aoao atu i ai e alofa le Tama Faalelagi i Ana fanau ma e mafai ona tatou fesootai ma Ia e auala i le tatalo. Fesoasoani i le tamaitiiti ia iloa pe faapefea ona faaaloalo ma migao i le lotu. Ia aoao atu i ai uluai mataupu faavae o le talalelei.

O le Lima Tausaga le Matua

O Uiga o le Tamaitiiti

- E ese le tiotio ma tafitifiti. Ua i ai ona uiga paleni lelei ma ua amata ona faamaopoopo mea. Ua mafai ona kiki le polo, savali sao i le laina, musa, tafue, ma savali faamalo. Ua fialia e tusa ata, valivali, ma auai i gaioiga ma taaloga. Ua aoao e tui nonoa o seevae ma nonoa ma faamau ma toso sipi o ofu.
- Ua ia iloina nai mataitusi, numera, ma upu. E manao e faataga faitau ma tusitusi. Ua ono aoao e faitau. E tautalatala. E tuufesili, e fai ni manatu, ma tuu atu ni tali e faailoa atu ai ua lautele lona malamalama. Ua lelei i le foia o faafitauli. Ua manao ma naunau i mea sao. Ua amata ona iloa le eseese o le mea moni ma le mea e lē moni. E fialia puupuu ae ua faateleina lona ua'i atu i se mea. E fialia i galuega patino. E fialia i tala malie ma nai togafiti, ae e le mafai ona ata ia te ia lava. E fialia i tala, pese, tauloto, ma tala faatino.
- E fai uo ma naunau e faamalie ma faifai mea faatasi. Ua amata ona fialia e auai i ni vaega laiti o tamaiti ae atonu e sili atu lona fialia i sana uo sili. Ua laitiiti ni feeseeseaiga na te faatupulia i taaloga faavaega. Ua amata ona manao e tausia ma ola i ni tulafono, ma e faitio ia te i latou e le faia. Ua amata ona malamalama i tulafono, ae tele taimi e taumafai ai e fesui ai ina ia fetau mo ia.
- E taula'i lona fialia i le fale ma lona aiga. E fialia i tagata matutua, ma manao e faamalie i latou. E maasiasi gofie, aemaise pe afai o ni ana lava mea sese.
- E manao ina ia lelei. Ua aoao i le eseese o le sao ma le sese. O nisi o taimi na te tau mai ai le mea e le moni poo le tuuaia foi o isi i lona faia o se mea sese, ona o lona manao tele e faamalie tagata matutua ma faia le mea sao. Ua saunia foi o ia e aoaoina mataupu faavae faaleagaga.



Fautuaga mo Matua ma Faiaoga

- Ia faaaofia le tamaitiiti i gaoioiga faaletino. Faaaoga taaloga faigofie ma isi gaoioiga. Faataga le tamaitiiti e tipitipi pepa ma faapipii, ma toe tuu faatasi se paso. Ia faataga o ia e fai lava na o ia ni mea. Ia faaali atu i ai lou talitonuina o le tamaitiiti. Ia talia ma faamalosiaina taumafaiga a le tamaitiiti.
- Ia faataga le tamaitiiti e tautala ma fesili. Faataga o ia e faitau ni fupu po o ni fasi fuaitau faigofie. Faaaoga ni upu faigofie e tusi i ni fasipepa. Tofitofi i ni galuega ma ni matafaioi faigofie. Faaaoga gaoioiga tusiata, tala sao o le olaga, ma ni mea e vaaia. Ia faeseese ni gaoioiga, e faaaoga ata, taaloga, pese, ma ni talatalanoaga. Faaaoga gaoioiga e foia ai faafitauli e pei o tupua ma talatalanoaga i fesili. Faataga le tamaitiiti e fai mai ni taga o se mea, faatino se mea, ma faaaoga papeti. Ia toē ma le tamaitiiti.
- Ia nofouta i le manaoga o le tamaitiiti mo lou faamaoniga. Ia faamalosiaina e faauo atu, ma taumafai e fesoasoani i le tamaitiiti pe afai e leai ni ana uo poo se vaega e i ai. Talanoa e uiga i le lagona e maua e isi pe afai e agalelei ni tagata pe agaleaga foi. Talanoa i le taua o le alofa atu i isi ma faamalo atu i ai, ma faaali i le tamaitiiti pe faapefea ona faia lena mea. Ia fesoasoani atu i le tamaitiiti ia iloa le taua o le eseese o tagata taitoatasi.
- Mai lea taimi i lea taimi, aoao le aoga ma le taua o le aiga. Tuu atu i le tamaitiiti le avanoa e fetufaa mai ai ona lagona e uiga i lona aiga. Faaali atu lou alofa, ma

faaali atu i ai lou agalelei. Faaviivii atu mo amio tatau. Taofia ni gaoioiga poo ni faamatalaga e ono faamaina ai le tamaitiiti.

- Ia aoao atu amio tatau. Aua nei tei pe a fai mai le tamaitiiti i se mea e le moni pe le logoleleia foi, ae ia aoao atu pea lava i ai le taua o le taliaina o le tiutetauave o le tagata lava ia mo ana amioga. Ia Faamalosi i le molimau a le tamaitiiti e ala i le ta'uina atu o lau lava molimau. Faamatala atu ni tala ma ni manatu e faamalosi ai le alofa o le tamaitiiti ma lona faatuatua i le Tama Faalelagi ma Iesu Keriso ma a La'ua aoaoga.

O le Ono Tausaga le Matua

O Uiga o le Tamaitiiti

- Ua ese le tiotio. E masani ona pisapisao, e le malolo, ma sagisagi fiafia. E manao e auai i gaoioiga ma faia ni lui laiti, e ui lava ina faigata ona fai. A le fiafia ua na o le matamata lava.
- E manaomia ni mataupu e aoao atu i ni auala mausali ma le tonu. Ua faaopoopo le lelei olona mafaufau. E tautalatala, ma tele ana fesili. Ua aoao e fai ana faaiuga, ae masani foi ona le mau manatu. Ua faateleina lona uai atu i mea e fai. E fiafia e faitau, tusitusi, pese, faalogo i tala, pe faataga fai foi ni gaoioiga.
- E sili atu le fiafia i gaoioiga fai faatasi ma taaalo faatasi ma ana uo, ae peitai e manao lava ia e fai ana lava mea. O nisi o taimi e fiapule, e loto malosi, ma e le agalelei i

ana uo. E le tumau ana faauoga ma isi. E atugalua o ia i le faiga o ia e isi. E naunau mo fegalegaleaiga lautele lelei.

- E gugutu. E faatelē lava se faamatalaga ma e faitio foi. E sagisagi gofie lava, e tātō, ma ata soo. E mafai ona loto alofa, agalelei, ma faifai mea faatasi, ae e mafai foi ona vave suia uiga.
- E popole i amioga lelei ma leaga, aemaise lava pe afai e aafia ai aiga ma uo. O nisi o taimi e na te tuuaia ai isi mo mea sese. E fiafia i tala o tusitusiga paia, aemaise o tala e uiga ia Iesu.

Fautuaga mo Matua ma Faiaoga

- Ia onosai i le tele o le malosi tele o le tamaitiiti ma le lē nofo filemu. Faaaoga gaoioiga e pei o tusitusiga, vali-valiga, tipitipi pepa ma faapipii, ma le faalamolemoleina o kelei. Faaaoga taaloga e mafai ai e le tamaitiiti ona faaaoga lona lava malosi.
- Faaaoga gaoioiga e foia ai-faafitauli e pei o tupua, o iloologa, o tala e pule ai lava le tamaitiiti ia ma lana faaiuga. Faaaoga ata, ata faapipii ma isi gaoioiga e fai i ata. Faamatala atu upu fou. Fai ni fesili. Faataga le tamaitiiti e fai faaiuga. Talatalanoa i le taua o le filifili e fai le mea sao, ma faataga le tamaitiiti e faataitai le faia o faaiuga i ni filifiliga laiti. Saunia ni avanoa mo le faitau tusi, tusitusi, pesepese, ma faalogo i tala, ma le faatinoina o tala. Ia fuafua lesone ma mafaufau i mea e fiafia i ai le tamaitiiti.
- Ia faamalosiaina le fetufaai ma le auai faatasi ma isi i le faatinoina. Ia faatele avanoa mo gaoioiga fai faatasi. Faaviivii atu ma tuuina atu ni faamaoniga faapitoa. Ia taulai atu lesone i le faaalua o le alofa e ala i le fesoasoani ma le nofouta i manaoga o isi tagata. Uunai le tamaitiiti e auai i taaloga ma isi gaoioiga.
- Faaviivii atu i taumafaiga patino a le tamaitiiti ina ia tuu ititia ai lona lagona e fai se gugutu. Faaviivii atu ma le faamaoni. Aua le faitio. Toē *faatasi* ma ia ae aua le ata e *uiga* ia te ia. Faamalosiaina atu i uiga lelei. Ia aoao atu i le tamaitiiti le amio filemu, ma amio le gaoia e ala lea i au faataitaiga.
- Aoao le tamaitiiti ia manatu i lona tiutetauave mo ana lava amioga ma taumafai e faaleleia atili. Faailoa atu i le tamaitiiti e tofua sese uma lava tagata. Aoao atu le salamo faigofie. Faaaoga tusitusiga paia e aoao atu ai mataupu faavae faigofie o le talalelei. Fesoasoani i le tamaitiiti ia malamalama ma faaaoga tusitusiga paia.

O le Fitu Tausaga le Matua

O Uiga o le Tamaitiiti.

- Ua lelei le puleaina o lona malosi. Ua faatupula'ia lona fiafia ma le atamai i taaloga faapitoa, o mea e fiafia i ai,

ma gaoioiga. E le malolo ma le nofo filemu. E i ai ona uiga masani o le popolevale, ma o isi o taimi e manatu faaletonu ai. E ese le malosi, ae vavaigofie.

- E naunau e aoao. E matua mafaufau mamafa lava, ma e sili atu foi ona fetuai. Ua mafai ona foia faafitauli e sili ona faigata. E manao i lu'i, e galue malosi, ma e faifai malie lava i le faamae'aina o se galuega. E lelei e fiafia umi. E fiafia i mausa ma faaaoga ai tomiai. E manao e faaputupu ni mea ma talanoa e uiga i ana lava galuega ma mea e faataunuuina.
- E masani ona taalo i vaega, ae o isi foi o taimi e manao e taalo na o ia e aunoa ma le pisa. E faale fiafia i le isi itupa. E naunau e pei o ana uo, ma taliaina o ia. E laitiiti lona fia pule ma e faalē manatu foi e fai ana ia lava mea. E fiafia i le tele o tiute ma ia tutoatasi. E masani ona popole i le le faia lelei o se mea.
- E le fiafia o ia i le faitio. E sili atu lona manatu i ona lava lagona nai lo le manatu i isi tagata. E masani ona fia atoatoa, ma e tauau ina faitioina e ia lava. E taofiofi ma faaeteete. E faalē talaoso ma faalē manatu ifo ia te ia lava nai lo le taimi muamua.
- Ua ia iloaina le sao ma le sese. E fiafia e aoao ma faataitai mataupu faavae o le talalelei e pei o le tatalo, ma le totogiina o le sefuluai. E malamalama i isi mataupu autu o le talalelei e pei o le faamanatuga, faatua, salamo, galuega faafaifeautalai, o le Agaga Paia, ma galuega faalemalumalusa. E manao e papatiso ma maua le meaalofo o le Agaga Paia.

Fautuaga mo matua ma Faiaoga

- Faaaoga gaoioiga e mafai ai e le tamaitiiti ona faaaoga lona malosi. Faataga le tamaitiiti e fetufaai mai ona tomiai faapitoa. Ia onosai i le faalavelave mai ma le lē nofo lelei, ma aua nei gauai atu i ni mea le fetuai. Faaaoga auala eseese e fesoasoani e faatumau ai le fiafia o le tamaitiiti ma taofia ai lona ulavale. Faafetai ma faamalo atu i ai i ona uiga lelei.
- Fai ni fesili faatupu manatu. Faaaoga tala e leai ni faaiuga, o tupua, o taaloga e faaaoga ai le mafaufau, ma talatalanoaga e faatupu ai manatu. Faataga le tamaitiiti e fai faaiuga. Ia lava le taimi e tuu atu e faauma ai lana galuega. Faamalosiaina i le tamaitiiti e faia pea gaoioiga ma mea e fiafia i ai. Ia saunia avanoa e faitau ai tusitusiga paia, upu e tusi i fasipepa, ma tala. Faaaoga tala ma nofoaga moni nai lo tala fatu.
- Faaaoga gaoioiga e manaomia ai le taalo faavaega, e pei o taaloga ma tala faatino, ae ia tuu atu i le manao o le tamaitiiti e fai ana mea na o ia mai lea taimi i lea taimi. Aua nei faamalosiaina le faifaime faatasi ma i latou o le isi itupa. Faaviivii atu i aga ma uiga lelei e pei o le feauauai i mea e fai ma le fetufaai. Tuu atu i le tamaitiiti ia tiute-

tauave ma galuega e mafai ona ia faataunuuina ma ia faaviivii atu i ana taumafaiga ma mea e faataunuuina.

- Ia uunaia i latou e manatu mo isi. Ia galueaiina lona loto talitonu. Vaai mo avanoa e faailoa atu ai le taliaina ma le alofa vavalalata, ae le o le faitioina. Ia talia le femoumoua'i o lagona ma le lē lata atu. Ia uunaia le tamaitiiti e ta'u mai ona lagona.
- Ia saunia avanoa mo le tamaitiiti e faataitai ai le faiga o filifiliga sao. Fesoasoani ile tamaitiiti ia malamalama i taunuuga o ana filifiliga. Ia aoao mataupu faavae o le talalelei i auala tonu, ma le faigofie, ma faamalosi i le tamaitiiti e faataitai i aso uma o lona olaga. Ia aoao mai tusitusiga paia. Ia saunia le tamaitiiti mo le papatisoga ma le faamauga e ala i le fesoasoani i ai ia malamalama i feagaiga o le a ia osia.

O Le Valu Tausaga le Matua

O Uiga o le Tamaitiiti

- Ua amata ona sili atu ona sa'o ana mea e fai. E feminoia ma faamimigi solo. E i ai ona uiga popole. E taalo i taaloga faatulagaina lelei e manaomia ai le tomai ma le malosi o le tino. E fiafia umi. E manao e fia auai.
- Ua manao e iloa mafuaaga o mea. E naunau foi e fetu-faai lona malamalama. E manatu e na te iloa mea e tele, ae ua amata foi ona ia iloina e sili atu le iloa o isi. E faamasinosino. E i ai ni tagata e fiafia lava. E fiafia e tusitusi, faitautusi, ma faia taga o tala.
- E fiafia e taalo i taaloga faivaega e i ai ni nai tulafono faigofie. E sili atu ia te ia le taaalo faatasi ma lana lava tupulaga. Ua sili atu le faamaopoopo mea ma ua faaitiitia foi le faamanumalo. E manao e i ai sana uo mamae. E i ai se lagona malosi e fia tutoatasi, ae faalagolago foi i tagata matutua mo le taitaiga ma le malupuipua.
- E masani ona alofa atu, fesoasoani, faafiafia atu, e fiafia i soo se tasi, ma naunau e faailoa ni mea, ae e mafai foi ona lē mafaufau, manatu faapito, pule faamalosi ma faifaatonuga. E gauai atu i faitioga. E faitio ia te ia ma isi. O nisi o taimi e taufaailili ma faavalevalea. Ua iloa le lagona ta'usalaina ma le maasiasi.
- E naunau e faalogo atu i aoaoga o le talalelei, ae ono i ai ni fesili mo ia aoaoga. E mitamita i le avea o ia ma tagata o le Ekalesia. E manao e ola i mataupu faavae o le talalelei. E aoaoina le talalelei e ala i faataitai tumau ma le auai.

Fautuaga mo Matua ma Faiaoga

- Faaaoga gaoioiga e manaomia le faatulaga sa'o ma faataga le tamaitiiti e faaoga lona malosi. Ia onosai i mea le fetau, o uiga faasia ma le feminoia. Ia

feauauai gaoioiga e fai filemu ma gaoioiga e pisa ai. Ia faaviivii atu i aga ma uiga lelei.

- Faaaoga taaloga, tala, ata, ma gaoioiga e foia ai faafitauli ia uuna'ia ai le aoao. Faaaoga le faitautusi, ma le tusitusi ma le faatinoina o tala. Ia fesoasoani i le tamaitiiti e faatutu ni sini e mafai ona ausia. Ia faamalosi i le tamaitiiti ina ia popole i ana lava aga ma amio nai lo amioaga a isi. Ia tuuina atu i le tamaitiiti ni toa talafeagai e pei o taitai o le talalelei ma isi tagata lelei o le Ekalesia.
- Ia saunia avanoa mo fegalegaleaiga faavaega, faifai mea faatasi, ma fetu-faai ai. Ia taitaia ma vaavaia lelei gaoioiga. Ia faailoa atu o na faauoga e mafai ona faalē lelei. Ia fesoasoani i le tamaitiiti ia avea o se tasi o le vaega, pe afai e leai sana uo mamae. Faaviivii atu i le tamaitiiti i ni ana aga ma uiga lelei. Tuu atu le tamaitiiti e galulue ma isi tamaiti ma oe i le faia o tulafono o le vasega ma isi faaiuga. Faataga o ia e galue tutoatasi.
- Ia fesoasoani i le tamaitiiti ia iloa po o a lagona lē lelei ma ia iloa ona faafoeina. Faaali atu lou fiafia ma le nau-nautai. Ia faaviivii atu ma ia fausia lona talitonuga mo ia lava. Aua le faitioina ma faatusatusa le tamaitiiti i isi tamaiti. Faailoa ma faataua taumafaiga a le tamaitiiti ma isi mea ua ia ausia. Tuu atu i le tamaitiiti e fiafia i mea malie pe a tatau ai, ma ia onosai i le taufaailili ma le taufaifai. Ia aoao atu i ai, e sese foi isi.
- Faailoa soo atu i ai lou faatuatua ma le molimau. Ia fesoasoani i le tamaitiiti e talisapaia lona auai i le Ekalesia, ma tiutetauave o loo i ai. Ia tuu atu le lu'i i le tamaitiiti e ola i mataupu faavae o le talalelei. Fetu-faai lagona i mea na tutupu i le tagata lava ia, o mau i tusitusiga paia, ma tala. Faaaoga gaoioiga e mafai ona auai ai le tamaitiiti.

O le Iva Tausaga le Matua

O Uiga o le Tamaitiiti

- E fiafia i taaloga faiau. Ua malosi lelei lona tino. E fiafia e atiae lona malosi, o tomai, ma le televave. E fiafia i galuega taulima faigata teisi.
- E mafai ona ia faatumauiina le fiafia i i mataupu ma ni gaoioiga mo se taimi umi lava. E saili i mea moni, e lē fiafia i mea e lē moni. E fiafia e taulotoina mea. E sagisagi fiafia tele ma fia iloa se mea fou. E manao e faitautusi, tusitusi, ma teu talafaamaumau. E fiafia i tagatanuu ma isi aganuu ma tagata. E fiafia e aoao i uiga i le tuana'i ma le taimi nei. E fiafia e ao ma faamaopoopo mai mea.
- E fiafia e faatasi ma vaega o tagata o lona lava itupa. E fiafia i suesuega faavaega mo ni mea fou, ma taaalo faatasi, ae manao foi e faatauva. E na te tofotofoina foi taitai ma manao e tutoatasi. E tele ina faaluina lona taimi ma ana uo.

- Ei ai ni uiga e fai ma faafitauli, aemaise pe a le taliaina e isi. Ua amata ona tutoatasi, faamoemoeina, ma faatuat-uaina. E popole i le faia o faamasinoga sa'o, ma finau pe a lē sa'o se faaiuga. Ua mafai foi ona taliaina lona faale-tonu ma ona sese ma tauaveina le tiutetauave o ana lava aga ma uiga. O nisi o taimi e faavalevalea ai foi.
- Ua iloa lelei le sao ma le sese. E manao e faia le mea sao, ae o nisi taimi e le ususitai ai. E faatosinaina i molimau a isi. Ua saunia e aoaoina mataupu faavae faigata o le talalelei.

Fautuaga mo Matua ma Faiaoga

- Ia saunia gaoioiga eseese, e aofia ai taaloga faiau, e faatumauina ai le fiafia ma fesoasoani i le tamaitiiti e atinae tomiai.
- Tuuina atu faamatalaga tuusao ma mea moni nai lo mea lē moni. Aua le tuuina atu uma tali. Ia tuu atu le taimi i le tamaitiiti e mafaufau ai ma talanoaina tali. Ia uunaia o ia e tauloto ni upusii ma ni mau. Ia iloa le eseese o tomiai taitoatasi pe a tuuina atu ni tofiga po o ni tiutetauave. Ia saunia avanoa e faitautusi ai, tusitusi, ma faia talafaamaumau. Ia uunaia o ia e tusi sana api mo tala faamaumau. Ia aoao e uiga i isi tagata ma aganuu ma talafaasolopito.
- Ia iloa le manaoga o le tamaitiiti ina ia taliaina o ia e ana uo. Ia faia ni tapulaa ma ia faatumauina, ae ia talia ni manaoga ia tutoatasi ai. Ia aoao le tamaitiiti pe faapefea ona loto faafetai tusa lava pe lagona e le tamaitiiti e le o manumalo. Ia uunaia le faia o faauoga, ma fesoasoani i le tamaitiiti i le faia o ni uo.
- Ia faailoa atu i le tamaitiiti e te taliaina o ia, e ui lava ona e te le taliaina nisi o ona uiga le lelei. Ia saunia avanoa mo le tamaitiiti e faaali ai lona tutoatasi ma lona faamoemoeina. Aua le ula pe tausua i le tamaitiiti i sana mea sese ua fai
- Ia faailoa soo atu lou alofa ma lau lagolagoina o le tamaitiiti. Ia tuuina atu mai lea taimi ma lea taimi lau molimau ma molimau a perofeta. Aoao atu mataupu faavae faigata atu o le talalelei.

O le Sefulu po o le Sefulutasi Tausaga le Matua

O Uiga o le Tamaitiiti

- Ua ono televave o le tuputupu ae. E fiafia i taaloga e manaomia ai le malosi, o le televave, ma tomiai. Ua i ai taimi e taalo ai, tautulei, tauivi, taufetui, ma le tau-faalili. E le fifilemu, e tafitifiti solo ma e lē onosai foi. E ono eseese ma ana uo i le tulaga o le malosi o le tino ma le faaaogaina o le mafaufau. E le manao e fai o ia e pei ose tamaitiiti. Ua popole foi i ona foliga ma lona tuputupu ae.

- E fiafia i manatu ma mataupu faalemafaufau ma aitia. Ua faia faaiuga e tusa ai ma mea sa aoaoina. E manao e luitauina gaoioiga faalemafaufau. E faia faaiuga ma fetu-unai lelei. E fiafia e tauloto. E fiafia e faatutu sini. E mafaufau sao. E fiafia e aoao. E fiafia umi. E mala-malama lelei i uiga o upu, ma e mafai ona faauigaina manatu ma mea. E i ai ona uiga malie e ono lē fiafia i ai tagata matutua.
- E fiafia solo ma faatautava. E malosi lona agaga lagolago atu i vaega. E tele foi ona uiga lelei ma le lē lelei i fegale-galeaiga ma ana uo. O ana faauoga e sili atu le faigata ma umi. E faalagolago i ana uo lelei. E taua atu ia te ia manatu ma tulaga mauualuga o ana uo nai lo tagata matutua. O nisi o taimi e faitioina ai faaiuga mai tagata matutua ma lagona o isi. E fiafia e taufaailili ma taalo suaono. E le mafaufau i nisi o taimi, ma e le manao e galulue faatasi, ao nisi foi o taimi e fefaaauoai ma galulue faatasi ma isi.
- E le manao e ta'uvalea, ma e le fiafia foi i faitioga a nisi. E ono faapea o mea uma lava na te faia e sese, aemaise pe afai e faitioina. E popole ma fefe e uiga i le aoga ma uo. E aafia gofie ona lagona aemaise ia lava. E i ai ona masalosologa ma lagona e le mautonu. O nisi o taimi e leileia ma itaita gofie, ma e matuai nofouta lava i le faia faalelei o ia. E mafai ona faaloalo, naunautai, faamaoni, ma loto alofa. E manao e tutoatasi ma tuu atu ia te ia ni tiutetauave.
- E i ai se lagona malosi ma le mafaufau mama. E fiafia i le faaleleia o ia lava. E le manao e ioe atu pe a ulavale. Ua saunia e aoao atili i mataupu o le talalelei.

Fautuaga mo Matua ma Faiaoga

- Ia iloa ina o loo tuputupu ae o ia ma faasolo ina matua. Aua le faamalosia ni faamasaniga ma le isi ituiga. Ia saunia ni avanoa mo ia e auai ai i gaoioiga faaletino e faaoga ai lona malosi. Ia aua le ano tele i ni ulavale laiti. Aoao atu le lē faaituau ma le taua o le auai i gaoioiga. Ia faaali atu lou fiafia i lona olaga. Ia faatauaina eseese o tagata taitoatasi.
- Faatupu manatu e ala lea i le faaaogaina o fesili, tala faatusipaia, taulotoina o mau, o gaoioiga e foia ai faafitauli, ma talanoaga. Faataga o ia e faia ni faaiuga ma faatutu ni sini. Faaaoga upu fou, ma faatagaina o ia e faamatala uiga o upu. Faaaoga fesoasoani vaaia, tala, ma taaloga.
- Tali atu i manaoga ina ia auai i vaega ma ia tosina i ai. Ia saunia ni gaoioiga e faatagaina ai fegalegaleiga ma a latou uo. Ia uunaia fuafuaga faavaega ma galuega faavaega. Aoao o ia ina ia nofouta mo i latou e le taliaina e isi. Ia tuu atu ni tiutetauave ma ni tofiga, ma fesoasoani ia mautinoa ua tulitatao ina ia faia. Ia uunaia e faia galuega auauna atu e pei o le vaaia o ni tamaiti, o le fetufaai o taleni, ma fetufaai atu le talalelei i isi. Faaaoga

ia faaitaiga ma lesona e aoaina ai ia iloa lagona o isi ma ia agalelei. Ia faaviivii i ai ona o le faaaloalo, o le lē manatu faapito, faamaoni, ma le faauo.

- Aua ne'i e faatusatusaina o ia i isi. Ia uunaia o ia, ma ia viia ana taumafaiga. Ia faaali atu lou faatuatuaina o ia i le avea ai ma se tagata e toatasi. Ia toe faamalosiā i amioga lelei, ma taumafai e aloese i ni uiga le lelei o ni taunuuga laiti. Ia faatagaina le tutoatasi ma faamatalaina mai ia lagona faaletagata. Taumafai ia malamalama i ona popolega ma mea e mafua ai ona lē fiafia o ia.

- Ia aoao atu ia ni mataupu ma ni tulaga ma'oti taua e faatatau i amioga mama. Ia faamamafa atu le fiafia moni ma le faaleleia o le tagata lava i le tausia o poloaiga. Ia uunaia o ia e tautino atu ina ia ola i mataupu o le talalelei. Fesoasoani ia te ia ina ia malamalama ma saunia mo tiutetauave i le lumanai ma faamanuiaga. Aua le taufaifai ia te ia mo ni mea sese na fai, aemaise lava i luma o uo. Aoao atu le talalelei i lona atoatoa faatasi ai ma tala faatusipaia ma tala mai soifuaga o perofeta o aso e gata ai. Ia uunaia o ia e tuuina atu lana molimau.

AOAONA O TAMAITI O VAITAUSAGA ESEESE



O tamaiti o vaitausaga eseese e masani ona aoaona faatasi le talalelei i le aiga ma le lotu. O ia tulaga faavaega e aofia ai le afi-afi faaleaiga ma isi faatasiga faaleaiga, o taimi o fetufaiga a le Peraimeri, o aso o faataunuuga, o aso o gaoioiga, ma vasega a le Aualofa mo tamaiti. E tatau ona avefa nei gaoioiga ma ni mea faafiafia loto a o aoaona atu ai foi ma mataupu faavae o le talalelei. Na saunoa mai ia Elder M. Russell Ballard e faapea: “E mafai ona faafiafiaina tamaiti i ni gaoioiga lelei ma matagofie i taimi o fetufaiga, ae leai se aoga tele pe afai e o ese mai tamaiti ua na o le faafiafiaina ae le o malamalama, e le o aoaona atu i ai le talalelei, pe siitia ai faaleagaga. . . . O lesona uma lava, o fonotaga uma, ma soo se gaoioiga e tatau ona taulai atu i le aumaia o fanau iti ia Keriso” (“Great Shall Be the Peace of Thy Children,” Ensign, Ape. 1994, 61).

Ao e aoaona atu ia tamaiti i vasega ua tuu faatasi ai vaitausaga eseese, atonu e te iloaina i nisi taimi le faigata ona faafaigofie se manatu ina ia malamalama ai tamaiti laiti ae manaia ma fetui foi mo le au matutua. O fautuaga nei e mafai ona fesoasoani ia te oe ia faaauai ai tamaiti a’o latou aoaona faatasi le talalelei.

Tuu Atu i Tamaiti Matutua e Fesoasoani i Tamaiti Laiti

Tuu atu i tamaiti e galulue taitoalua, pe tuu atu i se tamaiti matua se toatasi e fesoasoani i ni tamaiti laiti se toatele. Mo se faataitaiga:

- E mafai e se tamaiti matua ona nofo i tafatafa o se tamaiti laiti ma faitauina se mau, faasino i upu a o latou faitauina.

- E mafai e se tamaiti matua ona fesoasoani i se tamaiti laiti e faitauina se tala, taaalo i se taaloga, taulotoina se mau, galulue i se galuega fuafuaina, pe faamaeaina se pepa o galuega.
- E mafai e tamaiti matutua ona fesoasoani ia te oe e aoaona atu se mataupu faavae po o se gaoioiga. E mafai ona e talosagaina i latou uma ina ia aoaona se tamaiti se toatasi po o ni tamaiti laiti se toatele. O se auala lelei lena mo tamaiti matutua e aoaona ai mataupu faavae o le talalelei. E fesoasoani foi ia i latou ia mau ai le tomai ma le to’a.

Faafaigofie ni Vaega o Gaoioiga mo Tamaiti Laiti

Afai o loo auai uma tamaiti laiti ma tamaiti matutua i le gaoioiga e tasi, atonu e te manao e faafaigofie le gaoioiga mo tamaiti laiti. Mo se faataitaiga:

- Ia faia ni seti se lua o fesili: o fesili faigofie mo tamaiti laiti ma fesili faigata teisi mo tamaiti matutua. Tusi fesili i luga o ni fasi pepa. I se taaloga po o se gaoioiga e iloilo ai, ia tuu seti o fesili i totonu o ni pusa eseese se lua. Tuu atu i tamaiti taitoatasi e filifilia se fesili mai le atigipusa talafeagai.
- I se faatinoga, ia faataga tamaiti e faatinoina ni nai vaega faigofie pe avefa ma ni manu po o se vaega o se tala. E mafai e tamaiti matutua ona faatinoina ni vaega faigata, ia avefa ma tagata faamatala ma faitauina mau. Afai e i ai ni vaega e tau-tatala ai tamaiti laiti, e mafai ona fesoasoani tamaiti matutua e ta’uta’u atu ia te i latou upu e fai.
- Afai o loo e faamatalaina atu se tala, fai i tamaiti laiti e uu ia ata pe faapipiina i luga o le laupapa ie mamoe.

Faaaogaina o Nofoga po o Potu, Vaevaeina o Tamaiti e Tusa Ai ma o Latou Vaitausaga

Afai e o atu ia tamaiti laiti i se potu po o se nofoga, o le tagata matua o loo i lea nofoga e mafai ona fetuunaia lesona mo i latou. Mo se faataitaiga, afai o loo i ai se gaoioiga i lea nofoga, e mafai e le tagata matua ona faafoeina se vaega faigofie o le gaoioiga mo tamaiti laiti. (Tagai “Nofoga,” itulau 189.)

MALAMALAMA MA LE AOAINA O LE AUTALAVOU



Ina ua 15 tausaga o Mamona, sa “asiasi le Alii ia te ia, na tofotofoina foi ma iloa le agalelei o Iesu” (Mamona 1:15). Sa na o le 14 tausaga o Iosefa Samita ina ua ia mauaina le Uluai Faaaliga. Na taitaiina ma aoaoina o ia i lona talavou e sauniuni ai mo le Toefuataiina o le talalelei. O loo valaauina e le Alii i aso nei ia tagata talavou e auuina atu o ni au peresitene o korama ma vasega, e faataunuuina ia sauniga o le perisitua, ma ia talai atu le talalelei i le avea ai ma faifeautalai faamisiona. Ao e aoaoina atu le autalavou o le Ekalesia, ia manatua o loo silafia lelei e le Alii lo latou malosiaga. Na ia tuuina atu le faatuatuaga tele i tagata talavou i le taimi ua tuanai, ma o loo Ia faaaauu pea ona tuuina atu lona faatuatuaga tele ia i latou i aso nei.

Malamalama i Tagata Talavou

O tagata talavou o loo i ai le maelega ma le malosi lea e mafai ona avea ai le aoaoina o i latou ma mea e fiafia i ai. Ae ina ia aoaoina i latou i le talalelei, e tataua ona e iloa le auala e fesoasoani ai ia i latou ina ia taulai atu lo latou malosia i le taitaiga sa’o. E taua tele le malamalama ia i latou ma o latou popolega ma luitau.

Ina ia fesoasoani ia te oe ia malamalama i tagata talavou o loo e aoaoina, ia toe mafaufau i tua i aso o lou talavou. O a ni mea na e oo i ai na sili ona luitauina ai pe na e tiga ai foi? O le a le mea na e popole i ai? O a ni ou lagona sa i ai e uiga ia te oe lava ia? O a ni au sini ma ni ou manatu sa i ai? O a ni ou manaoga faalevafealoai po o ni ou manaoga faalelagona? O ai tagata sa sili ona fesoasoani atu ia te oe, ae na faapefea foi ona latou fesoasoani atu? O le mafaufau i nei fesili e mafai ona fesoasoani ai ia

te oe e aoao atu ma taitaiina lelei ai le autalavou.

Malamalama i Luitau o Loo Feagai ma le Autalavou

E feagai le autalavou ma luitau taua ao latou saunia e avea ma tagata matutua. Afai o loo e malamalama i nei luitau, e mafai ona e ofoina atu se lagolago ma se faamalosi aoga ma le atamai. O faamatalaga nei e mafai ona fesoasoani ia te oe e te malamalama ai i nisi o luitau o loo latou feagai.

Fetuutuunai i Suiga i o Latou Tino

O le tuputupu a’e ma suiga o le tino i le taimi o le talavou, e vave tele. I le tulaga lautele, o nei suiga e tasi pe lua tausaga e vave amata ai tamaitai talavou nai lo alii. O lagona fou e oo i ai alii talavou ma tamaitai talavou e mafai ona faagaetia ai pe fenu-mia ai foi i latou. E mafai ona latou lagonaina le faaletonu po o le le atoatoa aua ua latou le mananao i o latou foliga vaaia faaletino. O suiga i le faaletino latou te iloina e moomia ai ona latou faia ni fetuunaiga se tele i lagona ma fegalegaleaiga.

Faia o Fesuiaiga i Fegalegaleaiga

Talu ai ona o tagata talavou o loo i le fesuiaiga i le va o le avea ma tamaitiiti ma le tagata matua, e mafai ona latou lagonaina e le fetau i latou i totonu o ni siosiomaga tetele. E matuai faamaonia lava le vaega lea i siosiomaga, o lo latou faamoemoega atu o le maua lea o se aoaoga. Talu ai ona o suiga ua latou oo i ai, ua latou iloina ai e le o toe avea i latou ma ni tamaiti, ae ua latou iloa foi e le o mafai ona latou faataunuuina ia tiutetauave a tagata matutua. E masani



ona latou le iloaina o ia suiga o mea lava e masani ai, o lea e mafai ai ona latou lagonaina le malamalama i ai. E mafai ona latou manatu faapea o o latou lagona e le taatele ma e leai se tasi e malamalama i mea o loo latou oo i ai.

Aoao Ina ia Faaoga o Latou Atamai ua Faateleina

I le va o le 12 ma le 15 tausaga, e toatele ai lava le autalavou e faateleina lo latou malosi e aoao ai. Ua sili atu ona latou faia ia ni fetuunaiga, mafaufau lelei, ma fuafua mo le lumanai. O le a sili atu ona e faa-aafiaina le autalavou pe afai e te faaaloogia lo latou malamalama ma aoao mai ia i latou e pei lava foi ona e manao ia i latou e aoao mai ia te oe.

Faatumauina o Sootaga o Lagona i o Latou Matua ma Isi Tagata Matutua

E malolosi ia lagona o le autalavou e aoao mai o latou matua ma isi tagata matutua. Latou te mananao foi i tagata matutua ina ia faaaloalo, malamalama, ma faalogo atu ia i latou. Ae peitai, o tagata matutua, e mafai ona latou faamasino sese i latou i nisi taimi ona e faapea e le'i matutua o latou mafaufau po o ni amioga foi e le masani ai. E tatau ona tatou mulimuli i le apoapoiga a le Alii na tuuina atu ia Samuelu: "Aua e te vaai i lona tino, . . . aua e vaai tagata i le tino, ae vaai Ieova i le loto" (1 Samuelu 16:7). O se tagata matua e taliaina ma malamalama ma faaali atu le faaaloalo e mafai ona faia se suiga lelei i le olaga o se talavou le mautonu ma le le mau manatu.

E mafai ona faasoosoina oe e te mafaufau faapea e mafai ona e latalata atu i le autalavou e ala lea i le auai faatasi ma i latou i le faitioina o o latou matua po o isi tagata matutua. Ae peitai, o lenei mea e mafai ona faatupuina ai lo latou le faaaloalo i o latou matua faapea ma oe. Ia manatua o se vaega taua o le tiutetauave o le fesoasoani lea e faamalolosia ia sootaga i le va o matua ma a latou fanau.

Ia fesootai e le aunoa ma matua o le autalavou o loo e aoaoina. Ia e faailoa atu i ai a latou taleni, o lo latou alualu i luma, ma ni sao taua ma lelei na e maitauina i o latou atalii ma afafine. Ia faanofa malamalama ia

matua i mea o loo outou aoaoina i totonu o le vasega. Ia fesili atu po o le a se mea e mafai ona e faia e fesoasoani ai ia i latou ao e aoaoina a latou fanau. Ia faasino ia le autalavou i o latou matua, ma saili e faamalolosia sootaga faaleaiga.

Ia Faavaeina o Latou Lava Faasinomaga

O nisi talavou e taumafai e faavaeina se faasinomaga e ala lea i le ofuina o ni ofu le talafeagai po o le faiga o le ulu pe faaalua foi ni manatu e le masani ai. E mafai ona latou faia lea mea e faatosina atu ai tagata ia i latou pe ina ia ofi atu ai foi i totonu o se vaega o uo ma ilogofie ai i latou mai isi vaega. O le mea lava e masani ai, o lea itu-aiga amioga e le umi. O le mea moni lava, afai e lagonaina e le autalavou se lagona talisapaia mai tagata matutua ma e tuuina atu i ai le avanoa e faailoa mai ai o latou manatu e aunoa ma le taofiofia pe faitioina, o le a latou lagonaina loa lo latou saogalemu ma taofia ai loa ona faia ni uiga e le masani ai.

E le o se mea atamai le taumafai e ofu ma talanoa ia pei o tagata talavou o loo e aoaoina. Ia manatua e tatau ona *tasi oe ma* i latou, ae le o le avea o oe *ma se tasi o i* latou.

Aoao Mai Alii po o Tamaitai ua Avea ma Faataitaiga

E taua tele mo le autalavou le i ai o ni alii po o ni tamaitai e avea ma faataitaiga ao latou sauniuni atu mo le lumanai. Ia malamalama o loo avea oe ma isi tagata matutua ma nisi e faataitai i ai.

Saunia e Auauna Atu i le Ekalesia ma le Lalolagi

E tele ina faaaluina e le autalavou o latou taimi ina ia maua ai se aoaoga ma saunia ai mo se galuega. Ia uunaia i latou ina ia matu'ai sailia ma le faamaoni a latou aoaoga ma ia saunia lelei mo le lumanai. Ia uunaia foi i latou ina ia mafaufau e uiga i le auala o loo saunia ai i latou e a latou a'oga, e a latou suesuega o le talalelei, ma a latou filifiliga i le va o le sa'o ma le sese mo le auauna atu i le Ekalesia i le lumanai. Fesoasoani i alii talavou ina ia saunia e avea ma faifeautalai faamisiona.

Saunia mo le Faaiipoipoina ma le Olaga Faaleaiga

E mafai ona sili atu le saunia o le autalavou mo le faaiipoipoga ma le olaga faaleaiga e ala lea i le saunia e osia ma tausia ia feagaiga o le malumalu. O mea uma e te faia ma aoaoina atu e tatau ona faasino atu ai tagata talavou i le malumalu. Fesoasoani ia i latou ina ia malamalama i mea e manaomia ina ia agavaa ai mo le auai atu i le malumalu, ma uunaia i latou ina ia faatuina se sini e faia ai.

Ia Totoina i Totonu ia Tulaga Taua ia Latou te Ola Ai

O le talalelei toefuataina e tuuina mai ai ia mataupu faavae ma faatulagaga ia o le a taitaiina atu ai i tatou i le fiafia ma le faaeaga. Ia faaoga avanoa uma e fesoasoani ai i tagata talavou ina ia faaogaina nei avanoa mo i latou. Ia uunaia i latou ina ia taulamua mo lo latou lava alualu i luma faaleagaga (tagai i le “Fesoasoani i Tagata Taitoatasi Ina ia Avea ma a Latou Matafaioi le Aoaoina o le Talalelei,” itulau 63–65).

Atinaeina o Faauoga ma Isi Tagata o la Latou Tupulaga

E naunau le autalavou ia maua se mafutaga ma tagata o la latou lava tupulaga ma sailia mai le malosiaga mai ia i latou. E tele se sao taua o uo i le saunia o se tagata talavou e ave ma tagata matua. Latou te fesoasoani e faatumuina ona manaoga mo le taliaina. Latou te mafai ona faasufiina o ia e faatinoina ona tomalautele. Latou te tuuina atu le faamautinoaga faapea o isi tagata e i ai foi manaoga, o mea o loo tauivi ai, e faaitiitia ai lagona o le faaeese e mafai ona oo atu i ai. Latou te faatagaina ai o ia e aoao e uiga i lagona ma manatu o isi. Latou te tuuina atu le lagolago i tulaga taua e faatupulaia. Afai e tuufaatasia ia ni tagata talavou e i ai ni tulaga taua amiotonu, o le a latou fesoasoani e puipuia isi mai uunaiga a i latou e ese o latou tulaga e faatauaina. E i ai se sao taua o le Ekalesia i le sauniaina lea o fegalegaleaiga faatasi ma uo ma tagata matutua alofa o e latou te faamalosalia ia ni olaga ma ni tulaga e faatauaina atoatoa.

O Mea e Manaomia e le Autalavou mai Tagata Matutua*Lagolago*

Afai e lagonaina e tagata talavou le mafanafana, alofagia, ma le lagolago mai se matua, faiaoga, po o se isi tagata matua, latou te lagonaina lo latou faamalosalia e fetai ai ma luitau o le olaga. Ia mautinoa e lagona e tagata talavou o loo e aoaoina, e te avanoa ma e te fiafia ia i latou. Ao e mafaufau e uiga ia i latou ma mea e tatau ona latou aoaoina, ia e fesili ifo ia te oe lava po o e faia uma mea e mafai ona e faia e fesoasoani ai ia i latou ina ia alualu i luma.

Faamoemoeina o ni Amioga Lelei

Afai e faamoemoeina ia tagata talavou e ausia ia faatulagaga o le talalelei ma usiusitai i tulafono, e laitiiti lava ni vaega e ono faia ai e i latou ni amioga le talafeagai po o ni auala sese. E atamai tele pe a faavaeina vave i lau aoao atu ia ni mea ua e faamoemoeina mo i latou. Ia manatua o le ave ma se uo i le autalavou e le lava lena. E tatau ona ave oe ma se faataitaiga lelei. E tatau foi ona e aoao atu ia mataupu autu moni ma faamoemoe i ni amioga lelei ina ia latou iloa ai ona ola i se olaga faamaoni. (Tagai i le “O le Mana o le Upu,” itulau 52–53, ma le vaega o loo faaulutalaina “Faatupuina o se Atemosifia e Aoao Ai,” itulau 83–88.)

Faaloalo mo Tagata Taitoatasi

Afai e lagonaina e le autalavou e faaloalo ma faalogo atu ia tagata matutua ia i latou, latou te matua lagonaina foi le malupuipuia ma le saoloto, ona mananao lea e tosina atu ia i latou. Galue ma tatalo ina ia malamalama i tagata talavou o loo e aoaoina. Aapa atu taitoatasi ia i latou (tagai “Aapa Atu i le Tasi,” itulau 37–38). Fesili atu ia i latou e uiga i mea e fiafia i ai, o mea e naunau i ai, ma mea latou te oo i ai i aso uma. Faalogo atu ia i latou, ma faaloalo i o latou manatu, aga, ma lagona.

O se Vaaiga Mamao i lo Latou Lumanai

Ao e aoaoina atu le autalavou o le Ekalesia, o loo e fesoasoani e saunia ia ni taitai—matua, taitai o le perisitua ma ausilali, faifeautalai, ma atonu foi o ni perofeta o le lumanai. Talu ai ona e le lava le malamalama o tagata talavou, o nisi taimi e faigata ai ia i latou ona vaai e sili atu nai lo le taimi nei. I le ave ai ma se faiaoga, e mafai ona e tuuina atu ia i latou se vaaiga mamao o lo latou lumanai ma le taitaiga i le sauniuni atu i ai. Ia uunaiina i latou e mafaufau i o latou lava tagata i le lumanai. Aoao latou i le taimi nei i mea o le a latou manaomia ona latou iloa a taeao.

Uunaiiga ina ia Faitauina Faatasi ma le Malo o le Atua

E ui lava e masani ona popole le autalavou mo i latou lava, e i ai foi so latou lagona malosi e popole ai mo isi. Latou te popole i tulaga o le lalolagi ma e moni lava lena mea. Latou te mananao e auai i se galuega e aoga. Afai latou te iloina o loo latou auai i se vaega e i ai sona taua ma sona faamoemoe, o le a sili atu ona latou mau manatu, lagolago, ma ositulagaina o latou tagata mo lena faamoemoe. O le galuega o le fausiaina o le malo o le Atua e sili atu ona taua i lo latou lotonuu nai lo se isi lava mea. E mafai ona e uunaiina ia lē manatu faapito e ala lea i le musuia o i latou ina ia fesoasoani e fausia le malo o le Atua.

AOAIONA O LE AUTALAVOU E ALA I GAOIOIGA FAAVAEGA



O gaoioiga a le autalavou e tatau ona fuafuaina lelei a’o mafaufau i ni faamoe-moega o le talalelei. I le taimi o nei gaoioiga, e tatau ai ona e nofouta mo avanoa e fesoasoani atu ai i tagata talavou e faamalosia a latou molimau, atinaeina ia taleni ma tomai faaletaitai, tuuina atu o le auaunaga, ma faia ni faauoga ma isi o e ua matua naunatu atu i mataupu faavae o le talalelei. O fautuaga nei e mafai ona fesoasoani tele i taitai, faiaoga, ma matua.

Aoao Atu e ala i Faataitaiga

I le taimi o gaoioiga a le autalavou, o lau auupega sili ona malosia e aoao atu ai o lau faataitaiga lea. E te aoaoina tagata talavou e ala i au taga, o a outou talanoaga faasamasamanoa e uiga i isi, o au tali i ni faafitauli, o le gagana e te faaogaina, ma le auala e te faailoaina atu ai lou tagata i isi.

Mo se faataitaiga, na aoaoina e se vaega o tamaitai talavou se lesonea mai o latou taitai ina ua saunia i le latou tolauapiga a tamaitai nisi o tulaga na maofa ai. Sa latou manatu o le a latou auai i se tolauapiga lea o le a saunia ai ni fale ma le eletise, ma sa latou tapena fuafua i ai. Ae peitai, ina ua latou taunuu, sa na o fale’ie sa avanoa—e leai se eletise po o nisi lava mea. Sa faigofie lava i tamaitai ona faitio, ae sa faia e taitai o Tamaitai Talavou se faataitaiga e ala lea i le filifili e talie e tusa ai ma tulaga o loo i ai, ma faia le mea sili mai mea ua latou maua. I le tele o tausaga na lumanai ai, sa toe manatua ai e se tasi o tamaitai talavou lena tolauapiga o se taimi sa sili ona taua ia te ia. Na ia faapea mai: “O le a le galo lava ia te au le nofo ai i lalo o se pupuvao faatasi ma nisi o teine ma se tasi o o matou taitai. Sa matou talie uma lava ma taumafai e fuafua

pe o le a faapefea ona matou lavatia le isi tolu aso o le a sosoo ai. Ina ua ou vaaia o’u taitai o loo latou faia le mea sili mai se tulaga faigata, sa ou aoaoina ai se lesonea sili e uiga i le fetuutuunai ma le fiafia ma fesoasoani i isi.

Fuafua Avanoa e Aoao Atu Ai

E le tatau ona taumafai e aveia ia gaoioiga o ni vasega aloaia. Ae peitai, e masani lava ona i ai ni auala e fausia ai aoaoga o le talalelei e aveia ma gaoioiga.

Mo se faataitaiga, ina ua faalogo se fautua o le Perisitua Arona ia Peresitene Ezra Taft Benson o uunaiina ia aiga ina ia faitauina i aso taitasi le Tusi a Mamona, sa faagaetitia o ia i folafolaga sa tuuina mai ai. Na faapitoa lona ootia i le folafolaga lea e faapea o le a faamanuiaina aiga i le Agaga o le Alii i o latou fale pe afai o le a latou mulimuli i lenei fautuaga (tagai i le Conference Report, Oke. 1988, 3–4; po o le *Liahona*, Ian. 1989, 4–6). Na toe manatua e le fautua o le Perisitua Arona: “Na ou manatu, ‘Afai o lena folafolaga e faatatau i aiga uma lava, o le a faatatau foi la i la’u vaega o le Sikauti?’ Na ou mafaufau loa o le a matou amataina ona faitauina i aso taitasi ia tusitusiga paia i le tolauapiga a le Sikauti. O taeao uma lava ae le’i amataina le aso, matou te faapotopoto faatasi ai ma faitauina se mataupu mai le Tusi a Mamona. Ou te molimau atu na vaaia i tonu o la matou vaega le faamanuiaga a Peresitene Benson. Mai le aso na matou amata ai ona faitau faatasi, e le’i i ai lava ni tulaga ogaoga o ni faigata na tupu i le va o tama. Ou te faamoemoe sa latou mala-malama i le mana o le mulimuli i le fautuaga a le perofeta.”

O lena lava foi taitai na ia fuafuaina e le mafai ona faamutaina se sauniga a o tafuina faaniutu le afi o se to-lauapiga (campfire) e aunoa ma le tuuina atu o lana molimau ma uunaia ia tama taitoatasi ina ia o atu e fai se misiona. I le tele o tausaga mulimuli ane, o nisi o alii talavou na ia auauna atu i ai na faafetai atu mo lana fautu-aga i autafa o le afi ma ta'u atu ia te ia faapea na aafia ai a latou faaiuga.

Faaogaina Lelei o ni Taimi e Le'i Fuafuaina e Aoao Atu Ai

E masani lava i le taimi o gaoioiga, o le a e maua ai ni avanoa e le'i fuafuaina e aoao atu ai mataupu faavae o le talalelei (tagai foi "Taimi o Aoaoa i le Olaga Faaleaiga," itulau 148–49). Mo se faataitaiga, ina ua foi mai se vaega mai se savaliga i se tasi aoauli, sa latou maitauina ai e toalua ni tamaitai talavou ua leai. Sa faavave loa ona toe faapotopoto faatasi mai e le taitai le isi vaega. Sa latou tootutuli faatasi i le tatalo ona fai ai loa lea o se fuafuaga e sailia ai teineiti o loo misi. O se faafitauli ogaoga na se-manu e oo i ai ae na toe foia ina ua toe maua ia nei tamaitai talavou i se taimi vave. Sa toe faapotopoto faatasi mai foi e le taitai tagata uma, ona latou toe tuuina atu ai foi lea o se isi tatalo o le loto faafetai. Ina ua maea le tatalo, sa faailoa atu e le taitai lona alofa mo tamaitai talavou uma taitoatasi ma tuuina atu lana molimau e uiga i le moni o le Tama Faalelagi ma Lona naunau e tali mai i a latou tatalo.

Faaoga Gaoioiga e Avea ma Lagolago i le Aoaoina Atu o le Talalelei

O gaoioiga e mafai ona faatupuina ai ni malamalamaaga lea e faaoga i ai e oe ma i latou o loo e aoaoina ia mataupu faavae o le talalelei. Soo se taimi lava e talafeagai ai, ia faaalu se taimi pe a maea se gaoioiga e talanoa faatasi ai ma tagata talavou e uiga i mataupu faavae o le talalelei sa latou faaaogaina. E mafai ona taitaiina oe e ala i fesili nei: O le a? E a la? O le a nei la?

O le a? Fesili atu i tagata talavou e faamatala atu po o le a le mea na tupu i le taimi o le gaoioiga ma talanoa e uiga i tagata ma nofoaga sa aafia ai. E mafai ona e tuuina atu fesili e pei o le "O le a le vaega sili o le aso?" po o le "O le a le mea malie na tupu?" po o le "O le a le mea sa faigata ia te oe?"

E a la? Ia fesili atu i tagata sa auai e mafaufau i le gaoioiga e tusa ai ma mataupu faavae o le talalelei. E mafai ona e tuuina atu fesili e pei o le "Aisea na tatou faia ai le mea na tatou faia?" po o le "Na faapefea ona fesoasoani le gaoioiga i se tasi?" po o le "O le a se mea na e aoaoina mai lenei aoaoga?" po o le "O le a le mea sa faigata pe sa faigofie ia te oe?"

O le a nei la? Fesili atu i tagata talavou e mafaufau pe o le a faapefea ona aafia i latou i le gaoioiga i le lumanai. E taua tele le vaega lenei aua e fesoasoani ai ia i latou e lagoon

naina le naunau atu ina ia faaaogaina mea na latou aoaoina. E mafai ona e fesili atu, "Pe o le a e faia ea se mea e ese ai i le lumanai ona o le mea na e aoaoina i lenei aso?" Afai o lena, o le a la? E mafai ona e fai atu ia i latou e faauma mai le fuaiupu lea "I le lumanai, o le a ou . . ."

Atonu e te mana'o e faaoga nei fesili e avea ma lagolago i le talanoaga i se auala se tasi pe sili atu foi:

- Ia taitaiina se talanoaga faasamasamanoa i le agai atu i le fale mai se mea na tupu. O se vaega o alii talavou ma tamaitai talavou o loo agai atu i o latou fale mai se galuega auauna atu lea sa latou faaaluaia ai o latou taimi faatasi ma tamaiti i se falemai o tamaiti i le nuu. E ui lava sa popole le toatele o le autalavou i le taimi muamua, ae na foliga mai sa fialia uma tagata i le aoauli. Ao latou toe tietie atu i le falelotu, sa amata ona latou talatalanoa e uiga i tamaiti sa latou galulue faatasi. Sa latou faamatalaina mai mea malie, o mea lelei, ma mea e faanoanoa ai. O se tasi o fautua sa aveina le taavale. Sa ia faalogologo, ma tuufesili atu ma uunaia ia tagata taitoatasi e faamatala mai se mea e uiga i le mea na tupu. Ona ia faapea atu lea, "Mata o le a i ai se eseesega i soo se tasi o na tamaiti ona o le tatou asiasiga?" Sa i ai si tau le mautonu, ona faapea mai ai lea o se tasi, "Ou te manatu o le a i ai." O le tali lea na toe faaosoina ai isi talanoaga. Sa faaauau ona faalogologo pea le fautua ao talanoa le autalavou i le mafuaaga sa latou fialia ai e o mai ma mea o loo latou manana'o e faia i le lumanai. O lenei talanoaga puupuu na fesoasoani ai i tagata uma ia malamalama lelei i le uiga o le mea sa latou oo i ai i le aoauli.
- Fuafua ni nai minute i le faaiuga o se gaoioiga e talanoa ai e uiga i le mea na tupu ma lesona e mafai ona maua mai ai. O lenei mea e mafai ona faia i le faaiuga o se konafesi a le autalavou, toluapiga, po o se mlaaga i le malumalu. E mafai ona e faia le mea leni ae te le'i valaauliaina le autalavou e tuuina atu a latou molimau.
- Talanoa e uiga i le gaoioiga i le isi taimi tou te feiloai ai mo se lesona. Faamanatu atu i le autalavou po o a ni o latou lagona sa i ai faapea ma ni mea na latou aoaoina mai le gaoioiga.
- Ao lei fuafuaina e le autalavou le isi a latou gaoioiga e sosoo ai, ia valaaulia i latou e talanoa atu i ai e uiga i le gaoioiga talu ai nei. Afai e tele se taimi i le va o le gaoioiga ua tuanai ma le talanoaga e uiga i ai, atonu e te manaomia ona faaalu sina taimi i fesili "O le a" o loo lisiina atu i le itulau leni ina ia mafai e tagata ona manatuaina lelei le mea na tupu.
- Faaoga gaoioiga e avea o ni faataitaiga pe a e aoaoina atu ia lesona. I le taimi o lesona, e mafai e oe po o ni tagata talavou ua tofiaina ona talanoa e uiga i gaoioiga ua tuanai lea e faatatau i mataupu faavae o le talalelei o loo talanoaina.


- Ia valaaulia tagata talavou e tusia ni faamatalaga e uiga i gaoioiga. Atonu e te manao e valaaulia le autalavou e tusi i totonu o a latou tusi o talaaga e uiga i se gaoioiga pe tusi atu foi ni tusi i faifeautalai lea latou te faamatala atu ai e uiga i se galuega auauna atu ma se mea na latou aoaoina mai ai.

O Taiala ma Tulafono mo le Fuafuaina o Gaoioiga

Ia manatua o gaoioiga e tatau ona faamalosi ai le faatu-atua ma fausia ai noataga o le alofa. O se tasi o meaalofa sili e mafai ona e tuuina atu i le autalavou o malamalamaaga ia latou te taliaina ai le talalelei i o latou olaga.

Mo taiala ma tulafono mo le fuafuaina o gaoioiga, ia tagai i le vaega o “Gaoioiga” i le *Tusitaulima o Faatonuga a le Ekalesia*.

MALAMALAMA MA LE AOAONA O TAGATA MATUTUA



O se fesoasoani i se Aualofa a le uarota e masani lava ona talosagaina ia tuafafine e suitulaga mo faiaoga masani, ua uma ona valaauina. Sa taufai lava si ona maofa tele i lo latou le mautonu ina ua ia talosagaina i latou. Sa latou faapea mai latou te lagonaina lo latou le talafeagai ona aoao atu ni tamaitai se toatele, o e latou te mautinoa, e sili atu lo latou iloa ma ua saunia lelei e aoao atu nai lo latou.

E oo foi ia te oe, e te lagonaina lava lou le talafeagai i se valaauga e aoao atu ai tagata matutua. E mafai ona e popole e le gata i le maoae o le malamalama ma le tomai o le toatele o i latou e te aoaoina, ae faapea foi le tele o se eseese i le va o i latou. E masani lava, o vasega a tagata matutua e tele lava ina eseese i a latou galuega, aoaoga, malamalama i le Ekalesia, luitau faaleaiga, atamai i tusitusiga paia, maualuga o le lagona toafilemu, ma le atinaega faaleagaga. O lenei mea e mafai ona fai ma luitau i le tau vaai lea pe faapefea ona saunia ni mea o le a manaia ma aoga ai mo i latou uma. Ae e mafai ona e faaogaina nei uiga eseese ma mea uma eseese na oo i ai—o uiga e ono taitaiina atu ai oe i lou lagonaina o le le talafeagai—e faalatele ai ia lesona e te aoaoina atu.

E mafai ona e faalateleina lou valaauga i le avea ai ma se faiaoga e ala lea i lou faaogaina o le tele o malosiaga o i latou o loo e aoaoina. E mafai ona e faaogaina o latou malamalama ma mea na latou oo i ai. E mafai ona e fuafuaina ia lesona ina ia latou mafai ai ona aoao le isi mai le tasi. E te le tau manaomia ona ia te oe uma ia tali pe faafo ia tagata o le vasega i au sauniuniga; e le o ni mea ia e moomia ina ia avea ai ma se faiaoga lelei o le talalelei. Nai lo lena, e moomia ona e lotomauualalo, mael-

ega, tatalo, ma naunau ina ia i ai se sao o tagata o le vasega i lesona. Ao e agai i luma i lenei agaga, o le a mafai e le Alii ona liliuina ou popolega e tusa ai ma ni ou le atoatoa i le faalagolago atu ia te Ia. O le a Ia faalateleina au taumafaiga, tuuina atu ia te oe le filemu, ma musuia i latou o loo e aoaoina ina ia faaolaolaina ia talanoaga a le vasega. Ua tuuina mai e le Alii ia i tatou se aofaiga faapitoa o musumusuga pe a tatou faapotopoto e suesue le talalelei.

Uiga Taatele o Tagata Matutua e Aoaoina

Ao e saili e te taulai atu i malosiaga ma malamalamaaga o tagata matutua o loo e aoaoina, ia e nofouta i uiga e taatele ia i latou. O le toatele o tagata matutua o loo aoaoina latou te fetufaia ia uiga nei.

E Manaomia lo Latou Lagonaina e Alofagia ma Faaalologia i Latou ma o Loo Tuuina Atu so Latou Sao i se Mea e Taua

O le manao ina ia alofagia ma faaaloogia e le o aveesea e tusa lava pe matua, ma e faapena foi i le lagona ina ia tuuina atu se sao aoga. O se malamalamaaga i nei manaoaga o le a faagauai ai oe e te faalogo atu ma faatauaina ia manatu o i latou o loo e aoaoina. Ia iloilo ma le migao ia manatu uma e tuuina mai e tagata o le vasega, ma faaali atu le loto faafetai mo o latou manatu faamaoni. Ia faaeteete ina ia aua ne'i faalumaina soo se tasi o le vasega. Aloese mai le taufaifai ma tala malie e faalumaina ai se tasi.

Latou te Mananao e Aoao e Ala i le Agaga

E aumaia e tagata matutua i le vasega se risosi taua o mea na latou oo i ai. E toatele na latou aoaoina i latou lava olaga le mana

o le moni o mataupu faavae, ma e mafai ona tuuina atu a latou molimau i le auala ua faamanuiaina ai i latou e le talalelei. Talu ai o tofotofoga ma fiafiaga ua latou oo i ai, latou te lagonaina ai se manaomia tele ona malamalama i le talalelei ma mauaina le taitaiga mai le Agaga.

Latou te Mananao e Talanoa i Auala e Faatino ai le Talalelei i o Latou Olaga

E mafai e tagata matutua ona tuuina atu ia ni o latou malamalamaaga na latou maua e ala mai i le faatinoina o o latou talitonuga ma mafaufau loloto e uiga i tusitusiga paia. E mafai ona latou aoao ma faamalosi e le tasi le isi ao latou fetufaaia mea na latou oo i ai. Ia valaaulia i latou e fetufaaia atu ni mea na latou oo i ai i le taimi o talanoaga. Fesoasoani ia i latou ia malamalama ma talanoaina pe mafai faapefea e mataupu faavae na e suesueina ona faia se eseeseega lelei i o latou olaga taitoatasi ma olaga o tagata o o latou aiga.

Latou te Mananao e Taitaiina e i Latou i Latou Lava

A mananao tagata matutua latou te tauaveina le tiutetauave mo le aoaoina o le talalelei. E tataua ona e faaao-gaina ia metotia e aoao atu ai na o le a fesoasoani ia i latou e faatinoina ai (tagai i le “Fesoasoani i Tagata Taitoatasi Ina ia Avea ma a Latou Matafaioi le Aoaoina o le Talalelei,” itulau 63–65). Ia uunaiina i latou ina ia faamaeaina ia tofiga po o mea e fai e saunia mo lesona. Ia valaaulia i latou ina ia o mai saunia i le vasega e tuuina atu ni fesili ma fetufaaia atu ni malamalamaaga ma ni mea na oo i ai.

O se tasi faiaoga o le talalelei na te valaauliaina e le aunoa ia tagata o le vasega e faaoga le lima minute muamua o le vasega e fetufaaia mai ai ni malamalamaaga po o ni musumusuga na latou maua e ala i lo latou suesueina o tusitusiga paia i le gasologa o le vaiaso. O nei mea e oo i ai e valaaulia ai le Agaga ma uunaiina ai isi tagata o le vasega ina ia aveia ma tagata aoao filiga. O faamatalaga e tuuina mai e masani ona maua ai ni faatomuaga taua ma le aoga i lesona.

E Popole i Latou i o Latou Tiutetauave Faaleaiga

E mananao tagata matutua latou te sailia ni tali i luitau o loo latou feagai i totonu o o latou aiga. Latou te naunau ina ia aoaoina pe faapefea ona faaogaina ia mataupu faavae o le talalelei i nei luitau, ma latou te fiafia i malamalamaaga o isi ma mea na latou oo i ai. O talanoaga i mataupu faapea o se vaega lelei lea e faaogaina i ai le taimi o loo e faaaluina e suesue ai le talalelei.

Sa aoaoina atu e se faiaoga o le korama a toea se lesona e faatatau i le “O le Aiga: O se Folafolaga i le Lalolagi.” Sa faitauina e se tasi o le korama se vaega o le folafolaga,

ma sa toe tau faaauau le lesona a le faiaoga. Ae sii le lima o se tasi o le korama. “E i ai la’u fesili,” o lana tala lea. I le sititia mai o se faaupuga mai le folafolaga, sa ia fesili atu ai, “E faapefea ona tatou aoaoina a tatou fanau ‘ina ia fealofani ma fetausiai?’” O lea fesili na taitaiina atu ai i se talanoaga na fetufaaia uma mai i ai uso o le korama i auala e faaoga ai le mataupu faavae.

E amata ona tatou iloaina le taua o le valaauga e aoao atu i vasega a tagata matutua pe a tatou vaai ia tagata matutua o fetufaaia mea na latou aoaoina—aemaise lava pe a latou fetufaaia ai ma o latou aiga.

I se tasi vaega a faitaulaga sili, na aoao atu ai e le faiaoga se lesona e uiga i le galuega faafaifeautalai. O se vaega o le lesona, na ia taitaia ai se talanoaga e uiga i le manaomia ona o atu o ulugalii matutua e faamisiona. O le toatele o uso sa auauna atu faamisiona ao aveia ma alii talavou ma faapea foi i le taimi mulimuli ane ma o latou taitoalua, ma o nisi o i latou na molimau mai i tiutetauave ma faamanuiaga o sea ituaiga auaunaga.

O se tasi uso o le au faitaulaga sili na toe foi atu i lona aiga ma tau atu i lona toalua e uiga i le talanoaga. Sa faamalieina i la’ua i le la sao na la faia i olaga o tagata o lo la’ua aiga. Ae o upu ma le agaga o lona lesona na amata ona galueaina i o la’ua loto. I le lua masina mulimuli ane, sa la’ua lauga atu ai i le sauniga faamanatuga ae le’i malaga ese atu i la’ua mo le 18 masina i se isi atunuu. Faatasi ai ma lagona ootia, na faaalia e le tama lona talisapaia o le faiaoga o le au faitaulaga sili ma le faatosinaga o lana faaiuga i lona lesona. Na ia faapea mai na ia iloaina o le faaiuga ina ia auauna atu faamisiona o le a aveia ma se faamanuiaga i lona olaga ma olaga o tagata o lona aiga.

Galue ma Talia Eseese o Tagata Taitoatasi

O tagata matutua e tele ina eseese i o latou malamalamaaga ma malosiaga. O nisi latou te iloa lelei ia tusitusiga paia; o nisi e vave ona tali mai; o nisi e manaomia se taimi umi e mafaufau loloto ai i se fesili; o nisi e tau le mautonu e ui lava e tele ni mea e fia tautala mai ai; o nisi e faigata ona faitau. O le mafaufau ma le faaeteete i nei eseese, e mafai ai ona e fuafuaina ia gaoioiga e aoao mai ai na o le a fesoasoani ai i tagata uma o le vasega e auai i ai.

E mafai ona sili atu ona e aoaoina lelei se vaega e ese mai ai pe afai e te iloaina uma i latou taitoatasi ma fetuutuunai lau aoaoina i o latou manaoga ma mea e fiafia i ai (tagai “Malamalama Ia i Latou e te Aoaoina,” itulau 35–36). E faapitoa lava le taua ona uunaiina le auai o tagata fou faatoa liliu mai, o tagata e le toaga, o tagata e fou atu i le uarota, ma le autalavou matutua ua faatoa tuua lava le latou korama a le Perisitua Arona po o le vasega a Tamaitai Talavou.

O

AOAO ATU I TOTONU O LE AIGA



AOAO ATU I TOTONU O LE AIGA

A'o mai ia ou ui i le malamalama;

Ma ou tatalo atu i le Tama;

Ma ia ou iloa mea tonu e fai;

Ia ou, ui i le malamalama.

O mai fanau tatou aoao nei

I poloaiga e toe foi ai

I ona luma tatou te ola ai—

Ma ui, pea i le malamalama.

Viiga, nu. 187

1

TIUTETAUAVE FAAFA- IAOGA O MATUA



Na faailoa mai e Peresitene Boyd K. Packer: “O le faamoemoega autu o mea uma tatou te aoaoina atu o le tuu faatasia lea o matua ma fanau i le faatuatua i le Alii o Iesu Keriso, ma ia latou fiafia i le aiga, faamauina i se faaiipoipoga e faavavau, faamau atu i o latou augatuaa, ma faamautinoaina le faaeaina i le afioaga o lo tatou Tama Faalelagi” (i le Conference Report, Ape. 1995, 8; po o le Liahona, Iulai 1995, 8).

O le aiga ua faauuina e le Atua. O le tonugalemu lea i Lana fuafuaga. Ua ia faavaeina ia aiga ina ia aumaia ai le fiafia i Ana fanau, ina ia fesoasoani ia i latou e aoaoina le talalelei i se siosiomaga alofa, ma ia saunia ai i latou mo le ola faavavau. O le aiga o le nofoaga sili lea ona taua e aoao atu ai, aoao mai ai, ma faaaogaina ai mataupu faavae o le talalelei.

Ua i ai i matua le tiutetauave muamua mo le aoaoina o a latou fanau i le talalelei (tagai MFF 68:25–28). Ua faailoa mai e le Au Peresitene Sili ma le Korama a le Toasefululua e faapea: “ua i ai i matua se tiute paia e tausia a latou fanau i le alofa ma le amiotonu, ia tuuina atu i ai mea e manaomia i le faaleagaga ma le faaletino, ia aoao i latou e alofa ma feauaunaa’i, ia tausia poloaiga a le Atua ma ave ma tagatanuu usiusitai i tulafono i soo se mea e nonofo ai. O tane ma ava—tina ma tama—o le a latou tali atu i le Atua mo le faataunuua o nei mea e ao ona faia” (“O le Aiga: O Se Folafolaga i le Lalolagi,” *Liahona*, Iuni 1996, 14).

O Mea e Tatau i Matua Ona Aoaoina Atu i a Latou Fanau

O mea nei e tauaofai ai le tele o mea e tatau i matua ona aoaoina atu i a latou fanau. O risosi e mafai ona e faaaogaina i le aoaoina o lau fanau e aofia ai ia tusitusiga paia, o afioga tulei a perofeta o aso e gata ai, o mekasini a le Ekalesia, ma isi mea e gaosia e le Ekalesia.

Mataupu Faavae o le Talalelei

Ua poloaia e le Alii ia matua ina ia aoaoina a latou fanau “ia malamalama i le mataupu o le salamo, ma le faatuatua ia

Keriso, le Atalii o le Atua soifua, ma le papatisoga ma le meaalofo o le Agaga Paia i le faaeina o lima, pe a valu tausaga o lona matua” (MFF 68:25). E tatau ona e aoaoina atu i lau fanau le Togiola a le Faaola, o le natura o le perisitua ma sauniga o le faoalataga, ma le matafaioi tupito o aiga ma le faaiipoipoga e faavavau i le fuafuaga paia o le fiafia.

Tatalo

Ua poloaia foi e le Alii ia matua ina ia “aoao a latou fanau ia tatalo” (MFF 68:28). E taua tele mo tamaiti le iloaina e mafai ona latou talanoa atu i le Tama Faalelagi ma saili Lana taitaiga. E mafai ona e aoaoina i latou faapea o loo saunia pea le Atua e fesoasoani mai ia i latou. E mafai ona e fesoasoani i lau fanau ina ia aoao e tatalo taitoatasi i le taeao, i le po, ma soo se taimi latou te manaoomia ai le fesoasoani pe mananao foi e faailoa atu i ai le faafetai. E mafai foi ona e aoao atu i ai le taua o le tatalo faaleaiga.

Suesueina o Tusitusiga Paia

O le a e mauaina faamanuiaga silisili pe a e suesueina taitoatasi ia tusitusiga paia ma faia suesuega o tusitusiga paia faaleaiga. O le a mafai ai ona e fesoasoani i lau fanau ia fiafia i tusitusiga paia ma iloaina le mana o le afioga a le Atua i o latou olaga (tagai “O le Mana o le Upu,” itulau 52–53). O le a mafai foi ona e fesoasoani ia i latou e suesue tusitusiga paia ina ia malamalama ai i mataupu moni ma sailia ai tali i o latou faafitauli. O le a mafai ai foi ona e fesoasoani ia i latou e aoaoina ni tomaiti i suesuega ma ni amioga e moomia ona latou faaaauuina pea i le aoaoina o le talalelei i o latou olaga atoa (tagai “Fesoasoani i Tagata Taitoatasi ia Tauaveina le Tiutetauave mo le Aoaoina o le Talalelei,” itulau 63–65).

Ola i le Talalelei

E tatau ona e aoaoina lau fanau ina ia faatinoina lo latou saolotoga i auala amiotonu—ia faaaogaina aoaoga o le talalelei i mea uma latou te faia. E pei ona aoao mai le Tupu o Peniamina, e tatau ona e aoaoina lau fanau “ina ia savavali i ala o le upumoni ma le faautauta” ma “ia fealofani, ma auauna atu le tasi i le tasi” (Mosaea 4:15).

I totonu o le aiga, e tatau ai i fanau ona aoaoina ia tautusia le Sapati ia faapaiaina, tofogi sefuluai, ma mulimuli i perofeta o aso e gata ai. E tatau ona latou aoao ia saili mo mea uma e “mama, matagofie, logoleleia, ma tauleleia” (Mataupu Faavae o le Faatuatua 1:13).

Tomai Faatino

E faaopoopo atu i le aoaoina o autu faaletalalelei, e tatau foi ona e aoaoina atu i lau fanau ia tomai faatino e pei o le auala e puleaina ai ia tupe, o le faatumauiina o le soifua maloloina, o le faifaimea faatasi ma isi, ma le tausia lelei o lavalava ma meatotino. Fesoasoani ia i latou ina ia aoao ia iloa galulue, maua se aoaoga lelei, ma ia avea ma ni tagatanuu lelei.

O le Auala e Mafai ai e Matua Ona Aoaoina a Latou Fanau

I le avea ai ma se matua, e tatau ona e taumafai e faavaeina ni faatulagaga o le ola ai i le talalelei i totonu o lou aiga (tagai “Aoaoga e ala i Faatulagaga o le Ola ai i le Talalelei,” itulau 43–44). O faatulagaga o le ola ai i le talalelei i aso uma e mafai ona faatupuina ai se siosiomaga o le faatuatua ma le ususitai i le aiga. O nisi nei o auala e tele e mafai ai ona e aoaoina lau fanau.

Faataitaiga

E mafai ona avea faataitaiga ma auupega sili ona malosi e aoao atu ai. E aoaoina e fanau amioga ma uiga e ala lea i le maitauina o au mea e fai (tagai “Ia Ola i Mea e te Aoao Atu,” itulau 18–19).

Tulaga Masani mo Aoaoga i le Aiga

O tatalo faaleaiga i aso taitasi ma le suesueina o tusitusiga paia, o afiafi faaleaiga, e oo lava i tu ma aga faaleaiga e mafai ona faaafia ai le talalelei i soo se vaega o le olaga o le fanau i aso taitasi (tagai “Tulaga Masani mo Aoaoga i le Aiga,” itulau 145–47).

Na aoao mai Elder M. Russell Ballard e faapea: “O le alofa mo lo tatou Tama Faalelagi ma Lona Alo o Iesu Keriso e matua faateleina pe a aoao atu le talalelei ma ola ai i le aiga. O mataupu moni o le talalelei e teuina i loto ma agaga o e iti ma e matutua pe a faitauina ma talanoaina tusitusiga paia, pe a faia tatalo i le taeao ma le afiafi, ma pe a faaalua le faaaloalo ma le ususitai i le Atua i amioga i aso uma” (i le Conference Report, Ape. 1996, 112; po o le *Liahona*, Iulai 1996, 96).

Taimi o Aoaoga

O nisi o ou avanoa sili e aoao atu ai o le a le fuafuaina lea. Ia nofouta mo avanoa e tulai mai i le olaga i aso uma ina ia aoao atu ai mataupu o le talalelei i fanau (tagai Taimi mo Aoaoga i le Olaga Faaleaiga,” itulau 148–49).

E Le Faapea Ua Tuai Ona Toe Amata Aoaoga e Matua a Latou Fanau

E taua tele le faavaeina o faatulagaga o le ola ai i le talalelei ao laiti le fanau. E pei ona faailoa mai e Elder L. Tom Perry, “E maeu le taua o le amataina o le aoaoina o le talalelei i le amataga pe a tatou taliaina se agaga fou ititi i totonu o lo tatou aiga” (i le Conference Report, Oke. 1988, 87; po o le *Liahona*, Ian. 1989, 77). O fanau laiti e naunau tele e fia auai i afiafi faaleaiga, suesueina o tusitusiga paia, tatalo, ma galuega auuuna atu.

Na maitauina e Peresitene Thomas S. Monson: “E i ai i latou ua latou faamutaina o latou tiutetauave, ua latou lag-onaina e mafai ona latou faataatiaese sei oo ina matua le tamaitiiti. E leai la, o loo atagia mai lava le mea e tatau ona fai. O le taimi sili e aoao atu ai ua mou atu” (i le Conference Report, Oke. 1997, 21; po o le *Liahona*, Ian. 1998, 17).

Ae ui i lea, e le'i tuai ona toe aoaoina atu le talalelei i a outou fanau—pe toe amata foi. O le faagasologa o le aoaoga o le a eseese pe afai na e faatuai ona aoaoina atu i lau fanau le talalelei. Atonu o le a i ai nisi luitau faaopoopo. Ae o le a faamanuiaina oe e le Alii mo au taumafaiga naunautai uma ina ia aoao atu mataupu moni ma faavaeina ni faiga amiotonu i totonu o lou aiga. Afai faatoa e malamalama i ou tiutetauave faamatua, ia i ai sou faamoemoe. Tatalo, faatino le faatuatua, ma faia mea uma e te mafaia ina ia e aapa atu ai i lau fanau ma faaafiaina i latou mo le lelei.

Na faamalamalama mai e Elder Robert D. Hales, “E moni lava o le a faia e matua ni mea sese i le latou tausiga faamatua, ae o le lotomaulalo, faatuatua, tatalo, ma le suesue, e mafai ai e tagata taitoatasi ona aoaoina se auala sili ona lelei ma o le faia o lea tulaga e faamanuiaina ai olaga o tagata o le aiga i le taimi nei ma aoao ai ni aga sa'o mo augatupulaga o loo mulimuli mai” (i le Conference Report, Oke. 1993, 10–11; po o le *Liahona*, Ian. 1994, 10).

O TAMA I LE AVEA AI MA FAIAOGA



Na faailoa mai e le Au Peresitene Sili ma le Korama a le Tosefululua e faapea, “I le fuafuaga paia, e tatau ona pulefaamalumu tama i o latou aiga i le alofa ma le amiotonu” (“O le Aiga: O Se Folafolaga i le Lalolagi,” *Liahona*, Ian 1996, 108). O lenei matafaioi e aofia ai le tiutetauave o le aoaoina atu o le talalelei.

Na saunoa faamemelo se tamaitai matua o le Ekalesia i lesona o le talalelei na ia mauaina mai lona tama. Na ia toe manatua:

“Na faavaeina e lo’u tama se tu faaleaiga o le aveina lea o lana fanau i vaiaso taitasi mo le tusa toe lua masina atoa lo matou ta’i valu tausaga. Ina ua oo i lo’u taimi, sa ia au-maia se tusi o talaaga fou mo a’u, ma sa ma nonofo faatasi i lalo, na o le toalua lava o i ma’ua, ma sa ma talanoa. Na ia fesili mai ia te au e uiga i o’u lagona mo Iesu, ona ma talanoaina lea ma ia ia mataupu o le talalelei na ia saunia.

“I le lua masina lea, sa ia aoao mai ai ia te au le faigofie, ma le matagofie o le talalelei. Na te tuuina mai ia te au ou te tusia se ata ao ma talatalanoa. Na faali mai ai le mua’i olaga, o lenei olaga faalelalolagi, ma laasaga ou te moomia ona uia ina ia toe foi atu ai e mau faatasi ma le Tama Faalelagi: faatuatua ia Iesu Keriso, salamo, papatisoina, mauaina o le meaalofo o le Agaga Paia, ma tumau i le faatuatua seia oo i le iuga.

“O le a ou le faagaloina lava le alofa na ou lagonaina mai lo’u tama ao ia faaluina lena taimi ma a’u. Na ia tuuina mai lana molimau i laasaga uma o le ata o le fao-lataga ma sa onosai lava o ia i a’u fesili. Ou te manatu o se mea mamana lea sa ou oo i ai aua sa ia talanoa mai i le tulaga o lo’u malamalama ma tuuina mai lana molimau

ia te au. Ou te talitonu o lena mea na ou oo i ai o se mafuaaga autu lea o le i ai o sa’u molimau i le talalelei ina ua ou papatiso.”

O nisi taimi e faaalu ai e tama ia taimi uma i le tulaga manuia faaletino o o latou aiga. O nisi tama latou te tuuina uma atu lava tiutetauave mo le aoaoina atu o le talalelei i tina. E le tatau ona i ai lea tulaga. Mo tama uma lava, na saunoa mai ai Peresitene Gordon B. Hinckley:

“O lo outou tiutetauave o se tiutetauave faavae ma e le mafai ona solaese mai ai i le tu ai e ave ma ulu o le aiga. E le o tauaveina ai e lena tiutetauave soo se itu-aiga pule malosi po o le pule ma le amioletonu. O loo tauaveina ai se tofiga faapea o tama e sauniaina mea e manaomia e o latou aiga. O na mea e manaomia e sili atu nai lo meaai, lavalava, ma mea e nonofo ai. O na mea e manaomia e aofia ai le taitaiga tonu ma le aoaoga, e ala i faaitaiga faapea foi i upu, o mataupu o le faamaoni, sa’o, auauna atu, faaaloalo mo aia a isi, ma se malamalama e faamasinoina i tatou i mea tatou te faia i lenei olaga, e le gata i le va ma isi ae faapea foi i le Atua o le lagi, o lo tatou Tama Faavavau lea” (i le Conference Report, Oke. 1993, 78–79; po o le *Liahona*, Ian. 1994, 68).

Na fautua mai e Peresitene Ezra Taft Benson ia ni “auala ma’oti se sefulu e mafai ai e tama ona tuuina atu le taitaiga faaleagaga i a latou fanau:

“1. Tuuina atu faamanuiaga faaletama i lau fanau. Papatiso ma faamau lau fanau. Faauu ou atalii i le perisitua. O ni tulaga faaleagaga faatauaaina lea i olaga o lau fanau.

“2. Ia e taitaiina lava e oe ia tatalo faaleaiga, le suesueina o tusitusiga paia i aso uma, ma afiafi faaleaiga faalevaiaso. O lou auai o oe lava ia o le a faali atu ai i a oulua fanau le taua o nei gaoioiga .

“3. I taimi uma lava e mafai ai, ia auai faatasi ma lou aiga i sauniga a le Ekalesia. O le tapuaiga faaleaiga i lalo o lau taitaiga e taua tele mo le manuia faaleagaga o lau fanau.

“4. Ia outou o e tafafao, o le tama ma le afafine ma le tama ma le atalii, ma lau fanau. Ia o ma le aiga i ni toluapiga ma ni tafaoga, o ni taaloga po o ni faafiatiaga, o polokalama a le aoga, ma isi. O le i ai o



Tama iina e matuai tele ai lava se suiga.

“5. Ia faavaeina ni tu ma ni aga a le aiga i faiga malologa po o ni tafaoga. O nei mea e manatuaina pea e le faagaloina e lau fanau.

“6. Ia faia ni faatalanoaga taitoatasi ma lau fanau. Ia tuu atu ia i latou e talanoa mai e uiga i mea latou te mananao e oo i ai. Aoa atua ia i latou ia mataupu o le talalelei. Aoa atua ia i latou tulaga taua sa’o. Ia fai atu e te alofa ia i latou. O lou taimi e faaalaina ma lau fanau e ta’u atu ai ia i latou le mea e tuu i ai e Tama lana faamuamua.

“7. Aoa lau fanau ia galulue, ma faali atu ia i latou le taua o le galue agai atu i se sini aoga. O le faavaeina o se teugatupe mo le misiona ma tupe mo aoga mo lau fanau e faali atu ai ia i latou mea o loo fuafuaina e Tama e sili ona taua.

“8. Ia uunaiina musika ma ata ma tusi lelei i totonu o o outou aiga. O aiga e i ai se agaga o le mama ma le matagofie o le a faamanuiaina ai olaga o le fanau e faavavau.

“9. Afai e talafeagai le mamao, ia auai e le aunoa ma lou toalua i le malumalu. O le a malamalama lelei ai lau fanau i le taua o le faaiipoipoga e faavavau ma feagaiga o le malumalu ma le iunite faaleaiga e faavavau.

“10. Ia iloa e lau fanau lou fiafia ma lou faamalieleina i le auauna atu i le Ekalesia. O lenei mea e mafai ona pipisi atu ia i latou, o lea la, o le a mananao ai foi i latou ina ia auauna atu i le Ekalesia ma o le a alofofa i [Lona] malo.”

Na faaiuina i le saunoa mai faapea o Peresitene Benson, “Ia manatua lou valaauga paia o se tama ia Isaraelu—o lou valaauga silisili ona taua i le taimi nei ma le faavavau—o se valaauga o le a le faamaloloina mai ai lava oe” (i le Conference Report, Oke. 1987, 62–63; po o le *Liahona*, Ian. 1988, 50–51).

I le avea ai ma se tama, e tatau ona e manatuaina pea le taua e faavavau o lau matafaioi. O le avea ma tama o se tiute-tauave paia. Na saunoa mai Elder Boyd K. Packer, “E tatau ona i ai se uiga sili, aua o igoa uma e faaaloologia ai ma faamamaluina ai ma faaviivii ai lea e mafai ona tuuina atu ia te ia, i le Atua lava ia, o ia le silisili i mea uma, ae filifili lava ina ia ta’ua o ia o le Tama” (i le Conference Report, Ape. 1972, 139; po o le *Liahona*, Ian 1973, 113).

3

O TINA I LE AVEA
AI MA FAIAOGA

Ua saunoa mai le Au Peresitene Sili ma le Korama a le Toasefululua e faapea “o le uluai matafaioi a tina o le faafailleina lea o a latou fanau” (“O le Aiga: O Se Folafolaga i le Lalolagi,” *Liahona*, Iuni, 1996, 10).

Na manatuaina ma le alofa e Peresitene Benson ia le aoaoga a lona tina:

“Ou te manatua lelei lava a o o’u ititi, sa ou sau ai mai le togavao e agai i le fale i le faatoaga i Whitney, Idaho. Na mafai lava ona ou lagona atua le pese mai a lo’u tina “Ua Ou Faia Ea Se Lelei i le Aso?” [*Viiga*, nu. 136].

“O loo mafai lava pea ona ou iloa atu o ia faalemafaufau, i le sisina mai o lona afu i lona muaulu o loo punou i le laupapa auli, ma ni pepa nusipepa i luga o le sima, ae o loo ia auliina ni ofu uumi lanu papae. Ina ua ou fesili atu ia te ia pe o a ana mea la e fai, sa ia faapea mai, “La’u tama e, o ofu talaloa nei o le malumalu. O lea o le a ma o ma lou tama i le malumalu i Logan.’

“Ona ia tago lea tuu le auli mafolafola tuai i luga o le ogaumu, toso mai se nofoa ma soso mai ia te au, ma faamatala mai ia te au se mea e uiga i galuega faalemalumalu—ma le taua o le mafai ona alu i le malumalu, ma auai i le faiga o sauniga paia iina. Sa ia faaali mai foi ona lava faanaunauga e talosia ia oo i se aso maua e lana fanau ma fanau a lana fanau, ma fanau a fanau a lana fanau le avanoa e olioli ai i nei faamanuiaga e leai sona tusa” (*Liahona*, Ape. 1986, 12).

E tusa ai ma le taua o tina i le aoaoina atu o le talalelei i a latou fanau, na saunoa ai Peresitene Benson e faapea: “Tina, o outou o faiaoga sili a o outou fanau. . . . Aoa o outou fanau i le talalelei i totonu o

lou lava fale, i tafatafa o lau lava magalafu. O le aoaoga sili lea ona taua o le a mauaina e lau fanau. O le ala lea a le Alii i le aoao atu. E le mafai e le Ekalesia ona aoao atu e pei ona e aoao atu. E le mafai e le aoga. E le mafai e nofoaga e vaai ai tamaiti. Ae e mafai e oe, ma o le a lagolagoina oe e le Alii. O le a manatuaina e faavavau e lau fanau au aoaoga, ma afai o le a latou matutua, o le a latou le o ese mai lava ma outou. O le a latou faa-amuia ia te oe—o lo latou tina agelu” (*I Tina o Siona* [tamaitusi, 1987], 10–11).

I le avea ai ma se tina, e tele auala e te aoao atu ai. O nisi taimi e te fuafuaina ai ni avanoa e te aoao atu ai, ae o le tele o avanoa e aoao atu ai e te’i lava ua tupu i le gasologa o le olaga faaleaiga (tagai “Taimi mo Aoaoga i le Olaga Faaleaiga,” itulau 148–49). O nisi taimi e te aoao atu ai e ala i faaitaiga, o nisi taimi o le upu. O nisi taimi e te aoao atu ai e ala i le faatulagaina o faatulagaga o le ola ai i le talalelei i totonu o le aiga ma o nisi taimi e na o le faaaluina o le taimi e gauai atu ai ma faaali atu le alofa. Na tuuina mai e Peresitene Benson ni fautuaga se 10 lea e mafai ona fesoasoani ai ia te oe i lou aoaoina o lau fanau. O nei fautuaga uma o loo faamamafaina atu ai le faaaluina o se taimi:

“Ia faaalu se taimi e te i ai pea i le fetaulaiga o ala pe afai e o mai pe o ese atu foi lau fanau . . . e tusa pe na o le ono tausaga pe sefuluono tausaga o lau fanau

“ . . . Faaalu se taimi e avea ai oe ma se uo moni i lau fanau. . . .

“ . . . Faaalu se taimi e faitau atu ai i lau fanau. . . .

“ . . . Faaalu se taimi e tatalo ai ma lau fanau. . . .

“ . . . Faaalu se taimi e fai ai se afiafi faaleaiga lelei. . . . Ia avea lea mea o se tasi o tu ma aga silisili a lo outou aiga. . . .

“ . . . Faaalu se taimi tou te faatasitasi ai i taimi o meaai i le mea e gata mai ai. . . .

“ . . . Faaalu se taimi i aso taitasi e faitau faatasi ai tusitusiga paia o se aiga. . . .

“ . . . Faaalu se taimi e fai faatasi ai ni mea o se aiga. . . .

“ . . . Faaalu se taimi e aoao ai lau fanau. Ia faaoga lelei taimi o aoaoga. . . .



“ . . . Faaalu se taimi e alofa moni ai i lau fanau. O le alofa le faatuaioa o se tina e taulalata atu i le alofa faaKeriso” (*I Tina o Siona*, 8–12).

O tiutetauave o le aveva ma se tina e mafai ona foliga mai e mamafatu. E taua tele ona manatuaina e le o faamoemoe le Alii i tina ina ia atoatoa pe ausia ni faatula-gaga e le moni o le tausiaiga. Ae peitai, ua la faamoemoeina i latou ina ia latou iloaina le mamalu ma le paia o la latou matafaioi ma ia faia ma le lotomauualalo i le mea sili.

Na saunoa atu Elder Jeffrey R. Holland i tina o loo i le Ekalesia: “O outou o se faataitaiga aoao o Eva, le tina o tagata ola uma. . . . O outou o se faataitaiga aoao o Sara ma Repeka ma Rasela, ana le seanoa i latou semanu e leai ni folafolaga faapeteriaka matagofie na tuuina atu ia Aperamo, Isaako, ma Iakopo lea ua faamanuiaina ai i tatou uma. O outou o se faataitaiga aoao o Loi ma Eunike ma tina o le autau talavou e 2,000. O outou o se faataitaiga aoao o Maria, lea na filifilia ma muai faauuina talu mai le amataga o lenei lalolagi na te mauaina, ma tauaveina, fanauina le Alo o le Atua lava Ia. Matou te faafetai atu ia te

outou uma, e aofia ai o matou lava tina, ma tau atu ia te outou e leai se isi mea i le lalolagi e sili atu lona taua nai lo le auai tonu i le galuega mamalu a le Atua, i le aumaia lea o le tino ma le ola i Ona afafine ma atalii, ina ia mafai ai ona oo mai le tino ola pea ma le ola faavavau i na mamalu faaselesitila i luga” (i le Conference Report, Ape. 1997, 48; po o le *Liahona*, Iulai 1997, 42).

Na saunoa Pereistene Gordon B. Hinckley e uiga i le faamanuiaga silisili o le aveva ma tina:

“Ia iloa e tina taitoatasi e leai se isi faamanuiaga ua ia te ia e sili atu i fanau ua o mai ia te ia o ni meaalofa mai le Alii e ona le malosi uma; ua leai se isi misiona ua ia te ia e sili atu le taua nai lo le a’oa’oina o i latou i le malamalama ma le upu moni, ma le loto malamalama ma le alofa. . . .

“Ou te faamanatu atu i tina o i soo se mea, le pa’ia o lo outou valaauga. E leai se isi lava e mafai ona ia tauaveina lelei lou tulaga. E leai se matafaioi ua sili atu, leai se tiute ua taua atu, nai lo lou tausia i le alofa ma le filemu ma le faamaoni o i latou o e ua e aumaia i le lalolagi” (i le Conference Report, Oke. 1993, 79; po o le *Liahona*, Ian. 1994, 68–69).

O MATUA O SE PAAGA I LE A'OA'O ATU



I le “O le Aiga: O Se Folafolaga i le Lalolagi,” na faamalamalama mai ai e le Au Peresitene Sili ma le Korama a le Toasefululua faapea e ao i tina ma tama “ona fesoasoani le tasi i le isi o se paaga tutusa” (*Liahona*, Iun. 1996, 10). O lenei paaga e faapitoa lona talafeagai i le tiute-tauave paia o matua i le aoaoina lea o a latou fanau.

I se lauga i le konafesi aoao, na faitau atu ai e Peresitene Boyd K. Packer le Mataupu Faavae ma Feagaiga 27:15, 17: “O le mea lea, ina siitia ia outou loto ma olioli, ma fusi a’e o outou sulugatiti, ma ia ofu outou i ofu tau, ina ia outou mafai ona tetea atu i aso leaga, . . . o le tago i le talipupuni o le faatuatua o le a mafai ai ona outou tineia u fanafana mu uma lava a e amioleaga.” Ina ua uma ona faitau atu lenei fuaiupu, ona faamatalaina lea e Peresitene Packer le taua o le galulue faatasi o tina ma tama ina ia fesoasoani i a latou fanau ia fetagofi i le “talipupuni o le faatuatua”:

“O lena talipupuni o le faatuatua e le gaosia pe atinaeina i se falefaigaluega . . .

“. . . O le fuafuaga a lo tatou Tama, e pei lava le faalauteleina o le olaga lava ia, o le talipupuni o le faatuatua ia fausiaina ma ia i ai i totonu o le aiga. E le mafai ona tutusa uma ni tagata se toalua. O talipupuni taitasi o le faatuatua e tatau ona fausiaina e tusa ai ma faasinomaga o tagata taitoatasi.

“O le ata na fuafuaina e le Tama na faatatau o le alii ma le tamaitai, tane ma le ava, e galulue faatasi, ma ia fausia le talipupuni o le faatuatua ia mausali mo tamaiti taitoatasi ina ia le mafai ona faaleagaina pe puleaina e le agasala.

“E manaomia ai le malosia mausali o se tama e faamalosia ai le faatuatua ma lima

mu’amu’a o se tina e faamausaliina ai le talipupuni o le faatuatua i le la fanau. E faigata, ae e mafai lava ona fai.

“I totonu o le Ekalesia e mafai ona tatou aoao atu e uiga i ni vaega e mafai ai ona fausia se talipupuni o le faatuatua: faaaloalo, lototoa, legavia, salamo, faamagalo atu, ma le alofa. E mafai ona tatou aoaoina mai le lotu le ala e faapotopoto ma faapipii faatasi ai. Ae o le faiga sa’o lava ma le puipuia o le talipupuni o le faatuatua o le matafaioi lena a le aiga. A leai, atonu o le a vaivai le faatuatua ma pa’u ese ai i se tulaga matautia (i le Conference Report, Ape. 1995, 8; po o le *Liahona*, Iulai 1995, 9).

O fautuaga nei e mafai ona fesoasoani i matua ina ia atinaeina ai se paaga faafia-iaoga sili ona lelei.

Faaluina se Taimi e Fuafua Faatasi Ai

I le avea ai ma matua, e tatau ona oulua faamatuuese ni taimi patino e talanoaina ai manaoga o le lua fanau ma fuafuaina pe faapefea ona faafetaiaia na manaoga. O se tasi ulugalii pisi lava sa la’ua iloaia o le faia o ni talanoaga faalevaiaso e fuafua faatasi ai na avea lea ma se tasi o mea sili ona taua na la faia i le avea ai ma matua. Na la’ua faapea mai:

“E ui lava e toetoe atoa le tausaga o tau faamasani ina ia avea ia ma fuafuaga faalevaiaso ma se amioga, ae ua ma maofa nei pe na mafai faapefea ona ma faataunuaina e aunoa ma lena fuafuaga. Ua fesoasoani ia i ma’ua ina ia ma fiafia le tasi i le mea o loo faia e le isi. Ua fesoasoani ia i ma’ua ia ma iloaia le taua o le tasi i le isi faapea i le ma fanau. Ua maua ai e ma’ua le taimi e ma te vaai ai ia i ma’ua lava faapea le ma fanau ma mafaufauina ai se faiga ina ia faafetaiaia ai o matou faafitauli. Na ma fuafuaina foi a ma’ua tafaoga, o taimi faapitoa ma tamaiti, o auililiga o afiafi faaleaiga, o gaoioga i Aso Sa. E masani lava ona alu ai le 30 minute, e fai si uumi atu i nisi taimi pe afai o ni gaoioga tetele po o ni faafitauli e le masani ai e moomia ai le talanoaina.”

Ao oulua fuafuaina ia ni auala e aoao atu ai i le lua fanau, ia mafaufau ma le agaga tatalo i fesili nei:

- O le a se mea e tatau ona tupu i olaga o le ma fanau e avea ma se taunuuga o le ma aoaoga?



- O a mataupu faavae patino e tatau ona ma aoaoina atu ina ia ausia ai lenei mea?
- E tatau faapefea ona ma aoaoina atu nei mataupu faavae?

O fautuaga mo le faaaogaina o nei lesonea o loo maua i le “Sauniaina o Lesonea,” itulau “00” [98–99], ma le “Gaosia o Lesonea mai Lauga o Konafesi ma Isi Risosi,” itulau “00” [100–101].

O le Taua o le Lotogatasi i le Aoaoina o Fanau

Pe afai e faaalaina e tama ma tina se taimi e fefautuagai ai, o le a sili atu ona lotogatasi i la’ua i le aoaoina atu o le la fanau, e oo lava i taimi e aoao atu ai e le’i fuafuaina lea e tupu i le gasologa o le olaga faaleaiga. O sea lotogatasi e taua tele aua e laitiiti lava ni nai mea e fenumiai ai fanau nai lo savali feteenai mai ni tagata se toalua latou te alolofa ma faaaloalo tele i ai.

Na fetufaai mai e se tasi ulugalii le tala lenei e uiga i se mea na la oo i ai i se tasi o la atalii:

Sa galue malosi le alii o Mika e ono tausaga le matua i le tele o le tau-mafanafana atoa i le faia o galuega faapoopo i le fale faapea o latou tuaoi ina ia mafai ai ona ia mauaina se tupe e faaalaina pe a alu le tafaoga a lo latou aiga. O se faigamalaga e umi, ma sa fai atu i ai lona tina afai e manao e faatau ni ana mea po o ni mea e faamanatu ai le tafaoga i luga o le ala, e faatau lava e ia i ana tupe. E ui lava sa ia lapataiina o ia e toetoe lava o aso uma ina ia tuu lana tupe i se nofoaga saogalemua, ae sa fiafia lava ia Mika i le i ai o le tupe i lana taga. Na te feaveaia solo lava i taimi uma. O nisi taimi i se aso e na te toina ifo ai i fafo ma faitau pe faaali atu foi i ana uo.

I le aso ao lumanai le faigamalaga, na iloa ai e Mika ua pa’u ese lana tupe mai lana taga. Sa tagi o ia ma lona loto nutimomoia, ma ia alu atu i lona tina. Sa alofa foi o ia i ai, ma sa ia fesoasoani ia Mika e sue solo i soo se mea na la mafai ona

mafaufau i ai, ae sa leai se tupe na maua. “Ou te faamalie atu, ua leiloa lau tupe,” o le tala lea a lona tina. Sa ia taofia lona ta’u atu i ai lona lapataiina o ia i le tele o taimi, ae taofiofi mai foi o ia mai le faaosoosoga ina ia faia mea lelei uma mo lana tama. Ina ua uma, sa ia manatu, o le taalo i le tupe i aso uma e ui lava i ana lapataiga, o lana lava lea filifiliga.

Sa nofonofo le alii faanoanoa o Mika i luga o faasitepu i luma ina ua sau lona tama i le fale. Ina ua uma ona ia faalogo i le tala, sa aapa ane loa ia le tama o Mika i lana taga, ma to ifo i fafo le aofaiga tonu lava o le tupe a Mika ua leiloa, ma tuu atu ia te ia. Ina ua vaaia e le tama ia foliga ofo o lona toalua, sa ia faapea atu, “Ua na o sina tupe laitiiti lava. O le a le afaina?”

Ao tatou mafaufau i lenei tala, atonu tatou te fesili ifo po o ai o matua na sa’o. Ae atonu e le o le fesili lena e sili atu. Atonu e sili atu ona lelei pe a fesiligia pe faapefea ona mafai ona sili atu ona lotogatasi ia matua o Mika i le auala la te taulimaina ai lea tulaga. Atonu sa tatau ona talanoa faatasi, ma fuafuaina ia manaoga o Mika.

Atonu sa tatau ona la fesili ifo ia i la’ua lava, “O le a se mea ma te mananao e tupu i le olaga o Mika ona o se taunuuga o lenei tulaga? Pe manaomia lona aoaoina o se tiutetauave sili? Pe na te manaomia le lagonaina o le alofa ma le malamalama mai ona matua? Pe na te manaomia ona aoao ina ia aua ne’i faalialiavale i luma o ana uo? Pe na te manaomia ona aoaoina le taua o le mulimuli i tulafono faaleaiga?” O lenei mea semanu e fesoasoani ia i la’ua i le fuafuaina po o le a le mea e aoao atu i le la tama ma le auala e aoao atu ai.

Ana fai e faaalu e matua o Mika se taimi e aufaatasi ai i le taulimaina o lenei tulaga, semanu la te maua se auala lelei pe suia le tupe a Mika ua leiloa pe le toe suia foi. Nai lo lena, ua la’ua tali atu i ni auala na aoaoina ai ni lesonea feteena’i.

Ao oulua galulue faatasi o ni matua, e mafai ona tasi oulua i le aoaoina atu o le talalelei a Iesu Keriso i le lua fanau.

AOAOGA E ALA I LE FAATULAGAGA O LE OLA AI I LE TALALELEI



O se tasi o auala na aoaoina ai i tatou e le Alii e ala lea i le taitaiina o i tatou ina ia faatuina ni faatulagaga faamaoni, o tapuaiga e ola ai. Na Ia poloaaina i tatou ina ia tatalo ma faitauina ia tusitusiga paia i aso uma, e tagata taitoatasi faapea ma aiga. Na Ia poloaaina foi i tatou ina ia auai i lotu ma taumamafa i le faamanatuga i vaiaso taitasi, ia auai soo i le malumalu, ma ia anapogogi ma totogi taulaga anapogi i masina taitasi. O nei faatulagaga o le olaga e faaali mai ai ia i tatou le auala e tatau ona tatou savavali ai i le avefa ai ma Ona soo.

E aoaoina fanau ina ia ola e pei o ni soo o le Faaola pe a latou auai faatasi ma o latou aiga, ma i o latou uluai tausaga ma agai i luma, i le faia pea o faatulagaga o tapuaiga, auaunaga, suesuega, ma galuega ua Ia faauuina. Afai e le ola ai le aiga i nei faatulagaga, o le a faatapulaaaina foi le aoga o le aoaoina atu lelei o le talalelei e matua, o le a faatapulaaaina foi. Afai o le ituaiga olaga o loo ola ai matua e le ogatasi ma upu o loo tautatala ai, o le a matele atu foi le fanau e mulimuli i mea o loo faia e o latou matua e sili atu nai lo mea o loo tautatala ai. Ae afai e tautatala soo ia matua e uiga i le Faaola ma faatuina ia Ona ala e avefa ma faatulagaga a lo latou aiga, o le a laua aoaoina la la'ua fanau "i le a'oaiga ma le apoapoaiga a le Atua," e pei ona fai mai ai Enosa sa aoaoina ai o ia e lona tama (Enosa 1:1).

Na faailoa mai e Peresitene Polika Iaga: "I soo se malo, nuu, ma le aiga, e iai lava tu ma aga uiga ese, ma e aoaoina ai le tamaititi. Afai o le tulafono a Keriso e avefa ma tu ma aga a nei tagata, o le a tutupu ae ma ola ia fanau e tusa ai ma le tulafono o le malo selesitila . . . Ona tausia ai lea o fanau, i uputu a o latou tama, ia faia le mea sa'o,

ma ia aloese mai mea leaga uma lava" (i le *Journal of Discourses*, 3:327).

E tausia a "tatou fanau e tusa ai ma tulafono o le malo selesitila" pe a tatou faatuina ia faatulagaga o le ola ai i le talalelei i o tatou aiga.

O Mea Patino e Mafai Ona Tatou Faia Ina ia Faatuina ai ni Faatulagaga o le Avefa ma Soo

Ua i ai sa tatou matafaioi o le filifili lea ma le lotofuatiaifo ma faamallosia ia faatulagaga o le ola ai i le talalelei. Mo se faataitaiga, e mafai ona tatou filifilia ia ata, musika, ma tala na o le a fesoasoani ai i a tatou fanau e atinaeina se mea e faamoe-moe i ai e siitia ai ma faamalalamalaina ai. E mafai ona tatou auauna atu faatasi i le Ekalesia ma le nuu. E mafai ona tatou filifilia lavalava talafeagai lelei mo i tatou lava ma fesoasoani i a tatou fanau ina ia latou faia foi faapea. E mafai ona tatou suesueina faatasi ia tusitusiga paia ma faia ia afiafi faaleaiga. E mafai ona tatou lagolagoina se uiga faaaloalo e faatatau i le Sapati lea o le a aafia ai lagona o le fanau e uiga i le tausiaina o se aso e paia.

O se tasi o auala sili ona malosia e faatuina ai ni faatulagaga o le ola ai i le talalelei o se faavaeina lea ma faatumauina ni tu faaleaiga. E lagonaina e fanau le saogalemua i le iloaina lea e tusa lava po o le a le mea e tupu i o latou olaga, e i ai lava ni mea e tupu i o latou aiga o le a tumau pea e le suia. Na fautua mai ia Peresitene Ezra Taft Benson: "Ia faamallosia tu faaleaiga na e fusia faatasi ai outou e faavavau. O le faia o lona mea, e mafai ai ona tatou fausiaina iinei i le lalolagi se vaaigna itiiti o le lagi i totonu o aiga taitasi. Aua o le faavavau ua na

o se faaauauga lea o le olaga faaleaiga amiotonu” (i le Conference Report, Oke. 1989, 4; po o le *Liahona*, Ian. 1990, 5).

O le tele o tu faaleaiga e mafai ona faaautu i le talalelei. Mo se faataitaiga, i nisi o aiga, e mauaina e fanau se kopi fou o le Tusi a Mamona i lo latou aso fanau lona valu. O nisi aiga e faamanatuina le Kerisimasi e ala lea i le faatinoina o ni mea na tutupu i le taimi na soifua mai ai le Faaola. O nisi aiga, e tuuina atu e le tama se faamanuiaga faaleperisitua i le fanau taitoatasi i le amataga o se tausaga fou faaleaoaoga. O nisi aiga e faia ni a latou faatasiga faaletausaga pe feiloai faatasi foi i aso malolo ma le faamanuiaina o pepe. O nei tu mananaia ma le faapelepele e faamalositia ai aiga ma tagata taitoatasi ao latou olioli ai i le faia o soo se mea e masani ai ma e masani ona paia. O tu faaleaiga e mafai ona faamanatu ai i tagata o le aiga o latou ala o le olaga i le aveia ai ma soo o Keriso, ma e masani ona maua ai ni avanoa mo le aoaoina i mataupu o le talalelei.

Suia o ni Faatulagaga ua Le Manaomia i Totonu o o Tatou Aiga

E mafai ona tatou suia ia ni faatulagaga ua le manaomia i totonu o o tatou aiga. Afai tatou te o mai mai se aiga e le toaaga, e mafai ona tatou suia lona faatulagaga i o tatou lava olaga ma taumafai ina ia auai pea i sauniga ma faatasiga a le Ekalesia. Afai sa tatou faitioina ia taitai pe sa tatou faalogo foi i ai i o tatou matua, e mafai ona tatou fili-fili mai le taimi nei ina ia lagolagoina o tatou taitai e ala i la tatou gagana ma mea tatou te faia. O ia ituaiga suiga i le auala tatou te ola ai o le a tuuina atu ai i a tatou fanau se faatulagaga lelei e mulimuli ai.

Na fetuفاai mai e se tagata o le Ekalesia le tala lenei:

“O la’u tane, o Roger, na ola a’e i totonu o se aiga e leai ni faatulagaga o le ola ai i le talalelei. O lona tama sa fai ma ona mausa le ava malosia, ma sa mafatia ai le aiga mai lenei mea. Sa taumafai lona tina ina ia malosia i le Ekalesia, ae e manao lava lona tama ina ia faia e le aiga nisi mea i le Aso Sa. Sa matuai malosia lava ia Roger ao laitiiti i le faatasi ai ma ana uo, ma ina ua ia mauaina lana lava molimau, sa amata loa ona ia teuina se tamai api i mea na te manaomia

pe afai e fai sona lava aiga. E tusa ua 17 ona tausaga i le taimi lea. E tasi se vaega o le api o loo i ai mea e manao e fai i lana fanau, o le isi vaega o loo i ai mea e manao e fai i sona toalua, ma le ituaiga aiga e manao i ai, ma le isi e mo le ituaiga galuega e manao e sauniuni atu i ai. O nisi o mea na ia tusia sa ia aoaoina mai lea i tulaga leaga o le aiga sa ia ola a’e ai; na aoaoina ai o ia i le ituaiga aiga e le manao e oo i ai sona lava aiga. E tete lava lona tama i lona malosia i le Ekalesia o lea na manaomia ai loa lona alu ese, ma sa latou nonofo ai loa ma se aiga lolotu, lea sa ia moomoo lava i ai, e ui lava e le o latou o ni tagata o le Ekalesia. Na ia maua mai ia i latou isi manatu e uiga i lona aiga i le lumanai. O lea e ui lava i lona talavou, ae na ia manao e aveia o ia ma suiga i lana augatupulaga mai se olaga vevesi i le taimi ua tuana i se lumanai sili ona faamanuiaina.

“Ina ua fai le ma faamau, sa ia faaali mai ia te au le tamai api, ma o le a ma talanoaina ia manatu ma atinaeina seia oo ina ma fetuفاai ia nei mea ma te mananao i ai mo lo ma aiga. Ou te manatuina le mea muamua lava na ma galulue i ai o le tatalo lea. Na ma aoaoina le ma fanau ina ia tatalo mai le taimi ao laiti, ina ia matuai aveia ma se amioga ua totoina ina ia latou le manatu ai e le amanaiaina. Na ma fuafuaina o le sefuluai o le a le fesiligia lava. Na faia a ma afiafi faaleaiga ma le faamaoni. Ma sa ma faatuina se tu o le suesueina o tusitusiga paia i taeao uma. O le taimi muamua na faigata ai lava ona tau faitau ni nai fuaiupu patino i taimi taitasi, ona ma iloina lea o talanoaga na matou faia ona na mafua mai i ni fesili na tuuina mai e le fanau sa sili atu ona taua nai lo le tautu lava i se faasologa. I nai tausaga mulimuli ane sa matou faaopoopo atu i ai se viiga pe a maea le tatalo amata, faatasi ai ma fuaiupu uma lava. O le faiga lea sa fafaguina ai i matou uma ma aumaia ai se agaga lelei. O nisi nei o tu faaleaiga sa atinaeina ai lo matou aiga.

“Ou te maofa lava i le fuafua o lo’u toalua e faatutuina ni tu amiotonu i lona lava aiga ao laitiiti o ia ae sa ia te ia se faataitaiga vaivai sa mulimuli ai. Ou te maofa foi au ma ou faafetai ona sa naunau lava o ia ma te galulue faatasi ina ia aoaoina atu i lo ma aiga, aemaise ai lava ona sa faia ma le faamaoni.”

TULAGA MASANI MO AOAOGA I LE AIGA



I le avea ai ma matua, e tatau ona oulua saili ina ia faavaeina ni mea e fai soo mo le aoaoina atu o le talalelei i le aiga. Afai e te lua faia lenei mea, o le a maua pea e le lua fanau ia aoaoga o le talalelei lea e faatatau i o latou olaga ma avea ai ma se faavae mo i latou. E mafai ona latou maitauina mai mea e te lua faia, o le talitonu i le talalelei o lona uiga o le taitaiina lea e le talalelei i soo se vaega o le olaga.

O manatu nei e mafai ona fesoasoani ia te oulua e faavaeina ni mea e tutupu soo mo le aoaoina atu o le talalelei i le lua fanau.

Tatalo Faaleaiga

Na poloai mai le Faaola, “Ia tatalo i o outou aiga i le Tama i lo’u igoa, ina ia manuia a outou ava, ma a outou fanau” (3 Nifae 18:21).

O tatalo faaleaiga o ni faatasiga lelei ia e faaali atu ai i le fanau le auala e tatalo ai. Ao maitauina e lau fanau lou talanoa faamaoni atu i lou Tama Faalelagi, o le a latou vaaia ai lou faatuatua ma ou faanaunauga amiotonu. O le a latou aoao ai e “filifili ma le Atua i mea uma [latou] te faia” ina ia “faatonuina i [latou] e Ia i mea lelei uma” (Alema 37:37).

Afai e te tatalo, e tatau ona e faaaogaina upu *Afio*, *Afioga* e suitulaga i le *oe*, ma le *lau*. O lenei faataitaiga o le a fesoasoani ai foi i lau fanau e aoaoina le gagana o le tatalo, lea e faaalua ai le alofa ma le faaaloalo mo le Tama Faalelagi.

E mafai e fanau ona aoaoina mea e tele o le talalelei pe afai latou te faalogo i isi tagata o le aiga o tatalo. Latou te aoaoina ai le manaomia ona salamo pe a latou faalogo i isi o loo ole atu mo le faamagaloga. Latou te aoaoina le loto faafetai pe afai latou te

faalogo atu i isi o faafetai atu i le Tama Faalelagi mo o latou faamanuiaga. Latou te aoaoina ai le faatuatua, lotomaulalo, ma le usiusitai pe afai latou te vaaia o latou matua o loo saili atu pea le taitaiga. Latou te aoao ona ava ma faamamalu i taitai o le Ekalesia ao tatalo ia tagata o le aiga mo i latou i aso taitasi. E mafai ona latou maua se faanaunauga ina ia auauna atu i se misiona ma mauaina faamanuiaga o le malumalu a’o ole atu matua i le Tama Faalelagi ina ia fesoasoani i a latou fanau ia faia ni filifiliga e faatumauiina pea lo latou agavaa ina ia mauaina nei faamanuiaga.

E aoaoina e fanau e tatau ona i ai le alofa ma le popole mo isi pe a latou faalogo i tagata o le aiga o loo tatalo mo isi tagata. Ma e mauaina e tamaiti se lagona tele o le alofa pe afai latou te faalogo atu i isi tagata o le aiga o loo tatalo mo i latou.

E tatau ona tuuina atu i tagata uma taitoatasi o le aiga le avanoa e taitai ai le aiga i le tatalo. O fanau laiti e mafai ona auauai e fesoasoani atu i ai.

Suesueina o Tusitusiga Paia e le Aiga

O le suesueina o tusitusiga paia i aso taitasi o se tasi lea auala malosi e aoao atu ai i fanau le talalelei. Soo se taimi e mafai ai, e tatau i aiga ona faitau faatasi i se taimi faatulagaina i aso taitasi. O nisi, e faigofie lenei mea pe afai e faia i le taeao po. O isi, o le suesueina o tusitusiga paia e le aiga e sili atu ona lelei pe afai e faia ae le’i momoe. E ui lava o nisi taimi e faigata ai ona faaauai tagata o le aiga, ae o au taumafaiga faifai pea ina ia suesueina le afioga a le Atua o le a faamanuiaina ai olaga o lau fanau. O le a iloa ai e lau fanau le moni o le aoaoga a Nifae: “Ia outou fiafia i afioga a Keriso; aua faauta, e faaalua mai ia te outou i le afioga a Keriso mea uma tou te faia” (2 Nifae 32:3).

A faitauina e fanau ia tusitusiga paia faatasi ma o latou aiga, o le a latou fiafia ai i upu moni paia o le talalelei. O le a masani i latou i le gagana a tusitusiga paia. Latou te aoaoina ai ia tala mai tusitusiga paia ma iloa ai pe faapefea ona faaaogaina nei upu paia i o latou olaga i aso uma. E mafai foi ona latou aoao e faaaoga ia faafanua, o le Taiala i Tusitusiga Paia, ma isi fesoasoani o loo i totonu o tusitusiga paia (tagai itulau 56–61).



Talu ai ona o le aiga o le nofoaga sili lea ona taua mo le aoaoina o le talalelei, ua talafeagai foi mo tagata o le aiga ona fetuفاai ma talatalanoa ai i upu moni latou te aoaoina i sauniga a le Ekalesia, o vasega, faapea ia gaoioiga. E faatagaina ai outou matua ina ia malamalama i mea o loo aoaoina e a outou fanau i le talalelei, ma faatinoaina ai a outou matafaioi tonu i le avea ai ma i latou e sili ona gafa ma le aoaoina o a outou fanau.

O le tele o faatasiga faifaipea mo le aoao atu ai i totonu o le aiga e saunia ai avanoa lelei e fesili atu ai i fanau e uiga i mea na latou aoaoina i le lotu. E tatau ona e tuuina atu ia fesili e uunaiina ai le fanau e toe manatunatu i ni mea se tele latou te manatua, e aofia ai ia tala ma ni faamatalaga auiliili. Ia e faia mea uma e te mafaia ina ia uunaia ai tagata uma o le aiga e talanoaina mea na latou fetuفاai (tagai i le “Taitaia o Talanoaga,” itulau 66–68).

E mafai ona e filifili e faitau i se taimi atofaina i aso taitasi. O tagata uma o le aiga e mafai ona faitautusi, e tatau ona tuuina atu i ai se avanoa e faitau ai mai tusitusiga paia. E mafai ona latou feauauai i le faitauina o se fuaiupu se tasi po ni fuaiupu se tele. O tamaiti e le mafai ona faitau e mafai lava ona auai e ala lea i le toe ta’uina o fuaiupu ao faitauina e isi. Afai e mafai, e mafai e tamaiti laiti ona vaavaai i ata o tusitusiga paia a le Ekalesia po o ata mai le Taga Ata o le Talalelei.

Ina ia fesoasoani i tagata o le aiga ia malamalama i tusitusiga paia, e mafai ona e toe faaupuina atu ia ni fuaiupu faigata i ni faaupuga faigofie po o le vaai o ni upu e le masani ai i le Taiala i Tusitusiga Paia. E mafai ona e talosaga atu i tagata o le aiga e tauaofai ia manatu autu o le tusi sa faitauina i le aso. E mafai e se tamaitiiti laitiiti ona uuina i luga se ata o le tala o loo faitauina.

E mafai ona e fesili atu i se tamaitiiti e mafaufau i se tulaga i lona olaga e tutusa lelei lava ma le tala o loo i tusitusiga paia o loo faitauina. Mo se faataitaiga, e mafai ona e faapea atu, “sa tatou faitau e uiga ia Tavita ma Koliata. O a Koliata o loo feagai ma oe i lou olaga? O le a se mea e mafai ona e aoaoina mai ia Tavita o le a fesoasoani ai ia te oe e faafetaia nei luitau?” E mafai foi ona e faapea atu, “Ou te maitauina sa e fesoasoani i lou uso laitiiti e faamama lona potu. Na e iloaina sa e faaali atu le ituaiga alofa lava lea e tasi na fetalai i ai Iesu i le tala lenei?”

Afai e te faalē-masani i tusitusiga paia pe i ai foi ni faafaigata i le faitauina, atonu e te lagonaina le le lelei o le faalogona po o le atoatoa foi pe a outou faitau faatasi ma lau fanau. E leai se afaina pe afai e te faailoaina atu i lau fanau o loo outou aoao uma lava ia iloa ona faitau ia tusitusiga paia. Afai e te tolopoaina ia suesuega faaleaiga seia e maua se faalogona lelei, ua e aveeseina mai le fanau le tausiga faaleagaga lea e matuai manaomia lava. Ia manatua e mafai e le Agaga ona faaaafiaina oe e tusa lava po o le a lou malamalama.

Afiafi Faaleaiga

O afiafi faaleaiga e saunia ai avanoa silisili mo oe e fesoasoani ai i lau fanau ina ia malamalama ma faaogaina ia mataupu o

le talalelei. O se afiafi faaleaiga e mafai ona aofia ai le tatalo faaleaiga, aoaoina o le talalelei, viiga ma pese a le Peraimeri, ma gaoioiga faaleaiga.

I le fuafuaina o afiafi faaleaiga, ia manatunatu i manaoga o loo i ai nei, atugaluga, ma mea e fiafia i ai tagata o le aiga. Mo se faataitaiga, pe manaomia ona saunia se tamaitiiti mo le papatisoga po o le faauuina i se tofi i le perisitua? Pe sa i ai se fefinuaaiga i le aiga? Ao e iloiloaina ma le agaga tatalo ia manaoga ma luitau o tagata o le aiga, o le a sili atu ona mafai ona e fuafuaina po o a mataupu o le talalelei e tatau ona e aoaoina atu.

O mataupu faavae o le lelei o le aoao atu o loo tuuina atu i totonu o lenei tusi e mafai ona fesoasoani i tagata o le aiga e fuafuaina ma tuuina atu i afiafi faaleaiga. I le faaopoopo atu i ai, ua saunia e le Ekalesia ia le *Tusi Lesona o Afiafi Faaleaiga*, lea o loo aofia ai lesona ma manatu mo le faia o ni afiafi faaleaiga faamanuiaina. O mekasini a le Ekalesia o isi ia risosi e fesoasoani tele foi.

O nisi taimi e iloa ai e aiga le faigata ona avea le afiafi faaleaiga o se vaega faifai pea o o latou olaga. O nisi taimi e le lagolago mai ai le fanau, pe manatu foi matua ua la pisi tele. Ae peitai, o taumafaiga ina ia fuafuaina ma faataunuaina ia afiafi faaleaiga o le a faamanuiaina uma ai tagata o le aiga. O se tasi alii na manatuaina e na o le faalua ona fai ia afiafi faaleaiga a lo latou aiga ao ia tuputupu ae. Ae peitai, o na mea uma na mafai ona oo ai se lagona ia te ia ina ua faaipoipo, na ia manatuaina pea mataupu o le talalelei sa ia aoaoina. O lea na faia ai e ia ma lona toalu ina ia faavaeina ni afiafi faaleaiga faalevaiaso i lona lava aiga.

Taimi o Taumafataga a le Aiga

O taimi o taumafataga a le aiga e maua ai foi nisi avanoa mo oe e aoao atu ai lesona taua faapea foi mo tagata o le aiga e auai ai i talanoaga. I le tele o taimi e pisi ai, o le taimi o taumafataga e masani lava e na o le pau ia o taimi e mafai ona e faapotopoto mai ai lau fanau e fetuفاai i mea e tutupu i aso taitasi ma talanoaina faatasi ai ni manatu. E mafai ona e faaogaina nei faatasiga e talanoa atu ai i lau fanau e uiga i mataupu o le talalelei, tulaga taua faaleaiga, savali na fetuفاai ai i sauniga faamanatuga ma isi sauniga a le Ekalesia, aoga, o ni



gaoioiga o le a oo mai, mea e tutupu i le lalolagi, ma isi mataupu e fiafia i ai. E mafai ona avefa ma se taimi mo e oe aoao atili ai e uiga i atugaluga, o manatu, ma lagona o lau fanau.

O taimi o meaai a le aiga e tatau ona le sasalu ma o ni faatasiga e fiafia ai lea e lagonaina ai e tagata uma lo latou taliaina ina ia auai i talanoaga. I tulaga e mafai ai, o le taimi lenei e tatau ona saoloto mai isi mea e faalavelaveina ai. O faatasiga faapea e mafai ona i ai se sao i le lotogatasi ma le alualu i luma faaleagaga o le aiga.

Aufono Faaleaiga

E tatau ona taloina faatasi tagata o le aiga i ni fonotaga a le aufono faaleaiga. E mafai ona e faaaogaina ia aufono faaleaiga e faatutu ai ni sini, foia ai ni faafitauli, talanoaina ai mea tau tupe, faia ai ni fuafuaga, ma tuuina atu ai le lagolago ma le faamalosiua. E mafai ona e faia ia aufono faaleaiga ia o faatasi ma le afiafi faaleaiga ia po o se isi foi taimi. Ao e taitaia ia aufono faaleaiga, e mafai ona e aoaoina ai lau fanau ina ia iloa ona faalogo ma faaali atu le faaaloalo i lagona ma manatu o le isi tagata.

Feiloaiga Faapitoa

Ao e talatalanoa pea e le aunoa i lau fanau, o le a vavalalata ai ma i latou. Atonu e te moomia ona fuafuaina ni feiloaiga faapitoa ma tamaiti taitoatasi e faailoa atu ai lou alofa ma faamalosiua ma aoaoina atu i ai mataupu faavae o le talalelei. E tatau ona e faatagaina ia tamaiti taitoatasi e talanoa atu e uiga i o latou faafitauli po o ni mea na oo i ai e taua ia te ia. Ao e faaali atu lou manatu atu i atugaluga ma manatu o lau fanau, o le a aoaoina ai e

lau fanau le faatuatua o oe ma sailia lau fautuaga. Ona mafai lea ona e aoaoina pea lava pea i latou ina ia faia ni faaiuga lelei, tatalo, ma suesue i tusitusiga paia mo tali i a latou fesili.

Ia faaaoga ia tusitusiga paia e aoao ai lau fanau i le auala e faaaoga ai lo latou saolotoga ma le amiotonu. Na fautuaina mai e Elder Gene R. Cook ia auala e mafai ai e se matua ona faaaogaina ia tusitusiga paia e fesoasoani ai i se tamaitiiti o le na te fesiligia pe aisea e le faia ai e le aiga nisi o mea i le Aso Sa:

“Atonu e faaosoosoina oe e te faapea atu, ‘Aua o le ou te fai atu ai,’ po o le ‘Aua ua fai mai ai le Ekalesia.’ Ae o se matua e sili atu ona musuia e mafai ona faapea atu, ‘Ia, ua e iloa o le tausiana o le aso o le Alii ia paia e le o se mea na tatou faia e i tatou. Se’i faaali atu lava ia te oe se mea lenei.’ Ona e sueina lea o le Mataupu Faavae ma Feagaiga i le vaega e 59 ma faitau [fuaiupu 9 e oo i le 11]. . . .

“Ona mafai lea ona e faamalamalamaina atu, ‘E pei ona e vaai i ai, na aoao mai le Alii o le Aso Sa o se aso e paia. . . . O se aso e malolo ai mai a tatou galuega ma “avatu ai au viiga i Le Silisili,” o lona uiga e tatau ona tatou o atu i a tatou sauniga o le Ekalesia, taumamafa i le faamanatuga, faia isi o tatou tiute i le Ekalesia, ma asiasi atu i e mamai, o e matitiva, ma e le tagolima. O se aso ua faapaia i le Alii, ma ou te tuuina atu la’u molimau, lo’u afafine pele e, o lenei mea e moni lava ma ua faamanuiaina tele ai i tatou e le Alii mo le tausiana o le Aso Sapati” (*Raising Up a Family to the Lord* [1993], 19–20).

Mo manatu e mafai ona faaaogaina i feiloaiga faapitoa ma lau fanau, ia tagai i le “Aoa Atua i Faatalanoaga,” itulau 161–62.

TAIMI MO AOAOGA I LE OLAGA FAALEAIGA



I le avea ai ma matua, o le tele o o tatou avanoa e aoao atu ai e maua mai lea i ni taimi e le'i fuafuaina—i talatalanoaga, ao outou galulue faatasi ma a outou fanau, ma taimi o loo feagai faatasi ai tagata o le aiga ma ni luitau. O nei avanoa e mafai ona avea ma ni taimi sili ona malolosi e aoao atu ai aua o loo vavalalata ai i latou e tusa ma mea o loo maitauina e lau fanau. Talu ai ona o nei avanoa e mafai ona oo mai ma toe mou vave atu, e moomia la ona e iloaina ma ia saunia e aoaoina atu ia mataupu faavae ua saunia lau fanau e aoaoina. O fautuaga nei e mafai ona fesoasoani ia te oe e sailia ai ni avanoa e aoao atu ai.

Taulimaina o Fesili po o ni Popolega o Tamaiti

O tamaiti uma lava e i ai ni o latou popolega e uiga ia te i latou ma le lalolagi. E mafai ona e faaali atu ia te i latou faapea e saunia e le talalelei ia ni tali ma le taitaiga mo le malamalama ma le foiaina o o latou faafitauli. Afai e fefe se tamaitiiti ona o se afa, e mafai ona e faaaogaina lena taimi e faamalosi atu ai ia te ia ina ia tatalo mo le faamafanafanaga. Afai ua faamalosi se atalii talavou e vaai i se ata tifaga lauiloa e ono le talafeagai, e mafai ona e talanoaina le mataupu faatasi ma ia ma fesoasoani ia te ia e faaoga ia mataupu o le talalelei i le fuafuaina po o le a le mea e matamata ai ma le mea e le tatau ona matamata ai. Afai o loo popole tamaiti e uiga i se faaiuga taua lava, e mafai ona e faitauina le Moronae 7:15–19 faatasi ma i latou ma talanoaina le fautuaga a Mamona i le “ala e faamasino ai.” Afai ua maluu se tagata o le aiga, e mafai ona e aoaoina lau fanau e uiga i le lalolagi o agaga ma le toetutu.

Mo fautuaga e uiga i le auala e mafai ai ona e fautuaga atu i lau fanau, ia tagai i le itu-lau 145 i le “Tulaga Masani mo Aoaoga i le Aiga.”

Talanoaina o Faafitauli e Aafia ai Uo a le Fanau

Mai lea taimi i lea taimi, e ono ta'u atu ai e le fanau ia faafitauli e aafia ai a latou uo. Atonu e i ai ni galuega a a latou uo e manaomia ai ona latou galulue i le Aso Sa. Atonu latou te iloaina se alii talavou o le Ekalesia ae ua fuafua e aua nei alu e faamisiona. Atonu e i ai ni a latou uo o e latou te faaaogaina le gagana masoa po o le faaalua o ni uiga le faaaloalo i isi. I le talanoaina o ia tulaga ma lau fanau, e mafai ona e faaaogaina ia tusitusiga paia e aoao atu ai mataupu faavae o le talalelei. O lenei faiga e mafai ona fesoasoani e taitai atu ai fanau i faaiuga sa'o i tulaga faapena.

Fetufaai o Avanoa Ina ia Faia ai Filifiliga Sa'o

Afai e te mauaina ni avanoa e faia ai ni filifiliga sa'o, atonu e te manao e fetufaai atu mea nei i lau fanau. Mo se faataitaiga, afai ua tele naua se sui ua tuuina atu ia te oe i le faleoloa, e mafai ona e fesili atu i lau fanau po o le a le mea e tatau ona e faia. O lenei mea e mafai ona taitaina atu ai i se talanoaga e uiga i autu e pei o le faamaoni, saolotoga, ma taunuuga o a tatou mea e fai.

Talanoaina o Manatu e Auala mai i Faasalalauga

E mafai ona outou talanoa ma lau fanau e uiga i manatu e faalauiloa mai ai ia ata tifaga lauiloa, o ata i le televise, ma musika. O faasalalauga o talafou e maua ai avanoa e talanoaina ai ia mea o loo tutupu ma faafitauli o loo tulai mai. O ia ituiga talanoaga e mafai ona fesoasoani i fanau ia iloaitino ai le eseese o faafiafiaga e siitiaina ai ma faafiafiaga o loo tuuina mai ai manatu ma gaoioiga e feteenai ma faatulagaga o le talalelei.

Fesoasoani i Fanau ia Aoa Mai Mea Na Sese Ai

O mea sese e mafai ona saunia ai avanoa e aoao atu ai. Afai ua sese se tamaitiiti, e mafai ona e faamagaloina le tamaitiiti, ta-



lanoa atu i ai e uiga i le faatoese ma le faaleleia o se mea ua faaleagaina, ma afai e le usiusitai le tamaitiiti i le poloaiga, ona aoao atu lea i ai le ala o le salamo.

Afai o loo e sese, e tataua ona e faatoese ma talosaga atu mo le faamagaloga. E mafai e lau fanau ona aoaoina ni lesona malolosi ao latou vaai i au taumafaiga ina ia faa-toilaloina ou lava vaivaiga. Ia mafaufau i le mea lenei na fetufaai mai e se tagata o le Ekalesia:

“Pe tusa o le 10 o o’u tausaga na ou faia ai se mea na le fiafia ai lo’u tama. Na matuai le fiafia lava o ia ma mafaufau ai loa e faasalaina a’u. Na matuai loloto lo’u mafatiaga aua na ou lagonaina ua sili atu le mafa o le aoaiga ua ia faia ia te au nai lo le mea na ou faia. Na ou le amanaiaina o ia i le aso atoa, ma o taimi uma lava na tau-mafai ai e talanoa mai ia te au, ou te faliu ai ma tamoe ese. O le aso na sosoo ai sa ou le fiafia ai lava ia te ia, o lea sa ou ofo ai ona sa sau o ia i totonu o lo’u potu ma ta’u mai ia te au ua ia lagona lona sese ona ua ogaoga lona a’oa’iina o a’u. Na ia talosaga mai ia te au pe ou te malie faamolemole ae faamagaloga o ia. Na ou aoaoina ai iina e le faapea ua e matua ona le mafai lea ona e faatoese ma tautino mai ua e sese. O se avanoa lona na aoaoina ai le taua moni o le salamo.”

Faamalamalamaina Atu o Mafuaaga mo le Tuuina Atu o le Auaunaga

Ao e auauna atu ai i valaauga i le ekalesia po o nisi auala, e mafai ona e ta’uina atu i lau fanau le mea o loo e faia ma le mafuaaga o loo e faia ai. O le a fesoasoani lea i le fanau ia malamalama atili i le auala e aafia ai o latou talitonuga ma mea e faatauaina ona o a latou mea e fai. Afai e te faia se taumafataga o le afiafi mo se tasi o loo gasegase, e mafai ona e faamatalaina atu i ai le mafuaaga e taua ai le fesoasoani i lona tagata. Afai e vaai le fanau o loo sauniuni e aoaoina atu se lesona i le lotu, e mafai ona e talanoa atu ia i latou e uiga i le taua o le faalauteleina o valaauga. E mafai ona outou talanoaina ma lau fanau le mafuaaga e sii ai o tatou lima e lagolagoina ia taitai o le Ekalesia ma le auala tatou te lagolagoina ai i latou ua valaauina e le Alii.

Fesoasoani i Tamaiti ia Pulea o Latou Lagona

Afai e le fiafia, lotovaivai, pe feita ia tamaiti, e mafai ona latou faia ni uiga e le talafeagai ai. E mafai ona e aoaoina i latou ina ia latou iloa ma puleaina ni lagona o le faatiga i isi pe siisii i luga o latou leo. E mafai ona e faatosina mai i latou i tulaga e mafai ona faatupuina ai le ita ona talanoaina lea o auala lelei e taulimaina ai tulaga faapea i le lumanai.

Fesoasoani i Tamaiti ia Iloaina Aafiaga a le Agaga

E mafai ona e fesoasoani i lau fanau ia iloaina aafiaga a le Agaga e ala lea i le taulai atu i o latou lagona. Na faamatala mai e Elder Robert D. Hales le mea lenei:

“Ina ua maea lo’u papatisoga ma le faamauga, na toso atu a’u e lo’u tina i autafa ma fesili mai, ‘O le a sou lagona?’ Na ou faamatalaina atu i ai i le mea sili na ou mafaia le lagona o le filemu, faamafanafanaina, ma le fiafia sa ia te au. Na faamatala mai e tina e faapea o le mea na ou lagonaina o le meaalofo lea sa ou faato’u mauaina, le meaalofo o le Agaga Paia. Na ia ta’uina mai ia te au e faapea afai ou te ola agavaa i ai, o le a ou mauaina pea lava lona meaalofo. O se taimi lona o aoaoga na tumau pea ia te au i lo’u olaga atoa” (“Faamalolosia o Aiga: O Lo Tatou Tiute Paia,” *Liahona*, Iulai 1999, 37).

Aoaoina o Lesona mai le Natura

E mafai ona e faaaogaina mea e maitauina i aso uma e aoao atu ai le talalelei i lau fanau (tagai “Sailia o Lesona i Soo Se Mea,” itulau 23–24; “Faatusatusaga ma Lesona Faitino,” itulau 171–72). Mo se faataitaiga, o faamatalaga a se tamaitiiti e uiga i le matagofie o fugalaau o le tautotogo e mafai ona taitaiina atu ai i se talanoaga e uiga i le Toetu o Iesu Keriso. O le totoina faatasi o fatu o se taimi lelei lea e talanoaina ai le auala na faatusatusaina ai e Alema le afioga a le Atua i se fatu (tagai Alema 32:28–43).

Afai e te magafagafa, e mafai lava ona e liliuina ma le filemu ia le tele o mea e oo i ai lau fanau i ni taimi o aoaoga.

O AAFIAGA FAAFIAOGA O ISI TAGATA O LE AIGA



E ui lava o matua i ai le tiutetauave autu mo le aoaoina atu o le talalelei i a latou fanau, e mafai foi ona avea isi tagata o le aiga ma fesoasoaniga tele. E tataui o matua ona sailia avanoa ina ia tuu atu ai i isi tagata o le aiga e aoao atu ai ma faamalositia ai a latou fanau.

O Aafiaga Faafiaoga a Matua o Matua

E mafai e matua o matua ona faamalolositia ma musuia ia fanau a a latou fanau ao latou fetufaai atu mea na latou oo i ai, molimau, ma le faatuatua. O a latou tala moni o le ususitai, aoao mai mea sese, faia o osigataulaga ina ia ausia ai sini e faavavau, ma le faafetaiaia ma le fiafia o faafitauli e mafai ona fesoasoani i le fanau ao latou feagai foi ma mea faapea. I le faapoopo atu i ai, talanoa atu i fanau a a latou fanau, e mafai e matua o matua ona tusitusia faamaumau a latou molimau ma mea na oo i ai i totonu o tusi o talaaga, lea e mafai ona faagaetia ai ma aoaoina ai tagata o le aiga i le taimi nei faapea augatupulaga i le lumanai.

O Sister Susan L. Warner, o le sa avea ma fesoasoani lua i le au peresitene aoao o le Peraimeri, na faamatalaina mai le tala lenei:

“Ou te iloa se tamamatua, na ia aveina fanau a lana fanau mo se savaliga i se fono faaleaiga na faia i atumauga. Ina ua latou taunuu i se vaega taalaelae i lalo o laau, na ia fai atu i tamaiti laiti e nonofo i luga o se ogalaau, ao ia faamatala atu ia i latou se tamaitiiti e 14 tausaga e igoa ia Iosefa Samita, lea na manao e fai atu i le Tama Faalelagi ni fesili na le mautonu ai o ia. Na faamatala e le tamamatua na alu atu le alii o Iosefa i se togavao i tafatafa o lona fale ma tatalo ai, ma sa faatuatua o ia o le a tali mai le Atua. Na faalogologo fanau a ana fanau ma le filemu, ae sa le mafai e Ioane, e

fa ona tausaga, lea e masani ona le nofo filemu, ona taofiofi ia lava. Na pa atu lana tala, “Na ou faalogo muamua i le tala lena.”

“Na faamatala atu e le tamamatua le tatalo faatauanau a Iosefa ma le auala na tali mai ai i se asiasiga ofoofogia a le Tama Faalelagi ma Lona Alo o Iesu Keriso. Ina ua maea, na uu e Ioane laitiiti le lima o lona tamamatua ma faapea atu, “O se molimau manaia tele lena tamamatua.” Sa fiafia o ia e toe faalogo i le tala.

“E ui lava ina ua faamatala soo e tamamatua lenei tala paia i le tele o taimi o lona olaga, ae na ia faapea mai, “E leai se taimi na sili atu ai ona malosi le molimau a le Agaga o le Alii e pei o le taimi na ou tuuina atu ai la’u molimau e uiga ia Iosefa Samita i fanau a la’u lava fanau.” Na lagona e le tamamatua ma le fanau le molimau a le Agaga Paia” (i le Conference Report, Oke. 1998, 85; po o le *Liahona*, Ian. 1999, 78).

E tusa lava pe nonofo mamao ese ia matua o matua mai fanau a a latou fanau, e mafai lava ona latou faa-aafiaina i latou mo le lelei. E auala atu i telefoni po o tusi o faaviiviiga ma faamalositiauga, e mafai ai ona latou musuia le lototele ma tuuina atu le fautuaga.

O Aafiaga Faafiaoga a Uso ma Tuafafine

E tataui o matua ona uunaiina a latou fanau ina ia fesoasoani le tasi i le isi ia aoao ma alualu i luma. O fanau matutua e masani ona mafai ona avea ma faaitaiga lelei i o latou uso ma tuafafine laiti ma e mafai ona tofia e aoaoina i latou i le auala e faataunuuina ai galuega i le fale. Afai e auuina atu faamisiona se atalii, e mafai e ia, e ala i lana faaitaiga ma ana tusi, ona matuai aafia ai se uso laitiiti ina ia auuina atu. Afai e faaipoipo se tuafafine i le malumalu,



e mafai ona ia fetufaai atu lona fiafiaga ma le molimau i ona tuagane ma uso. Afai e naunau le fanau e fesoasoani i galuega i le fale, latou te faia ni faaitaiga lelei, i le aoaoina e le tasi o le isi i le auaua atu ma tiutetauave. O le a faamalosia ai foi lo latou lava aoaoina.

O Aafiaga Faafaiaoga a Uso ma Tuagane o Tina ma Tama, ma a Latou Fanau

E mafai ona i ai taimi e mafai ai e uso ma tuagane o tina ma tama ona aapa atu ma fesoasoani i se tagata o le aiga pe afai e le mafai e matua.

Na toe manatua e se tama le faatosinaina o lona atalii e se tasi o ona tei. Na musu le atalii e auai i le lotu mo le tele o ni vaiaso. Na lalata mai le taimi o le konafesi aoao, ma sa matuai tulimatai atu lava i ai si ona tei, na alapo ai lava i le taeao ma tutu i le laina ina ia mafai ona nofo ai i totonu o le Tapeneko i Sate Leki. Na vaaia e le atalii lenei faaitaiga, ma sa ootia ai o ia i le faatuatua ma le maelega o lona tei, ma sa uunaia ai o ia ina ia toe auai i le lotu. O lona faaiuga na suia ai lona olaga, ma sa faapea ai ona auaua mulimuli ane ai i se misiona faamaoni.

Na faamatala e se tina se aafiaga lelei a lona tuagane ma lona aiga ina ua la auina atu ma lona toalua le la tama tama e nonofo ma i latou ma faigaluega ai i se tasi o pamu penisini i le taumafanafana. Na toe manatua e se tasi

tamaitai ma le loto faafetai se talanoaga a lana tama na faamatala mai ai se tuagane o lona tina e sili ona fiafia i ai. Talu ai ona o lea talanoaga, na filifili ai lana tama e aloese mai uo o e sa aafia ai o ia i ni amioga leaga.

O Aafiaga Faafaiaoga o Tamaiti

Afai e faalogo atu matua i a latou fanau, e mafai ona latou aoaoina mai ai le anoanoai o upu moni. Na faamatalaina e Elder Russell M. Nelson se taimi na ia aoao mai ai i se tasi o ona afafine:

“Pe tusa o le fa o tausaga o le ma tama teine laitiiti, na ou sau ai i le fale mai tiute i le falemai ua leva le afiafi. Na ou iloina ai le matuai vaivai lava o lo’u toalua. . . . O lea na ou ofo atu ai ou te faamoemoeina le ma teineitiiti lea e fa tausaga. Na amata ona ou tuuina atu ia faatonuga: ‘Aveese ou lavalava; tautau i luga; fai lou ofumoe; fufulu ou nifo; fai lau tatalo’ ma isi lava faatonuga, ma tuuina atu i se auala e pei lava o se taitai’au. E lei pine ae faasipa lona ulu i le isi itu, ma tilotilo mai ia te au ma ona mata faanoanoa, ma faapea mai, ‘Tama, e te puleaina a’u?’

“Na ia aoaoina mai ia te au se lesona taua. Sa ou faaogaina ia ni auala malolosi i lenei agaga tausaaafia. O le puleaina o tamaiti i le faamalosi o le auala lea a Satani, ae le o le Faaola” (i le Conference Report, Ape. 1991, 27; po o le *Liahona*, Iulai 1991, 26).

AOAOGA I AIGA MA ASIASIGA I AIGA

Ou te faamoemoe o le a iloa e faiaoga o aiga ma faiaoga
asiasi ni mea se lua: muamua, o le luitau o le tiutetauave o loo i o
latou valaauga maoae, ma lona lua, o le matagofie o taunuuga
o a latou galuega, aemaise lava o i latou tatou te mafuta
ae lē o toaaga mai.

Peresitene Gordon B. Hinckley

O LE VAEGA FAAFAIAOGA O AOAOGA I AIGA



Afai o oe o se faiaoga o aiga, o oe foi o se faiaoga o le talalelei. I le faaopoopo atu i le vaaia lelei o le soifua manuia o aiga o loo tofia i ai oe ma lau soa, e te avatuina se savali o le talalelei e le itiiti ifo ma le faatasi i le masina. O loo aoao mai e tusitusiga paia faapea o faiaoga o aiga latou te “lapata’i, folafola, apoapoa’i, a’oa’o, ma valaau atu i tagata uma ia o mai ia Keriso” (MFF 20:59).

Ina ia mafai ona aoaoina ia aiga ua tofiaina atu ia te oe, e moomia ona e saunia lelei faaleagaga ma aoao ina ia faaaogaina ia mataupu o le aoaoina atu o le talalelei o loo talanoaina i totonu o lenei tusi. E tatau foi ona e taumafai pea lava pea e faalelei lau aoao atu (tagai “Faia o se Fuafuaga ina ia Faaleleia Atili ai Lou Aoao Atu,” itulau 25–28).

I lou tofiga i le avea ai ma se faiaoga o aiga, e i ai sou manaoga faapitoa mo ituaiga faatinoga faapea, ae le gata i lea o le faaaauuina pea ona faaleleia atili. O se malamalamaaga i mataupu faavae o le aoaoina atu o le talalelei o le a fesoasoani lea ia te oe e aoao atu ai savali i se auala o le a fesoasoani ai i tagata taitoatasi o loo e aoaoina, e tusa lava pe o latou o ni tagata le toaaga e le masani ona auai i ni talanoaga o le talalelei po o ni tagata malolosi foi o le Ekalesia.

Ia manatua o tagata eseese latou te manaomia ni auala eseese e aoao atu ai. Atonu e te manaomia le tuuina atu o se savali i se aiga e toatele ai ni tamaiti e eseese le matutua. Atonu e tofiaina oe e faaumea mai se tagata fou faatoa liliu mai. Pe atonu foi e te maua le avanoa e asiasi atu ai i tagata matutua po o tagata nofofua.

O se tasi soa o faiaoga o aiga na matuai mafaufau ma le faaeteete e uiga i le la lesona na foliga mai ai i le la asiasiga o le a la

aveina atu ni ofe fagota. Sa tumu a la taga i maunu. Sa mananao ia tagata o le aiga e fia iloa po o le a le mafuaaga, ae le’i ta’uina atu i ai e faiaoga o le aiga ao le’i oo i le taimi o le savali. Sa leai se faigata ia te i laua ona faapotopoto mai tamaiti ma faatosina mai i latou. Ona faataitai atu lea e se tasi o faiaoga o le aiga le auala e maunu mai ai e se faifaiva se i’a ua maua. Na ia faamatalaina atu faapea o i’a laiti e faigofie lava ona faasee nai lo i’a ua matutua toe sili atu le malamalama. Na ia faatusatusaina ia maunu i’a i faaosoosoga a Satani ma aoao atu ai faapea e faaoga e Satani auala taufaasese e taumafai ai e pu’e i tatou ma aveese lo tatou saolotoga. O se lesona e le faagaloina i le aiga.

I le avea ai ma se faiaoga o aiga, o loo ia te oe ni avanoa faapitoa e faaali atu ai le alofa mo i latou o loo e aoaoina. E pei ona aoao mai ia Peresitene Ezra Taft Benson, e tatau ona e “faia ni mea laiti, ni mea laiti na e matuai taua tele i se aiga. Mo se faataitaiga, ia iloa igoa uma o tagata o le aiga. Ia iloa o latou aso fanau, o faamanuiaga, o papatisoga, ma faaiipoipoga. I aso faapena, ia tusi atu se tusi talafeagai o le faamalo pe telefoni atu foi e avatu se faamanuia i se tagata o le aiga i se mea faapitoa ua ausia” (i le Conference Report, Ape. 1987, 61; po o le *Liahona*, Iulai 1987, 58). E mafai ona e fesoasoani i tagata o le aiga i taimi e manaomia ai le fesoasoani, lago-lagoina le fanau ma le autalavou i a latou gaoioiga, ma ia mautinoa o loo faailoa atu manaoga o le aiga i taitai o le korama.

Filifiliga o le Savali

Ao e filifilia se savali e fetufaai atu, ia manatua le aoaoga lenei: “E masani lava ona tuuina atu e faiaoga asiasi le savali a le

Au Peresitene Sili o loo lolomiina mai le *Ensign* ma le Liahona. O savali faaopoopo e mafai ona maua mai le epikopo po o isi taitai i le lotoifale. E mafai foi ona talosaga atu le ulu o le aiga foi e tuuina atu e faiaoga o aiga se savali faapitoa. O savali a faiaoga o aiga e tatau ona faavae lea i luga o tusitusiga paia ma aoaoga a perofeta o aso e gata ai” (*Tusitaulima o Faatonuga a le Ekalesia, Tusi 2: Taitai o le Perisitua ma Ausilali* [1998], 187).

Sauniaina o le Savali

Ia saunia faaleleia ia savali uma taitasi o aoaoga i aiga e pei lava o loo e saunia se lesona mo se vasega i le Lotu. O fautuaga nei e mafai ona fesoasoani ai ia te oe:

- Iloilo le lesona. Ia talatalanoa ma lau soa e uiga i mea o le a oulua tofu sao i ai i le tuuina atu o le lesona.
- Afai e te tuuina atu le savali a le Au Peresitene Sili po o se isi autu e le o saunia ai se lesona aloaia, ia mulimuli i fautuaga o loo maua i le “Gaosia o Lesona mai Lauga o Konafesi ma Isi Risosi,” itulau 107–108.
- Ia fetuutuunai le savali ma auala e aoao atu ai i tulaga, matutua, ma le fiafia o tagata taitoatasi o le aiga o loo e aoaoina. Ia faia le lesona ina ia fiafia ma talafeagai i tagata taitoatasi o le aiga.

- Ia mautinoa o le a puupuu le savali ina ia pu’epu’e mai ai le fiafia o i latou uma e i ai.

Momoliina Atu o le Savali

Ia manatua o le ulu o le aiga e tatau ona pulefaa-malumalu ma taitai pe a oulua asiasi atu. Ia manatua foi i le mafafau ia fautuaga nei:

- Tatalo ma faitau faatasi ia tusitusiga paia i soo se taimi e mafai ai. Ia faaaogaina ia tusitusiga paia i soo se avanoa e talafeagai ai. Ia aumai tusitusiga paia i soo se asiasiga. Ia faaoga e tali ai fesili pe tuuina atu ai foi se fautuaga.
- Mulimuli i musumusuga a le Agaga a’o e aoao atu.
- Aloese mai ni talanoaga uumi e le manaia pe le fesoasoani foi i tagata uma o loo i ai. Ia nofouta i taimi faatapulaaina o i latou e te asiasi atu i ai.
- Ia sailia ni auala ina ia auai ai tagata uma taitoatasi o le aiga i lesona. Ia faaali atu le naunautai ma le fiafia i tagata taitoatasi.
- Ia molimau atu i upu moni na e aoaoina atu. Ia fetufaai atu ni faataitaiga i le auala e faaoga ai na upu moni i le olaga i aso taitasi.

O LE VAEGA FAAFAIAOGA O ASIASIGA I LE AIGA



Afai e tofiaina oe e avea ma se faiaoga asiiasi, o se vaega taua o lou tiutetauave o le “aoaoina lea o manaoga faaleagaga ma faaletino o le uso ma lona aiga” ma ia “tu-uina atu aoaoga faaleagaga e ala i se savali faalemasina” (*Tusitaulima o Faatonuga a le Ekalesia, Tusi 2: Taitai o le Perisitua ma Ausilali* [1998], 225). O oe o se faiaoga o le talalelei.

Ina ia aoaoina uso ua tofiaina atu ia te oe, e manaomia lou saunia lelei faaleagaga ma aoao ina ia faaoga mataupu o le aoaoina atu o le talalelei sa talanoaina i totonu o lenei tusi. E tatau foi ona e taumafai pea lava pea ina ia faaleleia lou aoao atu (tagai “Faia o se Fuafuaga ina ia Faaleleia Atili ai Lou Aoao Atu,” itulau 25–28).

O lenei sauniuniga o le a matuai fesoasoani tele lava ia te oe aua e mafai ona valaauina oe e aoao atu ia ni uso e eseese ni o latou tulaga. E mafai ona e aoaoina i latou o e talavou, o e matutua, o e ua faaipoipo, o e nofofua, o e ua tete’a, o e faatoa liliu mai i le talalelei, o e e matuai malolosi i le Ekalesia, o e e le toaaga, o e e aoaoina lelei, o e e faigata ona aoaoina, pisi, o e e tuua toatasi, o e e talia aloaia, po o e e faatautee. O uso eseese e manaomia foi ni auala eseese e aoaoina ai. Po o a lava tulaga o uso e te aoaoina, e mafai ona e fesoasoani ia i latou ia iloa lelei le Faaola ma ola faamaoni atili i Lana talalelei.

Ao avea ia Sister Elaine L. Jack ma perezitene aoao o le Aualofa, sa ia faamatalaina ai le tala lenei:

“Sa iloa e Priscilla Samson-Davis, o se tuafafine i Kana (i Aferika) mea e ta’u o tauiviga. E tele ni mea sa faalavelaveina ai lona olaga. I le avea o ia ma faiaoga, sa ia vaai i ni aiga o tausia fanau sa maua i le sanatoto

ma le mumu, galulue malolosi, faia fe-faatauaiga i aso taitasi mo sina taga alaisa tumu, aniani, tamato— soo se meaai lava e tausii ai o latou aiga pele ia ola. I lena taimi atoa lava, sa auauna atu ai o ia e avea ma faiaoga asiiasi, e malaga e le aunoa i le pasi e vaai se uso sa nofo i le isi itu o le taulaga. Ina ua fesiligia o ia pe sa fai ma avega lenei asiiasiga, na tuuina atu ai mea uma sa mafai ona ia faia, sa ia tali mai, ‘E le faigata. O le tamaitai sa ou asiiasi i ai, e le iloa faitautusi. Pe a ou alu i ai, ou te faitauina i ai tusitatusiga paia ia te ia.’

“O lana tali faigofie na tautino atu ai le faatuatua ma le mautinoa sa ia te ia o lea sa i ai o ia i le ala sa’o. E ui lava o le mea e ui atu ai lana pasi e fai ma tu ma e tele ina fepi’opi’oa’i le ala, i le silafaga a le Alii o se ala sa’o moni lava lena ma le lauitiiti, aua sa alu atu o ia i le nofoaga sa’o. Sa faia e ia le galuega a lona Tama” (i le Conference Report, Ape. 1994, 19; po o le *Liahona*, Iulai 1994, 19).

Filifiliga o le Savali

Ao e filifilia se savali e fetufaaai atu, ia manatua le aoaoga lenei: “O faiaoga asiiasi latou te tuuina atu aoaoga faaleagaga e ala i se savali faalemasina. O savali o loo lomina i le *Ensign* po o le *Liahona* e ao ona faaaogaina e avea o se taiala ma fetuunai i manaoga o tuafafine taitoatasi” (*Tusitaulima o Faatonuga a le Ekalesia, Tusi 2: Taitai o le Perisitua ma Ausilali* [1998], 225). Saili le taitaiga a le Agaga ao oulua iloilo ina faatasi ma le faaeteete le savali faalemasina ma lau soa ona fuafua lea ma le agaga tatalo ia tuafafine uma taitoatasi e te lua aoaoina. I le faaopopo atu i le savali ua saunia, e tatau ona e faaaogaina ia tusitusiga paia ma

aoaoga a perofeta o aso e gata ai e avea ma au risosi autu i le fuafuaina o le savali. E mafai ona e faaaogaina faatasi ia nei risosi ma isi mea e gaosia e le Ekalesia.

Sauniaina o le Savali

Ia saunia faalelei ia savali uma taitasi a faiaoga asiasi e pei lava o loo e saunia se lesona mo se vasega i le Lotu. O fautuaga nei e mafai ona fesoasoani ai ia te oe:

- Iloilo le lesona. Ia talatalanoa ma lau soa e uiga i mea o le a oulua tofu sao i ai i le tuuina atu o le lesona.
- Mulimuli i fautuaga o loo maua i le “Gaosia o Lesona mai Lauga o Konafesi ma Isi Risosi,” itulau 107–108.
- Ia fetuutuunai le savali ma auala e aoao atu ai i tulaga, matutua, ma le fiafia o tagata taitoatasi o le aiga o loo e aoaoina. Ia faia le lesona ina ia fiafia ma talafeagai i uso uma taitoatasi e te aoaoina.

Momoliina Atu o le Savali

O fautuaga nei o le a fesoasoani ia te oe ao e aoaoina atu ia uso e te asiasi atu i ai:

- Tatalo ma faitau faatasi ia tusitusiga paia i soo se taimi e mafai ai. Ia faaaogaina ia tusitusiga paia i soo se avanoa e talafeagai ai. Ia aumai tusitusiga paia i soo se asiasiga. Ia faaaoga e tali ai fesili pe tuuina atu ai foi se fautuaga.
- Mulimuli i musumusuga a le Agaga ao e aoao atu.
- Ia nofouta i taimi faatapulaaina o uso e te asiasi atu i ai.
- Ia sailia ni auala ina ia auai ai uso o loo e asiasi i ai i lesona. Ia faaali atu le naunautai ma le fiafia i tagata taitoatasi.
- Ia molimau atu i upu moni na e aoaoina atu. Ia fetufaai atu ni faataitaiga i le auala e faaaoga ai na upu moni i le olaga i aso taitasi.

U

AOAOGA I TULAGA FAALETAITAI



1

O LE TAITAI, O LE AOA O ATU LEA



Na faamamafa mai e Elder Boyd K. Packer faapea o taitai uma lava o le Ekalesia e auauna atu o ni faiaoga: “O le [perofeta o se faiaoga; o ona fesoasoani o ni faiaoga; o le Au Pulega Aoa o ni faiaoga. O peresitene o siteki ma peresitene o misiona o ni faiaoga; o fautua maualuga ma peresitene o korama o ni faiaoga; e faapea i faalapotopotoga uma lava o le Ekalesia. E alualu i luma le Ekalesia e ala i le lagolagoina e le mana o le aoaoga lea e faataunuuiina” (Teach Ye Diligently, rev. ed. [1991], 3–4).

I se konafesi a le autalavou a le Ekalesia, na molimauina ai e se tagata matua o le Ekalesia se faaitaiga musuia o le aafiaga e mafai e taitai ona i ai pe a latou aoaoina atu ia mataupu moni. Na ia lipotia maia:

“I le faaiuga o le konafesi sa faia ai se siva. Sa o atu le aufaaili e faasausau uma. Ao matamata atu le au matutua, sa oo atu se vaega o le autalavou i le mea o i ai le faaili ma tuuina atu i ai ni fautuaga i le faaili, ae na teena e le au faaili. E lei pine ae aumaia e nisi o le autalavou ni ofutino, ma sa faamau lava ma le le fiafia e le au faaili.

“Ina ua amata ona taina ia pese, sa leotele, ma sa faateteleina le leotele. Ina ua oo lava i le tulaga na matuai popole ai lava le au matutua, sa faapotopoto loa le autalavou i le ogatotonu o le fola ona latou agai faatasi atu lea i le mea o loo i ai le faaili. Sa latou talosaga atu ina ia faaleolemu le musika. Sa tetee le faaili, ae sa tauanau atu pea le autalavou, ma o lea sa ki ai loa i lalo e le faaili le leo o le musika. Ina ua toe faaleotele foi le musika, sa toe faapotopoto le autalavou ma toe talosaga foi i le faaili. E faatolu lava ona faia lena faiga. Mulimuliane sa faapea ona oo atu i latou i le peresitene o le siteki. Sa latou faapea atu, “matou te manatu e le talafeagai nei musika. Nai lo le faaauaaina o le siva, o i matou uma lava o loo popole agai i ai matou te mananao matou te o atu i se isi fale ma faia ai se faesaite. E mafai ona fai e i matou lava, ae afai e mananao i ai outou le au matutua tou te o mai, e lei se afaina.’ Na faaumaina le siva, ma sa faapea ona potopoto alii talavou ma tamaitai talavou i se isi fale.

“Ina ua maea sa ou fesili atu i le peresitene o le siteki pe na faapefea ona tupu

lenei mea. Na ia faapea mai e tusa o le lima tausaga talu ai, na faapea mai ai se tasi o sui o le au fautua maualuga, ‘Afai tatou te mananao e ao atu ia faatulagaga i le autalavou, e ao ona tatou iloa manino po o a na faatulagaga e tatau ona i ai. O le laasaga muamua lava e ao i le au peresitene o le siteki ona ta’u mai ia i matou.’ Na fai si umi o tau manatunatu le au peresitene i faatulagaga ma le auala e tatau ona latou faatinoina ai i totonu o le latou siteki. Na umi foi se taimi na manaomia mo fautua maualuga ia malamalama ai ma ia gauai atu i nei faatulagaga, ae le gata foi i lea sa tau-mafai foi ina ia malilie ma malamalama i ai ia epikopo. E oo mai lava i lena taimi o loo maua pea e matua ma le autalavou ni faailoga fenumiai, ae o le taimi nei, mo le uluai taimi, ua saunia ai ia taitai e ao atu ia faatulagaga.

“Ona latou aoaoina lea o i latou, i lea tausaga ma lea tausaga, i vaega uma lava o le siteki. O lona taunuuga lea na ou molimauina i lena po i le siva o le konafesi a le autalavou.

“Na ou aoaoina ai o le aafiaga o taitai e mafai ona matuai maoae lava pe a latou malilie e faataunuuiina lo latou tiutetauave o le aoaoina lea o le Au Paia. Na ou aoaoina ai foi o se savali e fenumiai e le o se savali lea, ae o le taimi e faaaluina i le matuai faamauaina o le mea e ao ona aoaoina atu e matuai tauia lava. O le vaega mulimuli, na ou vaaia e a’u lava ia le faatagatamata ma le atamamai ma le lototoa i amioga o le autalavou o e na aoaoina lelei.”

O Lau Matafaioi i le Avea ai ma Taitai o le Aoa o le Talalelei

O se tasi o auala sili ona taua e faataunuuiina ai ou tiutetauave i le aveai ma se taitai i le Ekalesia e auala atu lea i le aoa o atu (tagai *Tusitaulima o Faatonuga a le Ekalesia, Tusi 2:Taitai o le Perisitua ma Ausilali* [1998], 338). Na aoa mai Elder Gordon B. Hinckley, “O le lelei o le aoa o atu o le autu moni lena faaletaitaiga i le Ekalesia” (“How to Be a Teacher When Your Role as a Leader Requires You to Teach,” Fonotaga a le Aufono o le Perisitua a le Pulega Aoa, 5 Fep. 1969; siitia mai e Jeffrey R. Holland i le Conference Report, Ape. 1998, 31; po o le *Liahona*, Iulai 1998, 30).

O le Alii lava ia o le faataitaiga silisili lea o se taitai e avea ma faiaoga: “Ua faataamilo Iesu i aai uma ma faoa aai, ua aoao i o latou sunako, ma talai i le talalelei o le malo” (Mataio 9:35). Na faamamafa mai e Elder Boyd K. Packer: “O le Alii o lo tatou faataitaiga. E faigata ona faamatalaina le Alii o se taitai. Ou te toe fia ta’uina atu. E faigata ona faamatalaina le Alii o se taitai. O Ia o se *faiaoga!* O le faatulagaga moni lava lena” (semina a sui risone, 6 Ape. 1984).

O loo aofia i tusitusiga paia le anoanoai o tala o isi taitai na auauna atu o ni faiaoga o le talalelei. O Atamu ma le toatele o e na tupuga mai ia te ia sa avea ma “tagata talai o le amiotonu [o e] na tautala atu ma perofeta ane, ma valaau atu i tagata uma i nuu uma lava, ia salamo.” Na ala mai i le latou talaiga, “sa aoao atu ai le faatuatua i le fanauga a tagata” (Mose 6:23). O uluai Aposetolo sa latou galulue i “aso uma i le malumalu, ma lea fale ma lea fale, [ma] ua latou le mapu e aoao atu ma talai atu ia Iesu Keriso” (Galuega 5:42). Na molimau mai le Tupu o Mosaea, “O a’u foi sa ou galue ma lo’u malosi uma, e tusa ma le poto ua ia te au, e aoao atu ia te outou poloaiga a le Atua, ma faatumau le filemu i le nuu” (Mosaea 29:14).

O Nisi Auala e te Aoao Atu ai i le Avea ai o Oe o se Taitai

Faia o se Faataitaiga Amiotonu

I le avea ai ma se taitai, e te aoaoina atu le talalelei i le auala e te ola ai. Ua faamoemoeina oe e te tausia ia poloaiga, ia agalelei, ma ia avea ma se auauna faamaoni a le Alii faapea i latou o loo e taitaia. O le faia o se faataitaiga amiotonu, e te faamalositia ai isi i a latou faaiuga ina ia ola i le talalelei.

Mulimuli i Tulafono ma Aiaiga o le Ekalesia

Ao e mulimuli ma le faamaoni i faatulagaga faavaeina o le puleaina o le Ekalesia, ua e aoaoina foi i latou uma tou te galulue faatasi. E te fesoasoani i isi ia latou iloa pe faapefea ona faataunuaina o latou tiute. Mo se faataitaiga, o taitai o le Perisitua Mekisateko o e latou te faataunuaina pea a latou faatalanoaga o aoaoga i aiga o loo faaali atu ai le auala e faatinoina ai.

Talanoa Sa’o e Uiga i Mataupu o le Talalelei

E mafai ona tele avanoa o taitai e aoao atu ai le talalelei. O nei avanoa e aofia ai fonotaga faaleautaitai (tagai itulau 160) ma faatalanoaga (tagai itulau 161). O le a e vaai ai i isi avanoa e oo mai faafuasei ao e taitaia ma outou fegalegaleai ma isi.

I le avea ai ma se epikopo talavou ma se tagata lomitusi, sa masani ai ona galulue faatasi ia Thomas S. Monson ma Peresitene J. Reuben Clark Jr., ao avea ma se tasi o le Au Peresitene Sili. Ao laua galulue faatasi, e masani ona faaogaina lelei e Peresitene Clark ia avanoa e aoao atu ai le talalelei. I tausaga mulimuli ane, na faamatalaina ai e Peresitene Monson se tasi o a la faatasiga na matuai tele sona aafiaga ia te ia:

“[Na talosaga mai ia Peresitene Clark] ia te au ou te faitauina atu leotele le tala o loo maua i le Luka e uiga i le tagata na maua i le lepela. Ona ia fai mai lea ia te au e faaauau la’u faitau mai le Luka e faatatau i le tagata na maua i le supa ma le auala lelei na tuuina atu ai o ia i le Alii, o le na faamaloloina o ia. Na aveese e Peresitene Clark mai lana taga se solosolo ma soloiese ai loimata mai ona mata. Na ia faapea mai, ‘A’o tatou faasolo ina matutua, e masani ona maligi soo o tatou loimata.’ Ina ua uma ni nai upu faatofa, sa ou aluese loa mai lona ofisa, ma tuua ai na o ia ma ona loimata ma ona mafaufauga.

“I se tasi afiafi sa ou tilivaina atu ai nisi o lomiga e fia iloiloaina i lona ofisa i lona fale i le Aai o Sate Leki. Sa faitauina e Peresitene Clark le tusi o Failauga, ma sa i ai o ia i se lagona filemu ma le ootia. Sa nofo a’e o ia i luga mai lana kesi tele, sa faatumulia i faaputuga tusi ma pepa. Na ia uuina ia tusitusiga paia i lona lima, na aveese ona mata mai le itulau lolomi, ma faitau leotele mai ia te au: ‘Se’i tatou faalogo ia i le iuga o ia mea uma: Ia e mata’u i le Atua, ma e anaana i ana poloaiga: aua o mea ia e tatau i tagata uma’ (Failauga 12:13.) Na ia faailoa mai, ‘O se upu moni faapelepeleina! O se manatu ua mautu!’

“O se faamanuiga ia te au le aoao mai i aso uma mai aao o se ituaiga matai faiaoga faapea. . . . I le iloaina o a’u o se epikopo faatoa tofiaina o loo pulefaamalumalu i se uarota e luitauina ai, na ia faamamafa mai ai e manaomia lo’u iloa o o’u tagata, ia malamalama i o latou tulaga, ma ia tali atu i o latou manaoga.

“O se tasi aso na ia toe faamatalaina mai ai le toe faatuaina mai e le Faaola o le tama a le fafine Naina, e pei ona tusia i le Talalelei a Luka. Ina ua tapuni e Peresitene Clark le Tusi Paia, na ou vaaia ai o loo tagi o ia. I se leo malu, na ia faapea mai ai, “Toma, ia agalelei i le fafine ua oti lana tane ma tausi i e matitiva’ “ (*Inspiring Experiences that Build Faith* [1994], 233–34).

Ina ia taitai i le Ekalesia e ao ona aoao atu, ma le faaleleia ia avea ma se taitai o le aoao lea ia lelei ona aoao atu—mai le pulelaa, i fonotaga faaleautaitai, ma tulaga taitoatasi.

AOAO ATU I FONOTAGA FAALEAUTAITAI



Na fetalai mai le Alii: “O lenei foi, faautou te tuuina atu ia te outou le poloaiga, pe a outou potopoto faatasi ia outou aoao atu ma fefaamalamalamaa’i le tasi i le tasi, ina ia outou iloa ai mea e tatau ona outou faia e taitai ai la’u ekalesia, atoa ma le ala e tausi ai vaega o la’u tulafono ma poloaiga, ua ou tuuina atu. O le a faapea lava ona aoaoina outou i le tulafono o la’u ekalesia, ma faapaiaina i na mea ua outou maua, ma tou te fusia outou lava ia faia mea uma i le paia atoatoa i o’u luma” (MFF 43:8–9).

Pe a faatatau i ai i lea faaaliga, na faamatala mai ai e Elder Jeffrey R. Holland, “I a tatou fonotaga faaleautaitai, ia tatou ‘aoao ma fefaamalamalamaa’i’ e pei ona fai mai ai ia faaaliga, ma e oo lava i nei mea e tatau i a tatou fonotaga ona aumai mai luga” (i le Conference Report, Ape. 1998, 33; po o le *Liahona*, Iulai 1998, 31; tagai foi MFF 43:16).

Talu ai ona o le taimi i fonotaga faaleautaitai e faatapulaaina, o lea e tatau ai ona matuai fuafuaina ma le faaeteete le taimi e alu i aoaoga. I nisi fonotaga, o le aoaoga e mafai ona avea ma se mafaufauga faaleagaga puupuu e tuuina atu i le amataga. I isi fonotaga, e toatasi pe sili atu foi i latou e auai atu e mafai ona talosagaina i se taimi mamao e taitaia se vaega i se suesueina auiliili o ni autu filifilia. O i latou e mauaina ia ituaiga tofiga e tatau ona faaogaina ia mataupu ma auala e aoao atu ai o loo fautuaina atu i totonu o lenei tusi.

Fuafuaina Po o le a le Mea e Aoao Atu

I le sauniuni atu mo fonotaga faaleautaitai na o le a aofia ai aoaoga auiliili, e tatau i taitai pulefaamalumu ona iloilo ma le agaga tatalo po o a mea e tatau ona aoaoina atu ae o ai foi e tatau ona talosagaina e aoaoina atu. E mafai ona latou filifilia ni autu e talafeagai ma aoaoga o le

talalelei pe fetalai foi i le pulega o le Ekalesia faapea ma tiute o i latou o loo faapotopoto ai. Na fetalai mai le Alii:

“Ou te tuuina atu foi ia te outou le poloaiga ia outou aoao le tasi i le tasi i mataupu o le malo. Ia outou aoao atu ma le filifiliga ma o lo’u alofa tunoa o le a mafuta ma outou, ina ia aoaoina atoatoa lelei outou i teori, mataupu autu, mataupu faavae, i le tulafono o le talalelei, ma mea uma lava tau le malo o le Atua, e tatau mo outou ona malamalama ai” (MFF 88:77–78).

O tusitusiga paia o le risosi faavae lea mo le suesue ai i fonotaga faaleautaitai. “Ou te tuuina atu ia te oe le poloaiga,” o le fautuaga lea a le Alii, “ia e faalagolago i mea ua tusia; aua ua tusia ai mea uma e uiga i le faavae o la’u ekalesia, o la’u talalelei, ma la’u papa” (MFF 18:3–4). O isi risosi o le *Tusitaulima o Faatonuga a le Ekalesia*, o lauga mai konafesi aoao, ma isi aoaoga a perofeta o aso e gata ai (mo le fesoasoaniga ina ia faia ni lesona mai ia risosi, ia tagai “Gaosia o Lesona mai Lauga o Konafesi ma Isi Risosi,” itulau 100–101).

Valaauliaina o le Agaga e ala i le Faaaloalo

E mafai ona tatou aoao atu ma aoaoina mai le talalelei ma fefaamalamalamaai faatasi pe a auai faatasi le Agaga ma i tatou (tagai MFF 42:14; 50:17–24). E mafai ona tatou valaaulia le Agaga e ala i lo tatou faaaloalo (tagai “Valaauliaina o le Agaga ao e Aoao Atu,” itulau 47–48; “Faaaloalo,” itulau 89–90). I fonotaga faaleautaitai, o i latou o loo pulefaamalumu ma taitai e mafai ona faamalosa le faaaloalo e ala i lo latou vave nofoia o o latou nofoa. O a latou amioga, e mafai ai ona latou fesoasoani ia maua le agaga mo fonotaga. O isi taitai e auai ai foi e mafai foi ona vave mai; aumai a latou tusitusiga paia, tusitaulima, ma mea e tusitusi ai; ma saunia lelei i latou e ala i le filifilemu ma le agaga tatalo.

O le tatalo e tuuina atu i le amataga o se fonotaga faaleautaitai e mafai ona fesoasoani e faatulagaina le faaaloalo ma valaaulia ai le Agaga. O se mafaufauga faaleagaga e maua ai foi se avanoa lelei mo le aoaoina atu ma le aoaoina mai o mataupu o le talalelei. I nisi o fonotaga faaleautaitai, o musika e muai tataina ma viiga e usuina i le taimi o le fonotaga e mafai ona fesoasoani e saunia ai loto ma mafaufau o i latou e auai.

AOAO ATU I FAATALANOAGA



Na fetufaai mai e Peresitene Thomas S. Monson le vaega leneni:

“Ina ua ou latalata atu i lo’u aso fanau lona sefulu ma le valu . . . , sa faapea ona fautuaina atu ai au ina ia maua le Perisitua Mekisateko. O lo’u tiute o le telefoni atu lea i lo’u peresitene o le siteki, o Paul C. Child, mo se avanoa ma se faatalanoaga. O ia o se tasi e fiafia ma malamalama lelei i tusitusiga paia. O lona faamoemoega e mo tagata uma ina ia i ai le alofa ma le malamalama i ai. Na ou iloa mai isi tagata e uiga i ana faatalanoaga auiliili ma le vailiili, ma o lea sa faapenei ai le ma talanoaga i luga o le telefoni:

“ ‘Talofa, Peresitene Child. O Tom Monson leneni. Ua talosagaina au e le epikopo e saili atu se faatalanoaga ma lau susuga.’

“ ‘Ua lelei, le Uso e Monson. O a fea e mafai ai ona e susu mai ta te feiloai?’

“I lo’u iloina o le taimi o lana sauniga faamanatuga o le ono, ma lo’u manao ia iti-iti se taimi na te iloiloina ai lo’u malamalama i tusitusiga paia, o lea na ou fai atu ai, ‘Ae a le Aso Sa i le ta o le lima?’

“O lana tali: ‘Oi, le Uso e Monson, e le lava lona taimi ta te suesue ai i tusitusiga paia. E mafai ona e sau i le lua, ma aumai au lava tusitusiga paia ua uma ona faailoga lelei’” (*Inspiring Experiences that Build Faith* [1994], 193).

Na iloa ai e le alii talavou o Thomas Monson o se faatalanoaga ma le peresitene o le siteki e sili atu nai lo na o se “faatalanoaga”; o se faatasiga e suesue ai ma aoaoina le talalelei.

Mataupu Faavae mo le Aoao Atu i Faatalanoaga

Afai e te faia ni faatalanoaga, o mataupu faavae nei e mafai ona fesoasoani ia te oe.

“Ia Teu Pea i o Outou Mafaufau . . . Upu o le Ola” (MFF 84:85)

Ia manatua o loo silafia e le Alii ia tagata o loo outou feiloai. Na te silafiaina o latou manaoga, popolega, malosiaga, ma vaivaiga. E masani lava o le a uunaia ma aoaoina oe e le Agaga ao e sauni e fesoasoani atu i tagata taitoatasi ma aiga.

Na fetalai mai le Alii, “Ia teu pea i o outou mafaufau upu o le ola, ma o le a tuuina atu ia te outou i lea lava itula lona vaega e tatau ai mo tagata taitoatasi” (MFF 84:85). Ao e suesueina ia tusitusiga paia, ia mataala i le avanoa, atonu e i ai ni fuaitau patino e fetai tonu ma le mea o loo fia faalogo i ai se tasi i se faatalanoaga. E faamaninoina leneni mea moni i se aafiaga na faamatalaina mai e se epikopo:

“I se tasi taeao o se Aso Gafua sa ou faitau ai i le Mataupu Faavae ma Feagaiga e faatatau i le salamo ma le faamagaloga. Na lolofi mai upu moni paia i lo’u mafaufau ma lo’u loto, aemaise lava i le faamagaloina lea o ta ita lava ia. Ou te le’i mafaufau lava o lona upu moni ‘O a’u, le Alii, e faamagaloina atu e ou te loto ia faamagaloina, a o outou e ao ina outou faamagaloina atu i tagata uma’ (MFF 64:10) e mafai ona faatatau i le tagata lava ia.

“Na uma la’u faitaugatusi mo lona taeao ma ou alu atu loa i le galuega. O le afiafi na sosoo ai na matou feiloai ai ma se ulugalii ua faaletonu lava le la ulugalii. Ina ua ou

talanoa atu ia i laua, na faamatala mai e le tuafafine se mea na tupu ia te ia ao teine talavou ina ua ia solia se tulafono faalemalo, o taunuuga na semanu e oo i ai o le avelea i le faamasinoga i lena taimi. I le tolusefulu tausaga ua tuanai, ma o le mea na tupu e leai sona aafiaga i le taimi nei, ae o loo ia lagonaina pea lava le avega o le ta'usalaina. Na vave lava ona oo mai le fuaiupu lea o loo i le Mataupu Faavae ma Feagaiga i lo'u mafaufau ma aumaia ai le filemu i se agaga ua fesouaina. O se matuai

molimau lava ia te au le suesueina o tusitusiga paia i aso uma e maua mai ai se tauai vave."

Ia Tuuina Atu le Molimau e Uiga i Tusitusiga Paia ma Mataupu Faavae o loo Latou Aoaoina Mai

Ao e faalagolago i tusitusiga paia i le faatinoina o faatalanoaga, e tataua ona e tuuina atu ai lau molimau. E mafai foi ona e fetufaai atu ni mea na e oo i ai e faali atu ai le auala na faamanuiaina ai lou olaga faapea ma olaga o isi i le mataupu faavae sa talanoaina.

4

PE A AOAOGA E TAITAI IA FAIAOGA



Afai o oe o se taitai i le Ekalesia, o se tasi o ou tiutetauave sili o le aoaoina lea o faiaoga o loo i ai i lau faalapopotoga i o latou tiute ma taitaiina a latou taumafaiga ina ia faaleleia. O nisi taimi e te faia ai le mea lenei i fonotaga faaleautaitai (tagai itu-lau 160) ma fonotaga mo le faaleleia o faiaoga, ma o nisi taimi e manaomia ai le aoaoina taitoatasi. O au taumafaiga ina ia faataunuuna lenei tiutetauave e mafai ona i ai se sao taua i le lelei o le aoao atu i tonu o le Ekalesia.

Mo faatonuga i mea e tatau ona e faia ina ia taitaiina ai faiaoga taitoatasi, ia tagai i le vaega o le “Aoaoina Atu o le Talalelei ma le Taitaiga” i le *Tusitaulima o Faatonuga a le Ekalesia*, itulau 338–39, ma le *Faaleleia o le Aoaoina Atu o le Talalelei: O Se Taiala a le Taitai*, itulau 4–6. O ni fautuaga nei se lima i le auala e tuuina atu ai le taitaiga o loo faamatalaina atu i nei tusitaulima.

Alofa Moni i Faiaoga Taitoatasi

O nisi taimi tatou te matele ai e faitio, ma mafau faapea afai tatou te faailoa atu i isi o latou sese, o le a latou mananao e suia. E seasea lava ona moni lenei mea. O le faitio e masani lava ona taitaiina atu ai i le tete ma le lotovaivai. O le a sili ona gauai atu faiaoga i au fautuaga pe a latou lagonaina lou alofa faaKeriso mo i latou ma iloa e te manao moni lava e fesoasoani ia i latou. O se tuafafine na iu lava ina avea ma se taitai lelei o faiaoga na i ai se mea na oo i ai i le faatoa amataina lava o lana auaunaga i le Ekalesia na aoao ai ia te ia lenei mataupu faavae. O lenei mea na oo i ai na suia ai lava le auala na ia manatu i ai e uiga i le aoao atu:

“E le’i leva ona ou faaipoipo ae ou maua loa se tofiga i le Aualofa e fesoasoani ina ia faaleleia ia aoaoga. Ou te le’i iloaina i lena taimi, ae sa ou popole tele mo le galuega ae faaleano tele i le faiaoga o le vasega lea sa ou vaaia. Sa o’u tauina atu ia te ia, i ni upu se tele, ‘Sa tatau ona e faia faapenei.’ O le tali na ou maua e le’i faaalua i le auala tonu lenei, ae na oo mai i se auala na aveseina: ‘Ona e faia lea. Afai ou te le o faia le mea e te manatu e tatau ona faia, ona e aveina lea o le vasega.’ Na ou aoaoina ai loa lea o le mea sa ou misia o le alofa. E le’i lava lo’u alofa ia te ia. E le’i lava lo’u faaaloalogaia o ia.”

Ia Faailoa Atu Mea Lelei o Loo Faia e le Faiaoga

E matele lava tagata i le fiafia e faia mea latou te lagona e lelei ona latou faia. O au faamatalaga faamalo faamaoni e faia ai mea e le mafaia e le faitio ona faia, o le faamalosalua lea i faiaoga ma fesoasoani ia i latou e faaauau pea ona faaleleia.

Afai e te alofa i faiaoga o loo e auauna atu i ai, e tatau ona faamaoni au faamatalaga faamalo. Ma o le a e iloaina ai le tele o mea e te faamalo atu ai, aua o faiaoga uma lava taitoatasi e i ai ni mea lelei e aoga ona maitauina. E mafai e se faiaoga ona lelei sona leo e tautala ai, o se taleni mo le taitaia o talanoaga, po o se malamalama lelei i tusitusiga paia po o le talafaasolopito o le Ekalesia. O se isi faiaoga e fuafua lelei, ae o le isi e mafai ona i ai sana molimau malu ma le malosi.

E ao ona patino faamatalaga faamalo. Mo se faataitaiga, e mafai ona e faapea atu i se faiaoga, “Ou te manatu o lau ata na faaalua o le Faaola ua faamalosalua lelei ai lau savali” po o le “Na fesoasoani lau molimau ia te au i le faaiuga o le lesonea na ou lagonaina ai le Agaga” po o le “Ou te fiafia i le auala na e taulimaina ai fesili faigata.” O faamatalaga faamalo patino e masani lava ona sili atu ona faamalosalua nai lo faamatalaga faalauaitetele aua e faaali atu ai ia i latou e te matuai e te alofa ma o le ala foi lea e te maitauina lelei ai.

O le a e maua le tele o avanoa e faailoa atu ai mea lelei e faia e faiaoga. E mafai foi ona e faia i fonotaga e faaleleia ai faiaoga ae

le gata foi i lea pe a outou feiloai taitoatasi ma faiaoga (tagai “Mauaina o le Lagolago mai Ou Taitai,” itulau 29). Ae le manaomia lou faatalitali mo ni faatasiga faapena. E mafai ona e faailoa atu lau faamalo pe a maea se vasega, i le faapaologa, i se tusi e auina atu i ai, po o se telefoni foi. E mafai foi ona e faailoa atu lau faamalo i luma o le vasega pe afai o le a le faalumaina ai le faiaoga.

Ia Faaaloologia Agavaa Paia o Faiaoga Taitoatasi

I le faapoopo atu i le iloaina o tulaga e gafatiaina e faiaoga, e tatau ona e iloaina ia le agavaa paia o faiaoga. O i latou o fanau agaga a le Tama Faalelagi, ma e le muta lo latou malosi. O le faafaileleina lelei ma lo latou lava filiga, e mafai ai ona faaleleia i latou i a latou taleni mao latou tomiai.

Ia Tuu Atu i Faiaoga e Faia e i Latou Lava a Latou Fuafuaga mo le Faaleleia

Afai e iloa e faiaoga e te alofa ia i latou ma talisapaia a latou taumafaiga, o le a sili atu lo latou lagona faamalieina e talosaga atu mo se fesoasoani. Afai latou te fefautuaai ma oe, fesoasoani ia i latou ina ia faia a latou lava fuafuaga e faaleleia ai. O lenei auala e faamamaluina ai le mataupu e faapea o faiaoga (ma, i le tulaga lenei, o taitai) e tatau ona fesoasoani i isi ia tauaveina le tiutetauave mo lo latou lava aoaoina ma le alualu i luma (tagai “Fesoasoani i Tagata Taitoatasi Ina ia Avea ma a Latou Matafaioi le Aoainoa o le Talalelei,” itulau 63–65). E masani lava ona lelei atu le aoaoina o tagata ma alualu i luma pe a taulamua ai i latou. O le mea e masani ai e sili atu i faiaoga ona atinaeina malie i le faavae o a latou fuafuaga nai lo le tuleia o i latou e taitai ina ia vave ona atinaeina (tagai “Faia o o se Fuafuaga ina ia Faaleleia Atili ai Lou Aoao Atu,” itulau 25–28).

Ia Faasa’o ma le Lotomauualalo, Alofa, ma le Taitaiga a le Agaga Paia

E ui lava e sili atu i se tulaga aoao ona faatagaina ia faiaoga e faia a latou lava fuafuaga mo le faaleleia, ae mafai i

nisi taimi ona e tuuina atu ni faasa’oga. Afai e te faia, ia e le gaoia ma ia agamalu. Ia manatua o le aoai atu e tatau ona faia pe a “uunaiina ai e le Agaga Paia” ma e tatau ona mulimuli mai ai le alofa faateleina (MFF 121:43). O le tala lenei o loo faaalua ai nei mataupu faavae taua:

“Sa ou maua i se tasi taimi i le aveai ai ma se tasi o le au epikopo se tofiga i se tasi o korama a le Perisitua Arona. Ina ua ou faatoa alu atu lava i se fonotaga a le korama sa matuai faalavelaveina lava a’u. Na tuuina atu e le fautua se lesona manaia tele ae i le faaiuga na matuai faaleaogaina uma ai lava mea lelei na ia faia i lona faapea atu, ‘Ia, o le mea lenei o loo aoaoina ai i tatou, ae le o le auala moni lenei e tatau ona i ai.’ Na matuai faafememeaiina ai lava au i lenei mea, ma, e aunoa ma le faia o ni faitioga i le fautua, sa ou tuuina atu la’u molimau, ina ia mautinoa ai o loo sa’o le malamalamaaga o alii talavou. I nai vaiaso mulimuli ane, na ia toe faia ai foi le mea lenei. O le taimi la lea, ina ua mavae se lesona matagofie, na ia fesiligia ai le taua o le matua’i usiusitai i le mataupu na ia aoaoina mai.

“Sa ou faatalitali mo ni nai aso ona ou talosaga lea i ai pe mafai ona ma feiloai. Sa ou tatalo ma anapogi ae ou te le’i alu atu i ai. Sa ou lagonaina le matuai alofa mo lenei alii ma mautinoa e le o i ai ni o’u lagona agaleaga ia te ia. Ina ua uma ona ma talanoa e uiga i alii talavou i le korama, sa ou ta’uina atu loa ia te ia lo’u popole i nisi o manatu e le o ogatasi tonu ma mea o loo ootooina mai i le tusi lesona e tatau ona matou aoaoina atu. Na ou tauina atu ia te ia o alii talavou o loo i ai i se vaitausaga o mea moni ma latou te manaomia ia malamalama i le mea moni ina ia mafai ona latou taumafai e ola ai. Na maligi ona loimata, ma amata ona ia fetufaai mai nisi o faigata sa i ai i lona olaga na mafua ai ona ia faia lea faamatalaga. I lona talatalanoaga faatasi, na matuai vavalalata ai lava i ma’ua. E le o le vaiaso na sosoo ai ae o nai vaiaso na lumanai ai na ia ta’ua atu ai i le vasega faapea o mea na ia ta’ua mua e sese, ma e faatoese mai ai. Na ou lagonaina o lona alofa ma le Agaga o le Alii na mafua ai le suiga tele i lona loto. E le tau faamatalaina atu, ae na aveai o ia ma se faiaoga na faateleina lona lelei.”

F

Ο ΜΕΤΟΤΙΑ ΦΑΑΦΑΙΑΟΓΑ



O METOTIA FAAFAIAOGA

O lenei vaega o le *Aoao Atu, E Leai Se Isi Valaauga e Sili Ai* o loo faailoa atu ai le tele o metotia eseese e aoao atu ai le talalelei. O loo lisiina atu faaalafapeta ia metotia. E tatau ona e filifilia ma le faae-teete ia auala, ia teu pea i le mafaufau ia mataupu o loo e aoaoina atu faapea ia manaoga o i latou o loo aoaoina. Ao e filifilia ia auala, ia iloilo ia faamatalaga o loo i le “Aoao Atu i ni Metotia Eseese” (itulau 96–97), “Filifilia o Metotia Talafeagai” (itulau 98), ma le “Filifilia o Metotia Lelei” (itulau 99).

Metotia	Itulau	Metotia	Itulau
Pepa o Gaoioiga	167	Musika	181
Fuaiupu o Gaoioiga	167	Musika e i ai Faamatalaga (Lagi-faaPese-se-Tala) . . .	183
Auala e Faaagaina	167	Lesona Faatino	184
Gaoioiga e Faatosina Mai Ai (Faagauai Mai Ai)	168	Masini Malamalama	184
Mea mo Fesoasoani Vaaia (Kaseti Vitio ma Lipine Faalogologo)	168	Talanoaga Faavaega	184
Manatu Palepalealuga	168	Ata Pepa e Faatutu i Luga	185
Taimi o Fesagisagia'iga	169	Ata	185
Tulaga Faatusa e Aoao Ai	170	Papeti	186
Laupapa	170	Fesili	186
Faitau Faatasi	171	Ata Faasolo e Faatino e le Aufaitau	186
Faatusatusaga ma Lesona Faatino	171	Faatauloto	187
Faatinoga	173	Vaega e Faatinoina	187
Ata tusi po o Ata Malamalama	174	Pusa e Faasolo ai Ata	188
Talanoaga	174	Tusitusiga Paia, Makaina ma le Tusiaina o Faamatalaga i Autafa	188
Tala Faatino	174	Tusitusiga Paia, Taulotoina o	188
Gaoioiga Tusiata	175	Tusitusiga Paia, Faitauina Leotele	188
Faataitaiga	176	Tusitusiga Paia, Fesoasoaniga mo Suesuega i	189
Laupapa le Mamoe	177	Tusitusiga Paia, Aoauga mai	189
Taaloga	177	Lagi-faaPese-se-Tala	189
Failauga Faapitoa	179	Nofoaga po o Potu	189
Faamatalaga Faaaoaoga	179	Tala	189
Faatatauga	179	Fesoasoani Vaaia	191
Faafanua	180	Laupapa Paepa'e	192
Taulotoina	181	Pepa o Galuega	193

PEPA O GALUEGA

Tagai i “Pepa o Galuega,” itulau 193–94.

FUAIUPU O GAOIOIGA

E fiafia tamaiti laiti i solo ma pese e i ai ni nai taga faigofie. O nei solo ma pese e masani ona faatatau i ai o fuaiupu o gaoioiga. E mafai ona e faaaogaina ia fuaiupu o gaoioiga e fesoasoani ai i tamaiti e aoaoina ia mataupu o le talalelei. E mafai foi ona e faaaogaina e fesoasoani ai i tamaiti ia lagonaina le faafeiloaia i le amataga o le vasega, saunia e tatalo, pe saunia e auai i le faatinoina o mea e fai i se lesona.

E fesoasoani tele le i ai o ni fuaiupu o gaoioiga eseese e sauni e faaaoga i soo se taimi e vaaia ai le manaomia ona suia o le saosasoa o se lesona pe faaaofia ai ia tamaiti i se gaoioiga.

O manatu mo fuaiupu o gaoioiga ma pese o loo aofia i totonu o le *Tusipese a Tamaiti*, o nisi o tusi lesona a le Peraimeri, ma nisi o lomiga o le Vaega a Tamaiti i le *Liahona*. E mafai ona e faia lava e oe ia au fuaiupu o gaoioiga e ala lea i le faaopoopo atu o ni taga faigofie i solo ma pese.

Faataitaiga o se Fuaiupu o Gaoioiga

O le fuaiupu o gaoioiga lenei e mafai ona faaaogaina e aoao ai tamaiti ina ia faafetai atu ai mo foafoaga a le Atua. E aumaia mai le pese a le Peraimeri o le “Ua Tele Naua le Lalolagi” (*Children’s Songbook*, 235).

Ua tele naua le lalolagi, ioe ua lapotopoto naua,
[faia se li’o lapoa i lima]

E maua uma ai mea na faia e le Atua;
E fepulafi mai fetu i le po atoa,
[faasasa’o ma faatetetete tama’ilima]

O le la i le ao e mafanafana ma malamalama,
[faia se li’o lapoa i lima]

Ua tele naua le lalolagi, ioe ua lapotopoto naua.
E alofa le Atua ia i tatou uma; o o tatou faamanuiaga
ua tele naua.

[piilima ma fusi oe lava ia]

O le Auala e Aoao Atu ai se Fuaiupu o Gaoioiga

Ao lei aoaoina atu se fuaiupu o gaoioiga, ia tauloto upu ma gaoioiga e oe lava ia. Ina ia aoao atu se fuaiupu o gaoioiga:

1. Ta’u upu ma faaali atu taga i tamaiti. Faifai lemu, ma faamanaia ia taga. O le a fesoasoani lea i tamaiti ia malamalama ai i upu ma taga.
2. Ia valaaulia tamaiti latou te faia le fuaiupu o gaoioiga faatasi ma oe.
3. Afai e fiafia i ai tamaiti i le fuaiupu o gaoioiga, ona toe fai lea. Afai ua latou le lavava, ona faapupuu lea. Afai e

umi le fuaiupu o gaoioiga, atonu e te manao e fesoasoani i tamaiti ia faia taga ae fai e oe upu.

Atonu e te manao mai lea taimi i lea taimi e faaaoga ia ata e fesoasoani ai e tuuina atu le fuaiupu o gaoioiga. O ata mai le Taga Ata o le Talalelei ma tusi lesona e gaosia e le Ekalesia ma mekasini a le Ekalesia e mafai ona fesoasoani tele. Atonu e te manao e mafaufau i le faaaogaina o se seti o Ata Tipi o Fesoasoani Vaaia a le Peraimeri (o loo maua i le *Church Materials Catalog*).

O nisi o tamaiti e le mafai ona auai i le fuaiupu o gaoioiga ae fiafia e matamata i isi o loo faia ia taga. O le a latou auai atu pe a latou saunia.

AUALA E FAAAOGAINA

I le avea ai ma se faiaoga o le talalelei, o se tasi o au sini sili ona taua o le tatau lea ona e fesoasoani i isi ina ia faaaogaina ia mataupu o le talalelei i soo se tulaga i aso uma. O auala e faaaogaina ai e mafai ona fesoasoani i tagata o loo aoaoina e iloaina ia faamanuiaga lea e oo mai pe a tatou ola i le talalelei.

O loo i lalo ifo nisi o auala lea e mafai ona fesoasoani ia i latou o loo e aoaoina ia ola i mataupu na e aoaoina atu. O nei auala ma le tele o isi auala o loo faamatalaina atu i le vaega lenei o le tusi.

- Ia talanoaina ia ni tulaga e tali tutusa ma ni tulaga atonu ua malamalama i ai i latou o loo aoaoina. Ia faaaoga tala faatino, talanoaga faavaega, gaoioiga faavaega, taaloga, pepa o galuega, tulaga faatusa e aoao ai, po o manatu palepalealuga e talanoaina ai pe faapefea ona faia ni faaiuga sa’o i na tulaga.
- Ia saunia ni fesili patino e faatatau i ai ina ia talanoaina faatasi ma le vasega.
- Ia fetufaai atu se mea na e oo i ai e uiga i le ola ai i se mataupu o le talalelei na faamanuiaina ai lou olaga. Ia valaaulia i latou o loo e aoaoina ina ia fetufaai faapupuu atu ni mea na latou oo i ai.
- Ia uunaia i latou o loo e aoaoina ina ia faatuina se sini se tasi po o le sili atu lea e mafai ona fesoasoani ai ia i latou e ola ai i se mataupu na e aoaoina atu. Mo se faataitaiga, i se lesona e uiga i le tatalo, e mafai ona e uunaiina i latou e faatuina se sini lea o le a fesoasoani ai ia i latou ina ia tatalo i se auala sili ona ‘anoa. E mafai ona e talosaga atu ia i latou e fetufaai mai o latou lagona i le vaiaso a sau.
- Ia fetufaai atu ia mau na o loo molimauiina ai le mataupu faavae. Ia tuu atu ia i latou o loo e aoaoina ina ia fetufaai mai ni mau po o ni tala faatusipaia e fiafia i ai.
- Ia talosaga atu i tagata o loo aoaoina ina ia mafaufau i se pese e fesoasoani ia i latou e manatuaina ai le

mataupu faavae. Ia fautua atu pese e mafai ona latou faaaogaina.

- Ia uunaiina i latou e te aoaoina ina ia fetufaai atu le savali o le lesona i o latou aiga. Mo se faataitaiga, e mafai ona latou fetufaai atu se gaoioiga, pese, pepa o galuega, po o se mau sa faaaogaina i le vasega. Ona tuu atu lea ia i latou e talanoaina ma o latou aiga pe mafai faapefea ona latou faaaogaina le mataupu faavae.
- Tuu atu ia i latou o loo e aoaoina e tusi se mau, upusii, solo, po o se vaega o se pese i luga o se fasi pepa e mafai ona latou aveina atu i le fale ma avea o se faamanatu o le lesona.
- Tuu atu i tamaiti e tusi se ata o i latou lava o loo ola ai i le mataupu faavae.
- Fesoasoani ia i latou e taulotoina se mataupu o le faatu-atua e faatatau i le mataupu faavae. Ia faamatala atu i tamaiti se tasi o vaega o loo i le “O O’u Faatulagaga o le Talalelei” o loo i tua o le tamaitusi *O O’u Aso o Faataunuuga* e fetau i le mataupu faavae.
- Pe toe tasi masina o loo lumanai, ona tofiaina lea o ni nai tagata o loo aoaoina ina ia suesue se lesona patino ma faatatau i o latou olaga. Afai e te aoaoina atu le lesona, ia tuu atu i tagata ua tofia e lipoti atu ia mea na latou oo i ai.

GAOIOIGA E FAATOSINA MAI AI (FAAGAUAI MAI AI)

O gaoioiga e faatosina mai ai e mafai ona faaaogaina e faatupuina ai le fiafia ma fesoasoani ai i tagata o loo aoaoina e taulai atu lo latou gauai i le mataupu o le lesona. E tatau ona puupuu ma tuusa’o i le lesona. E masani lava ona faaaogaina i le amataga o lesona, ae e mafai foi ona faaaoga e pu’epu’e mai ai le gauai o tagata o loo aoaoina i le taimi o lesona ma ia faia ai se fesuaiga mai se tasi vaega o le lesona i le isi. O le tele o lesona o loo totonu o tusi lesona ua gaosia e le Ekalesia o loo aofia ai fautuaga mo gaoioiga e faatosina mai ai.

Mo fautuaga i le faaaogaina ma le atinaeina o gaoioiga e faatosina mai ai, tagai “Amataina o le Lesona,” itulau 100, ma le “Fesoasoani i Tagata o Loo Aoaoina ina ia Gauai Mai,” itulau 74–76.

FESOASOANI VAAIA (KASETI VITIO MA LIPINE FAALOGOLOGO)

E mafai ona e faaaogaina mai lea taimi i lea taimi ia kaseti vitio ma lipine faalogologo na gaosia e le Ekalesia ina ia fesoasoani ai i le aoaoina atu o mataupu faavae o le talalelei. O nisi mea ua fuafuaina ina ia faaaogaina faatasi ma ni lesona patino i ni vasega ma’oti e aoao ai. O isi e mafai ona faaaogaina i lesona eseese. Tagai i le *Church*

Materials Catalog o loo i ai nei mo se lisi o mea mo fesoasoani vaaia e gaosia e le Ekalesia o loo maua.

I tulaga faaleEkalesia e masani ona tetee i tulafono o le pule taofia le faaaogaina o ni mea mo fesoasoani vaaia e le o umiaina e le Ekalesia. Mo taiala i tulafono o le pule taofia, ia tagai i le *Tusitaulima o Faatonuga a le Ekalesia, Tusi 2: Taitai Perisitua ma Ausilali*, itulau 362–64.

O le Auala e Faaoga ai Fesoasoani Vaaia

1. Vaai ma faalogo i le sauniuniga o le a tuuina atu a’o le’i faaaogaina i le vasega. Ia mautinoa e faamalosiua pe lagolagoina ai foi le lesona.
2. Ia tapenaina le sauniuniga e tuuina atu ina ia amata i le taimi tonu e te manaomia ai i le lesona. O le tulaga masani lava, e tatau ona e faaaogaina na o ni nai vaega pupuu; o fesoasoaniga vaaia e le tatau ona alu uma ai le taimi atoa o le lesona.
3. Ia saunia le masini ae le’i amataina le vasega. Ia mautinoa o loo lelei atoatoa. Ia mautinoa foi o le a mafai e tagata o loo aoaoina ona faalogo i ai ma vaai i ai mai o latou nofoaga.

Afai e te faaaogaina le sauniuniga e tuuina atu e avea o se vaega o le lesona, ia mautinoa ia avea o se meafaigaluega e aoao atu ai ae le o se faafiafiaga. Mo se faataitaiga, e mafai ona e uunaia ia tagata o loo aoaoina ina ia vaai mo ni mataupu faavae ma’oti po o ni tulaga patino i le taimi o le vitio. Pe mafai foi ona e tuuina atu ia i latou e tauaofai le savali o se lipine faalogologo pe a maea.

MANATU PALEPALEALUGA

I se gaoioiga o manatu palepalealuga, e tuuina atu ai e le faiaoga se fesili po o se tulaga ma tuuina atu i tagata o loo aoaoina sina taimi faatulagaina ina ia saoloto ai le tuuina mai o ni tali po o ni manatu.

Faataitaiga o Gaoioiga o Manatu Palepalealuga

E mafai ona e faaaogaina manatu palepalealuga e faailoa atu ai se manaoga o loo i lou aiga, korama, po o le vasega. Mo se faataitaiga, e mafai ona e tuuina atu i tagata o loo aoaoina e faatulagaina se galuega fesoasoani, fautua atu ni auala e valaaulia ai i se gaoioiga se tagata e le toaga, pe fetufaai atu foi ni manatu mo le faaleleia o taumafaiga mo aoaoga i aiga.

E mafai foi ona e faaaogaina manatu palepalealuga e faaso ai ni manatu i se mataupu autu i se lesona. Mo se faataitaiga, e mafai ona e talosaga atu ia i latou o loo e aoaoina ina ia faaaluina ni nai minute e lisi mai ai ni faamanuaga na latou mauaina e ala mai i le perisitua po o mea e mafai ona latou faia ina ia avea ai ma ni faataitaiga lelei i le avea ai ma tagata o le Ekalesia.

O le Auala e Faatinoina ai se Gaoioiga o Manatu Palepalealuga

1. Ia faamalamalama atu le uiga o manatu palepalealuga. Ia ta'u atu ia i latou o loo e aoaoina o le a e tuuina atu ia i latou sina taimi puupuu e tuu mai ai ni manatu. Ia mautinoa ua latou malamalama e te le faitioina i latou pe ulagia foi ni o latou manatu, ma fesoasoani ia i latou ia malamalama e le tatau ona latou faitio ma ulagia ia manatu o isi. Talu ai ona o le natura lava ia o manatu palepalealuga, e manaomia ai lou fai atu ia i latou ina ia faaaloalo i a latou mea e fai ma fautuaga.
2. Ia tuu atu se fesili po o se tulaga ma'oti. Ia mautinoa ia iloa e tagata o loo aoaoina le tele o le taimi e tuu mai ai a latou fautuaga.
3. Ia tuu atu i tagata o loo aoaoina e aumai o latou manatu. Afai latou te mumusu e amataina ni manatu palepalealuga, atonu e manaomia lou uunaiina o i latou ina ia amataina e ala lea i lou fautuaina atu e oe o ni nai manatu. Ia saili ni auala e aofia ai tagata taitoatasi o e e foliga mai e mumusu e auai.
4. Ao tuuina mai e tagata o loo aoaoina ia fautuaga, ia lisiina ia fautuaga i luga o le laupapa po o se fasi pepa pe tuu atu i se isi tagata na te lisiina.
5. Afai e uma le taimi, ona talanoaina lea o fautuaga na tuuina atu e tagata o loo aoaoina. Ia valaaulia i latou e toe faamanino atu o latou manatu ma talatalanoa e uiga i ai i le auala e faatatau ai i le lesona. Afai o le faamoemoega o le gaoioiga o le fuafuaina lea o se mea e faia, e pei o se galuega fesoasoani po o se fuafuaga e valaauliaina atu i se gaoioiga ni tagata le toaaga, ia fesoasoani ia i latou e filifilia se fautuaga se tasi. Ona fesoasoani lea ia i latou e faia ni fuafuaga e mulimuli ai i lena fautuaga.
6. Afai latou te fetuفاai mai ni manatu e faamaoni ae o loo atagia mai ai ni aoaoga sese, ia faaalu se taimi o le lesona e faasa'o ai i se agaga lelei ia na manatu.

FETUFAAIGA I VAEGA

O fetuفاaiga i vaega o gaoioiga ia e vaevaeina ai ia tagata o loo aoaoina i ni vaega laiti. E talanoa ia vaega e uiga i ni autu ua filifilia ona fetuفاai atu lea o o latou manatu ma isi. E mafai ona e faaaogaina ia fetuفاaiga i vaega e tuu atu ai i se vaega toatele o tagata le avanoa e auai ai i se lesona. O tagata taitoatasi o e e masani ona mumusu e auai e mafai ona fetuفاai mai ni manatu i vaega laiti lea e le mafai ona latou faaali atu i luma o le vaega atoa. O le a fesoasoani lea ia i latou e iloa ai o o latou manatu e taua tele i isi.

E i ai taimi, e mafai ai e vaega ona fetuفاai atu o latou manatu e ala lea i pepa lautetele po o siata po o ni ata tusi. Mo se faataitaiga, e mafai ona e talosaga atu ia i latou e

tusi ni vaega eseese o le tala faatusipaia lava lea e tasi po o mea latou te faafetai atu ai.

Faataitaiga o se Fetuفاaiga i Vaega

I se lesona e uiga i le sauniaina e auauna atu faamisiona talai, e mafai e se faiaoga o se korama a toeaina ona vaevaeina uso o le korama i ni vaega se lima ma tuu atu i vaega taitasi e saunia se lipoti e faatatau i se fesili o nei fesili:

- O a mea e mafai e alii talavou ona fai ina ia saunia ai e auauna atu faamisiona talai?
- O a mea e mafai e tama ona fai e fesoasoani ai i o latou atalii e saunia e auauna atu faamisiona talai?
- O a mea e mafai ona fai e faiaoga o aiga e fesoasoani ai i tama ma alii talavou e saunia ai e auauna atu faamisiona talai?
- O a mea e mafai ona fai e fautuaga o le Perisitua Arona ina ia fesoasoani ai i alii talavou e saunia ai e auauna atu e faamisiona talai?
- O a mea e mafai ona fai e tagata matutua e saunia ai i latou lava e auauna atu faamisiona talai?

E mafai ona e faaaogaina le faatulagaga lava lena e faia ai isi autu mo fetuفاaiga i vaega.

O le Auala e Taitaia ai se Fetuفاaiga i Vaega

O laasaga nei e faaali atu ai le auala e taitaia ai se fetuفاaiga i vaega. Ao e fuafua e taitaia se fetuفاaiga i vaega, ia fuafua po o le a le uumi o nei laasaga taitasi. Ia mautinoa o le faagasologa o le a le tele se taimi o le lesona e alu ai.

1. Vaevae le vasega i ni vaega ia le itiiti ifo ma le ta'i toatolu tagata. (Pe e te mana'o foi e na ona talosaga atu i tagata o loo aoaoina ina ia faliu atu i le isi tagata o loo sosoo ma ia mo se talanoaga faavavevave. Afai e te filifilia lena faiga, o le a e manaomia ona fetuفاai ia laasaga 2 e oo i le 6.)
2. Filifili se taitai mo vaega taitasi, pe tuu atu i vaega e filifilia o latou taitai. Ia tofia foi se tasi na te tusitusia faamaumau a vaega taitasi. Ia tuu atu i failautusi taitasi se fasi pepa ma se peni po o se penitala. E faamaumauina e le failautusi tali a le latou vaega i le taimi o le talanoaga. E faaaauu pea e taitai ia talanoaga ma lipoti mulimuli ane ia manatu o le latou vasega. (Afai e te taitaia le ituaiga fetuفاaiga i vaega lea e tusia ai e vaega ia ni ata, ona tuu atu lea i vaega taitasi ia mea latou te manaomia, e pei o pepa, penitala, ma ni vali.)
3. Ia tuu atu i vaega taitasi se autu e faatatau i le lesona. E mafai ona e talosaga atu i vaega uma ina ia talanoaina le autu lava e tasi, pe tuu atu foi i vaega taitasi ni autu eseese. E mafai ona fesoasoani tele le tuuina atu i vaega taitasi o se fasi pepa ma se autu ua tusia ai i luga.
4. Ia tuu atu i vaega se aofaiga faatulagaina o le taimi e talanoaina ai a latou autu. Ia mautinoa ia latou tutumau

pea i le autu. Ia lapataiina i latou i le toe tasi pe toe lua minute ae le'i maea.

5. Ia valaaulia taitai o vaega taitasi e tuuina atu ia manatu na maua mai i le talanoaga a le vaega. (Afa'i na talanoaina e vaega uma le autu e tasi, ona tuu atu lea i taitai o vaega taitasi e feauauai i le fetufaaiina mai o manatu taitasi. Aua a leai, e mafai lava e vaega e muamua ona tuu atu i ai le avanoa ona fetufaai mai ni manatu se tele, ae tuu ai isi vaega o le a tau leai ni manatu e fetufaai mai.)
6. Ia tauaofai ia manatu na tuuina mai, ia mautinoa ua matuai lava le talanoaina o le autu. Ia mautinoa ua malamalama tagata o loo aoaoina i le auala e faatatau ai a latou talanoaga i mataupu faavae o loo e aoaoina atu.

TULAGA FAATUSA E AOA O AI

O tulaga faatusa e aoao ai, o ni tulaga ia e moni i le olaga lea e uunaia ai tagata o loo aoaoina ina ia mafaufau loloto pe a talanoaina mea e mafai ona latou faia i tulaga faapea. E mafai ona fesoasoani e faailoa mai ai pe faapefea ona faaogaina ia mataupu faavae o le talalelei i le olaga i aso uma. E mafai ona e faaogaina ia tulaga faatusa e aoao ai e uunaia ai talanoaga, faamamafa atu ai le mataupu autu o se lesone, pe faaiuina ai foi se lesone.

O tulaga faatusa e aoao ai, e mafai ona faavae i luga o tala moni po o ni mea e fatuina e foliga mai e moni. Afa'i e te faaogaina se tulaga faatusa e faavae i se tala moni, atonu e te manao e fetufaai atu le taunuuga o le tala i se taimi o le lesone.

Faaitaiga o Tulaga Faatusa e Aoao Ai

O nisi nei o faaitaiga e fa o tulaga faatusa e aoao ai faatasi ai ma fesili e talanoaina.

Tausiaina o Isi ma le Agalelei

Sa e taalo i le taeao atoa ma nisi o uo i lo outou vaiaai ma sa outou matuai fiafia lava. O se teineitiiti o loo asiasi atu i le aiga o loo i le isi itu auala ua sau i fafo ma e foliga mai e manao e taalo ma outou.

- O le a le mea e tatau ona e faia?

Totogiina o se Sefuluai Atoa

Ua oo i le tau faaiiuga o Tesema, ma ua tilotilo foi ia Brother ma Sister Jones i a la mea tau tupe o le masina. Ua la iloa e le mafai ona totogiina uma a la'ua pili pe afa'i e totogiina le la sefuluai.

- Afa'i e te i ai i le tulaga lea o loo i ai ia Brother ma Sister Jones, o le a se mea e te faia?

Fetufaai atu le Talalelei

Ua leva ona fuafua i le tele o masina e te alu atu i le malumalu faatasi ma isi alii ma tamaitai talavou i le uarota e faataunuuna papatisoga mo e ua maliliu. Ua valaaulia oe e se uo e le auai i le Ekalesia i se pati e faia i le afiafi foi lava lena. Ua e fai atu i ai e le mafai ona e alu atu i le pati, ma ua fesili atu lau uo ia te oe po o a au mea o le a fai i lena afiafi.

- O le a faapefea ona e tali atu?

Faia o Faaiuga Sa'o

Ua valaaulia oe e se uo e te lua o i se tifaga e te iloa e le talafeagai.

- O le a se mea e mafai ona e faia e teena ai le valaaulia?

E Faapefea ona Amatalia se Tulaga Faatusa e Aoao Ai

O nisi o lesone o loo i totonu o tusi lesone ua gaosia e le Ekalesia o loo aofia ai ia tala ia e mafai ona faaogaina e avea ma tulaga faatusa e aoao ai. Ae peitai, e i ai taimi e te manao ai e faia lava ni au oe tulaga faatusa e aoao ai. Ina ia faia la lea tulaga, ia mulimuli i laasaga nei:

1. Ia teu i le mafaufau ia mataupu ia ua e saunia e aoao atu. Ona mafaufau lea i tulaga na e faatatau i na mataupu ma e faatatau foi i tausaga o le vaega o loo e aoaoina.
2. Ia saunia e tuuina atu ia tulaga i se auala moni ma se auala o le a faatupuina ai manatu ma le talanoaga (tagai "Taitaia ia Talanoaga," itulau 66–68; "Aoa Atua i Fesili," itulau 71–73; "Tala," itulau 189–90).
3. Mafaufau po o le a se mea e mafai ona e ta'u atu pe faia ina ia faamalosi ai ia mataupu faavae pe a maea le talanoaga.

LAUPAPA

O le laupapa o se tasi lea o meafaigaluega sili ona faigofie ma sili ona saunia e faaogaina. E mafai ona e faaogaina le laupapa e:


- Faamamafa atu ai manatu autu ma fesoasoani ai i tagata o loo aoaoina ina ia manatuaina.
- Faailoa atu ai manatu o tagata o loo aoaoina e ala lea i le tusiina i lalo.
- Taitaiina ai talanoaga e ala lea i le tusiina i lalo o fesili ma lisiina tali a tagata o loo aoaoina. Mo se faaitaiga:

PE A TATOU TATALO

Tatou te faafetai atu
i le Tama Faalelagi mo:

Tatou te ole atu
i le Tama Faalelagi mo:

Faamanino atu ai manatu po o tala e ala lea i le faaalina atu i se auala faigofie. Mo se faataitaiga:



- Ia faia ni ootoga po o ni lisi ina ia fesoasoani ai i tagata o loo aoaina ia mulimuli i se talanoaga.
- Ia lisiina ia tofiga po o mau e faatatau i le lesona o loo ai nei po o le isi lesona.

Taiala mo le Faaogaina o le Laupapa

O taiala nei e mafai ona fesoasoani ia te oe i le faaogaina o le laupapa e avea o se meafaigaluega lelei e aoao atu ai. O nei taiala e faatatau foi i lou faaogaina o masini malamalama ma laupapa papa’e.

- Fuafua ma faaitai mea o le a tusia, mafaufau pe o le a faapefea ona e faatulagaina ia faamatalaga po o ata. Faaitai le tusiga o soo se ata o le a e faaogaina.
- Afai e te fuafua e faaogaina se ootoga, se lisi, po o se ata i luga o le laupapa, atonu e te manao e faia leni mea ae le’i faia le vasega ona ufiufi lea i se pepa, faatoa faaali lava i le taimi talafeagai o le lesona.
- Tusi manino ma ia lava le lapopoa mo tagata uma e vaai atu i ai, ia mautinoa o mea ua tusia ia lelei le va, faatulagaina, ma ia faigofie ona faitau. Tusi na o upu po o fuaitau autu.
- Faaoga na o ata po o faailoga faigofie e faamatala ai tala po o ni manatu. Afai o le a e faafaigofieina ia ata ma faailoga, o le a e taofia ai foi le avea o ata ma faailoga ma vaega autu e taulai atu i ai i le lesona.

- Ia taofiofia pea le fiafia o i latou o loo e aoaina e ala lea i lou tautala pea ae o loo e tusitusi.
- Aloese mai le umi o le taimi e faaaluina i luga o le laupapa. E mafai ona faatupuina ai le le fiafia o i latou o loo aoaina i le lesona.
- Aua e te faatoese atu mo lou sipelaina o upu, tusitusi, po o le le lelei foi o lau tusiata. O le faatoese atu o le a na o le pau lena o le mea o lau tusitusi po o lau tusiata o le a taulai atu i ai. Afai e le lelei lau faalogona i le laupapa, talosaga atu i se isi e fesoasoani atu.
- Ia talosaga atu i se tasi mai lea taimi i lea taimi na te tusia ni mea i luga o le laupapa mo oe ina ia mafai ona e vaai atu pea i tagata o loo aoaina. Ia mautinoa o loo malamalama le tagata o loo fesoasoani atu ia te oe i le mea o loo e manao na te tusia ae po o fea foi i luga o le laupapa e tatau ona ia tusia ai.

FAITAU FAATASI (tagai foi ATA FAASOLO E FAATINO E LE AUFAITAU; FAATAULOTO)

I se faitauga faatasi, e faitauina faatasi e se vaega se mau, solo, po o se fuaiupu. O se faitauga faatasi e mafai ona faia i totonu o le vasega pe faatinoina foi mo se aumaimoa.

E mafai ona e faaogaina leni auala e tuuina atu ai tala faatusipaia, o tala, o solo, ma isi faamatalaga. E mafai foi ona e faaogaina o se vaega o se polokalama faapitoa mo aso malolo po o aso faailogaina faapitoa.

Faataitaiga o se Faitau Faatasi

Autu: Mataupu o le Faatuatua

Faagasologa: Tuu atu i tagata o loo aoaina e toe faamanatu Mataupu o le Faatuatua ona toe faamalau faatasi atu lea ia te oe.

O le Auala e Fafoeina ai le Faitau Faatasi

- Filifili se mea e lagolagoina ai le autu o le lesona. O mea e talafeagai e mafai ona maua i tusitusiga paia, tusi lesona e gaosia e le Ekalesia, mekasini a le Ekalesia, ma le Tusipese a Tamaiti.
- Afai o le a outou faatinoina se faitauga faatasi mo se aumaimoa, ia tuu atu i le vaega e faataitaia le faitauina o le latou vaega ina ia mafai ai ona latou tautatala faatasi. Ia mautinoa ua matuai manino lo latou ta’uina atu o upu ma faaogaina ia manava ma le suiga o le leo ma le saosaoa o o latou leo ina ia tuu atu ai le aano o le savali. I le taimi o le faatinoga, taitai i latou ina ia mafai ona latou tauina atu faatasi a latou vaega.

FAATUSATUSAGA MA LESONA FAATINO

E masani ona faigata ona aoao atu ia vaega maaleale o le talalelei—mataupu e pei o le faatuatua, salamo, alofa, o

le Togiola a Iesu Keriso, faamagaloina o agasala, ma le togilaina. Na saunoa mai Elder Boyd K. Packer:

“I le aooina atu o le talalelei, tatou te le toe gaosia le lalolagi faaletino o loo siomia ai i tatou; tatou te feagai ma le lalolagi e lē mafuatiaina e le mafaufau o loo i totonu ia i tatou, ma e i ai se eseese tele lava. E leai ma se meafaigaluega masani o ia i tatou. Ina ia taufaamatala atu i se tamaitiiti laitiiti e uiga i se e sili atu ona faigofie nai lo le faamatalaina atu e uiga i le faatuatua; e faigata tele ona faamatalaina le faatuatua.

“Mo se faataitaiga, e faapefea le tele o le faatuatua? E le pine ae tatou iloaina e leai se aoga o le tele o le faatuatua. E mafai ona tatou talanoa atu i se tamaitiiti pe o le a le tele o le faatuatua, po o le laitiiti foi, ae nenefu lona malamalama e uiga i ai. E le mafai ona tatou ta’uina atu ia te ia po o le a le lanu. E le mafai ona tatou ta’uina atu ia te ia po o a ona foliga. E le mafai ona tatou ta’uina atu ia te ia lona tino mai.”

Ona fetuفاai mai lea e Elder Packer se meafaigaluega e mafai ona tatou faaaogaina e aoao atu ai e uiga i mataupu e lē mafuatiaina i le mafaufau: “Ia faafesootai le mataupu e le o mafai ona vaaia . . . i se mea e mafai ona vaaia ua uma ona iloa e tamaiti ona amata ai lea ona fausia mai lena malamalama” (*Teach Ye Diligently*, rev. ed. [1991], 31–32).

E mafai ona e faaaogaina ia faatusatusaga ma lesona faatino e fesoasoani ai i tagata o loo aooina ia malamalama i mataupu maaleale. Faatasi ai ma le faaaogaina o tala ma le molimau a le tagata lava ia, o nei auala e tuuina atu ai ia te oe ni meafaigaluega lelei mo le aooina atu o mea moni o le faavavau lea e le mafai ona tatou vaaia i o tatou mata.

Ao e faaaogaina ia faatusatusaga ma lesona faatino, ia manatua e tatau pea ona toe faamalosi ai le faamoemoega o le lesona ma e le tatau ona latou o ese mai mataupu o le talalelei o loo e aooina atu.

Faatusatusaga

Na masani ona faaaoga e le Faola ni mea faitino faalelalolagi po o ni mea e masani ai ina ia fesoasoani ai i Ona tagata na faalogologo ia te Ia ia malamalama i mataupu faaleagaga. Na ia fetalai e uiga ia te Ia lava o le “areto o le ola” (Ioane 6:35) ma “le leoleo mamoe lelei” (Ioane 10:11, 14). Na ia aoao atu i Ona soo ina ia saili le mamoe ua leiloa (tagai Mataio 10:5–8) ma ia fafaga i Ana tamai mamoe (tagai Ioane 21:15–17). Na faatusatusaga e le Alii le malo o le lagi i se ‘oa, se penina, ma se upega fagota (tagai Mataio 13:44–48). Na ia faatusatusaina le faatuatua i le fatu o se sinapi (tagai Mataio 17:20). Na ia faapea mai foi e iloa tagata i o latou fua (tagai Mataio 7:15–20). I Ana lesona, o se faitotoa vaapiapi na ave lea ma ala i le ola faavavau (tagai Mataio 7:13–14) ma na ave Ona soo ma fai faiva i tagata (tagai Mataio 4:18–19). Na ia fetalai foi i le faopotopotoina o Ona tagata e pei ona ofaofatai e le matuamoa i

lana toloai i lalo o ona apaau (tagai Mataio 23:37).

Faatasi ai ma le faatinoina ma mafaufauga, e mafai ona e mauaina ni faatatauga o le talalelei i ni mea faitino e masani ai. Mo se faataitaiga, e mafai ona faatusatusaga le talalo i se leitio, e mafai ona faatusatusaga se faamanuiaga faapeteriaka i le Liahona, ma e mafai ona faatusatusaga le faamoemoe i le oso a’e o le la i le va o ao. E mafai ona e vaaia ni lesona i ni mea e te oo i ai i le galue, i galuega fai soo i le fale, po o a outou fegalegaleaiga ma isi tagata (tagai “Sailia o Lesona i Soo se Mea,” itulau “00” [22–23]).

Na fautua mai e Elder Packer se fua faatatau mo le sailia o ni faatusatusaga:

_____ e pei o _____

E pei ona faaalua i lalo, o lenei fua faatatau e mafai ona faaaogaina e aoao atu ai e uiga i le salamo. O le mataupu maaleale o le salamo e matuai manino lava pe a tatou faatusatusaina i se mea faigofie ma masani ai. Na aoao mai Elder Packer:

“Se’i faaaoga la le mataupu lea o le *salamo*.

“ O le salamo e pei o le _____

“O le a se mea lea e masani ona faaaogaina e tagata e mafai ona pei o le salamo? Se’i faapea la tatou te faaaogaina le fasimoli.

“ O le salamo e pei o le fasimoli ”

(tagai *Teach Ye Diligently*, 36–37; tagai foi i le itulau 34).

O Isi Faataitaiga o Faatusatusaga

O se lisi lenei o isi faatusatusaga e mafai ona e faaaogaina ao e aooina atu le talalelei:

O le suesueina o tusitusiga paia e pei lava o se tausamaaga.

O fanau e pei o ni oloa.

O le faatuatua e pei o se talita.

O tusitusiga paia e pei o se vaa faaola i vasa sousou.

O le agasala e pei o le oneone mimiti.

Lesona Faatino

E pei o faatusatusaga, o lesona faatino e faatatau ai mataupu maaleale i ni mea faitino e masani ai. Ae peitai, i se lesona faatino, e te faaaogaina ai mea faitino tonu nai lo le na ona talanoaina. Mo se faataitaiga, ina ia fesoasoani i tagata o loo aooina ia malamalama i aafiaga o le faamamaina i le salamo, e mafai e se faiaoga ona faaali atu se tipiga fasi moli ma faaaogaina foi e fufulu ai le palapala mai ona lima.

O Isi Faataitaiga o Lesona Faatino

O faataitaiga nei o loo faamatala atili mai ai pe faapefea ona faaaogaina ia lesona faatino:

- Ina ia faaali atu o sauniga ma feagaiga e le mafai ona tuueseeseina, ia faaali atu se tupe siliva. Ona fesili atu lea po o le fea itu o le tupe e sili atu ona taua. (E leai se itu e sili atu ona taua.) Fesili atu i tagata o loo aooina pe

mafai ona latou tuueseeseina ia itu o le tupe. Ona faamatala atu lea faapea, o sauniga ma feagaiga e le mafai ona tuueseeseina, e pei lava ona le mafai ona tuueseeseina o itu o se tupe siliva. Ia faailoa atu foi o sauniga ma feagaiga e tatau ai mo le ulufale atu i le afioaga o le Atua, e pei lava ona manaomia o le tupe i nisi taimi mo le ulufale atu i faafiatiaga.

- Ina ia faamamafa atu faapea o tagata taitoatasi uma lava e taua, ia tuu atu i tagata o loo aoaoina e faatulagaina se paso faigofie lea ua e aveeseina ai se vaega se tasi. Afai latou te talosaga mai mo le vaega ua misi, ona tuu atu lea ia i latou. Fesili atu ia i latou pe aisea e taua ai le vaega lea na misi. Ona faamatala atu lea faapea o vaega taitasi uma lava o le paso e pei o se tagata o le aiga po o se tagata o le vasega. E taua tagata uma lava.
- Ina ia faataitai atu le taua o le talalelei, ia faaali atu se faafanua. Fesili atu pe aisea tatou te faaaogaina ai ia faafanua. Ona faatusatusa lea o le faafanua i le talalelei. Ia faamatala atu, o le talalelei a Iesu Keriso e pei o se faafanua aua e taitaiina ai i tatou. E fesoasoani foi ia i tatou tatou te tutumau ai i le ala lea e tau atu i le ola faavavau faatasi ma lo tatou Tama Faalelagi.
- Ina ia aoao atu e uiga i le tausia lelei i le afioga a le Atua pe a maea ona totoina i o tatou loto (tagai Alema 32:28–43), ona tusi lea o ni ata o ni laau se lua—o le isi e malosi ma e susu, ma tamaoaiga lona eleele ae o le isi e vaivai ma e matutu, ma mago lona eleele.

O le Taimi e Faaoga ai ia Faatusatusaga ma Lesona Faatino

O faatusatusaga ma lesona faatino e mafai ona faaaogaina i le tele o auala, ae sili atu ona fesoasoani pe a e manaomiaina e:

- Pu'epu'e mai ai le vaai a i latou o loo e aoaoina. E mafai ona e faaaogaina ia faatusatusaga ma gaoioiga faatino e faatupu vave ai le fiala, taulai mai ai le vaai a i latou o loo aoaoina, ma faailoa atu ai se autu po o se mataupu o se lesona.
- Saunia ai se ootoga mo se lesona. E mafai ona e fausia mai lea taimi i lea taimi se lesona ato mai se faatusatusaga po o se lesona faatino.
- E faai ai, tauaofai ai, ma uunaia ai. A maea ona aoao atu se mataupu o le talalelei, e mafai ona e faaaogaina se faatusatusaga po o se lesona faatino e tauaofai ai mea na talanoaina ma ia uunaia ai i latou na e aoaoina ina ia faia ni suiga aoga i o latou olaga.

FAATINOGA

O nisi taimi e te lagonaina ai o le auala sili lava e aoao atu ai se mataupu po o se tomai patino o le faatinoina atu

lea. O faatinoga e mafai ona faaaogaina e aoao atu ai tomai e pei o le taitaiina o pese ma viiga, tuuina atu le fesoasoani muamua, taoina o le falaoa, nonoaina o se nonoa, faaaogaina o mea mo talafaasolopito o aiga, po o le faatinoina o se sauniga o le perisitua. A maea ona e faia se faatinoga, ona mafai lea ona tuuina atu le avanoa i tagata o loo aoaoina e faataitai ai lea auala.

Afai e te valaauliaina se isi e faatinoina atu se auala po o se tomai, ia mautinoa ia ofoina atu i ai lau lagolago ao ia saunia.

O le Auala e Saunia ma Tuuina Atu ai se Faatinoga

Ina ia saunia se faatinoga, ia mulimuli i laasaga nei:

1. Afai o loo e faia le faatinoga, ia faataitai. Ia mautinoa o le a ausia ona faamoemoega ma o le a mafai ai foi e oe ona tuuina atu i le taimi e avanoa ai. Ia mautinoa foi ia talafeagai mo i latou o loo e aoaoina ina ia latou le mumusu ai e faataitai le tomai fou.
2. Iloilo soo se mea e faaaogaina po o se masini. Ia mautinoa o mea e faaaogaina ia lava le lapopoa e mafai ai ona iloa pe mafai foi ona e faamatalaina atu pe afai e laiti. Afai na e talosaga atu i se tasi na te faia le faatinoga ma e te le faamoemoena lona tagata e saunia e ia mea e manaomia po o masini, ia talosaga atu ia te ia e saunia se lisi o mea e manaomia e te aumaia. Afai e te faamoemoe e toe faataitai e tagata o loo aoaoina le faiga na aoaoina atu i le faatinoga, ia saunia mea uma lava e faaaogaina mo i latou. O se pepa o mea e iloiloaina e mafai ona saunia mo tagata taitoatasi o loo e aoaoina. Soo se fua po o mea e faaaogaina e tatau ona ta'ua i luga o le pepa faapea foi i le taimi o le faatinoga.
3. Atonu e fesoasoani tele le lagolago atu o isi ua malamalama i le auala ao faataitai e tagata o loo aoaoina le tomai lea na faatinoina atu. Afai o lea, ia talanoa mamao atu i nei tagata.
4. Ia faatulaga le potuaoga ina ia mafai ona vaai ma lagona e tagata uma.
5. Afai e talafeagai, ia faia fuafuaga ina ia faamama ai le vaega lea e fai ai le faatinoga pe a maea.

Ina ia tuuina atu se faatinoga, ia mulimuli i laasaga nei:

1. Faamatala atu. Fesoasoani i tagata o loo aoaoina ia malamalama i le faamoemoega o le faatinoga ma mafuaaga mo faasologa. Ia fesoasoani foi ia i latou ina ia iloa pe faapefea ona aoga le auala, faagasologa, po o le tomai ia i latou.
2. Faatino. Faaali atu pe faapefea ona faaaoga le auala, faagasologa, po o le tomai. E tatau ona tuuina atu ai se faataitai, po o se faatinoga mo tagata o loo aoaoina e mulimuli ai.
3. Faataitai. Ia faatagaina tagata o loo aoaoina ina ia faataitai le faagasologa. I le taimi o le faataitai, e tatau


ona e maitauina, aoao atu, ma fesoasoani atu pe a tafaeagai ai. Ia onosai, malamalama, faaalua uiga lelei, ma ia faamalosiaiu atu.

Ina ia vaai i se faataitaiga o le faaaogaina o se faatinoga e aoao atu ai se mataupu, ia tagai i le itulau “00” [168].

TALA E FAATINO I NAI MEA FAITINO LAITI (tagai foi i ATA E FAATUTU I LUGA)

O tala e faatino i nai mea faitino laiti, o nai vaaiga pupuu ia e faaoga ai mea faitino. O tala faatino faigofie ma mea faitino e mafai ona manatuaina ai ni tala ma fiafia i ai tamaiti.

Faataitaiga o Tala e Faatino i Mea Faitino Laiti ma Ata e Faatutu i Luga



Atonu e te manao e talosaga atu ia i latou o loo e aoaoina e fesoasoani atu i le faiga o ni tala e faatino i nai mea faitino laiti ma ata e faatutu i luga i le taimi o le vasega pe aumai foi ni mea faitino e faaoga faatasi ma tala faatino ua uma ona e saunia.

Fua mo le Potoi Faamasima

- 1 le iputi masima
- 4 iputi falaoamata
- 1 le sipuniai ga’o fai meaai
- 2 iputi vai
- Mea e faalanu ai meaai (tuu i le faitalia pe fai pe leai)
- Ia seu faatasi le masima ma le falaoamata. Ia seu faatasi i se isi ipu le ga’o, ma le vai, ma afai e manaomia, ave i ai ma le mea e faalanu ai meaai. Ona seu faatasi lea o le ga’o ma le vai i totonu o le masima ma le falaoamata.
- Lomilomi malie le paluga seia oo ina avea ma potoi. Tuu le potoi i totonu o se koniteina e mau lelei le tapuni ina ia vaivai ai pea.

O tala faatino e faia i atigi pusa ma ipu pepa e mafai ona faaaogaina e sili atu ma le tasi le tala.

TALANOAGA

Tagai i le “Taitaia o Talanoaga,” itulau 66–68.

TALA FAATINO

I se tala faatino, e faatinoina ai e ni tagata se tala. O i latou o loo e aoaoina e mafai ona maua so latou malamalamaaga tele i mataupu o le talalelei e ala lea i le faatinoina o tala mai tusitusiga paia, talafaasolopito o le Ekalesia, po o mekasini a le Ekalesia.

Ituaiga o Tala Faatino

E eseese ituaiga tala faatino. Mo se faataitaiga, e mafai ona e:

- Faitauina se tala (pe tuu atu i se tasi e faitauina atu le tala) ao faatinoina ma le filemu e tagata o loo auai.
- Faamatala atu se tala ona tuu atu lea i tagata o loo auai e faatinoina faatasi ma upu pe leai foi ni upu. O tamaiti laiti e masani ona fiafia i le faatinoina soo o se tala, i le faatinoina o vaega a tagata eseese i taimi taitasi.
- Ia saunia ni faamatalaga i se taimi mamao mo i latou e auai e faitau atu i le vasega.
- Tuu atu i nisi o tagata o loo auai e faatinoina filemu se tala e masani ai ona tuu atu lea i isi e mateina po o le a le tala lea na faatinoina.
- Ia faatalanoa se tasi e pei lava o ia o se tagata mai tusitusiga paia po o le talafaasolopito o le Ekalesia. Mo se faataitaiga, e mafai ona e talosaga atu i se tasi na te faatinoina le vaega a Semu, o se tasi o atalii o Noa. E mafai ona e talosaga atu i le tagata o loo faatinoina ia Semu e faamatala atu ia te oe e uiga i le lauga atu a Noa, o le lolo, o le vaa, ma le aso na mafai ai e Noa ma lona aiga ona toe savavali i le laueleele. (Afai o loo e fuafua e

taitaia se ituaiga “faatalanoaga” faapena, e tatau ona talanoa mamao atu i le tagata ua tofiaina, ma ta’u atu i ai fesili o le a e fesiligia.)

O le Auala e Saunia ai ma Faatinoina ai ia Tala Faatino

E tusa lava pe faapefea ona faatinoina ia tala faatino, e tatau ona matuai manino lelei le faia ma le lesona. E tatau ona latou fesoasoani i tagata o loo aoaoina ia manatuaina ia mataupu o le talalelei. E tatau ona avatu ai savali faigofie ma tuusao. E le tatau ona aluese mai le paia o mea na tutupu i tusitusiga paia po o le talafaasolopito.

O laei faigofie e pei o ofu talaloa ma pulou e mafai ona faamatagofieina ai ia tala faatino, aemaise lava mo tamaiti. E mafai foi ona fesoasoani tele le faaaogaina o pepa e tusia ai igoa ina ia iloa ai tagata o loo faafofigaina atu e tagata o loo faia.

O nisi o tagata e aoaoina e mumusu e faatinoina ni vaega a tagata o loo i totonu o tusitusiga paia po o le talafaasolopito o le Ekalesia. E mafai lava ona e sailia ia auala mo tagata nei ina ia auai ai i le faatinoina o tala. Mo se faaitaiga, o nisi fanau laiti e sili atu ona fiafia e avea ma manu. E mafai foi ona latou fiafia i le faia o leo e pei o le leo o le matagi po o vae o loo taufetuli. Afai e i ai nisi e le mananao e auai, aua ne’i faamalosi i latou ia auai.

Ina ia faatinoina se tala faatino:

1. Talosaga atu mo ni tagata e ofo mai e i ai i le tala faatino. Tofitofi atu i ai o latou matafaioi.
2. Fesoasoani i tagata o loo auai ia malamalama i le tala o le a latou faatinoina ma tagata o le a latou faafofiga i ai.
3. I le gasologa o le tala faatino, fesoasoani i tagata o loo auai i a latou matafaioi pe a talafeagai ai. Atonu latou te manaomia oe e fesoasoani atu ia i latou i le taimi o le faatinoga. Afai o loo e aoaoina tamaiti laiti, atonu e te manao e tuuina atu fesili e uunaia ai i latou, e pei o le “O le a le isi mea o le a e faia?” po o le “O le a lau tala o le a fai nei?”

O tala faatino e le tatau ona alu uma ai le taimi o le lesona. Ia mautinoa ia lava se taimi i le faaiuga o le tala faatino e fesili atu ai i tagata auai po o a ni mea na latou aoaoina. Fesoasoani ia i latou ina ia faafetaui le savali o le tala faatino i le lesona ma o latou olaga.

Lapataiga e uiga i le Faafofigaina o se tasi i le Silisiliese i Tala Faatino

“O le Atua le Tama ma le Agaga Paia e lē tatau ona faafofigaina mai e se tagata i sauniga, o tala faatino, po o musika.

“Afai e faafofiga mai e se tagata le Faaola, e tatau ona faia ma le faaaloalo ma le migaga tele. E na o tagata e lelei amio ma o latou uiga faaletagata e tatau ona fuafuaina mo lea vaega. E na o mau na fetalai i ai le Faaola e tatau ona

tautalagia e le tagata o le a faafofiga ia te Ia. O le tagata o loo faafofiga i le Faaola e lē tatau ona pese pe siva.

“I le faaiuga o le faatinoga, e lē tatau i le tagata ona ofuina ana teuga i le faapaologa po o se isi lava mea. E tatau ona sui vave lava i ona lavalava masani.

“E lē tatau ona faafofigaina le Faaola e tamaiti i tala faatino se’i vagana ai ni vaai i le fanau mai” (*Tusitaulima o Faatonuga a le Ekalesia, Tusi 2: Taitai o le Perisitua ma Ausilali* [1998], 311).

Atonu e te manao e talosaga atu i se tagata faamatala na te faitauina mai upu na fetalai i ai le Faaola mai tusitusiga paia.

GAOIOIGA TUSIATA

O se tasi auala e fesoasoani ai i tagata o loo aoaoina ia malamalama i mataupu o le talalelei o le tuuina atu lea ia i latou e tusi ni ata. O le tusiata e faatagaina ai i latou e sailiili ma faailoa mai o latou malamalamaaga ma lagona i tala o le talalelei ma mataupu na talanoaina.

Faaitaiga o Gaoioiga Tusiata

- Tuu atu i tagata o loo aoaoina e tusi ni ata e faatatau i le autu o le lesona. Mo se faaitaiga, e mafai ona e tuuina atu ia i latou e tusi ni ata e uiga i o latou fale, o o latou aiga, o se aso malolo, sefuluai, po o le sauniuni foi e alu atu i le malumalu.
- Tuu atu i tagata o le vasega e fai se siata e faatatau i le lesona. Tuu atu i ai e galulue faatasi i ai i luga o se pepa umi lava.
- Faamatala atu se tala. Ona tuu atu lea i tagata o loo aoaoina e tusi ni ata e faailoa mai ai o latou lagona e uiga i le tala.
- A maea ona faamatalaina atu se tala, ona talosaga atu lea i tagata taitoatasi e tusi se ata e uiga i se vaega patino o le tala. Tuu atu i tagata o loo aoaoina e faaoga a latou ata e toe faamatala mai ai le tala. E mafai ona e tuu-faatasia ia ata ma faaali atu ia i latou i totonu o se pusa e faasolo ai ata (tagai “Pusa e Faasolo ai Ata,” itu-lau 188).
- Usu pe ta se lipine pu’e o se viiga po o se pese a le Peraimer. Tuu atu ia i latou o loo e aoaoina ina ia tusi ni ata e faaali mai ai so latou manatu e uiga i ai po o ni o latou lagona na i ai ina ua latou faalogo i lena viiga po o lena pese.

Taiala mo le Faatinoina o Gaoioiga Tusiata

Afai e te tuuina atu i tagata e tusi ni ata e avea o se vaega o le lesona, ia mautinoa o lena gaoioiga e faatatau i mataupu o loo e aoaoina atu. Ae peitai, aua e te faatagaina le gaoioiga e avea ma mea e taulai atu i ai le lesona. Ia faafofigie le gaoioiga ina ia mafai e tagata o loo aoaoina

ona faamaeaina i se taimi puupuu ua atofaina. Ia mautinoa ua saunia uma mea e te manaomiaina.

Ao tusia ata a tagata o loo aoaoina, ia uunaia i latou e faaaoga o latou mafaufau. Taumafai e aua ne'i faaosoina ni lagona i tamaiti faapea latou te tusia se ata i se auala patino. Ao tusia a latou ata, ia faaviivii ia i latou uma i a latou taumafaiga. Afai e i ai sau fesili e uiga i se mea o loo tusia e se tasi, aua ne'i e fesili atu, "O le a lau mea lena e tusi?" Ae ia e faapea atu ma le malu, "Se'i faamatala mai ia te a'u lau ata."

E mafai ona e faaaogaina i nisi taimi ia itulau lanu mai le itulau a tamaiti o le *Liahona*. Afai e te tuuina atu i tamaiti e valivali ia ata o le Faaola, ia faamanatu atu ia i latou ina ia faaloalo ma migao.

Afai e oo mai le taimi e faaauau ai le lesona, atonu e te manao e talosaga atu ia i latou o loo e aoaoina ina ia faamatala atu i isi e uiga i a latou ata. Fesili atu i ai pe faapefea ona faatatau ia ata i le lesona. Ia valaaulia i latou e fetufaai atu o latou lagona e uiga i le mea na latou tusia. O nisi taimi e fesoasoani tele le faaali atu o ata i le taimi atoa o le lesona.

Afai o loo e aoaoina se vasega faalelotu, ia uunaia tagata o le vasega e faaali atu a latou ata i o latou aiga. O le a fesoasoani lea ia i latou ia manatua ai mea na latou aoaoina. O le a tuuina atu ai foi i matua se avanoa e talanoaina ai mataupu o le talalelei faatasi ma a latou fanau.

FAATAITAIGA

Se'i mafaufau la i le faamatalaina atu o le faailogaina o mau i tagata latou te le'i vaai lava i se isi o faailogaina ia mau. O le a faigata ona latou malamalama pe a e taumafai e faamatala atu i ai i le na o le faaaogaina o upu. Ae atonu o le a leai se faafitauli pe a e faaali atu i ai ia faataitaiga o itulau ua faailogaina i totonu o au tusitusiga paia. Manatunatu i le faamatalaina atu o le sefuluai i fanau e le malamalama i le uiga o le faaupuga *tasi vaesefulu*. O le a latou malamalama lelei i le sefuluai pe a e faaali atu i ai i se faataitaiga, folafola solo ni tupe siliva se 10 i luga o se laulau ma tuu se tasi i totonu o se teutusi sefuluai.

I le avea ai ma se faiaoga o le talalelei, e mafai ona e feagai pea ma luitau o le fesoasoani i isi ina ia malamalama i se mea latou te le'i malamalama lelei i ai muamua. O se tasi auala e faataunuaina lelei ai lenei vaega o le faaaogaina lea o faataitaiga. E taua tele le faailoa atu o mataupu ma faamatala atu pe faapefea ona faaaogaina, ae o le a sili atu ona aoga lau aoa o atu pe a e tuuina atu foi ni faataitaiga.

E tatau ona e tuuina atu soo ia ni faataitaiga i le taimi o le lesona ina ia fesoasoani ia mautinoa ua malamalama tagata o loo aoaoina i le mea o loo e aoaoina atu. I le itulau e 73 o le tusi lenei, o loo i ai se tala i se faiaoga o le sa tatau ona tuuina atu se faataitaiga i se lesona a le Peraimeri

e uiga i faaaliga. Na ia tuuina atu ma le faaeteete le lesona, na faaaogaina ai auala eseese. I le taufaaiiuga o le lesona, na tuuina atu ai e le faiaoga se fesili toe iloilo: "O ai e i ai le pule e maua ai faaaliga mo le Ekalesia?" Na sii uma i luga lima o tamaiti. Sa latou iloa uma le tali: o le Peresitene o le Ekalesia. Ae na iloa ai e le faiaoga, e toetoe lava, o tamaiti uma e le iloa po o le a le uiga o le upu *faaaliga*. Ana fai na te tuuina atu muamua ni nai faataitaiga faigofie i le lesona, e pei o se faaaliga e patino lava ia te ia lea na taitaiina ai o ia e le Agaga Paia po o le tala foi i le fetalai atu o le Alii ia Iosefa Samita i le Uluai Faaaliga, semanu o le a matuai tele lava se eseese.

O le Auala e Faaoga ai Faataitaiga

E tele naua auala e tuuina atu ai faataitaiga. O le mea e sili ona taua o lou faaaogaina lea o faataitaiga o le a sili ona fesoasoani atu ai i tagata o loo aoaoina ia malamalama lelei i le mea o loo aoaoina atu. O nisi nei o manatu.

Faataitaiga e Masani Ai o ni Manatu e le Masani Ai

Afai o loo outou talanoaina se manatu e le masani ai i latou o loo e aoaoina, e mafai ona e faaaogaina ia ni faataitaiga patino ma e masani ai foi, ina ia fesoasoani ia i latou ia malamalama. Mo se faataitaiga, afai o loo outou talanoa e uiga i sauniga o le malumalu, e mafai ona e faapea atu, "O le papatisoga, o le faamanatuga, ma le faaipopoga i le malumalu mo le faavavau o ni faataitaiga ia o sauniga o le perisitua." Afai e te faia ni faamatalaga e faatatau i perofeta, e mafai ona e faapea atu, "O Atamu, Aperaamo, ma Mose o perofeta ia i aso anamua. O nisi faataitaiga o perofeta o aso e gata ai o Iosefa Samita, Tavita O. Makei, Ezra Taft Benson, ma Gordon B. Hinckley.

Atonu e faigata le vaega lenei i mataupu maaleale, e pei o le faatuatua, faamagaloina o agasala, po o le togiolaina. E masani ona sili atu le aoaoina atu o ia ituaiga mataupu e ala lea i le faaaogaina o tala, faatusatusaga, po o lesona faatino (tagai "Faatusatusaga ma Lesona Faatino," itulau 171-72).

Faataitaiga e Faaali Atu ai Tomai

O le auala sili lava e masani ai ona aoaoina atu se tomai o le faataitaiina atu lea pe faapefea ona fai. Mo se faataitaiga:

- Ina ia fesoasoani i isi ia aoaoina pe faapefea ona saunia se lesona, ia fetufaai atu i ai se ototoga o se lesona na e saunia.
- Nai lo le na ona ta'u atu i isi e uiga i fesoasoaniga mo suesuega o loo maua i totonu o a latou tusitusiga paia ma tuuina atu se faamalamalama i le auala e faaaogaina ai, ia tuu atu ia i latou e su'e a latou tusitusiga paia i le Taiala i Tusitusiga Paia, ma isi fesoasoaniga. Ona faaali atu lea ia i latou le auala e faaaogaina ai.

Faataitaiga e Faaalia ai Mataupu Faavae

O nisi mataupu faavae e mafai ona faataitaia. O le tala lenei o loo faaalia ai le auala na faataitaia ai e se faiaoga o le Peraimeri le mataupu o le fetufaai atu:

“Na talanoa atu le faiaoga o se vaega o le au ta’itulu tausaga le matutua o le Peraimeri e uiga i le fetufaai atu ona faamatala atu lea o ni tala se lua e uiga i ni tamaiti sa fetufaai atu. Ona ia faataatitia lea o nusipepa i luga o le fola ma tuuina atu i tamaiti taitoatasi se polo ele po o le kelei. Na ia maitauina o lana polo ele e matuai laitiiti lava nai lo isi ma valaaulia loa tamaiti uma, e auauai taitoatasi atu, e fetufaai ma ia. O le taimi muamua sa mumusu ai tamaiti, ae ina ua latou vaai i lona naunau e fetufaai atu ma i latou, o lea sa amata ai loa ona latou fiafia e fetufaai atu—e le gata i le faiaoga, ae faapea foi i isi. O le lesona na mafai ai e tamaiti ona iloa e le gata o le faauigaina o le fetufaai atu, ae na latou maua ai foi ni lagona e avea o se vaega o le aoaoga le fetufaai atu” (Janelle Lysenko, “Tools for Teaching Tots,” *Ensign*, Mati 1987, 71).

O Tala e Tuuina mai ai Faataitaiga o Tagata o Loo Ola i Mataupu o le Talalelei

O nisi mataupu, e pei o le faatuatua, alofa, faamaoni, ma le salamo, e le mafai ona faataitaia aua e faataata i latou i ni mea moni faaleagaga lea e le mafai ona tatou vaai iai. Ae o tala, e mafai ona e fetufaai atu ai faataitaiga o tagata o loo ola i mataupu o le talalelei. Mo se faataitaiga, e mafai ona e faaaogaina le tala ia Iosefa i Aikupito ma lona sola ese mai le ava a Potifara e aoao atu ai e uiga i le faamaoni. E mafai ona e aoao atu e uiga i le faatuatuaina e ala lea i le faamatalaina atu o le tala a Ioane Teila ma Willard Richards, o e na ofo atu o la’ua ola i ni tulaga matautia e nonofo ai i le Falepuipui o Karefaasi faatasi ai ma le Perofeta o Iosefa Samita ma lona uso o Ailama. E mafai foi ona fetufaai atu ou lava lagona. O tala fatu, e aofia ai faataoto, e mafai ona maua mai ai faataitaiga i le auala e ola ai i mataupu o le talalelei. (Mo taiala ma fautuaga i le faaaogaina o tala, tagai “Tala,” itulau 189–90).

LAUPAPA IE MAMOE

O laupapa ie mamoe o laupapa ia e feaveai e faaali atu ai i luga ia ni ata, e masani lava ona faamatalaina ai se tala. O lenei meafaigaluega e aoao atu ai, e aoga tele i fanau laiti. Afai e te faaaogaina se laupapa ie mamoe, atonu e te manao e valaaulia ia tagata o loo aoaoina e fesoasoani atu ia te oe i le tuuina i luga o ata. A maea ona faaaogaina se laupapa ie mamoe e faamatala ai se tala, atonu e te manao e faatagaina tamaiti e faaaoga ia ata e toe faamatala ai le tala.

O le Auala e Fai ai se Laupapa Ie Mamoe

Ina ia faia se laupapa ie mamoe:

1. ‘Oti se fasi pepa malo mamafa, po o se laupapa mani-finifi, po o se mea faapena.
2. ‘Oti se ie mamoe lanutasi, e pei e talatala, ae o se nailoni, ia lava le tele ia lua inisi lona faatautau i itu uma o le laupapa.
3. O le pito i fafo o le ie o loo u i lalo, ia tuu ai le laupapa i le ogatotonu o le ie. Ona afe mai lea o pito o le ie e ufi-ufi ai pito o le laupapa, ma faamaumau lelei autafa i le pito i tua o le laupapa.

O le Auala e Faia ai ni Ata mo Laupapa Ie Mamoe

Ina ia faia ni au lava ata mo laupapa ie mamoe:

1. Tusi se ata, pe kopi foi ma valivali se ata mai se mekasini a le Ekalesia, tusi lesona, po o isi risosi.
 2. ‘Oti ese le ata.
 3. Faapipii le ata i luga o se pepa malo.
 4. Faapipii se fasi ie mamoe po o se fasi sanipepa po o se isi mea talatala i tua o le pepa malo. O le a fesoasoani lea i le ata e pipii ai i luga o le laupapa ie mamoe.
- O ata mo laupapa ie mamoe o tagata, manu, ma isi mea e mafai ona okaina mai e ala i le *Church Materials Catalog*. I totonu o le tusi lea o loo taua ai o ata tipi o fesoasoani vaaia.

TAALOGA

O taaloga e maua ai le fesuisuiaiga o lesona ma maua ai e tagata o loo aoaoina ia fesoataiga ma isi. E mafai ona e mauaina ni manatu mo taaloga mai tusi lesona e gaosia e le Ekalesia, o mekasini a le Ekalesia, ma le *Tusi Lesona o Afiati Faaleaiga*.

O le Auala e Filifili ai Taaloga

Ao e filifilia ia taaloga e faaaoga i lesona, ia mautinoa o loo latou:

- Faamalosia ia mataupu o le talalelei o loo e aoaoina atu.
- Talafeagai mo le tulaga o loo e aoao atu ai.
- Talafeagai mo le matutua o i latou o loo e aoaoina ma le aofai o le vaega.
- Faigofie ona malamalama i ai.
- Faaogaina ai na o sina vaega o le lesona. I nisi tulaga, o se taaloga e ono manaomia ai se vaega tele o le lesona, ae o nei tulaga e mafai ona faia pe le faia foi, e le o se tulafono.
- E le uuna’ia ai le faatauva. E tatau ona e aloese mai le tuuina atu o tau i tagata e “manumalo.”
- Tuu atu ai i tagata uma o loo aoaoina le avanoa e auai ai ma lagonaina le faamanuiaina. E tatau ona tutusa uma lou faaviivii o tagata o loo aoaoina mo a latou tau-mafaiga lelei.

Faaitaiga o Taaloga

Taaloga Faafetaui

I le taaloga lenei, e sailia e tagata o loo aoaoina ia seti e lua o pepa e tutusa faamatalaga po o ata. Mafaufau i le faaitaiga lenei, lea e mafai ona faaogaina i totonu o se vasega a le Peraimeri:

Aumai ni fasi pepa se 12 e tutusa lelei le lapopoa ma ia mafai e tagata uma ona iloa. I le afa o fasi pepa, ia tusi pe faapipii ai ni ata e faatatau i le lesona. I le isi afa, tusi ai ni faamatalaga o ata. I itu e le o i ai ni ata po o ni faamatalaga, ia faanumera ai pepa mai le 1 e oo i le 12. I le taimi talafeagai ai i le lesona, faataititia ia fasi pepa i luga o le fola, faatasi ai ma pito o loo faanumera ia faau i luga, pe faapipii i se laupapa. E le tau faatulagaina i fuainumera.

Ina ia faatinoina le taaloga, tuu atu i tagata taitoatasi e auauai i le filifilia o ni fasi pepa se lua. Liliu ia fasi pepa e vaai ai pe o i ai le ata ma sona faamatalaga e fetau i ai. Afai e fetau, ona aveese lea o fasi pepa mai isi fasi pepa. Afai e le fetau, ona toe tuu lea i le tulaga sa i ai, faatasi ai ma le itu o loo faanumera ia faau pea i luga, ma tuu atu le avanoa i le isi tagata e filifili ai ni fasi pepa se lua. A maea ona faafetaui uma ata ma faamatalaga, ona talanoaina lea pe faapefea ona faatatau i le lesona.

Atonu e te manao e faaoga se tasi o nei fesuaiga i le taaloga lenei:

- Tusi le afa o se mau i luga o se tasi fasi pepa ma le vaega atoa o loo totoe o le mau i luga o le isi afa o le fasi pepa. Pe tusi foi na o se vaega o le mau i luga o se tasi fasi pepa ae o le vaega atoa i luga o le isi. Mo se faaitaiga, o nisi soa e mafai ona faapea “Toefuataiina o” ma le “le talalelei”; “miti a Liae” ma le “o le laau o le ola”; ma le “ai” ma le “u’amea.”
- Tusi le numera o mataupu faavae taitasi e 13 o le fautu-atua i luga o ni fasi pepa. I luga o nisi fasipepa ia tusi ai upu autu mai mataupu faavae taitasi.

Taaloga Matemate

I le taaloga lenei, e tuuina atu e le faiaoga ni faamatalaga tau faaataata e fesoasoani ai i tagata o loo aoaoina ina ia iloa se tagata, se nofoaga, se mea faitino, se tala faatusipaia, po o se mataupu faavae. E mafai ona e faaogaina le taaloga lenei e faailoa atu ai se lesona pe faamamafa atu ai se vasega o se lesona.

Ina ia faatinoina le taaloga, ia tuu atu ni faamatalaga tau faaataata e fesoasoani ai ia i latou o loo e aoaoina ina ia iloa se tagata po o se mea faitino lea e faatatau i le lesona. Ia tuu atu faamatalaga tau faaataata taitasi, ma tuuina atu ai i tagata o loo aoaoina se avanoa pe a mavae ia faamatalaga taitasi e iloa ai le tagata po o le mea lea. Amata i faamatalaga tau faaataata lautele. Ia matuai ma’oti ia faamatalaga tau faaataata seia oo lava ina sa’o le mateina e se tasi. Mo se faaitaiga, o faamatalaga tau faaataata nei e

mafai ona faaogaina e fesoasoani ai i tagata o loo aoaoina ina ia iloa le perofeta o Mose:

O a’u o se perofeta o le Feagaiga Tuai.

Sa ma talanoa fesagai ma le Atua.

Sa tausia a’u e se purinise Aikupito.

O la’u failauga o se alii e igoa ia Arona.

Na ou aveeseina mai le fanauga a Isaraelu mai le nofo pologa.

Atonu e te manao e faaoga se tasi o nei fesuaiga i lenei taaloga:

- Vaevae le vasega ta’itoalua. Tuu atu se upu i se tagata e toatasi i soa taitasi. O le tagata ua ia iloa le upu na te tuuina atu se upu taufaaataata se tasi e fesoasoani ai i lana soa e mateina ai le upu. Mo se faaitaiga, afai ua tuuina atu i le tagata le upu papatisoga, e mafai ona ia tuuina atu upu taufaaataata e pei o le *vai*, *faatanoa*, po o le *faatofu*. Afai e tuuina atu i le tagata le upu Noa, e mafai e ia ona tuuina atu upu tau faaataata e pei o le *lolo*, *manu*, *vaa*, *lupe*, po o le *nuanua*.
- Tuu atu i le tagata e toatasi se upu. Ona tuu atu lea i isi e mateina le upu e ala lea i le fesili atu o ni fesili se 20. O fesili e tatau ona taliina i le *ioe* po o le *leai*.
- Tuu atu i se tagata e toatasi e tusia se ata e faailoa mai ai se mataupu, se tagata, po o se tala. Tuu atu i isi e mateina po o le a le mea o loo faaalua mai i le ata.

Taaloga o Tali

I luga o fasi pepa taitasi, ia tusi ai fesili na o le a fesoasoani ai i tagata o loo aoaoina e toe faamanatuina mea na latou aoaoina i le faaiuga o se lesona. Tuu fasi pepa i totonu o se fagu po o se atigi pusa.

Ina ia toe faamanatuina le lesona, togi atu se taga fatu pi i se tagata ma tuu atu ia te ia na te se’iina se fesili mai le atigi pusa ma tali i ai. Ona tuu atu lea i le tagata lena na te togiina atu le taga fatu pi i se isi tagata, o ia lea o le a ia se’iina se fesili mai le atigi pusa ma tali i ai.

Taaloga i le Laupapa


I se taaloga i le laupapa, e agai atu tagata e taaalo i vasega o le taaloga mai le amataga e oo atu i le faaiuga e ala lea i le taliina o fesili ma mulimuli i faatonuga o loo i luga o pepa ua uma ona saunia. O se taaloga i le laupapa, e pei o le faaitaiga lea o loo i lalo, e mafai ona faia i luga o se pepa malo pe tusi foi i luga o le laupapa. O tupe siliva po o isi mea laiti e mafai ona faaogaina e avea ma vasega o le taaloga pe afai e te faaogaina se laupapa. Afai e te faaogaina se laupapa tusitusi, ia faaoga le penisina e faailoa atu ai le agai i luma o tagata o loo aoaoina. O pepa o le taaloga e tatau ona aoaoina ai pe iloiloina ai mataupu o le talalelei. Mo se faaitaiga, atonu e te manao e saunia ni pepa o loo i ai faamatalaga nei:

- Ua aumai e lou uso laitiiti se meataalo a lana uo o Ioane. Na ia faapea mai, “E tele naua meataalo a Ioane.

E na te le misia lava lenei meataalo e tasi.” E te faamatalaina atu i ai talu ai ona o Ioane e ana le meataalo, o lea e tatau ai ona toe faafoi atu. E te lua o atu ma lou uso e faafoi le meataalo i lana uo. Talu ai ona o le mea faamaoni lenei e ao ona faia, o lea ia agai ai i luma i ni avanoa se ono.

- E te le'i suesue lava mo se suega i le aoga. I le taimi o le suega, sa e kopi ai mai le tagata sa nofo i ou tafatafa. Talu ai ona o lenei mea e le faamaoni, o lea ia toe foi ai i tua i avanoa e tolu.

Ina ia faatinoina le taaloga, ia faafao pepa o le taaloga. Ona tuu atu lea i tagata o loo auai e auauai i le filifilia o se pepa, faitau le faamatalaga, ma agai i luma a latou vaega o le taaloga e tusa ai ma le faamatalaga.



FAILAUGA FAAPITOA

Atonu e te manao mai lea taimi i lea taimi e valaaulia atu se malo faaaloologia e saunoa atu ia i latou o loo e aoaoina e avea o se vaega o se lesona. Mo se faataitaiga, e mafai e se fautua o le Perisitua Arona ona valaaulia se faifeautalai ua maea lana misiona e talanoa atu i alii talavou e uiga i le auala e mafai ai ona latou saunia mo le auauna atu faamisiona.

O le Auala e Galuhue Faatasi ai ma se Failauga Faapitoo

E tatau ona e talosaga atu i lau epikopo mo le faamaoniga ae le'i valaauliaina se failauga faapitoo e le o se tagata o le uarota (tagai *Tusitaulima o Faatonuga a le Ekalesia, Tusi 2: Taitai o le Perisitua ma Ausilali* [1998], 365). Afai e te mauaina le faamaoniga a lau epikopo, ona mulimuli lea i laasaga nei:

1. Ia valaaulia mamao atu le failauga faapitoo. Ia faailoa atu ia te ia le autu o le lesona, le matutua o tagata o loo i le vasega, o lou lagona i le mea e tatau ona aoaoina mai e tagata o le vasega mai le tuuina atu o le lesona, ma le aofaiga o le taimi e tatau ona ia faaaogaina. Tuu atu i le failauga se kopi o le lesona mai le tusi lesona.
2. Afai o loo e saunia e tuuina atu fesili a le failauga faapitoo, ona saunia lea o se lisi o fesili o le a e tuuina atu. Ia tuu atu se kopi o fesili i le failauga faapitoo.

3. Ia faailoa atu le failauga i luma o le vasega ae le'i lauga atu o ia.

TAUTALAGA

O nisi taimi e sili atu ona lelei le na ona faamalamalama atu o ni mataupu patino po o ni mea tutupu i le talafaa-solopito nai lo le faia o se talanoaga po o se gaioiga e aoao mai ai. O le tautala atu e mafai ona matuai aoga pe afai e faia i taimi e talafeagai ai, e pei o lou faavave ona aoaoina atu o ni mea se tele, tuuina atu faamatalaga e fou ia i latou o loo e aoaoina, pe tauaofai ai se lesona.

O le Auala e Tuuina Atu Ai Tautalaga

O le tautalaga e sili atu ona lelei i tagata matutua o loo aoaoina nai lo le autalavou o loo aoaoina, o e atonu e i ai ni faafaigata i le nonofo ffilemu pe a manaomia ona latou faalogo e aunoa ma le faia o se isi mea. Ae peitai, e oo lava foi i tagata matutua, o se tautalaga e matuai 'iva lava pe afai e le lelei ona tuuina atu. O taiala nei e mafai ona fesoasoani ai ia te oe i le tuuina atu o ni tautalaga lelei:

- Ia e faamasani i le lesona ina ia e le manaomia ai ona faitauina le lesona mai le upu i le upu. O le a fesoasoani lea ia te oe e te vaai atu ai pea i mata o tagata o loo aoaoina.
- Faaaoga ni nai fesoasoaniga vaaia, e pei o ata, pepa lautele, siata, faafanua, laupapa, pepa mo masini faamalamalama. O nei mea o le a faateleina ai le fiafia ma uunaia ai le naunautai.
- Ia faafetaui le tautalaga i tulaga i aso taitasi ina ia mafai ai e tagata o loo aoaoina ona faatatauina ia mataupu i o latou olaga.
- Faaaoga le gagana e malamalama ai tagata o loo aoaoina.
- Ia fesuisui le maualuga o lou leo ina ia faatupuina ai se fesuiaga ma faamamafa atu ai ni vaega taua.
- Soo se taimi e mafai ai, ia faatagaina ia fesili ma talanoaga i le autu o loo e faamatalaina atu. E ui lava o se tautalaga e mafai ai ona sili atu mea e te talanoaina nai lo le aofia atoa uma ai, ae o le tele o lesona e tatau ona faatagaina ai tagata o loo aoaoina ina ia auai i se isi auala.

FAATATAUGA

E tatau ona tatou "faatatau tusi paia uma ia te i tatou, ina ia aoga e aoaoina ai i tatou" (1 Nifae 19:23). Ina ia faatatauina tusitusiga paia o lona uiga ia vaai pe faapefea ona fetau ia tala faatusipaia i tulaga i aso nei ma faaali mai ai pe faapefea ona talafeagai ia mataupu o loo latou aoaoina atu i o tatou olaga. Mo se faataitaiga, i se lesona e uiga i le tuu atu mo le upu moni, e mafai ona e faatatauina

atu ia i latou o loo e aoaoina le tala ia Apinati i luma o le Tupu o Noa (tagai Mosaea 11–17). Ina ia aoao atu e uiga i lo tatou tauaso faaleagaga faapea ma le mana o le Faaola e faamaloloina ai i tatou ma tuuina mai ai ia i tatou se pupula faaleagaga maoae, e mafai ona e faatatauina i ai le tala i le faamaloloina e Keriso o le tagata tauaso (tagai Ioane 9).

O le a sili atu ona lelei lou faaaogaina o le auala lenei pe a e tuuina atu i tagata o lou aiga po o tagata o le vasega se avanoa e mafaufau loloto ai i le mea na latou faitauina. Mo se faataitaiga, a maea ona e aoao atu e uiga i le tali a Iosefa Samita ina ua toetoe lava faatoilaloina o ia e le tiapolo i le Togalaau Paia (tagai Talafaasolopito—Iosefa Samita 2:15–16), e mafai ona e fai atu i tagata o loo aoaoina ina ia manatua ma tusi i lalo se mea na latou oo i ai ina ua tofotofoina ma susesueina. Ona mafai lea ona e valaauliaina i latou e mafaufau i le mafuaaga e taua ai i taimi o faigata le “valaau atu ma [lo tatou] malosi atoa i le Atua” (fuaiupu 16).

Ina ia fesoasoani i tagata o le aiga ma tagata o le vasega ia iloa o loo fetauia mau, e tataua ona e aoao atu i ni auala e fesootai ai mea na oo i ai perofeta ma tagata i le taimi ua tuanai ma mea na oo i ai tagata taitoatasi i aso nei. Ao e saunia ia lesonea taitasi, ia e fesili ifo ia te oe lava pe faapefea ona ave se mataupu faavae (po o se tala po o se mea na tupu) e pei o se mea na oo i olaga o tagata o le aiga po o tagata o le vasega. Mo se faataitaiga, afai o loo e aoaoina atu se lesonea e aofia ai se talanoaga o Tulafono e Sefulu, atonu e te maofa pe faapefea ona aoao atu e uiga i le poloaiga ina ia aua ne'i faia ma tapuai atu i ni tupua ua ta (tagai Esoto 20:4–5). O le toatele lava o tagata o le Ekalesia e laitiiti lava so latou malamalamaaga i le tapuai i tupua ua ta. Ae peitai, e tele naua isi mea o loo “tapuai” ai tagata i nisi taimi. Ao e aoao atu, atonu e te faatatauina ia le poloaiga anamua o loo i le Esoto 20:4–5 i se mea e sili atu ona taatele ma masani ai: o le tapuai o tagata i aso nei i tupe, lauiloa i taaloga, faamalieina o le loto, po o le lauiloa.

E toetoe lava o tala uma i totonu o tusitusiga paia e mafai ona faatatauina i o tatou olaga. Mafaufau i le tala lenei e uiga i se faiaoga o le na faatatauina se tala faatusi-paia ia i latou na ia aoaoina:

O se tasi uarota sa latou maitauina ni faafitauli i faiaoga o le Peraimeri o loo latou sauniaina atu meaai mama i va-iaso taitasi i taimi o le vasega. O meaai ua taitaieseina ai mai le Agaga ma ua taulaiese ai le fiafia o tamaiti mai lesonea. Na talosagaina e le peresitene o le Peraimeri le faatonu o le faaleleia o faiaoga a le uarota ina ia tuuina atu se taimi o fetufaaiga e aofia ai le faafitauli lea.

Na mafaufau loloto le faatonu mo le faaleleia o faiaoga i ni auala e tuuina atu ai ni manatu e le gata i faiaoga ae faapea foi i tamaiti. E leai ma se tasi o auala na foliga mai e sa'o. Ona ia toe tomanatu lea i lona tofiga i se tasi taeao, sa

faamanatu atu ai ia te ia le tala i le fafagaina e Keriso o le 5,000, lea na faitauina talu ai e lona aiga. Na ia manatua, ina ua uma ona fafagaina e Iesu le motu o tagata, sa i ai tagata sa mulimuli atu ia te Ia ona e mananao i ni meaai, ae latou te le o mananao e faalogologo i le talalelei (tagai Ioane 6:26–27).

O le Aso Sa lena, na faamatala atu ai e le faatonu mo le faaleleia o faiaoga le tala lenei. Sa ia faaaogaina le tala e aoao atu ai le mafuaaga moni mo le sau i le Peraimeri: ina ia tuu atu ma mauaina meaai faaleagaga.

O se tasi auala e fesoasoani ai i isi ia faatatauina ia tusitusiga paia ia i latou lava o le talosaga atu lea ia i latou ina ia matuai faagauaiina atu i latou i upu o tusitusiga paia. Mo se faataitaiga, afai e tuuina e se tasi o ia lava i le Iakopo 1:5–6, o le aoaoga e uiga i le tatalo o le a talafeagai lelei mo ia e pei ona sa i ai ia Iosefa Samita:

“Ae afai ua leai se poto ia te [a'u], ia [ou] ole atu i le Atua, o le foai tele mai i tagata uma ma le le toe tautaua; ona foaiina mai ai lea ia te [a'u]. Ae ia [ou] ole atu ma le faatuatua, aua lava ne'i masalosalo.”

O le tele o taimi e mafai ona tatou faatatauina ia tusitusiga paia i o tatou olaga e ala lea i le fesili ane, “O le a le mea na mana le perofeta lea na tusia lenei tala ia matou aoaoina mai ai? Aisea na ia faaafia ai nei faamatalaga auilili patino?” Afai tatou te fesiligia nei fesili e uiga i le tala ia Enosa, mo se faataitaiga, e mafai ona tatou iloa ina ia faatatauina i mea na tatou oo i ai i le tatalo. E mafai ona tatou aoaoina o le tatalo i nisi taimi e tele ni taumafaiga e faia ai ma e taliina mai foi e le Tama Faalelagi a tatou tatalo. E mafai foi ona tatou aoaoina e faa-aafia e matua a latou fanau, e ui lava e tele ni tausaga mo le fanau e mulimuli ai i aoaoga a o latou matua.

Ao tatou faatatauina ia i tatou lava ma fesoasoani i isi ia faia foi faapea, o le a mafai ai ona tatou vaaia le mana o le afioga a le Atua i soo se vaega o o tatou olaga.

FAAFANUA

E mafai ona e mauaina ia faafanua i le Taiala i Tusitusiga Paia, tusi lesonea e gaosia e le Ekalesia, mekasini a le Ekalesia, ma le potutusi o le falelotu.

O le Auala e Faaoga ai Faafanua

E mafai ona e faaaogaina ia faafanua i lesonea e ala lea i le:

- Tuuina atu i tagata o loo aoaoina e sueina ia aai o loo ta'ua i tala o loo outou aoaoina i tusitusiga paia ma le talafaasolopito o le Ekalesia.
- Tusia o ni faafanua faigofie i luga o le laupapa.
- Sailia o nofoaga e fiafia i ai, e pei o atunuu o loo auuna atu ai faifeautalai faamisiona po o aai o loo tutu ai ia malumalu.

TAULOTOINA

Afai tatou te taulotoina ia mau, upusii, viiga, ma pese a le Peraimeri, e mafai ona avea lea ma pogai o le faa-mafanafanaina, taitaiga, ma musumusuga mo i tatou. Ao tatou manatuaina ia nei mea, o le a mafai ona fesoasoani ia i tatou ia lagonaina le pa'i mai o le Agaga Paia i soo se mea e mafai ona i ai.

O le taulotoina e matuai manaomia lava le tula'i i ai o le mafaufau. E mafai ona e aoaoina atu i isi ni auala e fesoasoani tele ai i le taulotoina o ni mea. E mafai foi ona e fautuaina atu ni mea musuia mo i latou e taulotoina.

O le Auala e Fesoasoani ai i Tagata o Loo Aoaoina ia Taulotoina

O manatu nei e mafai ona aoga tele e fesoasoani atu ai i tagata o loo aoaoina ia iloa ona taulotoina ni mea. Ao e mafaufau i nei manatu, ia manatua o le a manatua e i latou o loo e aoaoina ni mea e uumi atu pe afai e aoga ma taua ia i latou. Ia mautinoa ua latou malamalama i le uiga o upu o loo latou taulotoina.

Tusi i Luga o le Laupapa le Mataitusi Muamua o upu Taitasi o le a Taulotoina

Atonu e te tusia ia mataitusi nei i luga o le laupapa ina ia fesoasoani ai i tagata o loo aoaoina ina ia taulotoina le mataupu faavae e lua o le faatuatua:

M T F T U L T K T P S T

Faasino i mataitusi ao e tauina atu le upu e fetau i ai.

Vaevae le Mea o le a Taulotoina i ni Fuaitau po o ni Laina Pupuu

O nisi nei o faaitaiga i le auala e mafai ai ona e faaogaina leni auala:

- Tuu atu i tagata uma e toe fai mai faatasi ia ni fuaitau pupuu, e taitasi fuaitau i le taimi. Mo se faaitaiga, ina ia taulotoina le Faataoto 3:5–6, e mafai e tagata o loo aoaoina ona taulotoina ia vaega nei o le mau: (1) “Ia e faatuatua ia Ieova ma lou loto atoa,” (2) “ae aua le faalagolago i lou lava atamai.” (3) “Ia e manatua o ia i ou ala uma,” (4) “ona faatonuina ai lea e ia ou lava ala.”
- Vaevae tagata o loo aoaoina i vaega. Tuu atu i vaega taitasi se tasi o nei fuaitau. Afai e te tusi atu i vaega taitasi, ona latou ta'u mai lea o le latou fuaitau. E mafai ona e tuuina atu i tagata o le vaega mai lea taimi i lea taimi latou te toe ta'uina mai ma le filemu i o latou mafaufau le fuaitau nai lo le tau leotele mai o upu. Ao faalogo soo atu pea i ai tagata o loo aoaoina i fuaitau, o le a le pine ae mafai ona latou taulotoina atoa ia fuaitau i le faasologa sa'o.
- Ia toe ta'u mai ia upu o le fuaitau e pei ona i ai, ona taofi lea ae tuu atu i ai e ta'u mai le isi fuaitau.

- Ia saunia se kopi tusitusia o upu, ona 'oti'oti lea o fuaitau i ni fasi upu. A maea ona taulotoina soo le fuaiupu, ona faaali atu lea o upu tusi ae aua ne'i faatula-gaina sa'o. Tuu atu i tagata o loo aoaoina latou te faatulagana ia upu fefiloi i le faatulagana sa'o.

Tusi i Luga o le Laupapa Mea e ao Ona Taulotoina

Tuu atu i tagata o loo aoaoina e faitau soo le mea o le a taulotoina. Ia soloese auauai pe ufiufi foi ia upu seia oo lava ina ua taulotoina uma e tagata o loo aoaoina le mea atoa.

Faaaoga Musika

E mafai ona e faaogaina ia musika e fesoasoani ai i tagata o loo aoaoina e taulotoina se mea. Mo se faaitaiga, e mafai ona e aoaoina atu ia tusi o tusitusiga paia po o Mataupu Faavae o le Faatuatua mai le *Tusipese a Tamaiti*, itulau 63, 119, 122–33. O leni foi faiga e mafai ona avea ma auala fiafia mo le aoaoina ai o tagata matutua ma le autalavou.

Ia Faaitaitai Soo le Mea ua Taulotoina

E taua tele le faaitaitai soo o le mea ua tatou taulotoina. Ao e fuafuaina pe faapefea ona faaitaitaia, ia mafaufau i le umi o le mea o le a taulotoina. O se mau puupuu e mafai ona aoaoina uma i le taimi e tasi. O se pese fou atonu e mafai ona aoaoina taitasi ia laina. O se vaega mo se polokalama faapitoa atonu e tele ni faaitaiga e faia ai. Ia iloiloina soo faatasi ma i latou o loo e aoaoina le mea ua taulotoina. Ia uunaiina ia tagata taitaitasi e faaitaitai e i latou lava.

MUSIKA

Na saunoa mai le Au Peresitene Sili:

“O viiga musuia o se vaega taua o a tatou sauniga lotu. E aumai e viiga le Agaga o le Alii, faatupuina le lagona o le migao, faalotogatasi i tatou o tagata o le Ekalesia, ma tuuina mai ai ia i tatou se ala tatou te vivii atu ai i le Alii.

“O nisi o timaiga musuia tele lava e tuuina atu lea i le lagiina o viiga. E uunaia i tatou e viiga ia tatou salamo ma faia galuega lelei, atinae le molimau ma le faatuatua, faa-mafanafana i e vaivai, faalototele i e faanoanoa, ma uunaia i tatou ia tatou tumau seia oo i le iuga” (*Viiga*, vii).

O viiga e tuuina mai ai ia i tatou le musumusuga ma le faamafanafanaga maoae i o tatou olaga pe a mafai ona tatou taulotoina ma manatuaina i taimi e manaomia ai.

Na uunaia e Elder Dallin H. Oaks tagata uma o le Ekalesia ina ia faaogaina soo ia viiga ina ia faamalosi ai i latou lava ma isi:

“Ou te fia iloa lava pe mata o lava lo tatou faaogaina o risosi mai le lagi i a tatou sauniga, i a tatou vasega, ma tonu o o tatou aiga. . . .

“E manaomia ona tatou faaoga atili a tatou viiga ia tatou mafuta ai ma le Agaga o le Alii, ia faalotogatasia ai i

tatou, ma ia fesoasoani ia i tatou e aoao atu ai ma iloa a tatou mataupu. E manaomia ona faaoga lelei a tatou viiga i aoaoga faafaifeautalai, i vasega faaletalalelei, i fonotaga a korama, i afiafi faaleaiga, ma asiasiga a faiaoga o aiga” (i le Conference Report, Oke. 1994, 10, 13; po o le *Liahona*, Ian. 1995, 10, 12).

Faalauteleina o Lesona i Musika

E mafai ona e faaogaina ia musika i le tele o auala eseesee e faalautele ai au lesona ma valaaulia ai le Agaga. O nisi nei o faataitaiga.

Aoao Atu pe Toe Faamanatu ai se Mataupu o le Talalelei

O le tele o viiga e mafai ona fesoasoani ia te oe e aoao atu ai mataupu o le talalelei pe toe faamanatu ai mataupu ua uma ona outou talanoaina.

Pe a faaogaina se pese e aoao atu ai se mataupu, e mafai ona e tuuina atu i tagata o loo aoaoina ia fesili e fesoasoani ai ia i latou e toe tomanatu i le savali o le pese pe faamalosia ai foi se talanoaga. Mo se faataitaiga, ao le'i tuuina atu i tagata o loo aoaoina e usuina le “Tausi Poloaiga” (*Viiga*, nu. 186; *Tusipese a Tamaiti*, 68–69), e mafai ona e fesili atu, “Aisea tou te manatu ai tatou te maua le saogalemu ma le filemu pe a tatou ususitai i poloaiga?” E mafai ona e faaogaina le “Le Faavae Malosi” (*Viiga*, nu. 45) e fesoasoani ai ia i latou o loo e aoaoina ia latou malamalama e fesoasoani le Faaola ia i tatou ao tatou feagai ma faigata. Ina ia aoao atu e uiga i le faamafanafanaga lea e mafai ona tatou mauaina i le oti o se tasi e pele, e mafai ona e faaogaina le “O Fea Lo'u Filemu?” (*Viiga*, nu. 68).

A maea ona aoao atu se mataupu o le talalelei, e mafai ona fesili atu ia i latou o loo e aoaoina, “O le a le viiga e mafai ona fesoasoani ia i tatou e manatua ai lenei mataupu?” Ona usu lea o viiga latou te fautuaina mai. Afai o tamaiti, e mafai ona e usuina se pese ona fesili atu lea ia i latou pe faapefea ona faatatau le pese i le lesona. E mafai ona e valaaulia i latou e usuina faatasi ma oe le pese.

Sauniaina o le Malamalamaaga i Tusitusiga Paia

O viiga taitasi i totonu o le tusipese a le Ekalesia o loo i ai faatasi ma ni mau e faatatau i ai, ia o loo lisiina atu (tagai i *Viiga*, itulau 282–85). O le tele o pese i le *Tusipese Tamaiti* o loo i ai foi ia ni mau e faatatau i ai. E mafai ona e faatatau i nei mau e saili ai pese e fetai lelei ma se lesona. Mo se faataitaiga, afai o loo e aoaoina atu le Ioane 13:34–35, e mafai ona e tuuina atu i tagata o loo aoaoina e usuina le “Ia Fealofani” (*Viiga*, 195; *Tusipese a Tamaiti*, 74), o se tasi o viiga e fetai i nei fuaiupu.

Fesoasoani i Tagata o Loo Aoaoina ia Fausia ma Faailoa atu a Latou Molimau

Ao usuina e tagata o loo aoaoina ia viiga ma isi pese o le Ekalesia, e mafai e le Agaga ona molimau atu ia i latou i le

moni o mataupu sa aoaoina. E i ai nisi pese e matuai faailoa mai i o latou upu ia le molimau, o lea afai e usuina ai e mafai ai e tagata ona tuuina atu faatasi a latou molimau. O ia pese e aofia ai le “Ua ou Iloa Lo'u Faaola” (*Viiga*, nu. 73); “O A'u O Se Atalii o le Atua” (*Viiga*, nu. 184; *Tusipese a Tamaiti*, 2–3); “Ia Viia Oe le Atua,” (*Viiga*, nu. 10); ma le “Pe Na Toe Soifua Moni Mai ea Iesu?” (*Tusipese a Tamaiti*, 45).

Na faamatalaina mai e Peresitene Gordon B. Hinckley le auala na faamalosia ai e musika lana molimau i le Perofeta o Iosefa Samita:

“I le tele o tausaga ua tuanai, ina ua sefululua o'u tausaga, sa faauuina ai a'u o se tiakono, ma o lo'u tama, o le sa avea ma peresitene o le matou siteki, sa ia aveina atu a'u i la'u uluai lotu perisitua a le siteki. . . . Sa usuina faatasi e nei alii uma i o latou leo malolosi, ma nai faaleoga a atunuu Europa ia sa latou malaga mai ai o ni tagata liliu mai, sa latou usuina uma nei upu ma se agaga maoae o le talitonuga ma le molimau:

“Viia le na fetai ai ma Ieova!

Le perofeta na tofia e Iesu.

Na te tatala le toe autupulaga,

Tupu ma nuu latou te viia.

[“Viia Le na Fetai ai ma Ieova,” *Viiga*, nu. 15]

“Sa latou pepese e uiga i le Perofeta o Iosefa Samita, ma a'o latou faia sa faapea ona oo mai ai i lo'u loto se alofa ma le talitonuga faateleina i le Perofeta silisili o lenei tisipenisione. I lo'u laitiiti sa tele ni mea na aoaoina ai au e uiga ia te ia i sauniga ma vasega i le matou uarota e faapea foi i totonu o lo matou fale; ae o le mea na ou oo i ai i lena sauniga perisitua a le siteki na matuai ese lava. Na ou iloa ai iina, e ala i le mana o le Agaga Paia, o Iosefa Samita o ia moni lava o se perofeta a le Atua” (“Viia le Na Fetai ai ma Ieova,” *Liahona*, Me 1984).

Faaiuina o se Lesona ma Uunaia ai Tagata o Loo Aoaoina ina ia Faaogaina se Mataupu o le Talalelei

I le faaiuina o se lesona, e mafai e se viiga po o se pese ona tauaofaiina le mataupu sa aoaoina atu ma molioo atu ai se savali faagaetia. Mo se faataitaiga, i le faaiuga o se lesona i le tausaga o poloaiga, e mafai ona e tuuina atu i tagata o loo aoaoina e usuina le “Filifili Tau o Mea Tonu,” (*Viiga*, nu. 149); “Tausi Poloaiga” (*Viiga*, nu. 186; *Tusipese a Tamaiti*, 68–69); “Ia Fai le Mea Tonu” (*Tusipese a Tamaiti*, 80); po o le “Lototele o Nifae” (*Tusipese a Tamaiti*, 64–65).

Faatupuina o Lagona o le Faaaloalo

E mafai e oe ma lou aiga ona usuina ia viiga ma isi pese i afiafi faaleaiga, aufono faaleaiga, ma isi faatasiga ina ia faatupuina ai lagona o le faaaloalo ma faalauteleina ai sue-suega a le aiga o le talalelei. I totonu o se potuaoga, e mafai ona e taina se musika ua pu'eina pe tuu atu foi i se tasi e taina le piano ao ulufale atu tagata o loo aoaoina i totonu

o le potu. O le a fesoasoani lea e faatupuina ai se sio-siomaga faaaloalo ma saunia ai tagata o loo aoaoina mo le lesona.

O isi auala e mafai ai ona e faatupuina ia le faaaloalo e aofia ai le tatina malie o musika a'o e faitauina atu se tala pe o tusia foi e tamaiti ni ata e uiga i le lesona. Po o lou tu-uina atu foi i se tasi na te usuina se pese e pei o le "Ta'u Mai Tala ia Iesu" (*Tusipese a Tamaiti*, 36) ao matamata tamaiti i ata o tala faatusipaia.

Filifilia ma le Sauniaina o Musika Talafeagai

Pe a filifilia musika mo se lesona, ia tagatagai i faasi-noupu o Viiga ma le Tusipese a Tamaiti mo viiga ma pese e fetau i le autu o le lesona. O kaseti faalogologo ma tisiketi (disc) ua pue'ina o musika o loo i totonu o Viiga po o le *Tusipese a Tamaiti* ma isi musika a le Ekalesia o loo lisiina atu i le *Church Materials Catalog*.

Ia mautinoa o soo se musika e te faaaogaina ae le o aofia ai i mea ia ua gaosia e le Ekalesia, ia tausisia faatula-gaga a le Ekalesia (tagai i le vaega o "Musika" i le *Tusitaulima o Faatonuga a le Ekalesia*). O le taitaifono o musika a le uarota po o le taitai musika e mafai ona fesoasoani ia te oe i le filifilia ma le sauniaina o musika talafeagai.

Afai e te fuafua e usu pe taitaia se viiga po o se pese, ia mautinoa ua e iloa lelei ia upu ina ia mafai ai ona e gauai atu ia i latou o loo e aoaoina nai lo le tusipese.

O Fautuaga mo le Taitaia o Pese

Iloilo ia vaega "Faaaogaina o le Tusipese" i Viiga (itulau 273-81) ma le "Faaaogaina o le Tusipese" i le *Tusipese a Tamaiti* (itulau 149-50). Aoa ia fua faavae mo pese. Ia mafaufau foi i fautuaga nei:

- Pe a taitai se viiga po o se pese, atonu e te manao e faaoga ou lima e faailoa atu ai le maualuga ma le televave, po o le saosasaoa o le pese. Ina ia faailoa atu le maualuga, taofi lou lima i se tulaga faalava, ma a'o usuina ia upu, ia sii lou lima i luga e faailoa ai ia vaega maualuluga, ma tuutuu i lalo e iloa ai vaega maualalalo. Ao e faia lenei mea, faalemu pe faasaoasaoa lou lima e faailoa atu ai le televave sa'o. E mafai foi ona e tusia le taimi o se pese i luga o le laupapa. Mo se faataitaiga, o le fati faatulagaina o le amataga o le "O A'u o se Atalii o le Atua," (*Viiga*, nu. 184; *Tusipese a Tamaiti*, 2-3) o le a foliga faapenei:

— — — — — *atalii* — — — — —
 — — — — — *o le* — — — — —
O a'u o se — — — — — *Atua*

- Nai lo le faaaogaina o pa'o e taitaiina ai se pese, mafau-fau i le faaaogaina o taga faigofie a lima lea e atagia mai ai upu o loo i le pese.

Talosaga atu i le taitai musika a le uarota mo se fesoasoani pe afai e te lagonaina e te manaomia se fesoasoani faaopoopo e aoao ai le auala e taitaiina ai musika.

Faaaogaina o Musika e Aoa Ai Fanau

O le toatele o tamaiti e fiafia e auai i gaoioiga faa-musika. O fati o musika e fesoasoani i tamaiti e manatua ai le mea na latou usuina ma le savali o upu. O musika e mafai foi ona faateleina ai le malamalama i mataupu o le talalelei ma faamalosia ai a latou molimau. E mafai foi ona e faaaogaina ia musika e faafeiloai ai tamaiti, saunia ai i latou mo le tatalo, taulai atu ai lo latou naunau i le lesona, pe faafilemu ai foi i latou pe a maea se gaoioiga. E mafai e musika ona suia le saosasaoa o se lesona ma faatagaina ai tamaiti e faaoga lo latou malosi sili atu.

O le tele o lesona o loo fautuaina atu ai pese na e faa-malosia ai le mataupu o loo aoaoina atu. Ia tagai i le faasi-noupu o le *Tusipese a Tamaiti* mo isi pese talafeagai.

E te le tau manaomia le avea o oe ma se tagata musika lelei ina ia faaoga ai musika i lau aoao atu. Afai e te saunia lelei ma e fiafia i le pese, o le a fiafia tamaiti ma aoaoina mai le musika e te faaaogaina. O nisi nei o fautuaga e fesoasoani ai ia te oe e faaoga ia musika e aoao ai ia fanau. Mo fautuaga faaopoopo, tagai i le *Tusipese a Tamaiti*, itulau 149-50, ma le kaseti vitio *How to Teach a Song to Children*.

O faataitaiga nei e faaali atu ai le auala e mafai ai e se faiaoga ona faaaogaina le pese "Ou te Fia Vaai i le Malumalu" (*Tusipese a Tamaiti*, 99) e aoao atu ai e uiga i malumalu:

Ou te iloa se pese matagofie e uiga i malumalu. Ao tatou usuina lenei pese, faalogo lelei ina ia sailia ai mea tatou te faia pe a tatou o atu i le malumalu.

Na e iloaina le mafuaaga tatou te o atu ai i le malumalu? (O tali e mafai ona aofia ai ia vaega nei, tatou te o atu i le malumalu ina ia lagonaina ai le pa'i mai o le Agaga Paia, e faalogo ai, e osia ai feagaiga ma le Tama Faalelagi, ma ia faamauina ai o ni aiga.)

Se'i o tatou toe usuina le pese. O le taimi lenei, faalogo po o ai e ana ia le fale lea o le malumalu.

Na e iloaina o ai e ana ia le malumalu? (O le fale o le Atua.)

Faaauu ai pea fesili faapena seia oo ina e faamamafaina atu vaega o le pese na o le a fesoasoani ai i tamaiti ia malamalama i le savali.

MUSIKA FAATASI MA FAAMATALAGA (LAGI-FAAPESE-SE-TALA)

E mafai ona e faaaogaina faatasi ia musika e i ai faa-matalaga e faamatala ai se tala pe fetufaai atu ai se savali o le talalelei e faatatau i se lesona. O lenei auala o nisi taimi e ta'ua ai o le lagi-faapese-se-tala. I le gasologa o lenei gaoioiga, o le tele o le tala po o le savali o loo faailoa atu e ala i pese e usuina e tagata o le aiga po o tagata o le vasega.

O faamatalaga pupuu e fesootai ai le tasi pese i le isi pese. E mafai foi ona e tuufaatasia ia musika ma faamatalaga e saunia ai ni polokalama o aso faailogaina po o isi sauniuniga.

Faaitaiga o Musika faatasi ma Faamatalaga

O le tuufaatasiga lenei o musika ma faamatalaga e mafai ona faaaogaina i se lesonea e faatatau i le loto faafetai:

Faamatalaga: E alofa tele le Atua i Ana fanau. O se tasi auala na faaalua ai le alofa o le Alii mo i tatou o le foafoaina lea o le lalolagi mo i tatou. O le Salamo e 136 o loo aoaoina ai i tatou ina ia faaali atu le loto faafetai i le Alii mo Lona foafoaina o le lalolagi:

“Vivii atu outou i le Alii o alii. . . .

“O le faia vavega tetele, na o ia lava. . . .

“O le na faia le lagi i le potu. . . .

“O le na fofola le lalolagi i luga o le vai. . . .

“O le na faia malamalama tetele. . . .

“O le la e pule i le ao. . . .

“O le masina ma fetu e pule i le po” (fuaiupu 3–9).

Viiga: “Le Lalolagi Manaia” (Viiga, nu. 50)

Faamatalaga: O le lalolagi lea na foafoaina e le Alii mo i tatou ua tele ma anoanoai mea ua i ai mo o tatou manaoaga. E tatau ona tatou viia le Atua mo le “tamaoaga” o faamanuiaga ua tatou seleseleina.

Viiga: “O mai, e ua Faafetai” (Viiga, nu. 52)

Faamatalaga: E tatau ona tatou faaali atu foi lo tatou matuai loto faafetai i le Alii mo Lana Togiola, lea ua mafai ona faamamaina ai a tatou agasala ma maua ai e i tatou le ola e faavavau. Ao tatou faailoa atu la tatou faafetai mo Lana taulaga, ua sili ai foi ona tatou iloa lona mana. O lea malamalama e matautia ma faamaualaloina ai.

Viiga: “Ou te tu ma Ofo” (Viiga, nu. 107)

Faamatalaga: E faamoemoe le Alii ia tatou fetuفاai o tatou faamanuiaga—ia fafaga i e fia aai, faalavalava i e ua le lavalava, faamafanafana i e mamai ma mafatia, ma aoao i latou o loo sailia le upumoni. Ao tatou faia nei mea, tatou te faaali atu lo tatou loto faafetai moni ia te Ia mo faamanuiaga na Ia tuuina mai ia i tatou.

Viiga: “Ona Ua Maua Tele” (Viiga, nu. 124)

Taiala mo le Sauniaina o Musika faatasi ma Faamatalaga

- Toe tagai i le faasino upu o ulutala o loo i le tusi o viiga ma le *Tusipese a Tamaiti* mo se lisi o pese e tutusa ia autu lea e mafai ona faaaogaina mo lenei gaoioiga. Faaaoga ia pese e masani ai i latou o loo e aoaoina.
- Afai o le a faaaogaina se piano, ia galulue vavalalata ma le ta piano ina ia saunia ia pese, pe tuu atu foi i le tagata

o loo taitaia ia pese e galulue faatasi ma ia. Ia mautinoa o loo iloa e le ta piano le mea e amata ai ona ta ia pese taitasi.

- Ia faafaigofie pea ia faamatalaga i le va o pese. E mafai ona avea o se mau, ni tala pupuu, solo, ni mea na oo i ai le tagata lava ia, po o ni upusii. Afai e faaaogaina lenei gaoioiga faatasi ma tamaiti, e mafai ona e tuuina atu ia i latou ni fesili ma tuu atu i tamaiti e taliina e avea o se vaega o le faamatalaga. O le a fesoasoani lenei faiga ia malamalama ai tamaiti i le savali o le talalelei o loo e aoaoina atu.
- Pe a talafeagai ai, ia faaaoga ia ata e fesoasoani ai i tagata o loo aoaoina ia pu’e e pei o se ata i o latou mafafafau le tala po o le savali o le talalelei o loo tuuina atu. E mafai ona e faatagaina tamaiti e uuina ia ata i le taimi o le faatinoga.

LESONA FAATINO

Tagai i “Faatusatusaga ma Lesona Faatino,” itulau 171–72.

MASINI MALAMALAMA (tagai i LAUPAPA)

O masini malamalama e faamatamata tetele ai, lea e maua i potutusi o falelotu, o masini ia e faamatamata tetele ai ma faalapopoa ai ata i luga o se ‘ie po o se puipui. E mafai foi ona faaaogaina e avea o se mea e suitulaga i le laupapa. E matuai aoga tele lenei masini pe afai e toatele naua se vasega ma ua faigata ai i tagata uma ona vaai i le laupapa. Afai e i ai se masini malamalama a le potutusi o le tou falelotu, ona talosaga lea i le tagata o loo vaaia le potutusi le auala e faaaoga ai.

TALANOAGA FAAVAEGA

O se talanoaga faavaega e aofia ai se vaega e toalua pe sili atu foi o tagata o le vasega—po o ni malo e valaaulia atu e i ai ni atamai po o ni tomai faapitoa—o e tofiaina atu i ai se autu e talanoaina. O se talanoaga faavaega e taitaiina e se faufautua, e masani lava o le faiaoga.

E mafai ona e faaaogaina ia talanoaga faavaega e tuuina atu ai faamatalaga pe talanoaina ai po o le a le auala e ola ai i se mataupu o le talalelei pe foiaina ai foi se faafitauli. O talanoaga faavaega e tuuina atu ai i tagata o le vasega se avanoa e faailoa atu ai o latou manatu i ni mataupu eseese se tele. Afai e te talosaga atu i tagata o le vasega e tuuina atu se mea fou pe talanoaina ni faafitauli e fafia i ai le vaega, o le a sili atu ona latou auai ma le naunautai e aoaoina.

O le Auala e Saunia ai mo se Talanoaga Faavaega

1. Filifili se autu e talafeagai i le lesona ma le matutua o le vasega. Ia saunia ia fesili e uiga i lenei autu e mafai ai ona e fesili atu i tagata o vaega.
2. Ia filifili mamao atu tagata o le vaega o e e lelei o latou faalogona i le taliina o fesili i luma o se vaega. Ia faatapulaa le aofaiga o tagata o le vaega i le va o le tolu i le lima. O se vaega e sili atu ma le toalima e mafai ona tele ai le taimi e alu ai, ae o vaega taitoatasi e le mafai ona lava le avanoa e tuuina mai ai faamatalaga e uiga i le autu. Afai e te manao e valaaulia ni tagata asiasi e i ai ni malamalamaaga po o ni tomai faapitoa, ia manatua e manaomia muamua le faamaoniga a le epikopo ao le'i mafai ona auai le au failauga (tagai *Tusitaulima o Faatonuga a le Ekalesia, Tusi 2: Taitai o le Perisitua ma Ausilali* [1998], 365).
3. Fesoasoani i tagata o le vaega e saunia mo le talanoaga. Mafaufau i fautuaga nei:
 - a. Fesoasoani ia i latou ia malamalama po o le a le mea o loo aofia i le talanoaga faapea ma o latou matafaioi e i ai, e aofia ai soo se ituaiga suesuega po o nisi sauniuniga e tataua ona latou faia. Ia tuuina atu foi ia i latou ni faamatalaga i le matutua ma manaoga o tagata o le vasega, o le ituaiga faatinoga e tuuina atu o le a e manao e fai, ma le umi o le taimi o le a tuuina atu e faali atu ai.
 - e. Fesoasoani ia i latou ia mauaina le faamatalaga o loo latou manaomia mo le latou vaega i le talanoaga.
 - i. Afai o le a tuuina mai e le vaega ia ni faamatalaga po o ni manatu fou, ona tofitofi atu lea i tagata taitoatasi o le vaega se manatu e tasi o le autu ia le itiiti ifo ma le tasi le vaiaso ina ia mafai ai ona latou saunia lelei mo le talanoaga. Atonu e te manao e tuuina atu i tagata o le vaega ia faamatalaga mai tusituisiga paia, tusi lesona, po o isi risosi.
 - o. Afai o le a taulai atu ia tagata o le vaega i se faafitauli, ia feiloai muamua ma i latou ae le'i amataina le talanoaga ma tuuina atu i ai se lisi o fesili e ao ona talanoaina. Ia faatagaina tagata taitoatasi e filifilia ni fesili se lua pe tolu latou te mananao e tali mai i ai.
 - u. Ao le'i amataina le faatinoga, ia tuu atu i tagata o le vaega ni nai minute e fesui ai manatu ia i latou lava e uiga i le autu o le a latou talanoaina.

O le Auala e Taitaia ai se Talanoaga Faavaega

1. Faatulaga le potu ina ia mafai ai ona vaaia ma faalogoia ia tagata o vaega.
2. Afai o le a oo mai le taimi o le talanoaga faavaega, ia faailoa atu tagata o le vaega ma le autu o le a latou talanoaina.
3. Ao taitaiina e oe po o se faufautua le talanoaga ma tuuina atu ia fesili, ia mautinoa ia lava se taimi e tuu atu i tagata taitoatasi o le vaega e tali atu ai. O le tele o le faa-


- manuiaina o se talanoaga faavaega e faalagolago lea i le tagata o loo fai ma faufautua. O le tagata lenei na te faatulagaina le lagona faaleagaga mo le faatinoga ma le taitaiina o le talanoaga e ala lea i le tusiaina o faamatalaga e taulai atu i le autu po o le faafitauli, tausia pea le saosasoa o le talanoaga ia faaauuina pea, ma fesoasoani i tagata uma o le vaega ia auai i le talanoaga.
4. Ia faatagaina tagata o le vasega e tuuina atu fesili o le vaega.
 5. A maea le talanoaga, ona tauaofai lea o manatu na fetu-faai mai.

ATA PEPA E FAATUTU I LUGA (tagai foi TALA E FAATINO I NAI MEA FAITINO LAITI)

E mafai e faiaoga ona faaogaina ata pepa e faatutu i luga e fesoasoani ai i le faamatalaina o se tala pe faali atu ai se mataupu o loo i totonu o se lesona.

O le Auala e Fai ai se Ata Pepa e Faatu i Luga

1. Gagau faa-afa se fasi pepa malo .
2. Faatasi ai ma le pito na gagau o loo faau i luga, tusi le ata i luga o le pepa. Ia mautinoa ia faalautele atu le pito i luga o le ata i le mea na gagau. Ona e tuuina atu lea i tagata o le aiga po o tagata o le vasega e valivali ma teu-teuina le ata.
3. "Oti ese ia ata, ia mautinoa e te le'i 'otiina i luga o le mea na gagau ai i le mea o loo faalautele atu i ai le ata.



ATA (tagai foi FESOASOANI VAAIA)

O ata o ni meafaigaluega taua ia mo le faamalosia o le manatu autu o se lesona ma fesoasoani ai i tagata o loo aoaoina ia tumau pea le naunau mai. E mafai ona e mauaina ia ata mo le aoaoina atu o le talalelei i totonu o le potutusi o le falelotu, o le Taga Ata o le Talalelei, tusi lesona e gaosia e le Ekalesia, ma mekasini a le Ekalesia.

Faaliina atu o Ata

E mafai ona e faaliina atu ia ata i auala eseese. Mo se faataitaiga, e mafai ona e:

- Tuu i luga o le mea e tuu ai penisina o le laupapa, i luga o se tulaga, po o luga o se nofoa.
- Tuu atu i tagata taitoatasi latou te uuina.
- Uu e oe.

Aua ne'i faaaogaina ni mea faapipii e faapipii ai ata i le laupapa po o le puipui.

O le Auala e Aoa atu ai i Ata

O ata e mafai ona avea ma se vaega taua o le faamatalaina atu o se tala. Mo se faataitaiga, e mafai ona e fesoasoani i tamaiti e iloiloina se tala e ala i le talosaga atu ia i latou e tuuina ni ata i le faasologa ona tuu atu lea i tamaiti taitoatasi e faamatalaina se vaega o le tala.

Ia faafelanulanuai le faaaogaina o ata. Mo se faataitaiga, e mafai ona e faaliina atu se ata o Ioane le Papatiso o loo papatisoina Iesu. Ona e fai atu lea, "A'o soifua Iesu i le lalolagi, na Ia faatuina le faataitaiga mo i tatou e mulimuli i ai. Na ia silafiaina na poloaiina e lo tatou Tama Faalelagi tagata uma ina ia papatisoina." Ona e tuuina atu lea o fesili nei:

- O le a le mea o loo tupu i lenei ata?
- O le a le fetalaiga a Iesu e uiga i le auala sao e papatiso ai?
- O ai na papatisoina Iesu?
- Aisea na talosaga ai Iesu ia Ioane e papatisoina o Ia?
- Aisea na o atu ai Iesu ma Ioane i le vai?
- Aisea e taua ai mo i tatou le mulimuli i le faataitaiga a Iesu ma ia papatisoina e pei o Ia?

A maea ona talanoaina nei fesili, e mafai ona e tauaofaiina ia tali a tagata o loo aoaoina ma faatatau agai i le manatu autu o le lesona.

Ia manatua o tagata tusiata latou te faaaogaina a latou lava faaliliuga pe a latou tusia ni ata. O lea la, e le o mea uma lava o loo i totonu o se ata e tatau ona talanoaina. Ia faalagolago i le tala o loo i totonu o tusitusiga paia mo le faamatalaga ma le faatulagaina o se mea na tupu.

PAPETI

O papeti e mafai ona faaaogaina e faatino ai vaega o se lesona po o se tala, e faafeiloai ai tamaiti i le vasega, e tuuina atu ai aoaoga, e usu ai pese, e fesoasoani ai i le faatinoina o tala, e tuu atu ai fesili, pe fesoasoani ai foi i tamaiti ia tumau lo latou naunau mai.

Faataitaiga o Papeti



FESILI

Tagai i "Aoa atu i Fesili," itulau 71-73.

ATA FAASOLO E FAATINO E LE AU FAITAU (tagai foi FAITAU FAATASI; TOE FAAMATALA ATU)

I se ata faasolo e faatino e le au faitau, e faitau e tagata o loo auai se faamatalaga tusia e faamatala ai se tala. O se ata faasolo e faatino e le au faitau e mafai ona faia i totonu o le vasega pe faatinoina mo se aumaimoa.

E mafai ona e faaaogaina lenei auala e tuuina atu ai tala faatusipaia, tala, solo, ma isi faamatalaga. E mafai foi ona e faaaogaina e avea o se vaega o se polokalama faapitoa mo aso faailogaina po o ni mea faapitoa e tutupu.

Faataitaiga o se Ata Faasolo e Faatino e le Au Faitau

Tala: Apinati, Tupu o Noa, ma Alema

Faagasologa: Ia faamatala atu na auina mai e le Atua se perofeta e igoa ia Apinati e lapataiina le Tupu o Noa ina ia salamo ma ia latou agasala. Ona tuu atu lea i tagata o

loo aoaoina e faitauina upu a le Tupu o Noa, o ana faitaulaga amioleaga, o Apinati, ma Alema, ma tagata sa Nifae o loo i le Mosaea 17:1–19 ma le 18:1, 7–11, 17, 30. Ia tuu atu foi i se tagata e avea ma faamatala, e faitauina le tala i le va o faamatalaga a tagata o loo i le tala.

O le Auala e Faatinoina ai se Ata Faasolo e Faationo e le Au Faitau

- Filifili mea e lagolagoina ai le autu o le lesona. O mea e talafeagai e mafai ona maua i totonu o tusitusiga paia, o tusi lesona e gaosia e le Ekalesia, ma mekasini a le Ekalesia.
- Vaevae i ni vaega ia mea na. Tofitofi atu vaega i tagata o loo auai. Tuu atu i tagata o loo auai se vaega a se tagata o le tala po o le faamatala. Ia mautinoa ia lava le taimi o tagata auai e suesue ai a latou vaega ma ia latou malamalama i o latou matafaioi.
- Afai o le a outou faatinoina se ata faasolo e faatino e le au faitau mo se aumaimoa, ia tuu atu i tagata o loo auai e faataitai le faitauina o a latou vaega. Ia mautinoa ia manino lelei le latou tautala mai, ma ia malolo i mea e tatau ona malolo ai, ma fesui ai i le leotele ma le saosasoa o o latou leo e molioo atu ai le uiga o le savali.

TAULOTOINA (tagai foi FAITAU FAATASI; ATA FAASOLO E FAATINO E LE AU FAITAU)

I le taulotoina, e toe faamalau atu ai e tagata o loo auai ia mea na faitauina, lea e masani ona taulotoina. O se taulotoina po o le toe faamatalaina atu e mafai ona faia i totonu o le vasega pe faatinoina foi mo se aumaimoa.

E mafai ona e faaaogaina leni auala e tuuina atu ai tala faatusipaia, tala, solo, ma isi faamatalaga. E mafai foi ona e faaaogaina e avea ma se polokalama faapitoa mo aso faailogaina po o ni mea faapitoa e tutupu.

Faataitaiga o le Taulotoina po o le Toe Faamatala Atu

Autu: O Tulafono e Sefulu

Faasologa: I le Aso Sa ao lumanai se lesona e uiga i le tausia o poloaiga, ia tuu atu ai i tagata taitoatasi se kopi “O Tulafono e Sefulu,” (Esoto 20:3–17). Ia tofitofi atu tulafono taitasi ia i latou e taulotoina. I le gasologa o le isi lesona, ia tuu atu i tagata taitoatasi e tauloto lana vaega pe a oo i lona taimi.

O le Auala e Faatinoina ai se Taulotoina po o le Toe Faamatala Atu

- Filifili mea e lagolagoina ai le autu o le lesona. O mea e talafeagai e mafai ona maua i totonu o tusitusiga paia, tusi lesona e gaosia e le Ekalesia, mekasini a le Ekalesia, ma le *Tusipese a Tamaiti*.

- Vaevae le vaega o le a toe faamatala atu i ni vaega, ma tofitofi atu vaega i tagata o loo auai. Ia tuu atu i tagata taitoatasi le vaega a se tagata o le tala po o se tagata faamatala. Ia mautinoa ia malamalama tagata o loo auai i a latou vaega ma ia lava le taimi latou te aoaoina ai.
- Afai o le a outou faatinoina le taulotoina po o le toe faamatalaina atu o se mea mo se aumaimoa, ia tuu atu i tagata o loo aoaoina ia faataitai le faitauina o le mea o le a faamatala atu. Ia mautinoa ia manino le latou tautala ma malolo i mea e tatau ona malolo ai, ma fesui ai le leotele ma le saosasoa o o latou leo e molioo atu ai le savali.

VAEGA E FAATINOINA

I le faatinoina o se tala, e faatinoina e tagata o loo auai se tulaga po o se faafitauli e tupu i le olaga i aso uma. O le vaega e faatinoina e fesoasoani ai i tagata e faatatauina ia mataupu o le talalelei i tulaga moni o le olaga ao latou sailia ia fofo mo faafitauli, mafaufau i taunuuga o filifiliga eseese, ma ia malamalama i manatu o isi tagata. O le vaega e faatinoina e mafai ona faaaogaina e faailoa atu ai pe tauaofai ai se lesona pe faatupuina ai se talanoaga e uiga i se mataupu i le lesona.

Faaaliga: O se vaega e faatinoina e le tutusa ma le tulaga suesueina. I se tulaga suesueina, e *talanoaina* ai e tagata o loo aoaoina ia se tulaga po o se faafitauli. I se vaega e faatinoina, e *faatinoina ai* e tagata o loo auai ia uiga e faaali e tagata i se tulaga ma’oti.

Faataitaiga o le Vaega e Faatinoina

- Ua folafola atu e se tamaititi i ona matua o le a ia fesoasoani e tapena le fale. Ao sauni o ia e galue, na o mai ai nisi o ana uo ma talosagaina o ia latou te taaalo. Latou te mananao ia latou o nei loa ma ia ae tuu lana galuega e fai i se taimi mulimuli ane. Ia faatinoina le vaega e tatau ona ia ta’uina atu i ona matua ma le mea e tatau ona ia ta’uina atu i ana uo.
- O se faapotopotoga o uo sa savavali atu i le auala. Sa latou mauaina se ato tupe o loo i ai se tupe i totonu, ae latou te le iloa po o ai e ona. Na tofu uma lava leni uo ma se mea na mananao e fai i le ato tupe. Ia faatinoina le vaega o le mea e tatau ona latou faia.

O le Auala e Faaoga ai Vaega e Faatinoina

1. Ia saunia i latou o loo e aoaoina mo le faatinoina o se vaega e ala lea i le faamatalaina faapuupuutu atu i ai o le faafitauli po o le tulaga. Ia lava ni faamatalaga e tuuina atu ia i latou ina ia mafai ai ona ona latou faatinoina a latou vaega ma le manatu i ai. Ia faamamafa atu i ai e ao ona latou faatinoina se vaega ae aua ne’i faapei o i latou lava.

2. Ia filifili ni tagata e auai pe talosaga atu foi mo nisi e ofo mai. Ia ma'oti ona faailoa atu po o ai o le a faatinoina ia vaega taitasi. Ia faatulaga ia tele ni tagata auai pe a mafai ai, talu ai ona o le faatagaina o ni tagata se toatele e faatinoina se vaega e masani ona matele atu i le faamanuiaina nai lo le tofiaina na o se tagata se toatasi e faatinoina le mea e ono tupu. (O le faatinoina o se vaega e mafai ona fai ma toe fai ina ia fesoasoani ai ia toatele tagata e auai ma ia iloaina isi taunuuga.)
3. Tuu atu i tagata auai ni nai minute e fuafua ai po o le a le la tou mea o le a fai.
4. Ina ia faaafia ai i latou uma o loo auai, ia valaaulia i latou e le o auai ia matamata faalelei.
5. A maea ona faatinoina se vaega, ona talanoa lea ma iloilo le mea na tupu e ala i le tuuina atu o fesili e pei o le "O le a sou lagona na i ai e uiga i le faafitauli?" po o le "Faamata e mafai ona tupu lenei mea i le olaga?" po o le "E faapefea ona fesoasoani lenei vaega na faatinoina ia e iloa ai le mea e fai pe afai e tupu moni lava lenei mea?" Ia tuu atu ia i latou o loo e aoaoina e fuafuaina auala e foia ai faafitauli faapea i o latou lava olaga. Ia talanoaina isi taunuuga e tele.


Taiala Lautele mo le Faatinoina o se Vaega

- O le auai i le faatinoina o se vaega e tatau ona faia i le lotofuafiaifo. Aua nei faamalosia se tasi e auai.
- Ia faatinoina se vaega o ni tulaga moni o le olaga e faatatau i le lesonea e taua ia i latou o loo e aoaoina.
- E sili atu ona lelei le faatinoina e tagata o se vaega o ni tulaga na latou oo i ai muamua. Ae peitai, ia faaogaina le faautauta i le filifilia o ni tulaga e faatinoina. Talu ai e taua le tatau ona matuai moni ma ia taua ni faafitauli i le mea e gata mai ai, e le tatau ona i ai se tagata e auai e tuuina atu i se tulaga e ono faatinoina ai o latou lava olaga.
- I le avea ai ma faiaoga, ia nofouta i lagona ma uiga o tagata o loo aoaoina. Ia taliaina ni mea sese, ma aoaoina i latou ina ia talisapaia manatu o isi. Aua ne'i faatagaina le faitio o tagata e auai.
- O fesoasoaniga laiti e pei o pulou po o igoa e faapipii i ofu e mafai ona faaopoopoina atu ai le manaia i le faatinoina o se vaega, aemaise lava pe afai o loo e aoaoina ia le fanau laiti.

PUSA E FAASOLO AI ATA

E pei ona faaalua i lalo, o se pusa e faasolo ai ata o se atigipusa lea e faaoga e faaali atu ai ata ua sosooina faatasi i luga o se lola. O lenei meafaigaluega e aoao atu ai e maua ai se auala malie mo tamaiti e vaai ai i ata, aemaise lava pe afai na tusi lava e i latou ia ata.

O pusa e faasolo ai ata e mafai ona faaogaina e faaali atu ai vaega eseese o se mataupu o le talalelei, e pei o auala eseese e tausia ai le Sapati ia faapaiaina.. E mafai foi ona faaogaina e faaali atu ai se tala mai tusitusiga paia po o le talafaasolopito o le Ekalesia.



O le Auala e Faia ai se Pusa e Faasolo ai Ata

1. 'Oti se pu lapoa i le itu o se atigipusa tele. O le avanoa lea ua otiina e tatau ona mafai ai ona faaali atu ai se ata se tasi.
2. Tipi ni fasi laau se lua e tusa ma le ta'i ono inisi e uumi atu ai nai lo le lautele o le atigipusa. E mafai ona e faaogaina ia 'au o ni pulumu po o ni pepa malo ia e taai ai ni pepa affi.
3. Ia 'oti ni pu se lua mo laau i itu uma o le atigipusa, e pei ona faaalua i le faataitaiga o loo i le itulau e "00" [178].
4. Momono ia laau i totonu o pu.
5. Tuu atu i tamaiti taitoatasi se fasi pepa ma ni penitala po o ni penivali. Tuu atu i tamaiti e tusi ni vaega eseese o se mataupu o le talalelei po o ni vaega eseese o se tala. Afai e maea ona tusia ia ata, ona faapipii lea o pito o ata i le faasologa sa'o ina ia maua ai se lola se tasi. Pe tuu atu foi i tamaiti latou te tusia ni ata i luga o ni vaega eseese o se pepa umi.
6. Faapipii pito o le lola i laau.

E mafai e tamaiti ona faaogaina ia tamai atigipusa, penitala, ma ni pepa uumi e fai ai ni a latou lava pusa e faasolo ai ata.

TUSITUSIGA PAIA, MAKAINA MA LE TUSIAINA O FAAMATALAGA I AUTAFA

Tagai itulau 56–58.

TUSITUSIGA PAIA, TAULOTOINA O

Tagai "Taulotoina," itulau 188.

TUSITUSIGA PAIA, FAITAUINA LEOTELE

Tagai itulau 56.

TUSITUSIGA PAIA, FESOASOANIGA MO SUESUEGA

Tagai itulau 189.

TUSITUSIGA PAIA, AOAOGA MAI

Tagai “Aoa mai Tusitusiga Paia,” itulau 189.

LAGI-FAAPESE-SE-TALA

Tagai i “Musika faatasi ma Faamatalaga (Lagi-Faape-se-Tala),” itulau 183.

NOFOAGA E AOA O AI

O nofoaga e aoa ai, o potu ia e faataunuuna ai e faiaoga eseese ia gaoioiga e aoa mai ai. E vaevaeina ia tagata o loo aoaoina i ni vaega tutusa lelei ma faataamilo i le va o nofoaga. I nofoaga taitasi e taitaia ai e se tagata se gaoioiga e aoa mai ai ma tumau ai pea i totonu o lena potu e tuuina atu ai le faamatalaga lava lea e tasi po o le faatinoga i vaega taitasi e oo atu i le potu.

O oe po o le taitai o potu taitasi e tataua ona tulimataia le taimi ina ia mautinoa ia tutusa uma le taimi e faaluina e vaega i lesona taitasi e aoaoina ai. Atonu e te manao e tataina se musika e faailoa atu ai le taimi ua tataua ai ona faataamilo i le isi potu. Ia lava se taimi e tuuina atu e tauaofai ai le aoaoga i le vasega atoa.

Faataitaiga o Nofoaga e Aoa Ai

- Ia faaali atu ni mea e faataua i se autu patino, ma tuu atu i tagata e faamatala mai nei mea. Mo se faataitaiga, e mafai ona e faia ni nofoaga mo le gaosia o mea i le fale ma le teuina o meaai, teuina o vai, mea tafu afi, ma pusa mo faalavelave faafuasei.
- Ia tuu atu i faiaoga i totonu o potu eseese e aoa ai ina ia talanoaina ia vaega o sootaga faaleaiga, e pei o matafaioi o matua, a’oa’iga, po o le fesootaiga.
- Tuu atu i se tagata i totonu o potu taitasi e faafoliga i ni tagata eseese mai tusitusiga paia. Ia tuu atu i tagata taitoatasi e faamatalaina pe faapefea ona avea le tagata sa ia faafoliga i ai ma se faataitaiga o se tasi sa ola faamaoni i le talalelei.
- Ia i ai i totonu o potu ia ni nai meataulima faigofie, taaloga, po o gaoioiga a tamaiti paionia.

O TALA

E fiafia tagata uma i tala lelei. O tala e faamauoina ai lesona ma pu’epu’e maia le fiafia o tagata aoa ia e mafai ona faia i ni nai metotia faafaiaoga. E mafai ona faaoga tala e tali ai ni fesili, faatomua atu ai ma faamalasia

mataupu faavae, pe aoteleina ai foi ni lesona. E mafai ona matua lelei e faamanino ai ma aoa atu mataupu faavae o le talalelei e ala lea i le tuuina atu o faataitaiga o le ola amiotonu, aapa atu i tagata o loo faalogologo i le tulaga tonu lava latou te gafatia ona malamalama ai.

A faaogaina lelei tala, e maua e tagata aoa le taua ma lagona. E mafai ona fesoasoani i tagata aoa e faaogaina mataupu faavae a o latou fetuفاai i mea tutupu faatusi paia, o taimi e faia ai faaiuga, o faigata ma tauiviga, ma faamanuiaga o le ola ai i le talalelei a Iesu Keriso. Latou te faafaigofieina mataupu faavae ia malamalama ai ma manatua. Latou te faaali mai i auala olaola ma le musuia pe mafai faapefea ona faaoga mataupu faavae o le talalelei i o tatou olaga. Mo se faataitaiga, ina ia aoa atu e uiga i le faatuatua, e mafai ona e fetuفاai atu le faamatalaga a Alema, afa i ia i tatou le faatuatua, tou te “faamoemoe i mea e le o vaaia, a ua moni ia” (Alema 32:21). Ae o le a sili atu lou faaatoatoaina o lau aoa atu, pe a e faamatalaina foi se tala e faaogaina ai e se tasi le faatuatua tele, e pei o le tala ia Tavita i le taua ma Koliata (tagai 1 Samuelu 17:20–50, aemaise lava fuaiupu e 26, 32–37, ma le 45–47).

O le Faaola o le Faiaoga o Faiaoga ma le faataitaiga e tataua ona tatou mulimuli ai i a tatou aoaoga uma lava o le talalelei. E masani ona Ia faaogaina tala i Ana aoaoga. O Ana faataoto o ni faataitaiga silisili ia ona lelei o le faaogaina o tala e aoa atu ai. Mo se faataitaiga, na fesili atu se aoa faitulafono ia te Ia, “O ai lo’u tuaoi?” Na Ia tali atu i le faamatalaina o se tala e uiga i se tagata na fasia ma faoana mea a o malaga atu mai Ierusalemia i Ieriko. Na ui ane ai ni alii se toalua i le alii na manu’a ma sa le’i ano i ai, ae o le lona tolu, o se tagata Samaria, na tu ma fesoasoani ia te ia (tagai Luka 10:29–35). Ina ua maea le le faataoto a Iesu, na Ia fesili atu i le aoa faitulafono, “O ai o nei tagata e toatolu e te manatu, o le tuaoi o le tagata lea na fasia e tagata faomea?” Sa tali atu le tagata, “O le na alofa atu ia te ia.” Ona tali atu lea o Iesu, “Ina alu ia, ma ia e faapea ona fai” (Luka 10: 36–37).

Filifilia o Tala

Pe a filifili se tala, fesili ifo ia te oe lava i nei fesili, ina ia mautinoa e talafeagai le tala ma lelei. O loo maua nei fesili ma isi i le “Filifilia o Metotia Talafeagai” (itulau e 98) ma le “Filifilia o Metotia Lelei” (itulau 99).

- Mata o le a valaaulia ai le Agaga i le tala?
- Pe ua fetau ea le tala ma le paia o mea o loo ou aoaoina atu?
- Mata e faamalalamaina ea e le tala ma faamalolosia i latou o loo ou aoaoina?
- Mata o le a fesoasoani ai ea i tagata aoa e malamalama atili ai i le mataupu faavae na aoaoina?
- Pe o le a faaogaina tataua ai ea le taimi?

O Ituaiga Tala Eseese

E mafai ona e faaaogaina tala mai mea na e oo lava oe i ai. E mafai foi ona e faaaogaina tala e uiga i isi, e pei o tala mai tusitusiga paia, mai soifuaga o taitai o le Ekalesia, ma soifuaga o isi tagata e te iloa pe na faitau ai foi. Mo ni faamoemoega patino, atonu e te manao e faaoga tala fatu, e pei o faataoto po o ni tala faafagogo.

Aafiaga Faaletagata

O le faamatalaina o aafiaga faaletagata, e mafai ona malolosi ni faatosinaga e fesoasoani ai i isi e ola i mataupu faavae. Pe a e ta'u atu e uiga i mea na e aafia ai oe lava ia, ua aveva oe o se molimau ola o upumoni o le talalelei. Afai e te tautala faamaoni ma le faamoemoega mama atoatoa, o le a faamautuina e le Agaga le moni o lau savali i loto o i latou e te aoaoina. O aafiaga faaletagata o i latou e te aoaoina, e mafai foi ona mamana se faatosinaga mo le lelei.

Na aoao mai Bruce R. McConkie, "Atonu o le faatula-gaga atoatoa lelei i le faamatalaina atu o tala e siitia ai le faatuatua, o le aoao atu lea o mea o loo maua i tusitusiga paia, ona tuu lea i ai o se faamaufaailoga o mea moni o loo tutupu i le faamatalaina lea . . . o se mea talitutusa na tupu i lo tatou tisipenisione ma o tatou tagata—ae sili atu ai—mea na tutupu ia i tatou taitoatasi" ("The How and Why of Faith-promoting Stories," *New Era*, July 1978, 5).

I le faamatalaina o aafiaga faaletagata, e tataua ia te oe ma i latou o loo e aoaoina ona manatua mea nei e ao ona faaeteete i ai:

- Aua nei tautala i mea paia sei vagana ua uunaia ai e le Agaga. Ua fetalai mai le Alii, "Ia manatua o mea mai luga e paia, e ao foi ina tautala i aima le faaeteete, ma le uuna'iga a le Agaga" (MFF 63:64).
- Aloese mai le faaosofiaina o lagona faate'ite'i, o lona uiga o le faia lea o se tala ina ia maofa ai. Aloese mai le taumafai e faaosofia ni lagona malolosi o tagata o loo e aoaoina.
- Aua e te faaopoopoina nisi mea i luga atu o mea moni na e oo i ai, ona o se isi lava mafuaaga.
- Aua e te faamatalaina atu mea na e oo i ai, ina ia faagauai mai ai ia te oe.
- Aua e te talanoa e uiga i agasala ua tuanai po o ni solitulafono.

O Tala e Uiga i Isi

Ua matua faatumulia tusitusiga paia ma le talafaasolopito o le Ekalesia i tala e uuiga i tane, o fafine, ma tamaiti sa faaaogaina mataupu faavae o le talalelei o i latou olaga. Mo se faataitaiga, e mafai ona aoao atu e uiga i le tatalo i le faamatalaina o le tala ia Enosa a o ole atu i le Alii mo ia lava, o lona nuu, ma ona fili. E mafai foi ona e aoao atu e

uiga i le tatalo i le faaaogaina lea o le tala i le olega a Iosefa Samita i le Vao Paia. Ma e anoanoai tala e i ai aoaoga, o tala faamomoi loto mai olaga o le Au Paia o Aso e Gata Ai faamaoni i ona po nei e mafai ona e faamatalaina. Pe a faamatala atu tala e uiga i isi, ia manatua taiala nei:

- Afai o se aafiaga faaletagata, ia mautinoa o loo e faia e tusa ai ma le Agaga. Aloese mai le faaosofiaina o ni lagona malolosi, ma aua le faaopoopoina nisi mea i luga atu o mea moni na tutupu, pe a e faamatalaina le tala.
- Ia mautinoa e te faamatalaina sa'o ia tala. Aua nei faamatalaina ni tala e uiga i isi ae lē moni, pe i ai foi ni mea e le moni. A o le'i faamatalaina se tala, alu i le faapogai e faamaonia mai ai pe moni lea mea.
- Afai e le'i lolomiina se tala pe le'i faasalalauina foi faalauaitele, ia maua mai se faatagana mai le tagata e ona ia le tala ae e te le'i faamatalaina.

O Tala Fatu

E i ai se avanoa mo tala fatu i le aoaoina o le talalelei. E mafai ona e aoaoina le ala e faaoga ai tala fatu i lou sueueina lea o le auala na faaoga ai e le Faaola faataoto i Ana aoaoga. Na Ia ta'ua se alii poto na fausia lona fale i luga o le papa ma se alii valea na fausia lona fale i luga o le oneone (tagai Mataio 7:24–27), o se fafine na salusaluina lona fale e sue ai lana tupe na leiloa (tagai Luka 15:8–10), ma se atalii faamaumau oa sa faaalu valeina lona tofi ae na toe talia fiafia i le aiga e lona tama (tagai Luka 15:11–32). Afai tatou te taliaina le Agaga, e mafai ona tatou aoaoina mea moni sili mai nei faataoto ma le tele o isi sa aoao mai e le Faaola.

E pei ona faamatala mai i le Lomifefiloi o le Tusi Paia, o faataoto o ni faatusatusaga. Latou te aoao maia upumoni faaleagaga i le faatustusaina lea i mea faaletino po o mea foi e tutupu (tagai Bible Dictionary, "Parables," 740–41). E moni lenei tulaga i tala fatu uma e talafeagai ona aoao atu ai mataupu faavae o le talalelei. E mafai e tala ona faafaigofie ia mataupu faavae ia malamalama ai, olaola ai i le mafaufau, ma manatua gofie ai. Mo ni fautuaga i le faaaogaina o faatusatusaga e aoao atu ai upumoni o le talalelei, tagai "Faatusatusaga ma Lesona Faatino", itulau 171–72.

A o e sauniuni e faaoga tala fatu, manatua taiala nei:

- Ia mautinoa ua malamalama i latou o loo e aoaoina, e lē o ni tala moni.
- E faapei foi o isi ituaiga tala, ia mautinoa e talafeagai tala fatu, ia logoleleia, ma ia tusa ai ma le Agaga.

O mekasini o le *Friend* ma le *New Era* e masani ona i ai tala fatu e mafai ona faaoga e faaopoopo atu ma faamaoaina ai lesona. Mo se faataitaiga o le faaaogaina lelei o tala i le aoaoina atu o le talalelei, sueue i lauga o konafesi aoao.

Taiala mo le Sauniaina ma le Faamatalaina o se Tala

- Ia i ai se mafuaaga e faamatala ai se tala. Aua nei faaogaina se tala e tau ina faafiafia ai i latou o loo e aoaoina. Ia fesootai le tala ma se mataupu faavae autu po o le faamoemoega o le lesona.
- A fai e le moni se tala, ia faamalamalama i le vasega.
- Filifili ni tala faagaetia mai lou olaga, o tusitusiga paia, o mekasini a le Ekalesia ma tusi lesona, o le talafaasolopito o le Ekalesia, ma soifuaga o le Au Pulega Aoao. Pe a faamatalaina tala mai lou olaga, aloese mai le faamatalaina o amioga sese ua tuanai po o agasala.
- Manatua e faaoga tala e talafeagai ma vaitausaga po o le matutua o le vaega o loo e aoaoina.
- A o le'i faamatalaina se tala i lau vasega, ia faitau faatele ma mafaufau i ai ina ia e masani ai. A o e faia lea tulaga, fuafua pe e te faamatalaina le tala i au lava upu pe leai foi. O tala e tele talanoaga e fai ai ma isi faamaninoga, e sili atu ona lelei pe a faitauina.
- Fuafua pe o le a le tele o le taimi e faamatala ai le tala. Afai e tatau ona faapuupuu le tala, ia tau o tagata ma mea taua talafeagai na tutupu e faamatala ina ia faigofie ona malamalama i le tala.
- Afai e te faamatalaina se tala i au lava upu, ia tusi i se pepa pe faatulaga foi i lou mafaufau le faasologa o mea na tutupu i le tala. Ia faaa'oa'o le faamatalaina leotele o le tala i au lava upu. Ia faaoga upu ma faamatalaga e faaopopo ai le manaia ma vaai i ai faalemafaufau.
- Fuafua pe faapefea ona e fesoasoani i tagata e faalogologo i ai, ia latou vaai faalemafaufau i le tala. E mafai ona e amatalia le fiafia i le tala i le faaogaina lea o ata po o nisi mea faitino e pei o ata tusi i luga o le laupapa, po o isi mea e fetui ma le tala. Mo se faataitaiga, a o le'i faamatalaina le tala e uiga i le oo mai o le Tusi a Mamona, e mafai ona e faaali atu se ata o Moronae o loo natia papatusi auro i le Mauga o Kumora. E mafai ona e faia fesili e pei o le "O le a le mea lea e tupu i le ata?" po o le "Aisea ua faia ai e Moronae lena mea?"
- Ia amata le tala i se faiga manaia, e faaoga ai upu e maua ai se ata olaola o tagata o le tala ma le nofoaga o loo tupu ai. Mo se faataitaiga, a faatomatau atu le tala i le Faaola o loo vavaoina le matagi, e mafai ona e faitau mai tusitusiga paia: "Faauta foi, ua to mai le afa tele i le vai, ona osofia mai ai lea o le vaa e peau" (Mataio 8:24).
- Ia sagisagi atu i le faamatalaina o le tala. Faamatala i se leo masani, faatasi ma le fiafia i ai ma le talitonuga maumaututu.
- A maea ona faamatalaina le tala, ia talanoa ma tagata aoao pe faapefea ona faaoga i o latou olaga le mataupu faavae na aoaoina.

Fautuaga Faaopopo mo le Faamatalaina o se Tala i Fanau Laiti

- Ia mafaufau i tausaga o tamaiti, fetuutuunai le tala ia talafeagai ma le umi e ua'i mai ai ma lo latou malamalama.
- Fuafua ni auala e faaafia ai tamaiti i le tala. Mo se faataitaiga e mafai ona e faaogaina e uu ni ata pe faataitai mai le faiga o fuaitau.
- Ae e te le'i faamatalaina le tala, faamatala upu o loo i le tala atonu e le malamalama ai tamaiti. O le a fesoasoani lea ia te oe e faamatalaina le tala e aunoa ma le faalavelavea.
- Afai e te faitauina mai i se tusi e i ai ni ata, fai ma taofi ae faaali i tamaiti ata o le tala. Ia lava se taimi e faaali ai ata ina ia vaai i ai tagata uma a o le'i faaauuina le tala.
- Afai e faia ni faamatalaga a tamaiti pe fai ni fesili, ia tuu atu i ai ni tali faigofie, ma tuusao. Ona faaauu ai lea o le tala.
- E fiafia tamaiti laiti e toe faamatala faafia ni tala. Afai e toe faamatala se tala, ia amata ona fesili lea, "O le a le mea na sosoo ai?" E mafai foi ona e togiina se taga o fatupi po o se meataalo malū i se tamaitiiti ona fesili lea i ai, e ta'u atu se mea se tasi e uiga i le tala. Ona togi lea e le tamaitiiti lena o le taga fatupi i se isi tamaitiiti ma faaauu ai pea lava seia i'u ina mae'a le tala.
- Ia tuu faatasi ni fuaitau eseese o se tala faatusi paia. Tofi ni tagata aoao eseese e faitauina mai mau i le faasologa.
- Atonu e fiafia tamaiti e nonofo i le fola i ou luma a o e faamatalaina atu se tala.
- Atonu e fiafia tamaiti e faatino se tala pe a uma ona faalogologo i ai.


O MEA FAITINO (tagai foi i ATA)

Tatou te aoao e ala i o tatou seniori uma. I le faiga o aoaoga aloaia, tatou te mafui atu i le faalogologo tele i upu e tautala ai. Peitai, o faiaoga e naunau e faateleina le tomai e malamalama ai le tagata aoao, na te faaogaina foi mea faitino. O le toatele lava o tagata e sili atu ona latou aoao ma umi se taimi e manatua ai, pe a e tuuina atu ni manatu i le faaogaina lea o ata, o faafanua, o le faavasegaina o upu, po o isi mea e vaaia, nai lo le na ona tautala atu.

O loo faaalia i faataitaiga nei nisi o mea e mafai ona e ausia i mea e vaaia.

Faamanino faiā a manatu, o tagata, po o nofoaga

Sa manao se faiaoga o le Aualofa e fesoasoani i tuafafine ia malamalama atili pe faapefea ona faaalia i le Roma 5:3–4 le faiā o faigata ma le faamoemoe. Na ia tusia se ata faigofie:




Ona fesili ai lea o ia i tuafafine e talanoaina pe faapefea e faigata ona aumaia le onosai, sa valaaulia i latou e aumai ni faataitaiga patino mai o latou olaga. A o faaaauu pea e tuafafine le ata faigofie, sa oo ina latou iloaina le taua o faigata, onosai, aafiaga, ma le faamoemoe i o latou olaga taitasi.

Sa aoaoina e se vasega o le Aoga Sa le tala i le auala i Emāu (tagai Luka 24:1–35). Sa faaoga e le faiaoga se faafanua i tusitusiga paia e fesoasoani ai i le vasega ia malamalama i le va o Ieruselema ma Emāu. Ona ia faaali atu lea i ai o se faafanua o lo latou lava taulaga, faatasi ai ma le va o ni nuu se lua e masani ai tagata aoao. Na avea lena ma fesoasoani i tagata aoao e malamalama ai i le umi e savali ai i lena va, ma fesoasoani ai ina ia latou talisapaia lelei ai mea na tula'i mai i le talanoaga a soo ma Iesu.

Faaali atu lagona ma saunia faamautinoaga faaleagaga

Sa faaogaina e se tasi faiaoga le laupapa e faapupula ai le Mataupu Faavae ma Feagaiga e 84:88 i se vasega o faifeautalai. Na manao o ia i faifeautalai ia latou lagona e mafai ona siomia i latou i le mamalu o le Alii. Na ia faapupulaina fuaitau taitasi mai le mau e pei ona ta'ua i lalo:



O lenei faatulagana faigofie o upu o le mau, na mafai ai e faifeautalai ona lagonaina le folafolaga puipui a le Alii i se ala maoae. Na sosoo ai ma se talanoaga manaia lava ina ua valaaulia tagata aoao e faamatala mai o latou atuatuvalega e tusa ai ma le galuega faafaifeautalai ma lo latou tali-tonuga maumaututu i le folafolaga a le Alii e fesoasoani ia te i latou.


Fesoasoani ia Malamalama Tagata Aoao i le Faasologa

E mafai ona fesoasoani mea e vaايا ia i latou o loo e aoaoina, ina ia malamalama i le faasologa o mea na tutupu. Mo se faataitaiga, e mafai ona fesoasoani taimi, e malamalama ai tagata aoao i le faasologa o mea na tutupu a o latou susueina mataupu e pei o le misiona a Iesu, o femalagaiga faamisionare a Paulo, po o le talafaasolopito i popofou o le Ekalesia.

Fesoasoani i Tagata Aoao ia Malamalama i Mataupu Faavae

Pe afai e vaai faalemafaufau tagata aoao i le faasologa faatusipaia, e masani ona latou malamalama lelei i mataupu faavae. O le toatele o tagata o le Ekalesia ua aoaoina le fuafuaga o le fiafia, i le vaai lea i ai. O le tusia o se ata o le muai olaga, o le olaga i le taimi nei, o le olaga pe a mavae le oti, faamasinoga, ma malo e tolu o le mamalu, e aoga e fesoasoani ai ia tatou malamalama i le faasologa o le fuafuaga.

O mea e vaايا e mafai ai ona faateleina le malamalama o le tagata aoao i mataupu faavae lavelave. Mo se faataitaiga, e mafai ona faaoga ata nei e faapei o le mana sooupu o le Togiola a Keriso



Fesoasoani i tagata aoao ia manatua

O se lesona e uiga i le fesoasoani i e matitiva ma e le tagolima, e mafai ona faalateleina i le faaogaina o le ata o Keriso ma le Tagata Mauoa Faitulafono. I lenei ata, o loo faasino atu ai e le Faola le alii talavou i tagata e lē tagolima ma faapea atu, “Ina alu ai, faatau atu au mea uma, ma avatu i e ua matitiva, ona e maua lea o le oa i le lagi: i le e sau ai, ma ave le satauro, ae mulimuli mai ia te au” (Mareko 10:21). E mafai ona fesoasoani lenei ata i tagata aoao, ia latou manatua ai e auauna atu ia i latou e manaomia le fesoasoani.

O LAUPAPA PAPAE

Tagai “Laupapa”, itulau 192

PEPA O GALUEGA

O pepa o galuega o loo i ai gaoioiga tusitusi e fesoasoani i tagata aoao e iloilo ai lo latou malamalama i se mataupu faavae o le talalelei, aoao ai mea fou, pe toe faamanatu ai foi mataupu autu. E mafai ona e saunia se pepa o galuega e faatomua, pe faamamafa, pe toe faamanatu ai foi vaega taua o se lesona. E mafai foi ona saunia se pepa o galuega e fai ma faamanatu o se lesona mo i latou e te aoaoina e ave i le fale e fetufaai ai ma o latou aiga.

Faataitaiga o Pepa o Galuega

Pepa o Galuega e Iloilo Ai


E mafai ona e faaogaina se pepa o galuega e iloilo ai, e fesoasoani ai i tagata e iloiloina pe o faapefea ona avea se mataupu faavae o le talalelei ma vaega o o latou olaga i le taimi nei, ma ia iloa ai vaega e mafai ona latou faaleleia atili. Faaoga se pepa o galuega e pei o le pepa o loo i lalo, i le amataga o le lesona. Ia faamalamalama afai e tali mai se tasi i le *leai* i soo se tasi o fesili, o le a fesoasoani le lesona ia te ia e malamalama ai i le ala e lelei atili ai le ola ai i le mataupu faavae ma o le a fautuaina atu ai ni auala se tasi pe lua foi e faaleleia ai atili.

O le a le Ituaiga Faataitaiga e i ai A'u?

- | Ioe | Leai | |
|--------------------------|--------------------------|---|
| <input type="checkbox"/> | <input type="checkbox"/> | Pe ou te faalogo atu ma le faaaloalo i manatu o isi? |
| <input type="checkbox"/> | <input type="checkbox"/> | Pe ou te tautala lelei ea e uiga i isi tagata? |
| <input type="checkbox"/> | <input type="checkbox"/> | Pe ou te faia ea ma le alofa tagata o lo'u aiga? |
| <input type="checkbox"/> | <input type="checkbox"/> | Pe o ou faamaoni ea i la'u galuega? |
| <input type="checkbox"/> | <input type="checkbox"/> | Pe ou te taalo tausaaafia ea? |
| <input type="checkbox"/> | <input type="checkbox"/> | Pe o ou tausisia ea le mama ma le atoatoa o la'u gagana? |
| <input type="checkbox"/> | <input type="checkbox"/> | Pe o ou tumama ea i o'u foliga ma lavalava? |
| <input type="checkbox"/> | <input type="checkbox"/> | Pe o ou tausia ea poloaiga? |
| <input type="checkbox"/> | <input type="checkbox"/> | Pe o ou faitauina ea i aso taitasi tusitusiga paia? |
| <input type="checkbox"/> | <input type="checkbox"/> | Pe o ou sagisagi atu ea e fesoasoani i isi? |
| <input type="checkbox"/> | <input type="checkbox"/> | Pe o ou matamata ea i ata tifaga ma polokalama lelei o le televise? |
| <input type="checkbox"/> | <input type="checkbox"/> | Pe o ou faitauina ea na o tusi ma mekasini lelei? |
| <input type="checkbox"/> | <input type="checkbox"/> | Pe o ou lē manatu faapito ea i o'u taimi ma a'u taleni? |
| <input type="checkbox"/> | <input type="checkbox"/> | Pe o faatuatuaina ea au? |

Faafetaui

Ia lisi igoa o perofeta eseese i se koluma se tasi ma fai foi se lisi o mea ua lauiloa ai i latou i se isi koluma. Ia faafetaui e tagata aoao ia perofeta ma mea na tutupu, e pei ona faaalua i lalo.



E mafai ona faafetaui e tagata aoao mea mai soo se numera o mataupu o le talalelei. Mo se faataitaiga, e mafai ona latou faafetauiina Mataupu Faavae o le Faatuatua ma fuainumera sa'o, e mafai foi ona latou faafetauia tiute faaleperisitua ma tofiga sa'o o le perisitua.

Faasologa o taimi

Saunia se pepa o galuega e lisi ai ni mea moni na tutupu i le talafaasolopito, po o vaega o se tala faatusi paia. Ia faanumeraina e tagata aoao i le faatulagaga sa'o. Mo se faataitaiga:

- Ua asiasi atu Keriso i tagata Sa Nifae. (3)
- Ua maliu Mamona. (4)
- Ua tuua e Liae Ieruselema. (2)
- Ua faatuputeleina le tamaoiga o Sa Iareto. (1)
- Ua mauaina e Iosefa Samita papatusi auro. (5)

Faatumu Avanoa

Saunia ni fuaiupu ae faamisi nisi upu. Ia faatumu e tagata aoao avanoa i upu sa'o. Ia saunia tali ae faafeleiloga'i. Mo se faataitaiga:

“Ae afai ua leai se _____ i so _____, ina _____ atu ia i le Atua, o le _____ tele mai i _____ uma ma le le toe _____; ona _____ mai ai lea ia te ia” (Iakopo 1:5).

Tali: ta'uta'ua, outou, foai, poto, foaiina, ole, tagata,

Faaaogaina o Mau

e mafai ona e faaogaina pepa o galuega e toe iloilo ai ma faaoga mea mai lesona ua maea. Filifili ni nai mau e fetau ma autu o le talalelei o loo suesueina nei. Toe faamanatu mau faatasi ma i latou o loo e aoaoina, ma ia mautinoa ua latou malamalama ai. Ona tusi lea o tusi o loo i ai mau i luga o le laupapa. Tuu atu se tulaga faatusa e

aoao ai (tagai “Tulaga Faatusa e Aoao Ai,” itulau 161–62). Fai i tagata o loo e aoaoina e filifili mai se mau se tasi pe a itiiti, ma faaoga i le tulaga faatusa e aoao ai. Tufa ia tofu tagata ma se fasipepa ma se peni. Ia tusi e tagata aoao le fuaitau po o fuaitau ua latou filifilia, pe o a foi mea o loo aoao mai e na fuaitau, ma pe faapefea ona latou faaogaina i le tulaga faatusa e aoao ai.

Upu ua Faafeileloga'i Mataitusi

E tele auala e mafai ona faaoga ai upu ua faafeileloga'i mataitusi. Mo se faataitaiga:

- Mataitusi ua faafeileloga'i i upu.[1] Fai i tagata aoao e faavasega ina ia sipelaina ai upu. O le pepa o galuega o loo i lalo o loo i ai upu ua faafeileloga'i, e ogatasi ma tomal e manaomia e faifeautalai.

EUSUSE (Suesue)	IUSIUS (Suisui)
AKUK (Kuka)	TEKAPI (Paketi)
LUIA (Auli)	OAAO (Aoao)
AONITISOLAMAF (Faamalositino)	
EMAOLIEIL (Amiolele)	
IMALOMU (Molimau)	AMMA (Mama)

- Faafeileloga'i upu ona faavasega lea e tagata aoao ina ia faaatoa ai se fuaitau, o se mau, se ulutala o se pese, po o se mataupu o le faatuatua. Mo se faataitaiga: aiga faavavau ona mafai e (“E mafai ona faavavau aiga” [Viiga, no. 183].)

atu mea Atua le alu Ou te ma e poloaiina fai ia ua (“Ou te alu atu ma fai ia mea ua poloaiina e le Atua” [1 Nifae 3:7].)

O Taiala mo le Faia ma le Faaogaina o Pepa o Galuega

- O faamatalaga ma manatu mai tusi lesona ma mekasini a le Ekalesia e mafai ona fetuutuunai i ni pepa o galuega mananaia.
- E tatau ona fetau pepa o galuega ma le matutua o tagata aoao. E tatau ona aoao ai ma ia fiafia ai. E le tatau ona soona faafaigata.
- E mafai e tagata aoao ona galulue taitoatasi, pe vae-vaaina foi le vasega i ni vaega laiti, ae ia tofu sao vaega i se pepa o galuega. E mafai ona tusia faamatalaga mai se pepa o galuega i luga o le laupapa, ma e mafai ona faamae'aina faatasi e le vasega.
- Ia lava peni po o ni penitala mo tagata aoao uma.
- E le tatau ona umi se taimi mo pepa o galuega. Peitai, e tatau ona e faatagaina se taimi ia lava mo tagata o le vasega e faamae'a ai.
- A maea ona tuu atu i tagata uma se taimi aofai e faauma ai le pepa o galuega, ona toe iloilo ina lea o tali.
- Fesoasoani ia lagona e tagata uma le faamanuiaina o le faamae'aina o le pepa o galuega. Fesoasoani i soo se tasi e foliga mai o loo fai si faigata.

G

O LE VASEGA O LE
AOAOINA ATU O LE TALALELEI



FESOASOANIGA MO LE FAIAOGA O LE VASEGA

Faamoemoega o le Vasega

O lenei vasega e sauniaina ai se faavae o le a fesoasoani i tagata o le Ekalesia ina ia matuai lelei atoatoa i le avea ai ma faiaoga o le talalelei i o latou aiga ma le Ekalesia. Ua fuafuaina lesone i lenei vasega ina ia aoaoina atu o se vaega o se vasega faatulagaina. E mafai foi ona susesueina e tagata taitoatasi po o se aiga.

Vaaiga Lautele i le Vasega

Ua poloaiina i tatou e le Alii ina ia “aoao le tasi i le tasi i mataupu o le malo” (MFF 88:77). E pei o le Faiaoga o Faiaoga, na Ia faatulagaina le faataitaiga mo i tatou ia mulimuli i ai. I faaaliga o aso e gata ai, na Ia tuuina mai ai ia i tatou ni poloaiga patino e uiga i le auala e tatau ona tatou aoao atu ai (tagai, mo se faataitaiga, MFF 42:12–14; 50:13–22; 52:9; 88:122). O Lana faataitaiga ma Ana poloaiga e taitaiina ai i tatou ao tatou taumafai e faaleleia atili le avea ai o i tatou ma faiaoga.

O le lesone 1, “O le Taua o le Aoaoina Atu o le Talalelei i le Fuafuaga a le Atua,” e faatulagaina ai le agaga mo le vasega atoa o le Aoaoina Atu o le Talalelei. E taulai atu ai i le fuafuaga tele a le Alii ina ia aoaoina mai ia i tatou le fuafuaga o le togioala. O loo aoao mai e le lesone e mafai ona tatou lagolago atu i lenei galuega paia.

O le lesone 2, 3, ma le 4 o loo tuuina mai ai ni mataupu faavae se tolu o le aoaoina atu o le talalelei: “Alofa ia i Latou e te Aoaoina,” “Aoao Atu i le Agaga,” ma le “Aoao Atu le Mataupu.”

O le lesone 5, “Valaaulia le Aoao ma le Maelega,” o loo taulai atu i le fesoasoani atu lea i tagata taitoatasi ina ia latou tauaveina le matafaioi mo le aoaoina o le talalelei. O lesone 6 ma le 7, e faaulutalaina uma faapea “Faatupuina o se Atmosifia e Aoao Ai,” o loo faaalua mai ai pe faapefea ona foia ma faaleleia ia faafitauli e mafai ona alia’e mai i nofoaga e faia ai aoaoga. O lesone 8 ma le 9, e faaulutalaina uma “Faaogaina o Metotia Lelei,” o le a e aoaoina atu ai ma talanoaina ai le faaaogaina lelei o ni auala fesuisuia e aoao atu ai. O le lesone 10, “Saunia Mea Tatau Uma,” o loo faaalua mai ai le auala e fuafuaina ai lesone.

I lesone 11 ma le 12 o le a e fesoasoani ai i tagata o le vasega e faaaogaina mea uma na latou aoaoina i lesone muamua e 10. O le lesone 11, “Faaleleia Atili o Au Taleni,” e fesoasoani i tagata o le vasega e faia se fuafuaga a le tagata lava ia mo le faaleleia ma faaalua mai ai po o le a le tele o risosi o loo maua i totonu o le uarota e mafai ona fesoasoani ia i latou e faataunuaina ai lenei fuafuaga ma le atoatoa. O le lesone 12, “O Atu ia ma Aoao Atu,” e tuuina atu ai i tagata o le vasega le avanoa e aoao ai e le tasi le isi e ala lea i le fetufaai atu o mea na latou aoaoina i le taimi o le vasega.

Faiga o le Vasega

Mo faamatalaga e uiga i le taimi e tatau ona faia ai le vasega, o ai e tatau ona auai atu i ai, ma fetuunaiga e mafai ona faia, ia tagai i le Faaleleia o le Aoaoina Atu o le Talalelei: O se Taiala a le Taitai, itulau 10.

Saunia e Aoao Atu le Vasega

Ua fautuaina ina ia e faitauina uma lesone e 12 a’o le’i amataina le vasega. O le a fesoasoani lea ia te oe e te iloa ai pe faapefea ona galulue faatasi ia lesone ina ia saunia se faavae mo le aoaoina atu o le talalelei. O le a e nofouta ai foi i mataupu

faavae o le aoaoina atu o le talalelei lea e tatau ona e ola ai ao e aoaoina atu le vasega.

Faaogaina o Mea e Gaosia e le Ekalesia I le faaopoopo atu i lenei tusi, o le a e moomia ia tusitusiga paia ma le vaega o le “Aoaoina Atu o le Talalelei ma le Taitaiga” o le Tusitaulima o Faatonuga a le Ekalesia. Atonu e te manao foi e te faaogaina ia mea o loo lisiina mai i le “Risosi a le Ekalesia mo le Aoaoina Atu o le Talalelei,” itulau e 112 o lenei tusi.

Faafesootai le tagata o loo vaايا le potutusi o le falelotu ina ia iloa ai po o a risosi o loo maua i le potutusi o le falelotu.

Galulue Faatasi ma Tagata o le Vasega *O Mea e Faaogaina e Manaomia e Tagata o le Vasega*

E tatau i tagata o le vasega ona aumai a latou tusitusiga paia i le vasega. E faaopoopo atu i ai, e tatau ona aumai ni a latou api po o ni tusi o talaaga e mafai ona tusi ai a latou faamatalaga, tofiga po o mea e fai, ma o latou manatu. E tatau i tagata uma taitoatasi o le vasega ona aumaia se kopi o le tusi lenei i le vasega.

Fesoasoani i Tagata o le Vasega ia Auai i le Faatinoina o Mea e Fai i le Vasega

O lesona taitasi o loo aofia ai ni faatonuga e fesoasoani ai i tagata o le vasega ia faatinoina se vaega taua mo le aoaoina. Mo se faataitaiga, e mafai ona valaaulia tagata o le vasega e tusitusi i totonu o a latou api, faailoa mai ni manatu, pe fetufaaai mai foi ni mea na oo i le tagata lava ia. Ao e sauniaina au lesona, ia mautinoa ua lava se taimi ua e fuafuaina mo tagata o le vasega e auai ai i nei gaoioiga.

Tofiga po o Mea e Fai

O lesona i lenei vasega e aofia ai ni ituaiga tofiga eseese se lua:

1. O valaaulia ina ia saunia se vaega o le lesona. O nei tofiga o loo lisiina atu i le vaega o “Sauniuniga” i le tele o lesona. E tuuina atu ai i tagata o le vasega ia avanoa e auai mai ma aoao ai e le tasi le isi. E tatau ona e iloiloaina ma le agaga tatalo poo ai tagata o le vasega e tatau ona tuuina atu i ai nei tofiga. I le tuuina atu o tofiga, ia lava se taimi e tuuina atu i tagata o le vasega e sauniuni ai.
2. O tofiga e faataitaia ai ia ni mataupu faavae ma’oti i fafo atu o le vasega. O nei tofiga o se vaega taua o le vasega aua o le a latou fesoasoani ai i tagata o le vasega e faaauau pea ona faaleleia i latou i le aveai ai ma faiaoga.

Lagolagoina o Tagata Taitoatasi o le Vasega

I le faaopoopo atu i le aoaoina o lesona i le vasega, e tatau ona e faaaluina se taimi e lagolagoina ai tagata taitoatasi o le vasega. O le a iloa e tagata o le vasega le faateleina o le faamanuiaina ao e fesootai ma i latou i le va o lesona e tuuina atu le faamalosia ma le lagolago. Atonu latou te mananao e talanoa e uiga i mea na oo i ai ao latou faaogaina ia mataupu faavae sa aoaoina i lesona.

O le Folafolaina mai o le Fesoasoaniga Faalelagi Mafaufau loloto i le faaaliga na tuuina atu i le faiaoga o loo i le itulau e 236. Ao e faatinoina le faatuatua, tatalo mo le fesoasoaniga, ma faaogaina ia mataupu faavae o le a e aoaoina atu i le vasega, o le a e fesoasoani i tagata o le vasega “ina ia aveai i latou ma tufugaaao o le Atua e aumai ai [isi] i le malamalama o le upu moni” (Alema 17:9).

SUESUEINA O LE VASEGA E LE TAGATA LAVA MA LE AIGA

Afai o le vasega o le Aoaoina Atu o le Talalelei e le o faia i totonu o lau uarota pe le mafai foi ona e auai atu i ai, e mafai ona e suesue lava oe i lesona po o lou aiga foi. Ae peitai, o suesuega a le tagata lava ia po o le aiga e le i faamoemoe e suitulaga ai mo le auai i le vasega pe afai ua valaaulia ai oe. O le a tele atu ni mea e te mauaina pe a outou feiloai faatasi ma isi e fetufaai ia manatu ma aoaoina faatasi i auala e mafai ona faaleleia i le aveai ai ma faiaoga.

O Autu i le Suesue o Oe Lava Ia pe Faatasi ma Lou Aiga

Faitau ia “Fesoasoaniga mo le Faiaoga,” o loo i itulau 196–97. Ia fetuunai ia fautuaga i lou lava tulaga.

Ia faia sau lava tautinoga. O le a sili atu ona ‘anoa lau suesuega pe afai e te amataina i se tautinoga faaletagata ina ia faaleleia faapea ma se naunautaga ina ia faamaeaina ma le filiga le vasega.

Suesue lesona i le faasologa, ma aua le taumafai ia sili atu ma le tasi le lesona e suesueina i le vaiaso. O le a e manaomia se taimi i le va o lesona e faaoga ai mea na e aoaoina.

Ia i ai i taimi uma se api. O le faia o se faamaumauga o lou alualu i luma o se vaega taua lea o le vasega o le Aoaoina Atu o le Talalelei. I totonu o lesona, o loo i ai avanoa e faamaumau ai ia faamatalaga, mea na faagaetia ai, o fuafuaga, o mea na oo i ai, ma le alualu i luma e faatatau i le vasega.

Faamaea ia tofiga po o mea e fai. O au taumafaiga ina ia faaleleia o le a faatoa faamanuiaina pe a e faatinoina mea na e aoaoina. O lesona taitasi e i ai ni tofiga ina ia fesoasoani ai ia te oe e faatatauina ia mataupu faavae i avanoa tonu lava e aoao atu ai. Faamaea lelei ma le faamaoni nei tofiga po o mea e fai. Faamaumau i totonu o lau api lau iloiloga o au taumafaiga ma lou alualu i luma.

Afai o loo outou suesue faatasi ma tagata o lou aiga, ia faatulaga lelei la outou suesuega e pei lava o loo outou i ai i totonu o se vasega. E mafai ona outou feauauai i le taitaia o talanoaga. Faitau ia mau o loo fautuaina atu i lesona, talanoaina ia fesili, ma faia ia tofiga.

Afai o loo e suesue na o oe, manatunatu faapea o loo e i totonu o se vasega. O le a se mea e te faapoopoina atu i le talanoaina o autu o lesona? E faapefea ona e tali atu i fesili o loo tuuina mai? Ia faamaumau ou manatu i totonu o lau api. Tagai i le “Faatulagaina o se Fuafuaga a le Tagata Lava ia mo le Suesueina o le Talalelei,” itulau 16–17, mo fautuaga i le faataunuaina lelei o lau suesuega.

Afai o loo e suesue na o oe, saili se tasi e mafai ona e lipoti atu i ai. O lau lava suesuega na o oe o le a faaleleia pe afai e i ai se tasi e mafai ona e fetufaai atu i ai ou atamai ma manatu. Atonu e mafai ona e talosaga atu i se tagata o lou aiga, o se uo, o se taitai o le perisitua po o le ausilali. Ia fetufaai atu i lea tagata au sini ma fuafuaga faapea ma taunuuga o au taumafaiga.

O LE TAU A O LE TALALELEI I LE FUAFUAGA A LE ATUA

Lesona
1

Faamoemoega Ina ia fesoasoani i tagata o le vasega e faateleina lo latou mananao e lagolago i le galuega a le Alii e ala lea i le aoaoina atu o Lana talalelei.

Faaaliga mo le Faiaoga O Lona alofa-agalelei, ua saunia ai e lo tatou Tama o i le Lagi ia faiaoga ina ia fesoasoani i Lana fanau ia aoaoina mea e tatau ona latou faia ina ia maua ai le ola faavavau. O i tatou uma lava taitoatasi o ni tagata ua faamanuiaina i le aoaoina atu o le talalelei, ma ua poloaiina i tatou uma lava taitoatasi ina ia aoaoina atu le talalelei i isi. O au taumafaiga i le aoaoina atu o lenei vasega, o se vaega lea o lenei galuega tele.

O le saunoaga lenei mai ia Peresitene Gordon B. Hinckley o loo atagia mai ai se savali lea e tatau ona e ta'uina atu i tagata o le vasega i lenei vasega atoa:

“E tatau ona tatou faamalolosia i tatou ma o tatou tagata ina ia uunaia o tatou faiaoga e tautatala mai o latou loto nai lo le tautatala mai tusi, ina ia fesootea mai lo latou alolofa mo le Alii ma lenei galuega pele, ma o le a faapea ona faatupuina ai le ma'el-ega i loto o i latou o loo latou aoaoina” (*Teachings of Gordon B. Hinckley* [1997], 619–20).

“Ua ia te i tatou se galuega e fai, ua matua tele lava. Ia tatou pulunaunau atu nei loa ma amata ona fai faatasi ma se tautinoga fou, ma faalagolago i le Alii. . . . E mafai ona tatou faia, pe a tatou loto tatalo ma faamaoni. E mafai ona tatou faia lelei ia sili atu nai lo soo se taimi ua mavae atu” (i le Conference Report, Ape. 1995, 117; po o le *Liahona*, Iulai 1995, 97–98).

I le avea ai o lenei savali e fai ma ona faatumutumuga, o lenei lesona e faatulagaina ai le agaga mo le vasega atoa o le Aoaoina Atu o le Talalelei.

- Sauniuniga**
1. Suesue ma le agaga tatalo ia mau o loo i lenei lesona. Saili ina ia faatatauina nei mau i le faamoemoega o le lesona.
 2. Suesue le vaega o lenei tusi ua faaulutalaina “O le Taua o le Aoaoina Atu o le Talalelei i le Fuafuaga a le Atua” (itulau 2–10).
 3. Ia uunaia tagata o le vasega ina ia o mai i le vasega ma a latou tusitusiga paia ma se api. Afai e talafeagai, ia feiloai ma se tasi o le au epikopo ina ia faia ni fuafuaga e saunia ai ni api mo tagata o le vasega.
 4. Ia maua mai ia lava ni kopi O le Aoaoina Atu, E Leai Se Isi Valaauga E Sili Ai e tuu atu i tagata o le vasega e le'i i ai ni tusi.

Faalautelega Fautuaina o le Lesona Faafeiloai atu i tagata o le vasega. Afai e te le iloaina i latou pe le iloa foi e le tasi le isi, ia valaaulia i latou e faailoa mai o latou igoa.

Ia mautinoa ua tofua tagata o le vasega ma se api e faaoga i le taimi o le lesona. Ia faamatala atu i ai o le faamoemoega o api e faamaumau ai o latou manatu, o mea e faa-

gaeetia ai, o fuafuaga, o mea na oo i ai, ma le alualu i luma e faatatau i le vasega o le Aoaoina Atu o le Talalelei.

O faiaoga o le talalelei e aafia ai olaga o le toatele o tagata.

Tala

Ia fetufaai atu le tala lenei na faamatalaina e Peresitene Thomas S. Monson:

“Sa i ai se faiaoga o le Aoga Sa—e le mafai ona faagaloina, e manatuaina pea. Sa matou feiloai mo le taimi muamua i le taeao o se Aso Sa. Sa malaga faatasi atu o ia ma le peresitene o le Aoga Sa i totonu o le potuaoga ma sa faailoa mai ia i matou o se faiaoga sa talosaga na te aoaoina i matou. Sa matou iloaina sa avea o ia ma se faifeautalaitai ma e fiafia tele i tagata talavou. O lona igoa o Lucy Gertsch. E aulelei o ia, e leo malu, ma e fiafia ia i matou. Sa talosaga mai o ia i tagata uma o le vasega e faailoa atu le tagata lava ia, ona ia tuuina mai lea o ni fesili ina ia maua ai e ia se malamalamaga i le tulaga o tama, ma teine taitoatasi. Sa ia faamatalaina mai ia i matou lona olaga a’o laitiiti. . . . E le’i siisiia i luga lona leo. O le amio le pulea ma le pisapisao e le’i faatautava i le matagofie o ana lesona. . . . Sa ia aoaoina mai tusitusiga paia e pei lava ua tino mai. Sa matou matuai masani ia Samuelu, Tavita, Iakopo, Nifae, ma le Alii o Iesu Keriso. Na faateleina lo matou iloa o le talalelei. Na faaleleia a matou amio. Sa leai se tuaoi o lo matou alofa mo Lucy Gertsch. . . .

“Ua tuanai atu tausaga. . . . O tama ma teine na aoaoina, o e sa talie, o e sa ola a’e i lalo o le taitaiga a lena faiaoga musuia o le upumoni e le’i faagaloina lona alofa po o ana lesona” (i le Conference Report, Ape. 1992, 81–82; po o le *Liahona*, Iulai 1992, 70–71).

Ia molimau atu i tagata o le vasega faapea o a latou taumafaiga e aoao atu le talalelei a Iesu Keriso e mafai ona ootia ai olaga o le toatele o tagata. Ia faailoa atu ou lagona e uiga i le taua o le valaauga e aoao atu.

Upusii

Tuu atu i se tagata o le vasega e faitauina le saunoaga lenei mai ia Elder Jeffrey R. Holland:

“Mo i tatou taitoatasi o le ‘o mai ia Keriso,’ o le tausia lea o Ana poloaiga ma mulimuli i Lana faataitaiga e foi atu ai i le Tama, e moni o se faamoemoega aupito maualuga lea ma paia ua ola ai le tagata. O le fesoasoani i isi ia faia foi lena mea—ia aoao atu, faatauanau atu, ma taitai i latou ma le agaga tatalo ia savavali foi i lena ala o le togiola—atonu e moni o se tiute lona lua pito taua lena i o tatou olaga” (i le Conference Report, Ape. 1998, 31; po o le *Liahona*, Iulai 1998, 29).

O le aoaoina atu o le talalelei e i ai sana matafaioi taua i le fuafuaga a le Tama Faalelagi.

Talanoaina o Mau

Ia faamamafa atu o le aoao atu o loo i ai pea sana matafaioi taua i le fuafuaga o le togiola a le Atua. Tuu atu i tagata o le vasega e faitauina ia mau nei o loo lisiina atu i lalo. Atonu e fesoasoani tele mo outou le faamatalaina o le tulaga o mau taitasi (mo se faataitaiga, e mafai ona e faamatalaina atu o le Mataupu Faavae ma Feagaiga 138 o loo aofia ai se tala i le faaaliga na maua e Peresitene Iosefa F. Samita e uiga i le lalolagi o agaga). Fai atu i tagata o le vasega e fetufaai mai ni o latou malamalamaaga na maua mai i nei fuaiupu e uiga i le matafaioi o le aoao atu o loo i ai i le fuafuaga a le Tama Faalelagi.

- a. Mataupu Faavae ma Feagaiga 138:56. (Sa tatou “mauaina a [tatou] uluai lesona i le lalolagi o agaga.”)
- e. Alema 12:27–32. (Ina ua uma ona tuliese a o Atamu ma Eva mai le Faatoaga o Etena, sa fesoasoani le Atua ia i laua ina ia aoao e uiga i le fuafuaga o le togiola. Na Ia auina mai agelu e aoao ia te i laua, ma sa Ia tali mai ia laua tatalo. Na Ia tuuina atu ia te i laua ia poloaiga ina ua uma ona aoao ina ia te i laua le fuafuaga o le togiola.)
- i. Mose 6:57–58. (Na poloaiina e le Atua ia Atamu ma Eva ina ia aoao atu le talalelei i a laua fanau.)

Ia tauaofai le talanoaga i le faitauina lea o le Roma 10:13–15, 17 ma le 2 Nifae 2:8. Ia tuuina atu lau molimau i le matafaioi o le aoao ina ia te i laua le fuafuaga a le Tama Faalelagi.

E tele o tatou avanoa e aoao ai le talalelei ma aoao atu i isi.

Upusii

Ia faailoa atu e aoao ina ia te i laua le fuafuaga a le Tama Faalelagi. Ia faailoa atu e aoao ina ia te i laua le fuafuaga a le Tama Faalelagi. Ia faailoa atu e aoao ina ia te i laua le fuafuaga a le Tama Faalelagi. Ia faailoa atu e aoao ina ia te i laua le fuafuaga a le Tama Faalelagi.

I Matua

Ua saunoa mai le Au Peresitene Sili:

Matou te talosaga atu i matua ina ia tuuina atu atoatoa a latou taumafaiga sili i le aoao ina ia te i laua le fuafuaga a le Tama Faalelagi. Ia faailoa atu e aoao ina ia te i laua le fuafuaga a le Tama Faalelagi. Ia faailoa atu e aoao ina ia te i laua le fuafuaga a le Tama Faalelagi.

Matou te fautua atu i matua ma fanau ina ia tuu atu le faamuamua aupito maua i tatalo faaleaiga, o afiafi faaleaiga, suesuega ma aoao o le talalelei, ma gaoioiga lelei faaleaiga. Peitai, tusa pe o le a le taua ma le talafeagai o isi gaoioiga, e lē tatau ona faatagaina e suitulaga i tiute ua faatonuina mai e le Atua, ia e na o matua ma aiga e mafai ona faia lelei ai” (Tusi a le Au Peresitene Sili, 11 Fep. 1999).

I Taitai Perisitua ma Ausilali

Na saunoa mai Peresitene Gordon B. Hinckley: “O le lelei ona aoao atu, o le autu moni lene faale-taitaiga i le Ekalesia. O le a oo mai le ola e faavavau pe afai ua lelei ona aoao alii ma tamaitai, e suia ai i latou ma pulea o latou olaga. E le mafai ona faia faamalosi i latou ia amiotonu pe o i le lagi. E tatau ona taitaia i latou ma o lona uiga, ia aoao atu” (“O le Auala e Avea ai ma se Faiaoga Pe Afai o Lau Matafaioi i le Avea ai ma Taitai, e Moomia ai Lou Aoao Atu, “ Fonotaga a le Au Faatonu o le Perisitua i le Au Pulega Aoao, 5 Fep. 1969; siitia mai e Jefferey R. Holland i le Conference Report, Ape. 1998, 31; po o le Liahona, Iulai 1998, 30).

Mo Faiaoga i Potuaoga a le Ekalesia

Na aoao mai Peresitene Thomas S. Monson:

“E faaopoopo e le potuaoga o le Ekalesia se mea taua lava i le aoao o fanau ma aulavou taitasi. I lene potuaoga, e mafai e faiaoga taitasi ona faagaetiaina e e faalogol-

ogo i lesona ma lagona le malosi o le molimau [a le faiaoga]. I sauniga a le Peraimeri, Aoga Sa, ma Tamaitai Talavou faapea ma le Perisitua Arona, e mafai e faiaoga saunia lelei, e valaauina i lalo o musumusuga a le Alii, ona uunaia tamaiti ma tupulaga talavou taitasi, ma musuia i latou uma e ‘saili . . . i tusi silisili ona lelei upu o le potou; saili le atamai, e ala i le suesue ma le faatuatua’ (MFF 88:118). E mafai e se upu faamalosi’au i i, ma se manatu faaleagaga i o, ona aafia ai se olaga taua ma tuu ai se uunaiga tumau i le agaga. . . .

“E mafai e se faiaoga lotomaulalo ma musuia o le potuaoga o le ekalesia, ona faatupuina i ana tamaiti aoga le fiafia i tusitusiga paia. E mafai e se faiaoga ona aumai Aposetolo anamua ma le Faaola o le lalolagi e le na’o le potuaoga, ae i loto, ma mafafafau, ma agaga foi o a tatou fanau” (i le Conference Report, Oke. 1991, 92; po o le Liahona, Ian. 1992, 79).

Mo Faiaoga o Aiga ma Faiaoga Asiasi

Na saunoa mai Peresitene Spencer W. Kimball: “Afai tou te o atu i totonu o fale o [tagata], . . . o le a outou faasaoina agaga. . . . O ai e mafai ona ta’uina mai faapea o le toatele o tagata lelei o loo toaaga i le Ekalesia i aso nei ona sa outou asiasi atu i ai i o latou aiga ma tuuina atu ia i latou se vaaiga fou, atoa ma se malamalama fou. Ua outou faalateleina lo latou malamalama. Ua outou tuuina atu ia i latou se mea fou” (*The Teachings of Spencer W. Kimball*, ed. Edward L. Kimball [1982], 526).

Mo Tagata Uma o le Ekalesia

Na saunoa mai faapea Peresitene Lorenzo Snow, “E ui lava o le tasi e aoao atu ma le malū e pei o se agelu, ae peitai e sili atu ai ona lelei ma malū le aoao atu a se tasi e faia faataitaiga lelei, o faatinoga lelei, o gaoioga lelei faifaipea e faaalua ai le naunautai ina ia fiafia mai tagata” (*The Teachings of Lorenzo Snow*, comp. Clyde J. Williams [1984], 78–79).

Tuuina Atu o le
Lesona a le Faiaoga

E fautua atu ia mafafafau tagata o le vasega i faiaoga eseese o loo faamatalaina atu i saunoaga ia na faitauina atu: matua, taitai o le perisitua ma ausilali, faiaoga i totonu o potuaoga a le Ekalesia, faiaoga o aiga, faiaoga asiasi, ma i latou e aoao atu e ala i faataitaiga. Ia valaaulia tagata o le vasega e faamatala faapuupuu atu e uiga i se tasi o i latou nei, o loo i ai se matafaioi se tasi po o le sili atu foi, na fesoasoani ia te ia ina ia maua sona malamalama tele i le talalelei ma sona naunautai sili ina ia ola ai e tusa ai ma ona mataupu faavae.

Molimau

Ia talanoa puupuu e uiga i faamanuiaga e oo mai ia i tatou ona o le tele o o tatou avanoa e aoao ai ma aoao atu ai le talalelei—i totonu o o tatou aiga, i totonu o le Ekalesia, ma a tatou fegalegaleaiga i aso taitasi. Ia faailoa atu lou agaga faafetai mo nei avanoa. Ia faamamafa atu faapea ua saunia e le Alii nei avanoa ina ia fesoasoani ai ia i tatou e tetee atu i aooga a le tiapolo ma aafiaga o loo siomia ai i tatou. Ia fetufaai atu le saunoaga lenei mai ia Peresitene Gordon B. Hinckley:

“O loo i ai le fia aai i le nuu, ma se galala moni— o se fia aai i le afioga a le Alii ma se galala le faamalieina mo mea o le Agaga. . . . O loo fia aai le lalolagi i meaai faaleagaga. O la tatou matafaioi lea ma ua ia i tatou le avanoa e faafaileleina ai le tagata” (“Fafaga le Agaga, Faafailele Tagata,” Liahona, Oke. 1998, 3).

O le faamoemoega o le vasega o le Aoaoina Atu o le Talalelei o le fesoasoani lea ia i tatou ia faaleleia atili lo tatou avea ai ma faiaoga.

Tuuina Atu o le
Lesona a le Faiaoga

Faitau atu le saunoaga a Peresitene Gordon B. Hinckley o loo aofia ai i totonu o “Faaaliga mo le Faiaoga” i le itulau “00” [189].

A maea ona faitauina atu ia le saunoaga a Peresitene Hinckley, ona faailoa atu lea faapea o le faamoemoega o le vasega o le Aoaoina Atu o le Talalelei o le fesoasoani lea ia i tatou ina ia aoaoina atu le talalelei a Iesu Keriso “ina ia sili atu nai lo se taimi muamua na tatou faia ai.”

Ia faamalamalama atu o risosi mo le vasega e aofia ai ia tusitusiga paia, *O le Aoa Atu, E Leai Se Isi Valaauga E Sili Ai*, ma le vaega o le “Aoaoina Atu o le Talalelei ma le Taitaiga” o le *Tusitaulima o Faatonuga a le Ekalesia*.

Ia tuuina atu ni kopi *O le Aoa Atu, E Leai Se Isi Valaauga E Sili Ai* i tagata o le vasega latou te le'i mauaina. Ta'u atu i tagata o le vasega, o lenei tusi o loo aofia ai mea e faatatau i lesona o loo i ai i le vasega. O le a faamanuiaina ai i latou mai le faitau i ai i nei mea ao le'i amataina le lesona faapea foi pe a maea lesona taitasi.

Ia faamatala atu o lenei vasega o le a fausia ai se faavae mo le aoaoina atu o le talalelei. O loo taulai atu i mataupu faavae ma auala e aoao atu ai e faatatau i vaitausaga ma aganuu uma. E 12 lesona o loo i ai i lenei vasega. O autu o lesona e 11 o le a oo mai o loo faaalai ai mea e mafai e tagata o le vasega ona faamoemoeina mai le vasega. Fai atu i tagata o le vasega e sue i le itulau e iv o lenei tusi e vaai i ai i ulutala o lesona.

Ia ofo atu e fesoasoani i tagata o le vasega ao latou taumafai e faatino ia mataupu faavae o loo aoaoina i le vasega. Ia faaopoopo atu i ai, ia uunaiina tagata o le vasega ina ia:

- a. Suesue i tusitusiga paia, *O le Aoa Atu, E Leai Se Isi Valaauga E Sili Ai*, ma le vaega o le “Aoaoina Atu o le Talalelei ma le Taitaiga” o le *Tusitaulima o Faatonuga a le Ekalesia*.
- e. Aumai tusitusiga paia i le vasega i vaiaso taitasi.
- i. Aumai a latou api i le vasega i vaiaso taitasi.
- o. O mai saunia i le vasega i vaiaso taitasi e auai i le faatinoina o mea e fai i lesona ma ia tofu sao mai i le aoaoina o isi i le vasega.
- u. Mafaufau loloto ma tatalo e uiga i avanoa e aoao atu ai.
- f. Amata ona atinaeina ma faatinoina se fuafuaga a le tagata lava ia mo le faaleleia o ia i le avea ai ma se faiaoga.

Faiiuga

Upusii

Ia valaaulia se tagata o le vasega e faitau atu le saunoaga lenei a Elder Boyd K. Packer: “Ua tautalagia faapea o le tiutetauave o tagata o le Ekalesia ua vaevaeina i ni vaega autu se tolu: ia saunia le faaolataga mo tagata o loo ola o le Ekalesia, ia faataunuuina galuega e manaomia mo o tatou augatuaa ua maliliu, ma ia talai atu le talalelei i le

lalolagi atoa. O nei tiutetauave uma e moomia ai le aoaoina, ma o mea uma e tatau ona iloa, e tatau ona aoaoina atu i ai. O i tatou o nisi o tagata e tatau ona aoaoina atu” (Teach Ye Diligently, rev. ed. [1991], 7).

Aotelega

Ia aotele ia mataupu faavae na outou talanoaina.

Molimau

Ia fetufaaai atu lau molimau e pei ona musuia ai e le Agaga.

Tofiga po o Mea e Fai

Ia uunaiina tagata o le vasega ina ia:

1. Tusi i a latou api e uiga i avanoa e aoao atu ai ma aoao mai ai foi, a o latou auai i le vasega.
2. Saili le taitaiga a le Agaga (le Agaga Paia) ia fesootai ma se lesona o se afiafi faaleaiga o loo loma, tofiga faaleEkalesia, po o se isi avanoa e aoao atu ai. Ia man-atua afioga a le Alii: “O le a tuuina atu foi le Agaga ia te outou i le tatalo o le faatu-atua” (MFF 42:14). Tusi i totonu o a latou api mea latou te oo i ai i leni tofiga. (I le avea ai ma se vaega o le lesona 3, o nisi tagata o le vasega o le a talosagaina e lipoti mai ni mea na oo i ai.)
3. Iloilo ia mataupu faavae na aoaoina i leni lesona e ala lea i le suesueina o le vaega o leni tusi o loo faaulutalaina “O le Taua o le Aoaoina Atu o le Talalelei i le Fuafuaga a le Atua” (itulau 2–10).

ALOFA IA I LATOU E TE AOAONA

Lesona 2

Faamoemoega Ina ia fesoasoani i tagata o le vasega e saili ina ia faatumuina i le alofa faaKeriso mo i latou o e latou te aoaoina.

Faaaliga mo le Faiaoga I toe itula mulimuli o Lana galuega i la le tino nei, sa aoao ai ma faamalosia e Iesu Ana Aposetolo (tagai Ioane 13–17). I le avea ai ma se vaega o nei aoaoga, na la poloaiina ai Ona soo ina ia fealofani e pei ona Ia alofa atu ia i latou (tagai Ioane 13:34; 15:12, 17). O lo latou usiusitai i lenei poloaiga o le a faaaliga ai o i latou moni lava o Ona soo (tagai Ioane 13:35). O mea uma lava latou te faia, e aofia ai lo latou tofiga o le o atu lea ma aoao atu i malo uma, e ao ona faia i le alofa. I aso e gata ai, ua aoaoina ai foi faapea i tatou e le Alii: “Ma e leai se tasi e mafai ona fesoasoani i lenei galuega vagana o le a lotomaulalo o ia ma tumu i le alofa” (MFF 12:8).

Ao e aoaoina atu lenei lesona, fesoasoani i tagata o le vasega ia malamalama pe faapefea ona faatumulia i le alofa faaKeriso mo i latou o e latou te aoaoina. Ao mulimuli tagata o le vasega i le fautuaga o loo i lenei lesona, o le a sili atu ai foi ona lelei lo latou aoao atu. O le a latou mauaina ai foi le olioli tele i le avea ai ma faiaoga.

- Sauniuniga**
1. Suesue ma le agaga tatalo ia mau o loo i lenei lesona. Saili ina ia faatatauina nei mau i le faamoemoega o le lesona. Ia matuai faamasani lelei i le 3 Nifae 11–17 ina ia mafai ona e faamatalaina atu faapuupuu vaega o le tala na o loo ootooina atu i le itulau e 205 o lenei tusi.
 2. Suesue le vaega o le tusi lenei o loo faaulutalaina “Alofa Ia i Latou e te Aoaoina” (itulau 33–40).
 3. Afai e maua mea nei, ona saunia lea e faaoga e avea o se vaega o le lesona:
 - a. O ata o Iesu o Loo Aoao Atu i le Itu Lalolagi i Sisifo (62380; Pusa Ata o le Talalelei 316); O Iesu o Loo Faamaloloina sa Nifae (62541; Pusa Ata o le Talalelei 317); ma Iesu o Loo Faamanuiaina Fanau a sa Nifae (Pusa Ata o le Talalelei 322).
 4. Tofi se tagata o le vasega e talanoa faapuupuu e uiga i le auala na aafia ai o ia i le alofa o se faiaoga o le talalelei (e pei o se matua, o se faiaoga i se potuaoga a le Ekalesia, po o se taitai o le Ekalesia). Fai atu i le tagata lea o le vasega ina ia faailoa atu fesili nei e avea o se vaega o lana tautalaga:

Na faapefea ona e iloa e alofa lenei tagata ia te oe?

Na faapefea ona aafia ou lagona e uiga i le aoaoina o le talalelei i le alofa o lenei tagata?
 5. Ia logo mamao atu, pe toe tasi le vaiaso pe sili atu foi, ia faatulaga ai se tagata e pese toatasi po o se vaega foi o tagata matutua po o tamaiti e usuina le “Ia Fealofani” (Viiga, nu.195) i le faaiuga o le vasega. Afai e le mafai ona faia, ona saunia lea ia usuina e le vasega atoa.

Faalautelega Fautuaina o le Lesona	O faiaoga e i ai le alofa faaKeriso e faia se eseesega i olaga o e latou te aoaoina.
Tala Faatusi paia ma Ata	Faaali atu le ata o Iesu o loo aoaoina sa Nifae. I ni au lava upu, ia faamatala faapu-upuu atu le tala i le asiasiga a le Faola toetu i tagata sa Nifae. Ia mautinoa ia aofia ai vaega nei: Na faaali atu le Faola toetu i tagata sa Nifae i le nuu o Nuumau. Na ia valaaulia i latou ina ia o atu ma tuu o latou lima i Lona itu ma fetagofi i mea na tutu'i ai fao i Ona lima ma vae. Ona Ia aoaoina lea o i latou mo se taimi umi. Ina ua uma ona aoaoina i latou, na Ia uunaiina i latou ina ia foi atu i o latou aiga ma mafaufau ai i mea na Ia fetalai atu ai. Ina o le a toe foi atu o Ia i le Tama sa Ia vaaia le maligi o o latou loimata, o loo mananao Ia latou nonofo teisi ma ia. (Tagai 3 Nifae 11–16; 17:1–5.) Faaali atu le ata o Iesu o loo faamaloloina sa Nifae. Ona valaaulia lea o se tagata o le vasega e faitauina le 3 Nifae 17:6–10.
Laupapa	A maea ona faitauina e tagata o le vasega ia fuaiupu, ona tusi lea i luga o le laupapa <i>Na Ia faamaloloina foi i latou taitoatasi.</i>
Tala Faatusi paia ma le Ata	I ni au lava upu, ia faaauau le faamatalaina atu o le tala. Ia mautinoa ia faapea atu na faamaloloina e Iesu ia tagata, na Ia poloai atu ia i latou ina ia aumai a latou fanau ia te Ia (tagai 3 Nifae 17:11–12). Faaali atu le ata o Iesu o loo faamanuiaina fanau a tagata sa Nifae. Ona valaaulia lea o se tagata o le vasega e faitauina le 3 Nifae 17:21–25.
Laupapa	A maea ona faitauina e le tagata o le vasega ia fuaiupu, ona tusi lea i luga o le laupapa <i>Ua avefa foi e Ia o latou tamaiti taitoatasi ma faamanuia ia te i latou.</i>
Talanoaga	Fai atu i tagata o le vasega e mafaufau loloto i le alofa o le Faola na faaali atu i tagata sa Nifae. Ia valaaulia foi i latou e mafaufau e uiga i lagona atonu sa oo i tagata sa Nifae ao auauna atu Iesu ia te i latou taitoatasi. ▪ O a ni auala atonu e aafia ai i le alofa faaKeriso o se faiaoga i latou o loo aoaoina? (O tali e mafai ona aofia ai o le alofa faaKeriso o se faiaoga e mafai ona valaaulia ai le Agaga, fesoasoani i tagata e faatoilaloina le fefe, ma taitaiina atu ai tagata ina ia sili atu ona taliaina le talalelei.)
Upusii	A maea ona talanoaina puupuu lenei fesili, ona tuu atu lea i se tagata o le vasega e faitauina le saunoaga lenei mai le Perofeta o Iosefa Samita o loo i le itulau e “00” [30] o lenei tusi.
Tautalaga e Tuuina Atu e le Tagata o le Vasega	Fai atu i le tagata o le vasega ua tofia ina ia talanoa e uiga i le auala na faatosinaina ai o ia ona o le alofa o se faiaoga.
Aoaoga a le Faiaoga	Ia faamalamalama atu o lenei lesona e aofia ai aoaoga mai tusitusiga paia lea e mafai ona fesoasoani ia i tatou ina ia faatumuina i le alofa faaKeriso mo i latou tatou te aoaoina. O loo aofia ai foi ia talanoaga i le auala e aofia ai i le alofa faaKeriso la tatou auaunaga i le avefa ai ma faiaoga.

E mafai ona faatumuina i tatou i le alofa faaKeriso mo i latou tatou te aoaoina.

Gaoioiga i Tusitusiga Paia ma le Api

Ia valaaulia ni tagata eseese o le vasega e faitauina mau o loo lisiina atu i lalo. A maea ona faitauina ia fuaiupu taitasi, ona fai atu lea i tagata o le vasega e faailoa mai ia mataupu faavae o loo i le fuaiupu lea e mafai ona fesoasoani ia i latou e faatumuina ai i le alofa faaKeriso. Ia uunaiina tagata o le vasega e tusi i totonu o a latou api soo se manatu o loo ia i latou ao latou auai i lenei talanoaga. Ia faamatala atu o le a tuuina atu ia i latou se avanoa e fetufaai ai nei manatu i le taufaaiuiuga o le vasega.

Ioane 15:10 (Tausi poloaiga)

Efeso 4:32 (Faamagalo atu i isi)

Mosaea 2:17 (Auauna atu)

Mosaea 4;11–12 (Salamo, lotomauualalo, ma faatinoina le faatuatua)

Alema 38:12 (Taofiofi manaoga)

3 Nifae 11:29–30 (Taofi le fefinau)

Morona 7:48 (Tatalo ina ia faatumuina i le alofa mama o Keriso)

O lo tatou alofa faaKeriso mo i latou tatou te aoaoina e tatau ona atagia mai i la tatou sauniuniga, o la tatou aoao atu, ma o tatou olaga i aso taitasi.

Gaoioiga i le Api ma le Talanoaga

Ia faailoa atu, pe a faatumuina i tatou i le alofa faaKeriso mo i latou tatou te aoaoina, o lo tatou alofa e atagia mai i la tatou sauniuniga, o la tatou aoao atu, ma o tatou olaga i aso taitasi. Ona tusi lea o mea nei i luga o le laupapa. Fai atu i tagata o le vasega e kopi i totonu o a latou api.

<u>Sauniuniga</u>	<u>Aoao Atu</u>	<u>Olaga i Aso Taitasi</u>

Tuu atu i tagata o le vasega e mafaufau i ni tagata tonu o loo latou aoaoina (e pei o tagata o aiga, tagata o le vasega, po o tagata o le korama). Ona fai atu lea ia i latou e mafaufau i le fesili lenei, ma tusi o latou manatu i lalo o ulutala talafeagai i totonu o a latou api:

- O a nisi o mea e mafai ona e faia e faaali atu ai lou alofa faaKeriso mo nei tagata? (Ia maitauina o nisi o manatu o loo lisiina atu i le siata lenei. O isi manatu o loo aofia i le “O le Alofa e Faamaluluina ai Loto,” “Malamalama Ia i Latou o Loo e Aoaoina,” ma le “Aapa Atu i le Tasi,” itulau 33–37 i le tusi lenei.)

<u>Sauniuniga</u>	<u>Aoao Atu</u>	<u>Olaga i aso taitasi</u>
Tatalo mo i latou. Ia malamalama i o latou manaoga ma mea e fiafia i ai. Ia saunia lelei e aoaoina i latou.	Faafeiloai lelei i latou i le amataga o le vasega. Faailoa atu lou alofa mo i latou. Faalogo atu ma le naunautai. Tali faalelei atu ma le faaloalo ao latou auai i le faatinoina o mea e fai i le vasega. Ia uunaiina i latou ina ia ola ai i mataupu faavae o loo e aoaoina atu. Faamalo atu ia i latou pe a tatau ai.	Tatalo mo i latou. Ia faaauo ia i latou pe a e vaai i ai. Ia malamalama i a latou gaoioiga ma mea e faataunuaina. Ia auai atu i gaoioiga latou te auai atu i ai. Faamalo atu i ai pe a tatau ai. Faaali atu lou popolega ma tuuina atu le faamalosiua pe a latou feagai ma faigata.

Ia valaaulia tagata o le vasega e talanoaina nisi o manatu na latou tusia i a latou api. Tusi o latou manatu i luga o le laupapa.

Faaiuga

Aotelega ma le Upusii Ia aotele faapuupuu le lesona, e faaoga ai le saunoaga lenei mai ia Elder Joseph B. Wirthlin:

“O le agalelei o uo e pei o Keriso, tatou te ootia loloto ai ma suia o tatou olaga. . . . O le alofa o le fatu moni lea o le talalelei a Keriso. I lenei Ekalesia, o tatalo mo se fesoa-soani e masani ona tali mai e le Alii e ala mai i se galuega faigofie e fai i aso taitasi a uso ma tuafafine alolofa. I le agalelei o uo moni, na ou vaaia ai le alofa mutimutivale o le Alii lava Ia” (i le Conference Report, Oct. 1997, 42; poo le Liahona, Ianuari 1998, 37–38).

Molimau Ia e tuuina atu lau molimau ao musuia oe e le Agaga, ma tauina atu lou alofa mo tagata o le vasega.

Musika Ia alu ane se tasi ua maea ona tofia e usu toatasi pe usuina e se vaega toalaiti le pese “Ia Fealofani” (*Viiga*, nu. 195). A le o lea, ia valaaulia tagata o le vasega e usuina faatasi.

Tofiga po o Mea e Fai Ia uunaia tagata o le vasega ia:

1. Filifili se auala e tasi pe sili atu foi mai le tusi o gaoioiga o loo i le itulau e 206. Ia faaoga lenei auala i se avanoa e aoao atu ai i le vaiaso e sosoo ai. Ia tusi ia latou api taunuuga o lenei faatinoga.
2. Faaauau le tofiga o le vaiaso talu ai ia saili ai le taitaiga a le Agaga i le faia o se lesona i se afiafi faaleaiga o loo sosoo ai, i se tofiga o le Ekalesia, poo se isi avanoa e

aoao atu ai. Ia manatua afiga a le Alii: “O le a tuuina atu foi le Agaga ia te outou i le tatalo i le faatuatua” (MFF 42:14). Ia tusiina ia latou api ni tulaga na oo i ai e tusa ai ma lenei tofiga. (O se vaega o le lesona 3, o le a talosagaina ai nisi e lipoti mai mea na oo i ai.)

3. Toe iloilo ia mataupu na aoaoina i lenei lesona e ala i le suesue i le vaega ua faaulutalaina “Alofa Ia i Latou e te Aoaoina” o lenei tusi (itulau 33–40).

Lesona

3

AOAO ATU I LE AGAGA

Faamoemoega Ina ia fesoasoani i tagata o le vasega e saili i le taitaiga a le Agaga ma aoao atu i se ala o le a fesoasoani ai i isi ia latou lagona le uunaiga a le Agaga.

Faaaliga mo le Faiaoga Tatou te aoao i mea moni o le talalelei e ala i le mana o le Agaga Paia, poo le Agaga (tagai Moronae 10:5). Na faamalamalamaina mai e le Alii le taua o le aoao atu i le Agaga ina ua la fetalai mai, “O le a tuuina atu foi le Agaga ia te outou i le tatalo i le faatuatua; ae afai tou te le maua le Agaga aua tou te aoao atu” (MFF 42:14). Pe a ola agavaa faatasi ia faiaoga ma tagata aoao mo le taitaiga a le Agaga, “e faamanuiaina ma olioli faatasi i latou” (tagai MFF 50:13–22).

O nisi tagata o le vasega—aemaise i latou oē itiiti ni tulaga o le Ekalesia ua oo i ai—atonu e lagona faapea latou te le mafai ona latou aoao atu i le Agaga. Ao e aoaoina atu lenei lesona, ia fesoasoani atu i tagata o le vasega ina ia mafai ona latou aoao atu i le Agaga. Ia fesoasoani ia i latou ia malamalama o mea e manaomia mo le aoao atu i le Agaga e le o le matagofie o upu e faaogaina, e le o a’oga, poo le umi o le avea ai ma faiaoga, ae o le tatalo, maelega, faaaloalo ma le lotomaulalo.

Sauniuniga

1. Suesue ma le agaga tatalo ia mau o loo i lenei lesona. Saili ina ia faaoga nei mau i le faamoemoega o le lesona.
2. Suesue le vaega o lenei tusi ua faaulutalaina “Aoa Atu i le Agaga” (itulau 43–49).
3. Faatonu ni tagata se toalua pe toatolu o le vasega ia sauni e faamatala mai faapupu mea na aoaoina a’o latou sailia le taitaiga a le Agaga Paia i lo latou aoao atu. (I le faaiuga o lesona 1 ma le 2, na tofia ai tagata o le vasega e tusiina i a latou api mea na oo i ai.)
4. Aumai i le vasega se sioti vai ma se ipu malamalama.
5. Ao le i amataina le vasega, ia tusi le fesili lea i luga o le laupapa: *O le a le mea e aupito sili ona taua i a tatou taumafaiga e aoao atu le talalelei?*

Faalautelega Fautuaina o le Lesona Ao le i faia le tatalo amata, ia valaaulia tagata o le vasega e usuina le “Ia Ou Aoa Atu” (*Viiga*, nu. 176). A mavae le viiga, ia fai atu i le tagata e faia le tatalo ia ole atu mo le taitaiga a le Agaga Paia i le taimi o le lesona.

“O le Agaga e aupito sili ona taua.”

Upusii Ia taitai atu mafaufau o tagata o le vasega i le fesili ua e tusia i luga o le laupapa. Ia valaaulia tagata o le vasega ia mafaufau e uiga i le fesili e aunoa ma le tali leotele mai. Ona ta’u atu lea ia i latou o se tali i le fesili o loo i le saunoaga lenei a Peresitene Ezra Taft Benson:

“Afai e i ai se savali ua ou fai atu soo ai i ou uso o le Toasefululua, o le savali lenei, e taulia le Agaga. E taua le Agaga. Ou te le iloa pe ua faafia ona ou fai atu ai i lenei mea,

ae ou te le vaivai lava e tauina atu—o le Agaga e aupito sili ona taua” (semina mo peresitene o misiona, 3 Ape. 1985).

Ia faamatala atu e masani ona tatou faapea atu “o le Agaga” pe a faatatau i le Agaga Paia. O le aoao atu i le agaga o le ituaiga aoaoga lea e pito sili ona malosi aua e na’o le aafiaga lava a le Agaga e mafai ai ona tatou malamalama i mea a le Atua (tagai 1 Korinito 2:11).

Ao tatou aoaoina mai ma aoao atu le talalelei, o le a faatasi le Agaga ma i tatou i le anoanoai o mea.

Talanoaina o Mau

Ia faamamafa atu e masani ona faaali mai le Agaga i se tulaga filemu ma le faatauva ae lē o ni faaaliga uiga ese o le mana (tagai 1 Tupu 19:9–12). Ona fai atu lea i tagata o le vasega e faitau mau o loo lisiina i lalo. Ia fai atu ia i latou e faamatala mai le mea o loo aoao mai i fuaiupu taitasi e uiga i le ala e mafai ai ona faatasi mai le Agaga i lo tatou aoaoina atu o le talalelei. Ia tusi a latou tali i luga o le laupapa.

- a. Ioane 14:26. (E aoao i tatou i mea uma ma faamanatu mai ia i tatou mea uma.)
- e. Ioane 15:26 (E molimau ia Keriso.)
- i. 2 Nifae 33:1 (E aumaia le mea moni i o tatou loto.)
- o. MFF 6:14–15, 22–23. (E faamalamalama ma aumaia le filemu i o tatou mafaufau.)
- u. MFF 11:13. (Faatumuina o tatou agaga i le olioli.)
- f. MFF 50:21–22. (E malamalama ai le tasi i le isi.)

Tautalaga e Tuuina
Atu e le Tagata o
le Vasega

Ia valaaulia ia tagata o le vasega na tofiaina e faia ni tautalaga e uiga i o latou lagona ma mea na oo i ai ao latou sailia le taitaiga a le Agaga Paia i lo latou aoao atu. (tagai “Sauniuniga,” vaega 3).

E i ai mea patino e mafai ona tatou faia e talosagaina ai le Agaga.

Talanoaga i le
laupapa

- O a mea e mafai ona tatou faia i lo tatou aoao atu e talosagaina ai le Agaga? (Tusi tali a tagata o le vasega i luga o le laupapa. Ia uunaia tagata o le vasega ia tusiina nei mea i a latou api.)

Afai e le ta’ua e tagata o le vasega nisi o mea mai le lisi lea, ona faaopoopo lea i le lisi o loo i luga o le laupapa:

- a. Tatalo
- e. Ia aoao atu mai i tusitusiga paia.
- i. Ia molimau atu.
- o. Ia faaaoga viiga, o pese a le Peraimeri, ma isi musika paia.
- u. Ia tau atu lou alofa mo isi ma le Tama Faalelagi ma Iesu Keriso.
- f. Ia fetufaai malamalamaaga, lagona, ma ni mea na oo i ai e faatatau i mataupu o le lesona.
- O fea o nei mea ua tatou faia i le vasega i le asō? Ua tatou faia ea se isi mea i totonu o le vasega e talosagaina ai le Agaga?

Gaoioiga i le Api

Fai i tagata o le vasega e mafaufau e uiga i se avanoa e aoao atu ai o le a le toe mamao se taimi ona latou mauaina lea. Ia valaaulia i latou ia mafaufau i le ala latou te mafai ai ona faaaogaina nisi o mea ua fautuaina o loo tusia i luga o le laupapa a’o latou aoao atu. Ia tuuina atu ni nai minute ia i latou e tusi ai o latou manatu i a latou api.

O le a lava a tatou taumafaiga silisili pe a i ai le uunaiga a le Agaga.

Lesona Faatino

Ia tusi i luga o le laupapa , *O ai e mafai ona aoao atu i le Agaga?*

Ia faaali atu le sioti vai ma le ipu malamalama. Ia faamatala atu o le faatinoga leni, o le ipu malamalama e fai ma sui o i tatou o ni faiaoga o le talalelei. Ona faaafa lea o le ipu malamalama i vai. Ia faamatala atu o le vai na e sasaaina i le ipu malamalama e fai ma sui o le faaogaina silisili o a tatou taleni.

Ia faamatala atu, atonu e mafau i tatou e mafai ona matuai atoatoa i lo tatou aoao atu pe ana faapea lava o loo ia i tatou ni taleni se tele. Ae peitai, e le mafai ona tumu leni ipu malamalama na o a tatou taleni. I le avea ai ma tagata lelei moni i le aoaoina atu o le talalelei, e ao ona tatou aoao atu i le mana o le Agaga Paia. O le vavega e faapea, e tusa lava poo ai i tatou ma tusa lava pe o le a le tulaga o lo tatou talenia, o le mea silisili e mafai ona tatou faia o le a lava lea pe a i ai le aafiaga a le Agaga. A'o e faamatalaina atu leni mea, ia faatumu loa le ipu malamalama ia oo i augutu.

Upusii

Ia fai atu i se tagata o le vasega e faitauina le saunoaga leni a Elder Henry B. Eyring:

“O se tulaga atamai le mata'u ina nei le talafeagai o tatou tomai ma le matafaioi ua tuuina mai tatou te faafaileleina ai le faatuatua o isi. O o tatou tomai, poo le a lava le tele o loo i ai, o le a le lava. Ae o lena vaaiga moni faatapulaaina, e tulai mai ai le lotomaulalo e mafai ona taitaiina atu ai i le faalagolago i le Agaga ma lona mana” (i le Conference Report, Oke. 1997, 114; poo le *Liahona*, Ian. 1998, 99).


E mafai ona agavaa i tatou taitasi e aoao atu i le Agaga.

Talanoaina o Mau
ma le Laupapa

Ia faia le talanoaga o loo i lalo ifo e fesoasoani ai i tagata o le vasega ia malamalama pe faapefea ona agavaa i latou e aoao atu i le Agaga.

Ia fai atu i se tagata o le vasega e faitau le Mataupu Faavae ma Feagaiga 42:14.


Ia tusi mea nei i luga o le laupapa:



Ia fai atu i se tagata o le vasega e faitau le Mataupu Faavae ma Feagaiga 88:77–78.

- O le a le mea o loo folafola mai e le Alii pe afai tatou te aoao atu mataupu o le malo ma le maelega. (O le a i ai Lona alofa tunoa ma i tatou.)

Ia tusi mea nei i luga o le laupapa:



Ia faamatala atu o le alofa tunoa o se mana e mafai ai. O le fesoasoani paia lea ma le malosi o loo auina mai e ala mai i le alofa mutimutivale ma le agalelei o le Alii. O le alofa tunoa o le Alii, e mafai ai ona tatou faia galuega lelei e le mafai ona tatou faia i lo tatou lava malosi.

Ia fai i se tagata o le vasega e faitau le Mataupu Faavae ma Feagaiga 100:7–8.


- O a mea o loo tau mai e nei fuaiupu e uiga i le ala e tataua ona tatou talai atu ai le talalelei? (“I le paia o le loto,” ma le “i le agaga o le agamalu.”)

Ia faamatala atu o le *paia* o lona uiga o le faaaloalo ma le mamalu. Ina ia fesoasoani i tagata o le vasega ia malamalama i le uiga o le upu *agamalu*, ia faitau le saunoaga leni a Peresitene Gordon B. Hinckley:

“O le agamalu e aumaia le agaga o le loto faafetai ae le o le manatu faapito ia te ia lava, o le faailoaina o se mana sili atu nai lo lona lava malosi, o le iloaina o le Atua, ma se taliaina o ana poloaiga” (“With All Thy Getting Get Understanding,” *Ensign*, Aug. 1988, 3–4).

- O le a le mea o loo folafola mai e le Alii pe afai tatou te aoa atu Lana talalelei i le paia ma le agamalu? (Tagai MFF 100:8. O le a molimau atu le Agaga Paia i mataupu o loo tatou aoaoina atu.)

Ia tusi mea nei i luga o le laupapa:



Auai i le Faatinoina o Mea e Fai Ia taitai atu mafaufau o tagata o le vasega i mataupu ua e tusiaina i luga o le laupapa. Ia faamamafa atu ao tatou tatalo ma le faatuatua ma aoao atu mataupu faavae ma le maelega i le paia ma i le agamalu; o le a tatou mauaina le Agaga, o le a molimau i mea moni o loo tatou aoaoina atu. Ia valaaulia tagata o le vasega ia faamatala atu mea na tutupu i taimi na talosagaina ai e i latou po o isi le Agaga e ala i le mulimuli i nei mataupu.

Faaiuga

Aotelega ma Upusii Ia faapuupuu le aotelega o le lesone. Ona fai atu lea i se tagata o le vasega e faitau le saunoaga leni a Peresitene Thomas S. Monson:

“Atonu o nisi o outou e matamuli, ona pau lava o outou natura, pe faapea ane foi ia te outou lava e le agavaa e taliaina se valaauga. Ia manatua o leni galuega e le o sa outou galuega poo sa’u fo’i. O le galuega lava a le Alii, ma pe a tatou i ai i le galuega a le Alii, ua agavaa i tatou mo le fesoasoani a le Alii. Ia manatua o le ua valaauina e le Alii, e faaagavaaina e le Alii” (i le Conference Report, Ape, 1996, 62; poo le *Liahona*, Iulai 1997, 52).

Molimau Ia tuuina atu le molimau ao musuia e le Agaga.

Tofiga po o Mea e Fai Ia uunaia tagata o le vasega ia:

1. Mafaufau atili i manatu na latou tusiaina i a latou api e uiga i le aoao atu i le Agaga. Ia faaoga se tasi o nei manatu i se avanoa o le a oo mai e aoao atu ai.
2. Ia faaauau pea ona latou faamaumauina lo latou alualu i luma i a latou api.
3. Ia toe iloilo ina mataupu na aoaoina i leni lesone e ala i le suesueina o le vaega o le tusi leni o loo faaulutalaina “Aoa atu i le Agaga” (itulau 43–50).

AOAO ATU LE MATAUPU

Lesona 4

Faamoemoega Ina ia fesoasoani i tagata o le vasega ia malamalama i le mana e oo mai i le suesue ma le aoaoina atu o mataupu o le talalelei, o loo maua i tusitusiga paia ma aoaoga a perofeta o aso e gata ai.

Faaaliga mo le Faiaoga Ao e sauniuni e aoao atu lenei lesona, ia tatalo mo le taitaiga ina ia aoga le aoao atu mai i tusitusiga paia ma aoaoga a perofeta o aso e gata ai. Ao musuia e le Agaga Paia, ia ta'u atu le aafiaga ua faia e mataupu faavae o le talalelei i lou olaga a'o e suesueina ma aoao atu.

- Sauniuniga**
1. Suesue ma le agaga tatalo ia mau o loo i lenei lesona. Saili ina ia faaoga nei mau i le faamoemoega o le lesona.
 2. Suesue le vaega o lenei tusi o loo faaulutalaina “Aoa Atu Le Mataupu” (itulau 52–61) ma mea nei i le vaega o le “Aoaoina Atu o le Talalelei ma le Taitaiga” i le *Tusitaulima o Faatonuga a le Ekalesia: “Aoaoina atu o Aoaoga ma Sauniga Faaola o le Talalelei”* (itulau 340), “Aoa Atu Mai Tusitusiga Paia ma Aoaoga a Perofeta o Aso e Gata Ai” (itulau 340), ma le “Faaaogaina o Mea e Gaosia e le Ekalesia mo le Faia o Lesona” (itulau 343).
 3. Ia valaaulia se tagata o le vasega poo se isi tagata o le uarota ia sauni e susū mai i le vasega e faamatala atu pe na faapefea ona aafia lona olaga e ala i le aoaoina o se mataupu faavae patino o le talalelei.
 4. Afai o loo i ai ni tusi lesona ua saunia e le Ekalesia mo le taimi nei, ia aumaia ni nai tusi i le vasega.
 5. Ao le i amataina le vasega, ia tusi mea nei i luga o le laupapa:

“Ou te tuuina atu foi ia te outou le poloaiga ia outou aoao le tasi i le tasi i mataupu o le malo” (MFF 88:77).

E faapefea ona aafia i tatou i le aoaoina o mataupu faavae o le malo?

E faapefea ona eseese le aoaoina o mataupu faavae moni mai le aoaoina o isi mea?

Faalautelega Fautuaina o le Lesona

Na poloaiina i tatou e le Alii ia “aoao e le tasi le tasi i mataupu o le malo.” E mafai ona i ai se aafiaga malosi o le mataupu i o tatou mafaufau ma loto.

O le Laupapa ma le Talanoaina o Mau

Ia taitai atu manatu o tagata o le vasega i mau ma fesili na e tusia i luga o le laupapa (tagai “Sauniuniga,” numera 5).

Ia faamatala o mau o loo tusiaina i luga o le laupapa, o le fasi fuaiupu “mataupu o le malo” e faatatau lea i upu moni o le talalelei ua faaalua mai.

Ia taitai atu manatu o tagata o le vasega i fesili na e tusiaina i luga o le laupapa. Ao le i fai atu i tagata o le vasega e talanoaina fesili, ia fai atu ia i latou e faitau leotele mai muamua mau nei:

- a. Enosa 1:1–4. (E tuia o tatou loto i mataupu faavae o le talalelei ma faamaualaloina ai i tatou i luma o le Atua.)
- e. Alema 31:5. (O le afioga a le Atua e taitaiina ai tagata e faia mea tonu ma “sili ona aoga” ai i manatu.)
- i. Alema 32:28 (O le afioga a le Atua e faateleina ai o tatou loto, e faamalamalaina ai o tatou mafaufau, ma amata ai ona suamalie ia te i tatou.)
- o. Iosefa Samita—Talafaasolopito 2:11–12. (O le afioga a le Atua e oo mai “ma le . . . matua ootia o [le] loto.”)

Ia fai atu i tagata o le vasega ia talanoaina fesili o loo i luga o le laupapa.

Tautalaga a leTagata o le Vasega

Ia valaaulia le tagata o le vasega poo se isi tagata o le uarota na tofiaina e faamatala atu pe na faapefea ona aafia lona olaga i le aoaoina o se mataupu faavae patino o le talalelei.

E ao ona taulai a tatou aoaoga i le mataupu faavae.

Tulaga Faatusa e Aoao Ai

Ia fai atu i tagata o le vasega e mafaufau o i latou nisi o le au peresitene o Alii Talavou, Tamaitai Talavou, poo le Aoga Sa. Ua fai atu se faiaoga o la latou faalapopotoga ia i latou, “A ou aoaoina le autalavou e tele taimi o le vasega ou te faaaluina e talanoa ai e uiga i mea e pei o taaloga, tafaoga faamasani, ma tifaga. Ou te lagona lava e peiseai o le a aveesea le sagisagi mai o tagata o le vasega pe a tele le taimi ou te faaaluina i le aoao atu mai tusitusiga paia.”

Talanoaga ma Upusii

- O le a se fautuaga e te avatu ia fesoasoani ai i lea tagata e aoao atu le mataupu mai i tusitusiga paia?

Ia valaaulia ni tagata se toatolu o le vasega e faitauina le palakalafa o loo i lalo ifo, o se vaega o lenei talanoaga. Ia faamamafa atu le taua o le aoaoina o le afioga a le Atua i tagata o le Ekalesia poo le a lava le matua o lona soifua.

Mo Faiaoga o Tagata Matutua

Na faapea mai Peresitene Iosefa Filitia Samita, “E le lelei ia te au pe a ou auai i se sauniga ae tofia se tagata e lauga, ona tulai mai lea i luma o tagata ma tuuina mai ni aoaoga faasalemausau, ma ni filosofia faaletagata, e ui ina o loo lelei le ala o loo aumai ai,—o manatu o i latou o e o loo faatosina atu i ai manatu o le lalolagi, ae leai se faatuatua i o latou loto ia Iesu Keriso ma se alofa mo Ia.—poo i latou o e talanoaina mataupu e le ogatasi ma mataupu autu o le talalelei” (*Doctrines of Salvation*, comp. Bruce R. McConkie, 3 vols. [1954–56], 2:342).

Mo Faiaoga o Alii ma Tamaitai Talavou

Na aoao mai Peresitene J. Reuben Clark Jr:

“O loo fia aai le autalavou a le Ekalesia i mea i la le Agaga; o loo latou naunau e aoao le talalelei, ma o loo latou moomia le tuusa’o, ma ia lē lualuagia. . . .

“E te le tau soso atu i o [latou] tua ma musumusu atu i ai aoaoga faalelotu i o [latou] taliga; . . . E le tatau ona e faalafiina upumoni faalelotu i se ofu talaloa o mea faalelalogi; e tatau ona e aumaia i luma nei upumoni ia i [latou]” (*The Charted Course of the Church in Education*, rev. ed. [pamphlet, 1994],3,9).

Mo Faiaoga o le Fanau Iti

Na apoapoi mai Elder Ezra Taft Benson, “Pau lava le mea matou te aioi atu ai ia te outou [e] faapea i loto o nei fanau o e ua tuuina atu i lau vaavaaiga ma le taitaiga, o le a e matua uunaia i latou ma o le a leai lava se mea i lenei lalolagi o le a sili ona pele atu ia i latou nai lo o le Talalelei” (“Our First Obligation,” *Children’s Friend*, Oct. 1950, 454).

Mo Faiaoga Uma o le Talalelei

Na saunoa mai Elder Boyd K. Packer:

“O mataupu moni, ua malamalama i ai, e suia ai le amio.

O le suesue i mataupu o le talalelei e vave ona faaleleia ai le amio nai lo le suesue i ala e faalelei ai le amio” (i le Conference Report, Oke. 1986, 20; poo le *Liahona*, Ianuari 1987, 19).

E tatau ona tatou mautinoa o loo tatou aoa atu mataupu faavae sa’o.

Ia faitau le saunoaga leni a Peresitene Marion G. Romney:

“A ou fia inu i se vai puna, ou te fia manao i le vai mai le mata o le vai i le mea e puna mai ai, ae lē o le vaega lea e tafe mai le mea na feoa’i ai lafumanu. . . . Ou te fiafia i manatu o isi, ae a tuu mai i le talalelei, e tatau lava ona tatou malamalama lelei i afioga a le Alii” (sii mai e J. Richard Clarke i le Conference Report, Oke. 1982, 19; poo le *Liahona*, Ianuari 1983, 24).

- O a punaoa e ao ona tatou liliu atu i ai ina ia fesoasoani ia i latou o e o loo tatou aoaoina atu “ia malamalama lelei i afioga a le Alii?” (O tali e tatau ona aofia ai tusitusiga paia ma aoaoga a perofeta o aso e gata ai.)
- E faapefea ona tatou mautinoa o loo tatou aoaoina atu mataupu faavae tonu?

O se vaega o leni talanoaga, ia fai atu i tagata o le vasega e faitau le Mataupu Faavae ma Feagaiga 42:12–13 ma le 52:9. Ia faamamafa atu e mafai ona tatou faamautinoaina o loo tatou aoaoina atu mataupu faavae tonu e ala lea i le ogatasi ma tusitusiga paia ma aoaoga a perofeta o aso e gata ai. Ia fai atu i se tagata o le vasega e faitau le saunoaga leni a Peresitene Spencer W. Kimball:

“E leai se tasi e i ai sana aia tatau e tuuina atu ai sana ia lava faaliliuga pe a valaauina o ia e aoa atu i faalapotopotoga a le Ekalesia; o ia o se mālō, . . . ma ua tatau ai ia te i latou na te aoaoina ona mafaufau, ona ua filifilia o ia ma lagolagoina i le faatulagaga tonu, o lea ua avea ai o ia ma sui o le Ekalesia, ma o mea o loo ia aoaoina atu, ua faamaoniaina e le Ekalesia” (*The Teachings of Spencer W. Kimball*, ed. Edward L. Kimball [1982], 532–33).

Afai o e aumaia tusi lesona ua saunia e le Ekalesia mo le faaogaina i le taimi nei, ia faaali atu nei loa.

Ia faailoa atu o tusi lesona na saunia e le Ekalesia o loo i ai vaega fautuaina mo fesili e faatino ai, o gaoioiga, ma lipine fautuaina e faalogologo ma matamata ai, e fesoasoani

Upusii ma le
Talanoaga

ia i tatou e taulai atu ai la tatou aoaoga i tusitusiga paia ma afioga tulei a perofeta o aso e gata ai.

O loo folafola mai e le Alii ia i tatou ia faamanuiaga sili a’o tatou aoaoina ma aoao atu Lana mataupu ma le maelega.

Upusii

Ia faailoa atu e ao ona tatou suesue i mataupu faavae o le talalelei ae tatou te le i aoaoina atu atoatoa i latou. Ona faitau lea o le saunoaga lenei a Peresitene Spencer W. Kimball:

“O se mea masani le i ai lea o ni nai mau o tusitusiga paia tatou te tautu i ai, e faaopeopea i o tatou mafaufau, e pei ona i ai, ma ua ia te i tatou le manatu sese lena ua tele lo tatou iloa o le talalelei. I lenei tulaga, o le maua o sina malamalama ititi e mafai ona matua avea ma se faafitauli. Ou te talitonu o i tatou taitoatasi, i se taimi o o tatou olaga, e ao ona iloa tusitusiga paia mo i tatou lava—ma e le na o le iloa i se taimi e tasi, ae ia toe iloa ma saga iloa” (*Liahona*, Tesema 1985, 4).

O le Laupapa ma le Talanoaina o Mau

Ia tape le laupapa, ma tusi ai le siata lenei. Ia faamatala atu o le a faaali atu e le siata ia folafolaga a le Alii i faiaoga o ē “e toe iloa ma saga iloa [ia tusitusiga paia].” Ia fai atu i tagata o le vasega e kopi le siata i a latou api. (Aua le susueina a latou tusi i le itulau lenei.)

Mau o Tusitusiga
Paia

Alema 17:2–3

Mataupu Faavae ma
Feagaiga 11:21–22

Mataupu Faavae ma
Feagaiga 84:85

O Mea Tatou te
Faia

O Faamanuiaga
Tatou te Maua

Ia fai atu i le vasega e faitau mau o loo tauina mai i le siata. A uma ona faitauina mau taitasi, ia fesili atu i le vasega e tau mai mea e mafai ona tatou faia ma faamanuiaga o le a tatou maua ona o le faia o na faatinoga. Ia tusiina o latou manatu i koluma e talafeagai ai. Ia uunaia tagata o le vasega ia tusiina nei manatu i a latou api. O loo tauina atu i le siata lenei nisi o tali e mafai ona i ai.

<u>Mau o Tusitusiga Paia</u>	<u>O Mea Tatou te Faia</u>	<u>O Faamanuiaga Tatou te Maua</u>
Alema 17:2–3	la suesue ma le maelega i tusitusiga paia	Maua le agaga o valoaga ma faaaliga
Mataupu Faavae ma Feagaiga 11:21–22	la tatalo ma anapogi	Aoao atu i le mana ma le pule a le Atua
Mataupu Faavae ma Feagaiga 84:85	la maua le afioga a le Atua e ala i le aoao ma suesue	Maua le taitaiga a le Agaga
	la sauni e aoao atu e ala i le “teu[ina] pea i o outou mafaufau upu o le ola”	Aoao atu i le mana e faatalitonuina ai isi Aoao atu i musumusuga

Faatinoga

Ia fai atu i tagata o le vasega ia tusiina i a latou api se mea patino se tasi o le a latou faia e mulimuli ai i apoapoiga o loo tauina mai i nei mau. Ia fai atu foi ia i latou ia tusiina pe lagona faapefea e i latou o le a fesoasoani lenei faatinoga latou te mauaina ai faamanuiaga a le Alii i o latou tiutetauave o le aoao atu.

Faaiuga

Molimau

Ao uunaia e le Agaga, ia molimau atu i le mana e oo mai e ala i le suesue ma aoao i mataupu faavae o le talalelei.

Tofiga po o Mea e Fai

Ia uunaia tagata o le vasega ia:

1. Suesue ma le maelega i tusitusiga paia i aso taitasi. (Atonu e te manao e uunaia i latou ia faitau le “Faatulagaina o se Fuafuaga a le Tagata Lava Ia mo le Suesueina o le Talalelei,” itulau 16–17 o loo i lenei tusi.)
2. E tusa ai ma mea na faaoga ai le api i le taimi o le lesona, ia taumafai e faia se mea e tasi i le vaiaso a sau ia faaleleia ai a latou suesuega o le talalelei a le tagata lava ia. Ia tusi e uiga i lo latou alualu i luma e tusa ai ma lea sini.
3. Ia toe iloilo ina mataupu na aoaoina atu i lenei lesona e ala i le suesueina o le vaega o le tusi lenei ua faaulutalaina “Ia Aoao Atu le Mataupu” (itulau 52–62).

Lesona

5

IA VALAAULIA LE
AOAO MA LE MAELEGA

Faamoemoega Ina ia fesoasoani i tagata o le vasega ia malamalama o loo i tagata taitoatasi le tiutetauave ia aoao i le talalelei; ina ia fesoasoani ia i latou ia iloa pe faapefea i le avea ai o i latou ma faiaoga, ona fesoasoani i isi e faataunuuina lena tiutetauave.

Faaaliga mo le Faiaoga Na poloaiina e le Alii i tatou ia “saili i le aoao, e faapea foi i le suesue ma le faatuatua” (MFF 88:118). E pei ona sa aoao atu e Peresitene Spencer W. Kimball, o leni poloaiga e ao ona usitaia ma le maelega: “. . . e le mafai ona avea se tasi o ‘se e anana i le upu’ e aunoa ma le muai avea ma ‘se e faalogo.’ Ma o le avea ma ‘se e faalogo’ e le na o le tu samasamanoa ma faatalitali mo ni faatonuga; ae alu atu o ia e saili ma aoao ma tatalo ma ia malamalama i ai” (*Liahona*, Tesema 1985, 3).

O le faaiuga a le tagata e suesue i le talalelei ma le maelega o se faaaogaina tonu lea o le filifiliga saoloto. O faiaoga e malamalama i le mataupu faavae o le filifiliga saoloto, o le a lē taumafai e faia faamalosi isi e aoao i le talalelei. Ae peitai, o le a latou tauivi e aoao atu i se auala o le a uunaia ai isi ia tuuina atu ma le maelega le malosi e aoaoina ai le talalelei.

- Sauniuniga**
1. Suesue ma le agaga tatalo ia mau o loo i leni lesona. Saili ina ia faatatauina nei mau i le faamoemoega o le lesona.
 2. Ia suesue le vaega o le tusi leni o loo faaulutalaina “Ia Valaaulia le Aoao ma le Maelega” (itulau 63–79). Ia suesue foi i le “Mataupu o le Liuaia,” itulau 338 o loo i le vaega o le “Aoaoina Atu o le Talalelei ma le Taitaiga” o loo i le *Tusitaulima o Faatonuga a le Ekalesia*.
 3. Ia logo mamao atu ni tagata se toatolu o le vasega e fesoasoani ia te oe i le faitauina atu o le tala o loo i le itulau 219. Ia fai atu i le tasi e faitauina le vaega a le tagata faamatala, o le isi e faitauina le vaega a le sa Sorama, ma se isi lona tolu e faitauina le vaega a Alema.
 4. Ia faia ni pine o igoa mo tagata o loo auai i le faitauina o le tala. Ia tusi le *Tagata Faamatala* i le tasi o pine, o le *sa Sorama* i le isi, ma *Alema* i le isi.

Faalautelega Fautuaina o le Lesona E i ai le tiutetauave i tagata taitoatasi e aoao ai le talalelei.

Faitauina o le Tala Ia fai atu i tagata o loo faitauina le tala ia o atu i luma o le vasega. Ia avatu i ai pine o o latou igoa. Ona faailoa atu lea o tagata nei e toatolu o le vasega ua malilie e faitauina atu se tala. O le faamoemoega o leni faatinoga, o le suesueina lea o le tiutetauave o loo i tagata taitoatasi e aoao ai i le talalelei.

Ia tusi mau nei i luga o le laupapa: *Alema* 32:27–28, 33, 38, 41. Ia faamatala atu o nei mau e ogatasi ma aoaoga a Alema o le a faaaogaina i leni faatinoga. Ia uunaia tagata o le vasega ia mulimuli i le faitauina o mau a o faitauina le vaega a Alema.

Tagata Faamatala: Ao talai atu Alema ma ona uso i tagata liliuese ua faaigoa o sa Sorama, na latou ulu atu i se tasi o sunako a sa Sorama. O iina na latou faalogo ai o tautau e sa Sorama “[o le a] leai se Keriso” (Alema 31:16).

Ina ua uma ona faalogo i lenei aoaoga sese, ona taapeape ai lea o Alema ma lona auuso e talai atu le afioga a le Atua ma molimau atu e uiga ia Keriso. E toatele se motu o tagata sa Sorama na o atu e fetaia’i ma Alema, ma o le tasi o ia sa Sorama na fai atu ia te ia. (Tagai Alema 31:37–38; 32:1.)

O le Tagata sa Sorama: (Ia faitau le Alema 32:5, ia amata mai i upu “Faauta, se a se mea e faia e o’u uso nei.”)

Tagata Faamatala: (Ia faitau le Alema 32:6.)

Laupapa

Ia tusi mea nei i luga o le laupapa:

*O le Tiutetauave o le Tagata Lava la
la saunia e faalogo i le upu (ia fiafia e aoaoina).*

Ia faamanino na tali atu sa Sorama i o latou puapuaga e ala i le filifili e lotomauualalo. Na latou sailia se tagata e mafai ona aoaoina i latou i le afioga a le Atua.

Faitauina o le Tala

Tagata Faamatala: Ina ua iloa ua saunia sa Sorama e faalogo i le afioga a le Atua, o lea na aoaoina atu ai Alema ia i latou i le ala e maua moni ai le upu ma mauaina se molimau i lona moni.

Alema: (Ia faitau le Alema 32:27–28, 33.)

Laupapa

Ia faaopoopo atu i le lisi o loo i luga o le laupapa e pei ona faaalua i lalo:

*O le Tiutetauave o le Tagata Lava la
la saunia e faalogo i le upu (ia fiafia e aoaoina).
la faia se nofoaga mo le upu.*

Faitauina o le Tala Tagata Faamatala: I le taufaaiiuga o ana upu na fai atu ai Alema ia sa Sorama pe a latou mauaina se molimau i le upu, o le a i ai nisi mea e tele latou te faia. O lona tuuina atu o lenei faamatalaga, na ia faatusaliaina ai le upu i se laau e tupu mai i se fatu.

Alema: (Ia faitau le Alema 32:38, 41.)

Laupapa Ia faaopoopo atu i le lisi e pei ona faaalua i lalo:

*O le Tiutetauave o le Tagata Lava Ia
la saunia e faalogo i le upu (ia fiafia e aoaoina).
Ia faia se nofoaga mo le upu.
Ia faafaileleina le upu.*

Ia fai atu i tagata o le vasega na faatinoina le faitauina o le tala e toe foi atu i o latou nofoa.

Tautalaga a le Faiaoga Ia faamatala atu na aoao atu Alema ia sa Sorama e taitoatasi i latou ma le tiutetauave o le aoao i le talalelei. O loo ia i tatou taitoatasi le tiutetauave o le aoao i le talalelei. O tagata taitoatasi o loo faatoa amata ona taliaina lenei tiutetauave ua “saunia . . . i latou e faalogologo i le upu’ (Alema 32:6). O isi o loo sailiili i le upu ma saunia se nofoaga e totoina ai le upu i totonu o o latou loto (tagai Alema 32:27–28). A o isi o loo faafaileleina le upu i le faatuatua, ma le filiga tele, ma le onosai (tagai Alema 32:41).

E aoaoina e tagata taitoatasi le talalelei e ala i lo latou faatuatua, maelega, ma le onosai.

- Talanoaga
- O a nisi o mea patino e mafai ona faia e tagata ia “faafaileleina ai le upu”? (Ia tusi tali a tagata o le vasega i luga o le laupapa. Ia vaai o loo lisiina i lalo nisi o tali e ono i ai.)
 - a. Ia suesue ma manatunatu loloto i tusitusiga paia i aso taitasi.
 - e. Ia saili i tusitusiga paia mo tali e patino tonu i fesili.
 - i. Ia suesue i lauga mai konafesi aoao.
 - o. Ia suesue i faamatalaga ma tala o loo i mekasini a le Ekalesia.
 - u. Ia anapogi ma tatalo mo le malamalama.
 - f. Ia saili le malamalama ao faia galuega faalemalumalusa.
 - g. Ia talanoaina mataupu o le talalelei faatasi ma tagata o le aiga ma uo.
 - l. Ia mulimuli i le taitaiga a le Agaga.
 - m. Ia taumafai ma le faamaoni e tausia poloaiga.
 - O a faamanuiaga ua oo mai ia te oe ona o au taumafaiga ma le maelega e aoao i le talalelei?

E ao i faiaoga ona fesoasoani i tagata taitoatasi ia faaoga lo latou saolotoga e aoa ma ola ai i le talalelei.

Aoaoga a le Faiaoga

Ia faamanatu i tagata o le vasega na aumaia e le Atua ia i tatou le saolotoga—o le pule e filifili ai le lelei po o le leaga (tagai MFF 29:35). E faaogaina lo tatou saolotoga pe a tatou filifili pe tatou te aoa ma ola ai i le talalelei pe leai foi.

Upusii

Ia faitau le saunoaga lenei a Elder James E. Faust:

“O le saolotoga, lea ua tuuina mai ia te i tatou i le fuafuaga a lo tatou Tama, o se ala sili foi lea i le fuafuaga a Satani o le fai faamalosi. Ona o lenei meaalofa taua, ua mafai ai ona tatou tuputupu a’e, faaleleia atili, alualu i luma, ma saili atu i le atoatoa” (i le Conference Report, Oke. 1987, 42; poo le *Liahona*, Ian. 1988, 35).

Talanoaga

- O le a se eseesega e i ai lo tatou aoa atu ina ua tatou iloa e i ai le saolotoga o tagata taitoatasi, ma o loo ia te i latou foi le tiutetauave o le aoaoina o i latou lava? (Atonu e te manao e tusi tali a tagata o le vasega i luga o le laupapa.)

Ia fesoasoani i tagata o le vasega ia iloa e ao ona latou taulai atu i ē o loo latou aoaoina atu, ae le na’o le aoa atu. O faiaoga lelei o le talalelei e le mafauafau na’o mea o le a latou aoaoina atu. Latou te fesili ifo ia i latou lava, “Pe faapefea ona ou fesoasoani atu ia i latou o loo ou aoaoina ina ia aoa ma malamalama i mea e tatau ona latou iloaia?” O le faia o lena mea, e faaalua ai le faaloalo o faiaoga i saolotoga o i latou o loo latou aoaoina, ma fesoasoani ai i a te i latou ia maua le olioli i le taliaina o o latou tiutetauave e aoa.

Ia fai atu a’o tatou taumafai e fesoasoani i isi ia talia le tiutetauave o le aoa i le talalelei, e ao ona tatou valaauliaina ma uunaia i latou nai lo o le faia faamalosi. E ao ona tatou manatunatu loloto ma tatalo mo a tatou fuafuaga e fesoasoani ai i tagata taitasi o loo tatou aoaoina.

E le tatau ona tatou faia se mea e ono aveesea ai le manao o isi ia aoa i le talalelei.

Talanoaga

- O a nisi o mea e ono faia e faiaoga atonu e aveesea ai le manaoga o tagata ia aoa i le talalelei? (Ia tuu atu le taimi i tagata o le vasega e mafauafau loloto ai ma talanoaina lenei fesili. Ia uunaia i latou e talanoaina le fesili i tulaga faalauaite le nai lo le faitioina o faiaoga taitoatasi. O loo lisi atu i lalo nisi o manatu e mafai ona i ai.)
 - a. O le faitauina atu lea o lesona ia i latou mai le tusi lesona.
 - e. O le faaluina lea o le taimi tele o le lesona e te tautala ai.
 - i. O le taumafai lea e faaifo i latou i le malamalama ma le tomai faafiaoga.
 - o. O le faitioina ma le manatu māmā i a latou fesili ma manatu e tuuina atu.
 - u. O le tuuina atu o faamatalaga poo le faia o fesili e ono faavaivaiina ai lo latou faatuatua.
 - f. O le faaogaina o le gagana po o faaitaiga e ono aveesea ai le Agaga.
 - g. O le lē taula’i atu o lesona i mea moni o le talalelei.

Upusii

Ia faai lenei talanoaga i le fai atu lea i se tagata o le vasega e faitauina le saunoaga lenei a Elder Dallin H. Oaks:

“O faiaoga taitasi o le talalelei o ē saili e mulimuli i le Matai o le a *taula’i atu ana taumafaiga uma i isi ae le o ia lava*. Na faapea mai Satani, ‘Auina atu au, . . . o le a ou togiolaina le fanauga uma a tagata, . . . ma e moni o le a faapea lava ona ou faia; o le mea

lea, ia tuu mai ia te au lou mamalu.’ Ia faatusatusa ane lena manatu na faataatia mai ma le faataitaiga a le Faaola, o le na fetalai, ‘Lou Tama e, ia faia lou finagalo, ma ia ia te oe pea le mamalu e faavavau.’ (Mose 4:1–2). O se faiaoga o le talalelei o le a taulai atu lana aoaoga i manaoga o mamoe ma le mamalu o le Matai. E aloese o ia mai le avea ma tama autu. O le a ia aoao atu le lafu ina ia latou tepa taulai pea i le Matai. O le a ia le faanenefuina la latou vaaiga i le Matai e ala i lona faalavelave i le ala poo le lafoia atu o se ataata o le faaleleia o ia lava, poo lona lava lelei” (Lauga, Mati 31, 1998).

E tele mea e mafai ona tatou faia e valaaulia ai le aoao ma le maelega.

Gaoioiga i le Api

Ia fai atu i tagata o le vasega e susue i le itulau 63 o le tusi lenei. Ia fai atu i se tagata se toatasi o le vasega e faitau leotele le faamatalaga o loo i lena itulau. O lenei faamatalaga o loo lisiina ai ni mea faalaua’itele se tolu e mafai ona tatou faia e valaaulia ai le aoao ma le maelega. Ia faailoa atu o loo i ai ni mea faigofie ma patino se tele e mafai ona tatou faia i vaega taitasi nei.

Ia toe iloiloaina e le vasega le lisi lenei i a latou api. Ia valaaulia i latou e filifili se manatu se tasi mai le lisi o le a latou faaaogaina i se avanoa o loo loma e aoao atu ai. Afai e lava le taimi, ia faatagaina i latou e tusi faapuupuu i a latou api pe faapefea ona latou faatinoina lenei manatu. Atonu e te manafoi e fai atu ia i latou e fetufaai a latou fuafuaga ma isi tagata o le vasega. Afai e le lava le taimi mo i latou e tusi ai a latou api ma talanoaina o latou manatu, ia uunaia i latou e tusi a latou api i le fale.

- a. Ia fai atu i se tasi e fesoasoani i le faia o se lesona. Ia fesoasoani atu ia te ia mo le sauniaina.
- e. Ia fai atu i se tasi e saunia se lesona faatino.
- i. Ia fetufaai lagona ma mea na oo i ai le tagata lava ia pe a talafeagai ai.
- o. Ia fai atu ia i latou o loo e aoaoina ia mafaufau loloto i faamanuiaga a le Alii ua tuuina atu ia te i latou ma o latou aiga.
- u. Ia aoao atu le ala e faitauina ai ma le malamalama tusitusiga paia.
- f. Ia faailoa atu le aoga o sao o tagata uma taitoatasi i le lesona. Ia faalogo i manatu ma faaaoga auala o loo faaalua i talanoaga.
- g. Ia faia fesili e faatupu manatu ma valaaulia le tuuina mai o manatu i talanoaga.
- l. Pe a fesili se tasi, ia valaaulia isi e tuuina mai tali.
- m. Ia fesili atu ia i latou o loo e aoaoina ia mafaufau pe mafai faapefea ona latou faatinoina mea ua latou aoaoina.

Faaiuga

Ia faamanatu i tagata o le vasega e tata i faiaoga o le talalelei ona avea ma faataitaiga i le aoaoina ma le maelega o le talalelei. Ia uunaia i latou ia iloiloaina a latou lava taumafaiga e aoao mataupu faavae o le talalelei. Ia valaaulia i latou ia iloa poo a mea e mafai ona latou faia ia mulimuli ai i apoapoiga a Alema e tausia le upu i le faatuatua, ma le maelega, ma le onosai (tagai Alema 32:37, 41–42).

Ia uunaia tagata o le vasega ia manatua le paia o le saolotoga o tagata uma taitoatasi. Ona faitau lea o le saunoaga lenei a Peresitene Spencer W. Kimball:

“O ‘oa o le malamalama faalelalogi, ma le malamalama faaleagaga, o ni ‘oa natia—e natia mai i ē lē saili atu i ai i le ala tata, ma taumafai ia maua ia malamalama ai. . . . O le malamalama faaleagaga, e le mafai ona maua i le na’o o le ole

atu; e le lava foi le na’o le tatalo. E manaomia le tumau ma le saili i ai ma le faamaoni o se tasi, i lona olaga. . . . (*The Teachings of Spencer W. Kimball*, ed. Edward L. Kimball [1982], 389–90).

Molimau

Ia tuuina atu le molimau ao musuia e le Agaga.

Tofiga po o Mea e Fai

Ia uunaia tagata o le vasega ia:

1. Tusi i a latou api mea na tutupu ao latou faatinoina auala latou te valaauliaina ai le aoao ma le maelega (tagai i le “Gaoioiga i le Api” o loo i luga). A talafeagai, ona talanoa lea ma se taitai e uiga i nei mea na tutupu, ma se isi tagata o le vasega, poo se tagata o le aiga.
2. Iloiloina mataupu na aoaoina atu i lenei lesiona e ala i le susesue i le vaega o le tusi lenei ua faaulutalaina “*Valaaulia e Aoao ma le Maelega*” (itulau 63–79).

Lesona

6

FAATUPUINA O SE ATEMOSIFIA E AOA O AI

Vaega 1

Faamoemoega Ina ia fesoasoani i tagata o le vasega ia malamalama pe mafai faapefea ona galulue faatasi ma faiaoga ma tagata aoao i le faatupuina o se atemosifia e aoao ai le talalelei.

Faaaliga mo le Faiaoga I le lesona 5, na talanoaina ai e tagata o le vasega ia tiutetauave o tagata taitoatasi ia maelega i lo latou aoaoina o le talalelei. O le lesona i lenei vaiaso e taulai atu i se tiutetauave e faia faatasi e faiaoga ma tagata aoao: o le faatupuina o se atemosifia e aoao ai. O le a fesoasoani ai i tagata o le vasega e faaogaina mataupu o le talalelei i a latou taumafaiga e taofia mea e fai ma faalavelave i totonu o le potuaoga ma fesoasoani e foia faafitauli o le amio lē pulea atonu o loo i ai.

I le avea o lenei lesona ma se faavae, o le a saunia tagata o le vasega e tuuina atu ni tali i faafitauli patino. O le a faia lenei mea ma se vaega o le lesona 7.

Sauniuniga

1. Suesue ma le agaga tatalo ia mau o loo i lenei lesona. Saili ina ia faatatauina nei mau i le faamoemoega o le lesona.
2. Ia faamasani i tala o loo i le lesona. Ia faataitai ona faitauina i se ala e aumaia ai loto o tagata o le vasega.
3. Ia aumaia mea nei i le vasega:
 - a. O se fasi pepa telē (poo ni fasi pepa laiti se tele).
 - e. O peni maka e tolu.
4. Ia suesue le vaega o le tusi lenei ua faaulutalaina “Faatupuina o se Atemosifia e Aoao ai” (itulau 81–95).

Faalautelega Fautuaina o le Lesona Ua saunia e le Aoga a Perofeta se faaitaiga i le ala e faatupuina ai se atemosifia e aoao ai le talalelei.

Upusii Ia faitauina atu le faamatalaga lenei:

“I popofou o lenei tisipenisione na poloaiina ai e le Alii le usoga ia ‘aoao le tasi i le tasi i mataupu o le malo.’ E ao ona latou aoao i mea uma e tatau ona latou iloa tau i le talalelei ma le malo o le Atua, e faapea foi i mea tau le poto salalau ma saienisi, ma malo, ma atunuu. E ao ona latou ‘saili i le aoao, e faapea foi i le suesue ma le fautu-atua,’ ma e ao ona fausia se nofoaga paia poo le malumalu i Katelani, e avea ma ‘se fale o le aoaoga’ atoa ai ma isi mea. (MFF 88:74–81, 118–122.)

“I le avea ai ma se vaega o le faatulagaga sa i ai ina ia faataunuuna ai nei poloaiga, na faatonuina ai e le Alii le faia o le *aoga a perofeta* (MFF 88:122, 127–141)” (Bruce R. McConkie, *Mormon Doctrine*, 2nd ed. [1996], 679).

Ia faamatala atu o le faamoemoega o le aoga a perofeta e “saunia ai uso filfilia o le perisitua e talai atu le talalelei a Iesu Keriso i le lalolagi atoa” (Ezra Taft Benson, i le Conference Report, Ape. 1983, 69; poo le *Liahona*, Iulai 1983, 83). Na aoaoina e le Alii e ala mai i faaaliga, ia tagata o le aoga i le ala e faatautaia ai i latou lava. E tolu vaega o Ana aoaoga e mafai ona fesoasoani ai i aiga ma vasega o le Ekalesia ia faatuina ai se atemosifia e aoao ai.

Laupapa

Tusi le lisi lenei i luga o le laupapa:

1. E fai *saofaga o tagata uma*.

2. O loo i ai se *noataga faauo i le talalelei e tuufaatasia ai ē uma o loo auai*.

3. E uai atu *tagata uma taitoatasi ma sauni e taulai atu i sao o isi*.

Mau

Ia sue e le vasega le Mataupu Faavae ma Feagaiga 88: 122–23, 125. Ia faamatala atu o mea e tolu na e tusiina i luga o le laupapa o loo aoao mai e lenei mau. Ia fai atu i tagata o le vasega e faitau leotele le mau. A'o latou faitauina atu, ia fai atu ia i latou e vaavaai mo poloaiga mai le Alii e mafai ona fesoasoani ia i tatou e tausisia ai nei elemene e tolu o se atemosifia e aoao ai.

Ia faamamafa atu pe a faapotopoto faatasi tagata e aoao i le talalelei, e tofu tagata taitoatasi ma se mea aoga e tuu atu. E taitasi ma uunaia e le Agaga e fetufaai manatu ma lagona o le a faamalalamalaina ai isi. O ē uma e auai e tatau ona faalogologo le tasi i le isi ina “ia faamalalamalaina uma . . . tagata uma” (MFF 88:122).

O faiaoga ma tagata aoao e i ai faatasi le tiutetauave o le faatupuina o se atemosifia e aoao ai.

Aoaoga a le
Faiaoga ma Mau

Ia faamanino atu o lesona muamua e lima i lenei vasega e aofia ai talanoaga e uiga i tiutetauave o faiaoga. O le tasi o lesona, o le lesona 5 lea, o loo aofia ai foi talanoaga e uiga i tiutetauave o tagata taitoatasi ia aoao le talalelei mo i latou lava. O le lesona i le asō e taulai atu i se tiutetauave fai faatasi a faiaoga ma tagata aoao: o le tiutetauave o le faatupuina o se atemosifia e mafai ai ona sologa lelei lo tatou aoaoina faatasi ai o le talalelei. I le faataunuuna o lenei tiutetauave, e ao i faiaoga ma tagata aoao ona fesoasoani le tasi i le isi ma lotogatasi i le faamoemoega.

Ia faamatala atu na saunoa Alema i lenei lotogatasi ina ua ia aoao atu tagata o e na papatisoina i vai o Mamona. Ia fai atu i se tagata o le vasega e faitau le Mosaea 18:18–22.

Tala

Ia faamatala atu le tala lenei, na faamatalaina e se tamaitai o le na popole i le vasega a le Aoga Sa na ia auai ai. Fai i tagata o le vasega ia faalogologo mo auala na galulue faatasi ai tagata aoao ma le faiaoga i totonu o le tala e fesoasoani i le faatuina o se atemosifia e aoao ai.

“I la matou uarota fou, na ma iloa ai ma lou toalua e faalē lelei le matou vasega o le Mataupu o le Talalelei. A o tautala mai le faiaoga, o nisi o tagata o le vasega o loo faitauina a latou tusitusiga paia; o isi o loo punonou lava i lalo. Na ou iloa atu le faapopoleina ai o le faiaoga i lea mea. O le tasi o taimi na oo ai lava ina ia fesili mai, ‘Pe o faalogo mai ea se tasi?’

“E le i umi ae o ma iloaina ua o atu nisi o tagata o le uarota i le vasega o le Mataupu Faavae o le Talalelei ae le o le vasega o Mataupu o le Talalelei. Na ma faalogo o le faiaoga o le vasega lena o Mataupu Faavae o le Talalelei e matua lelei lava. Na ma o atu i lena vasega ma ma iloaina ai le ola, faatumulia i manatu, ma tele mea aoga e maua ai. A o ma savalivali atu i le fale mai i le lotu i se tasi aso, na ma talatalanoa ma taufai ioe e faalē sa’o le mea na ma faia. E manaomia lo ma fesoasoani atu i le epikopo i le lagoonaina lea o le faiaoga na ia valaauina e aoaoina i matou. Ona amata lea ona ma talatalanoa e uiga i mea e mafai ona ma faia e faalateleina ai le vasega o le Mataupu o le Talalelei. Na ma iloa ai ua matou tuuina uma atu le tiutetauave mo se vasega ia lelei ma aoga i le faiaoga, e peiseai sa matou faatalitali ia te ia na te faauai atu o matou loto ma faafiafiaina i matou.

“Na ma tatalo i lena vaiaso mo le taitaiga ma sa ma o atu i le vasega o Mataupu o le Talalelei i le Aso Sa ma se agaga ese. I ni nai minute o le lesona, na fesili ai lou toalua, ma sa valaaulia e le faiaoga isi tagata o le vasega e tuuina atu tali. Na amataina se talanoaga matagofie, ma na tofu sao atu i ai tagata e toatele o le vasega. Mulimuli ane i le lesona, na tuuina mai ai e le faiaoga se manatu sa le i manino ia te au, ma sa ou fesiligia ai o ia e fesoasoani mai ia ou malamalama. Na ia tali mai i lona tauina mai o se mau ou te le i iloaina muamua. Ona faamatalaina lea e se tamaitai se tala e faamalamalamaina ai le manatu o le faiaoga, ma se isi tagata o le vasega na tuuina mai se isi mau. Na matou lagonaina le mafutaga a le Agaga i lena potuaoga. Na amata ona to’ā le faiaoga. Na ou maitauina le malosi ma le lototoa na ia mauaina mai i o matou uiga faatauvaa lava o le sagisagi atu ma le lafolafola manatu atu. Na faaiuina le lesona i se tatalo o le loto faafetai ma sa tau fai ‘Amene’ mai ai le vasega.

“Talu mai lena aso o le toatele o tagata o le vasega na taufai tofu faaali manatu ma sagisagi atu. Na foliga mai na faatupu malosi i le faiaoga lo latou sagisagi fiafia atu, ma na ia faaalia pea lava pea lona loto faafetai mo le lagolagosua atu. Na faateleina pea lava pea le lelei o le vasega o le Aoga Sa.”

Talanoaga Faa-Vaega

Vaevae le vasega i ni vaega se tolu. Ia tuu atu i vaega taitasi se peni maka ma se fasi pepa tele (poo ni fasi pepa laiti se tele). Ia fai atu i vaega taitasi e filifili se tasi e fai ma tagata tusitusi. Ona tofu lea o vaega taitasi ma le fesili e tasi o fesili nei:

1. O a nisi o mea e mafai e faiaoga ma tagata aoao ona faia e uuna’ia ai tagata uma e tofu sao atu?
2. O a nisi o mea e mafai ona faia e faiaoga ma tagata aoao e atinae ai fegalegaleaiga faauo a i latou lava?
3. O a nisi o mea e mafai ona faia e faiaoga ma tagata aoao e fesoasoani ai i tagata uma e ua’i atu ma faalogo le tasi i le isi?

Ia fai atu i vaega uma o le a tuuina atu le tolu minute e talanoaina ai a latou fesili. Ao latou faia lena mea, e tatau ona latou manatunatu i o latou lava lagona ma mea na tutupu ia i latou lava faapea le tala na e faatoa faamatalaina atu ia i latou. E tatau ona tusia manatu o vaega taitasi i luga o le pepa telē e le tagata na tofia e tusitusi. Ona ia faaali atu lea o le lisi ia iloa atu e tagata uma.

Pe a maea le lua i le tolu minute, ona faaali atu lea o a latou lisi. Ia faapuupuu le iloiloaina o manatu o loo i le lisi. Ia uunaia tagata o le vasega e tusia nei manatu i a latou api.

Afai e le o aofia ai nei manatu i lisi a tagata o le vasega, e mafai ona e ta’u atu ia i latou:

1. O a nisi o mea e mafai e faiaoga ma tagata aoao ona faia e uuna’ia ai tagata uma e tofu sao atu?
 - a. E ao i faiaoga ma tagata aoao ona faaoga mataupu o loo latou talanoaina.
 - e. O vaega e tatau ai—e pei o vasega a le Perisitua Mekisateko, o le Aualofa ma Mataupu Faavae o le Talalelei— e ao i tagata aoao ona faitauina mea o le lesona a’o le i o mai i le vasega.
 - i. E ao i tagata aoao ona faaali mai ma le naunautai manatu i talanoaga. E tatau ona sii i luga o latou lima e fesoasoani ai i le faiaoga ia iloa ua latou sauni e fesili atu ma tuuina atu manatu.
 - o. E ao i tagata aoao taitoatasi ona faaeteete ia le faoina uma le talanoaga.
 - u. E ao i tagata aoao ona faia maeaea ma le maelega mea uma ua tuuina atu e fai.
2. O a nisi o mea e mafai ona faia e faiaoga ma tagata aoao e atinae ai fegalegaleaiga faauo a i latou lava?
 - a. E ao i faiaoga ma tagata aoao ona iloa tulaga e gafatia e tagata taitasi ma o latou manaoga.
 - e. E ao ona latou fesoasoani le tasi i le isi i totonu ma fafo atu o le vasega.
 - i. Pe a talafeagai ai, e ao ona latou ta’u atu lo latou naunau atu ma le alofa o le tasi i le isi.
3. O a nisi o mea e mafai ona faia e faiaoga ma tagata aoao e fesoasoani ai i tagata uma ia ua’i atu ma faalogo le tasi i le isi?
 - a. E ao i faiaoga ma tagata aoao ona faalogo lelei le tasi i le isi ma fefaaaloaloa’i
 - e. E ao i faiaoga ma tagata aoao ona taunuu vave ane.
 - i. E ao ona latou mataala ma tulaia atu manatu i le lesona.
 - o. E ao i tagata aoao ona tuuina atu fesili talafeagai pe a latou le malamalama i le mea o loo aoaoina atu.
 - u. O vaega e tatau ai, e ao i tagata aoao ona i ai pea i le taimi atoa o le vasega.

E fesoasoani faiaoga i tagata aoao ia malamalama ma faataunuu o latou tiute-tauave o le faatupuina o se atemosifia e aoao ai.

O Tala ma le Talanoaga

Ia fai atu o le a e faamatalaina atu ni tala se lua. Ia fai atu i tagata o le vasega ia mafafafau pe na faapefea ona fesoasoani nei faiaoga o loo i nei tala mo le faatupuina o se atemosifia e aoao ai. Ona tuuina atu lea o le tala lenei na faamatalaina e Peresitene Thomas S. Monson:

“I se tasi aso o le taumalulu, na ou tomanatu ai i se mea na tupu ia te au a’o o’u tamaitiiti. Sa faatoa sefulutasi ai o’u tausaga. O le matou peresitene o le Peraimeri, o Melisa, o se tamaitai ua matua lava, e alofa, ma ua sinā foi lona lauao. I se tasi aso i le Peraimeri, na fai mai ai Melisa ia te au ou te faamuli atu ma te talanoa. I iina na ma saofafai ai i le isi itu o le falelotu e le o i ai ni tagata. Na ia tuuina mai ona lima i lou tauau ma amata ona tagi.

“Na ou tei, ma sa ou fesili atu pe aisea ua tagi ai.

“Na ia tali mai, ‘E foliga mai e le mafai ona ou uunaia [tama] ia faaaloalo i le taimi o le sauniga amata a le Peraimeri. Pe e te finagalo malie ia e fesoasoani mai ia te au, Tommy?’

“Na ou folafola atu ia Melisa o le a ou faia lava. Na fou ia te au, ae le fou ia Melisa, na gata ai iina ua le toe i ai se isi lava faafitauli o le faaaloalo i totonu o lona Peraimeri. Aua, na alu atu o ia i le puna tonu o faafitauli—o a’u lea” (i le Conference Report, Oke. 1987, 82–83; poo le *Liahona*, Ianuari 1988, 66).

- I lenei tala, o le a le mea na faia e le peresitene o le Peraimeri e fesoasoani ai i le faatupuina o se atemosifia e aoao ai? (Na ia fesoasoani ia Tommy Monson laitiiti ia malamalama ma faataunuu lona tiutetauave.)
- A maea ona faalogologo atu i le tala, pe i ai ea ni fautuaga e te fia tuuina atu e faaopoopo atu i le lisi na outou faia?) (Atonu e te manao e fautua atu i tagata o le vasega e faaopoopo atu fautuaga nei i lisi o loo ia latou api.)

O le Tala ma le Talanoaga

Ia fai atu o le a e tuuina atu nei se tala e uiga i se faiaoga i totonu o le faalapotopotoga a Tamaitai Talavou:

“. . . O mai tatou o atu faatasi i se potuaoga o tamaitai talavou e 12 ma le 13 tausaga le matutua. Faafofoga a’o e faalogo atu i le mauaina e tagata aoao o le mataupu faavae. Ia maitau le aafiaga sa saunia e le faiaoga mo tagata aoao, ina ia mafai ai ona latou faafesootaia le mataupu faavae ma mea moni o tutupu i o latou olaga. Ia lagona le molimau mai a le Agaga:

“Na tuutuu mai e lo matou faiaoga lona nofoa e faalatalata mai i teine e tolima sa nonofo i se afali’o. ‘O loo i ai sa tatou malo asiasi mai o loo faatalitali mai i fafo,” o lana tala amata lea. ‘O Sister Iona. Ua ioe o ia e faali mai ia i tatou si ana pepe lam-o’imo’i, ma faamatala mai ia i tatou sona lagona e uiga i le avea ma se tina fou. A o outou vaavaai i lenei pepe fou, ia outou maitauina foi le tina—pe faapefea ona ia taulimaina le pepe, o mea na te faia, ma mea e fai mai ai o ia. O le a tatou talanoaina lana asiasiga pe a tuumuli ese atu o ia.”

“‘Ua sau i totonu Sister Iona ma faaalu le fitu i le valu minute e talanoa mai ai e uiga i lana pepe ma tali mai i fesili. Ua faafetai atu teine ia te ia, ma ua ia tuua le potuaoga.

“‘O le manaia ia o le pepe, a ea?’ ua tali fiafia mai lo matou faiaoga i le ioe fiafia atu a le vasega. ‘Ae o le a se mea sa outou maitauina e uiga i le tina?’

Sa le toe i ai se magagu mo sina taimi, ona sau ai lea o le tali: “Sa fiafia o ia,’ O le isi tali: ‘Sa ia luelueina i tua ma luma le pepe i le taimi atoa lava na ia siiina ai.” Sa i ai nai nisi tali, ona amata lemu loa lea e Keiti ona fai mai, ‘Sa—mmm—matua lemu lava lana talanoa mai.’

“‘Pe mafai ona e faamatala teisi mai le uiga o lona mea?’ o le tauanau atu lea a le faiaoga.

“‘O i, e faamanatu mai ia te a’u i lona leo le leo o lo’u tina ina ua telefoni mai o ia mai le falemai e tau mai ia i matou ua i ai so matou uso pepe fou, i le tausaga na tea nei.’

“Na liliu atu le faiaoga i isi teine ma faapea atu: ‘O le a so outou manatu? Pe na i ai se isi o outou na maitauina lona leo?’

“Na tau manatunatu loloto teineiti ma amata ona tali atu i upu nei e pei o le ‘faaaloalo,’ ‘lagi’ ‘alofa.’

“Na faapea mai le faiaoga: ‘Ou te manatu ua ou malamalama. Ou te talitonu ua oo mai na upu i o tatou mafaufau ona ua tatou iloa se meaalofa maoae mai lo tatou Tama Faalelagi. E alofa o la ia i tatou ma faatuatuaina tele i tatou, ua la naunau ai e tuuina mai ia i tatou Ona mana e foafoa ai. Tatou te lagona lava le loto faafetai ma le faaaloalo mo lenei faatuatuaina. O le tulaga faatina o se matafaioi *paia*.’

“Ina ua maea le tuuina manino atu o le mataupu faavae ma le molimau, ona faia lea e le matou faiaoga se gaoioiga, e faamatala mai ai e teineiti ia uiga lelei o o latou lava tina e faailoa ai se malamalamaaga i le paia o le avea ai ma tina. ‘Pe mafai e outou taitasi ona saunia i le taimi nei e avea ma tina e ala i le faatinoina o se tasi o nei uiga lelei—atonu o le onosai atili, agalelei atili, pe o le lelei atili i lenei vaiaso?’

“Na taitasi teineiti ma talanoa e tusa ai ma [uiga lelei] na latou filifilia. Na faia le molimau patino a lo matou faiaoga. Na faia le tatalo faaiu” (Virginia H. Pearce i le Conference Report, Oke. 1996, 14–15; poo le *Liahona*, Ianuari 1997, 14).

- I lenei tala, o le a le mea na faia e le faiaoga e fesoasoani ai e faatupuina se atemosifia e aoao ai? (O tali e ono aofia ai o lona valaauliaina lea o se malo asiasi e faamatalaina atu se mea patino na oo i ai, o lona fai atu o fesili faatupu manatu, o lona faalogologo lelei atu, o lona tali atu i manatu o tagata o le vasega faatasi ai ma fesili tulitatao, o lona aoao atu o mataupu faavae, ma lona fesoasoani atu i tamaitai talavou ia faaoga le mataupu i o latou olaga.) O a mea na faia e tagata o le vasega? (O tali e ono aofia ai, sa latou faalogo ma tuuina atu manatu.)
- E mafai faapefea e le atemosifia e aoao ai o loo faatupuina i totonu o le vasega ona fesoasoani e aveesea ai faafitauli i le lumanai?
- A maea ona faalogologo atu i le tala, pe i ai ea ni fautuaga e te fia tuuina atu e faaopoopo atu i le lisi na outou faia?) (Atonu e te manafoi e fautuaga atu i tagata o le vasega e faaopoopo atu fautuaga nei i le lisi o loo i a latou api.)

Pe a tatou fesoasoani i tagata aoao ia matua auai i le faatupuina o se atemosifia e aoao ai, ua tatou aoao atu i latou e mulimuli ia Iesu Keriso.

Aoaoga a le Faiaoga

Ia faamanino atu o tala na e tuuina atu o lo o i ai ni auala e taofia ma foia ai faafitauli. Ia fai atu i tagata o le vasega e sue le vaega o le tusi lenei ua faaulutalaina “Faatupuina se Atemosifia e Aoao Ai,” e amata atu i le itulau 81. Ia fai atu o itulau 81–89 o loo talanoaina ai le faatupuina o se atemosifia e aoao ai ma le taofia o mea e fai ma faalavelave, ma o itulau 91–95 o loo i ai fautuaga patino lava i ala e taulimaina ai mea e fai ma faalavelave pe a tutupu mai. Ia faamatala atu pe tatou te saili e taofia faafitauli poo le foia foi, e tatau ona tasi lava le tatou sini faamoemoeina: o le aoao atu lea o le talalelei a Iesu Keriso ma ia fesoasoani i tagata aoao ia malamalama ma faataunuu lo latou tiutetauave fai faatasi o le faatupuina o se atemosifia e aoao ai.

O lenei sini faamoemoeina o le ki lea e pulea ai amio i totonu o le potuaoga. Pe a tatou tuuina le sini faamoemoeina i o tatou mafaufau, e le na o lo tatou faasa’oina o amioaga ma faafilemuina tagata o le vasega i totonu o le potuaoga. Ae peitai, o loo tatou aoao atu isi ia mulimuli ia Iesu Keriso.

O nisi taimi e manatu ai faiaoga ua latou le mafaia pe a le vave ona latou mauaina se auala e faatupuina ai se atemosifia e aoao ai le talalelei. Ae peitai, o se na atemosifia e seasea lava ona vave maua. E faia e tagata i se ala faafasitepu i lea taimi ma lea taimi—o le upu ma le upu, o le fuaiupu ma le fuaiupu (tagai 2 Nifae 28:30). E manaomia tau-mafaiga faifai pea. O le ki, o le galue faamaoni, maelega, ma onosai, ma ia taitaiina pea e mataupu moni.

Faaiuga**Molimau**

Ia tuuina atu le molimau ao musuia e le Agaga.

Tofiga po o Mea e Fai

Ia fai atu i tagata o le vasega o le lesona o le vaiaso e sosoo ai o le a taulai atu i ni nai mea patino e mafai ona faia e faiaoga, e taofia ai mea e fai ma faalavelave ma foia ai faafitauli tau i le amio. Ia fai atu ia i latou e mafaufau i se tulaga e mafai ona faalavelaveina ai se atemosifia e aoao ai ma mafaufau i se ala e mafai ona foia ai. O le ala e foia ai e tatau ona patino ma mafai ona faatinoina. E tatau ona latou tusia i a latou api ni manatu e uiga i le faafitauli ma le ala e foia ai, ma e tatau ona latou saunia e tauina atu i le vasega i le lua pe tolu minute i le vaiaso e sosoo ai mea na latou tusiaina.

Pe a mafaufau i ni ala talafeagai e foia ai, e tatau i tagata o le vasega ona sutesue i le vaega o le tusi lenei ua faaulutalaina “Faatupuina o se Atmosifia e Aoao Ai” (itulau 81-94).

FAATUPUINA O SE ATEMOSIFIA E AOA O AI

Vaega 2

Lesona
7

Faamoemoega	Ina ia fesoasoani i tagata o le vasega ia faaaoga ia mataupu na latou aoaoina i le lesona 6.
Faaaliga mo le Faiaoga	<p>I le faaiuga o le lesona 6, na e fai atu ai i tagata o le vasega ia sauni e talanoa atu e uiga i ala e taofia ai mea e fai ma faalavelave ma foia faafitauli tau i le amio (tagai itulau 228). Talu ai e mananao faiaoga ia aoaoina ala patino, e mafai ona faatinoina, e taulimaina ai faafitauli, e tatau ona e fuafuaina lenei lesona ina ia e faaaluina ai le tele o le taimi i le vasega i le faia o lenei gaoioiga faatino.</p> <p>Ao e taitaiina talanoaga o i lenei lesona, ia fesoasoani atu i tagata o le vasega ia matua mautinoa ua mafai ona latou faatupuina se atemosifia e aoao ai.</p>
Sauniuniga	<ol style="list-style-type: none"> 1. Suesue ma le agaga tatalo le Mataupu Faavae ma Feagaiga 12:8. Saili ina ia faatatauina lenei mau i le faamoemoega o le lesona. 2. Sauni e faia se tautalaga e uiga i le ala e taofia pe foia ai se mea patino e fai ma faalavelave ma foia ia faafitauli tau i le amio. Ia mautinoa e mafai ona faatinoina lau auala e foia ai. 3. Ia mautinoa foi o loo saunia tagata o le vasega e faia ni tautalaga e uiga i ala e taofia ai mea e fai ma faalavelave ma foia ai faafitauli tau i le amio (tagai i mea e fai o loo i le itulau 218). 4. Ia faaauau pea ona suesue i le vaega o le tusi lenei ua faaulutalaina “Faatupuina o se Atemosifia e Aoao Ai” (itulau 81–94).
Faalautelega Fautuaina o le Lesona	<p>O le manuia o lo tatou faatosina maia o isi e faalagolago lea i lo tatou lotomaulalo ma le alofa.</p> <p>Aoaoga a le Faiaoga ma le Talanoaina o Mau</p> <p>Ia faamanatu i tagata o le vasega, na latou talanoaina i le lesona 2 le taua o le alofa i e o loo latou aoaoina atu. E tatau ona pulea i lenei mataupu faavae mea uma tatou te faia a o tatou taumafai e faatupuina se atemosifia e aoao ai, aemaise lava pe a tatou galulue ma tagata taitoatasi o le vasega.</p> <p>Ia fai atu i se tagata o le vasega e faitau le Mataupu Faavae ma Feagaiga 12:8.</p> <ul style="list-style-type: none"> ▪ Aisea e taua ai le lotomaulalo ma le alofa i le faatosinaina mai o isi i le lelei? <p>Ia fautua atu a’o talanoa tagata o le vasega e uiga i ala e taofia ai mea e fai ma faalavelave ma foia faafitauli tau i le amio, e ao ona latou manatua pea le taua o lenei mataupu.</p>
Upusii	Ia tuuina atu le saunoaga lenei a Peresitene Howard W. Hunter:

“ . . . [O] le auala autu a le Atua e galue ai, o le faatauanau atu, faapea le onosai ma le faapalepale, ae lē o le faia faamalosi ma le faia o se finauga. E galue o Ia e ala atu i le tauanau filemu, ma le faaoleole lemu. E galue o Ia ma le faaaloalo e le aunoa mo le saolotoga ma le tutoatasi ua tatou maua. E finagalo o Ia ia fesoasoani ia i tatou ma aoi mai mo le avanoa e fesoasoani mai ai ia i tatou, peitai o le a Ia le faia lea mea ma mea e aveesea ai la tatou filifiliga saoloto. E tele naua Lona alofa ia i tatou na te le faia ai lena mea” (i le Conference Report, Oke. 1989, 21; poo le *Liahona*, Ianuari 1990, 18).

E mafai ona tatou fesoasoani i isi ia malamalama ma faataunuu lo latou tiute-tauave o le tuuina atu o o latou sao i le faatupuina o se atemosifia e aoao ai.

Aoaoga a le Faiaoga

Tagai i mea na tuuina atu i tagata o le vasega e fai i le vaiaso na tea nei. Ia fai atu i tagata o le vasega sa e galue ai foi i lena lava mea e tasi. Ona tuuina atu lea o le faafitauli na e mauaina ma lau auala e foia ai. Ia tau atu ni mea se tolu o se atemosifia e aoao ai o le a faalauteleina e le auala ua e saunia e foia ai (mo se iloiloga o nei mea, tagai i le itulau 224). A maea ona tuuina atu lau auala e foia ai, ona fai atu lea o fesili nei:

- O le a le mea e lelei ai lenei auala e foia ai?
- O a faaeteetega e tatau ona faia i le faaogaina o lenei auala e foia ai?
- O a nisi auala e te manatu e ono i ai e foia ai?

Tautalaga a le
Tagata o le Vasega

Ia fai atu i tagata o le vasega e feauauai ona faia ni tautalaga e uiga i faafitauli ua latou mauaina ma a latou fautuaga i auala e foia ai faafitauli. Ia manatua ia tofu le tagata o le vasega ma le avanoa e tuuina atu ai sona sao. A lava le taimi, ia mulimuli tautalaga taitasi i fesili e tolu o loo i luga.

Aoaoga a le Faiaoga

Ia faamatala atu o le puipuia o mea e fai ma faalavelave ma le foiaina o faafitauli tau i le amio, e masani lava ona talafeagai le galulue ma tagata taitoatasi o le vasega. Ae peitai, e mafai foi ona tatou aoao atu tagata o le vasega i o latou tiutetauave a’o popoto faatasi. O le tasi auala lelei i le faia o lea mea o le amata lea ona fetuفاai atu o tatou lagona e uiga i o tatou valaauga ma o tatou tiutetauave i le avea ai ma ni faiaoga. Ona tatou ootoina lea o tiutetauave o tagata o le vasega, ma aoao atu ia mea e tolu o se atemosifia e aoao ai na talanoaina i le lesona o le vaiaso na tea nei (tagai i le itulau 224). O le mea mulimuli, e mafai ona tatou faamamafa atu e tatou te manao-miaina la latou fesoasoani ona e pau lea o le mea e manuia ai le vasega pe a galulue faatasi le faiaoga ma tagata o le vasega. (Mo se faataitaiga o lena aoaoga, tagai i le tala o loo i le itulau 88 o leni tusi. Atonu e te manao e faitau atu le tala leni i le vasega.)

E ao ona tatou saili i auala e faaititia ai mea e fai ma faalavelave.

Lesona Faatino

Ia fai atu i se tagata o le vasega e tu i luma o le vasega. Ia fai atu i le tagata o le vasega e faaloloa ona lima, ma uuina i lima taitasi se tusi mamafa poo se isi mea faitino. Ia fai atu ia te ia e faamatala atu i isi tagata o le vasega e uiga i le Uluai Faaliga a’o faaaauu pea le uuina o tusi i lea lava tulaga. Pe a amata ona tau pa’u ifo ona lima, ia faamanatu atu ia te ia e tuu ai pea i luga. Pe a maea le tusa ma le 30 sekone, ia fai atu ia te ia e tuu i lalo tusi ma toe foi i lona nofoa.

Ia faailoa atu ao taumafai lea tagata e aoao atu, sa le i matua faalologo uma atu tagata o le vasega i le mea na faamatalaina mai. Na avatu o latou mafaufau i le taumafaiga e uuina tusi i luga.

Aoaoga a le Faiaoga

Ia faamamafa atu e le gata i faafitauli ua uma ona tatou talanoaina, ae o le faatulagaga foi o le potuaoga e mafai ona fai ma faalavelave i le aoao atu ma le aoaoina. Pe a ulu

atu tagata o le vasega i se potuaoga poo se isi nofoaga e fai ai le aoga ae le o faatula-gaina lelei pe faalē lelei foi, o le a latou le matua ua’i atu atoatoa i le savali o le lesona.

O le fuafuaina ma le faaeteete o faatulagaga i le potuaoga e mafai foi ona fesoasoani i le faaititia o mea e fai ma faalavelave. Mo se faaitaiga, e tatau ona tatou faatula-gaina nofo ina ia mafai e tagata aoao ona iloa mai i tatou, o le laupapa, ma le tasi e le isi. O se faatulagana faapena o le potuaoga e faalauleleiina ai le taumafaiga a le faiaoga i le aoao atu ma le taumafaiga a le tagata aoao e ua’i mai ma aoao. O le iloaina o le mafanafana ma le mālū o le potu, i nofoaga e mafai ai, e mafai ona fesoasoani ia lelei faalogona a tagata uma. O nisi fautuaga mo le sauniaina o le faatulagaga faitino o loo maua i le “Sauniaina o le Potuaoga,” itulau 81 i totonu o leni lava tusi.

E mafai ona tatou puipua ma foia faafitauli tau i le amio e ala i le mulimuli i mataupu autu o le aoaoina atu o le talalelei.

Aoaoga a le Faiaoga

Ia faamanino atu pe a tatou faatupuina ma faatumauina se atemosifia e aoao ai, ua tatou fesoasoani foi e puipua mai mea e fai ma faalavelave ma foia faafitauli tau i le amio. O le mea pito sili ona taua e mafai ona tatou faia e faataunuuina ai leni mea o le faaogaina lea o mataupu o le aoaoina o le talalelei o loo aoaoina atu i leni vasega. O nei mataupu e faapea:

1. Ia e alofa ia i latou e te aoaoina atu.
2. Ia aoao atu i le Agaga.
3. Ia aoao atu le mataupu.
4. Ia valaaulia e aoao ma le maelega.
5. Ia saunia mea tatau uma.
6. Ia faaoga metotia lelei.

I le avea ai ma faiaoga, e ao ona tatou suesue ifo i tatou lava e le aunoa ma a tatou aoaoga ina ia mautinoa o loo tatou faaogaina nei mataupu faavae uma taitasi.

Faaiuga

Molimau

Ia tuuina atu le molimau ao musuia e le Agaga

Tofiga po o Mea e Fai

Ia uunaia tagata o le vasega ia:

1. Faaauau le suesueina o le vaega o le tusi leni o loo faaulutalaina “Faatupuina o se Atemosifia e Aoao Ai” (itulau 81–94. Ia mafaufau i o latou lava tulaga e aoao atu ai, ma saili mea e mafai ona latou faia e fesoasoani ai i le faatupuina o se atemosifia e aoao ai.
2. Iloiloaina le lisi o loo i le itulau 220 pe faapefea ona “valaaulia le aoao ma le mael-ega. Ia filifili se mea se tasi i le lisi, ma faaogaina lena mea i se avanoa o loo loma e aoao atu ai. Ia tusi i a latou api o latou lagona ma mea na oo i ai.

Lesona

8

FAAAGOGA METOTIA LELEI

Vaega 1

Faamoemoega

Ina ia fesoasoani i tagata o le vasega e filifili ni metotia e aoao atu ai ma ia faaoga lelei na metotia.

Faaaliga mo le Faiaoga

O le a faaalualuina i luma tulaga lelei o le aoao atu o le talalelei ma le aoaoina pe a filifilia ma le faaeteete metotia ma faaaogaina lelei. E tatau i faiaoga ona filifili metotia e (1) fesoasoani ai i ē o loo latou aoaoina atu ia maua se malamalamaaga manino i mataupu ma ia manatua pea ma (2) talafeagai ma mea o loo aoaoina atu i le lesona atoa ai ma le matutua o i latou o loo latou aoaoina atu.

I lenei lesona ma le lesona 9, o le a aoao ai tagata o le vasega e uiga i metotia autu nei o le aoao atu: o le faaaogaina o lesona faatino, o le faia o faatusatusaga, o le faaaogaina o le laupapa, o le fetufaai o tala, o fesili, ma le faia o talanoaga.

Sauniuniga

1. Ia iloilo ina le vaega o le tusi lenei o loo faaulutalaina “Ia Faaoga Metotia Lelei” (itulau 96–102). Ia iloilo foi le vaega F, “Metotia Faafaiaoga” (itulau 167–94).
2. Ia aumaia i le vasega se ipu ti e mama fafo ma totonu, ma se ipu ti e mama fafo ae palapala totonu.
3. Ia saunia se faatinoga e faaoga ai le laupapa e aoao atu ai se mataupu o le talalelei. Atonu e te manao e faaoga ia se tasi o faataitaiga o loo i le itulau e 172, pe e te faia foi e oe lava sau faataitaiga.

Faalautelega Fautuaina o le Lesona

E tatau ona tatou faaaogaina metotia faafaiaoga e fesoasoani ai i tagata taitoatasi ia malamalama, manatua, ma faaoga mataupu o le talalelei.

Tala

Ia faamatala atu le tala lenei. Ia fai atu o se mea lenei na tupu ia Peresitene Boyd K. Packer ma lona faletua ao galue o ia o se peresitene o le misiona.

“Sa ma faatulagaina ni konafesi faarisone. Na faia e Sister Packer ni keke fogafale tolu mo konafesi faarisone uma, . . . o teuteu matagofie—o le mafiafia o kulimi eseese na faakulimiina ai, ma upu ‘O Le Talalelei’ na tusia i le pito i luga. Ina ua potopoto faifeautalai, sa sau le ma solo i totonu e molimoli mai le keke. Na faia ina ia silamiō i ai!

“Ao ma faaali atu o le keke e faatusa i le talalelei, sa ma fesili atu, ‘O ai e manao i se fasi keke?’ E masani ona i ai pea lava se faifeautalai e fiaai ma sa ofo mai ma le nau-nau. Na ma fai atu ia te ia e sau i luma ma sa ma faapea atu i ai, ‘O le a ma tuuina atu muamua ia te oe.’ Ona faatutu ifo ai lea o o’u tamatamailima i le fogafale-aluga o le keke ma vavae mai ai se fasikeke telē. Sa ou oomiina le fasikeke i ou lima ina ia pāpā mai le kulimi i o’u vāilima, ma a’o nonofo ma le lē talitonu alii faifeautalai, sa ou

togiina atu le fasi keke i le alii faifeautalai, ma pispisi ane ai le kulimi i le pito i luma o lona peleue. ‘E i ai se isi e fia manao i se fasi keke?’ o la’u toe fesili atu lea. E i ai se mafuaaga, sa leai nisi e mananao i ai.

“Ona ma saunia lea o se ipu mafolafola tioata, o se tui iila, o se solo fafano, ma se naifi iila. Sa ou tipiina ma lo’u faaloalo sili ma le faaeteete se fasi keke mai le isi pito, ma tuu faalelei i luga o le ipu mafolafola tioata, ma fesili atu ‘E i ai se isi e fia manao i se fasikeke?’

“Sa manino lava le lesona. E tasi lava le keke i faataitaiga e lua, e tasi lava le ituaiga, e tasi lava foi le tofo. O le auala na tuuina atu ai e faaoso fiafia, ma faatupu manatu, pe faalē fiafia ma faaoso inoino foi. O le keke, na ma faamanatuina atu ai i faifeautalai, sa faatusaina i le talalelei. Na faapefea ona latou tuuina atu?

“Ina ua maea le faatinoga sa leai se faafitauli—ma e moni lava, sa matua sagisagi fiafia mai—mo le taumafaiga ina ia faaleleia atili le aoaoina o lesona. I ni nai masina mulimuli ane na ou mafaufau ai e tatau ona toe faamanatu atu i faifeautalai le lesona, ma sa ou auina atu i ai se puletini na tusia ai le ata o le keke.

“Ina ua ou toe feiloai atu i faifeautalai, sa ou faapea atu, ‘Sa outou mauaina se puletini talu ai nei, a ea?’

“‘Toe, o lea lava.’

“O le a le mea sa ta’u atu ai?’

“Sa tofu faifeautalai ma le tali na faapea mai ai, ‘Sa faamanatu mai ai ia i matou ia saga faaleleia atili le tuuina atu o a matou lesona ma ia suesue atili, ia aoaoina lelei lesona, ma fesoasoani le tasi i le isi i a matou auala e aoao atu ai.’

“‘Pe na outou mauaina na mea uma mai i se ata?’

“‘Ioe, o se tasi lena o lesona matou te le vave faagaloina!’

“Sa tatau foi la, ona ou faaopoopo atu i ai, sa ou matua fiafia lava foi e togiina le pili o le faamamaina o le peleue o le faifeautalai!” (*Teach Ye Diligently*, rev. ed. [1991], 270–71).

Faaaliga: Afai e te manao e faataitai ona fai le lesona faatino a Peresitene Packer, e tatau ona e mafaufau e vavae mai se fasi keke i lou lima ma oomi i luga o se ipu mafolafola nai lo o le togiina atu i se tagata o le vasega.

Talanoaga

- O a mea e mafai ona tatou aoao mai i lenei tala e uiga i le ala e tuuina atu ai le talalelei?
- O le a le mea o loo fai ma molimau i le lelei o le lesona a Peresitene Packer?

Ia faamamafa atu na *malamalama* faifeautalai o le misiona a Peresitene Packer i le lesona, na *manatuaina*, ma *faaogaina* i o latou olaga. E le lava le fesoasoani ia i latou o loo tatou aoaoina atu ina ia tau lava ia malamalama i mataupu o le talalelei. E tatau foi ona tatou fesoasoani ia i latou ia manatua ma faaogaina.

Ia susue e le vasega le itulau 167 o le tusi lenei. Ia faamatala atu o le itulau lenei o loo i ai se lisi o metotia e mafai ona faaogaina i le aoaoina atu o le talalelei. O le lesona o le asō ma le lesona o le vaiaso e sosoo ai o le a aofia ai faatinoga o nisi o metotia o loo i le lisi. Ia faamamafa atu e tatau ona tatou filifilia metotia e siitia ai ē o loo tatou aoaoina ma lē ta’aina ese mai ai i mataupu faavae o loo tatou aoaoina atu.

Faatinoga ma le Talanoaga	<p>Faaaogaina o lesona faatino</p> <p>Faamanino le tala na e tuuina atu, na faaaogaina ai e Peresitene Packer se lesona faatino e faamanatu ai i faifeautalai ia lelei ona aoao atu. E mafai ona tatou faaaogaina lesona faatino e aoao atu ai soo se mataupu o le talalelei.</p> <p>Ia faaali atu ni iputi se lua—o le tasi e mama fafo ma totonu ma le isi e mama fafo ae palapala totonu. Ona fai lea o fesili nei:</p> <ul style="list-style-type: none"> ▪ O le fea o nei ipu e lua e te fia inu ai? <p>Ia faamatala atu na faatusaina e Iesu se vaega o tagata i se ipu e mama fafo ae eleelea totonu. Ia fai atu i se tagata o le vasega e faitau le Mataio 23:25–26.</p> <ul style="list-style-type: none"> ▪ O le a le mataupu o le talalelei o loo aoaoina atu e lenei lesona faatino? (E le lava le na o le <i>foliga</i> e amiotonu; e ao ona tatou amiotonu ma mama o tatou loto.) O le a le mea e te lagona e matua aoga lava e tusa ai ma lenei lesona faatino?
Aoaoga a le Faiaoga	<p>Ia fai atu o itulau 171–74 o le tusi lenei o loo i ai ni mea e faaaogaina e fesoasoani ai i faiaoga i le faia o lesona faatino lelei. Ia fai atu i tagata o le vasega e susue i le itulau 174. Iloilo fautuaga mo le faia ma le faaaogaina o lesona faatino. Ona tuuina atu lea o ni fautuaga faaopoopo e te iloa i le faaaogaina o lesona faatino.</p>
Upusii	<p>Faia faatusatusaga</p> <p>Ia faailoa atu o lesona faatino e aoga tele aua e fesootai ai mataupu faaleagaga ma mea faitino faaletino e masani ai. E mafai foi ona tatou faataunuaina lenei mea e ala i le faia o ni faatusatusaga faigofie.</p> <p>Ia fai atu i tagata eseese o le vasega e faitau faatusatusaga nei (o faatusatusaga faaopoopo o loo maua i itulau 173–174 o le tusi lenei):</p> <p>Na aoao mai e Peresitene Gordon B. Hinckley:</p> <p>“O le faatuatua e pei o le uaua o lo’u lima. Afai ou te faaaogaina, ma tausia lelei, e tupu malosii; o le a tele mea na te faia. Ae afai ou te tuuina i se mea e asoa ai ma leai se mea e faaaoga i ai, o le a vaivai ma le toe aoga” (<i>Liahona</i>, Aperila 1999, 18).</p> <p>Na saunoa Elder Russel M. Nelson:</p> <p>“O le veape <i>ia tui</i> (inoculate), . . . o lona uiga tuusa’o ‘o le tuu lea o se mata i totonu’—e vaavaaia ai mai le faaleagaina.</p> <p>“O se mafatiaga e pei o le ma’i pipili e mafai ona lē savali ai poo le faaleagaina ai foi o le tino. O se mafatiaga e pei o le agasala e mafai ona pipili pe faaleagaina ai foi le agaga. O uiga leaga o le ma’i pipili ua mafai nei ona teena e ala i tui pui-pui, ae o uiga leaga o le agasala e manaomia ai isi ituaiga pui-puiga. E le mafai e fomai ona faia ni tui e tetele atu ai i le amioleaga. O le pui-puiga faaleagaga e sau mai le Alii—ma i lana lava auala. E le i filifili Iesu na te vaavaaia, ae na te tuuina atu le mataupu moni” (i le Conference Report, Ape. 1995, 41–42; poo le <i>Liahona</i>, Iulai 1995, 37).</p> <p>Na saunoa Elder Joseph B. Wirthlin:</p> <p>“ . . . [O] aluna tetele ua matua loloto lava o latou a’a e faaluaina ma le afa lo latou loloto i lo le umi o le laau. O laau faapena e seasea pauu i lalo e tusa po o le a le mata-mataita o afā.</p> <p>“E tataui tagata faamaoni o le Ekalesia ona avefa faapei o aluna ma faaloloto o latou a’a i le eleele olaola o mataupu faavae o le talalelei” (i le Conference Report, Oke. 1994; poo le <i>Liahona</i>, Ianuari 1995, 89)</p>

Talanoaga i Mau	<p>Tofi se tagata o le vasega e faitau le Mataio 13:44.</p> <ul style="list-style-type: none"> ▪ O a ni mea e mafai ona tatou aoao mai i lenei faatusatusaga?
Aoaoga a le Faiaoga	<p>Ia faamamafa atu o faatusatusaga e faatoa lelei lava pe a tatou faatatauina i mea o loo masani ai i latou o loo tatou aoaoina atu. Ia faailoa atu o itulau “00” [163–64] o le tusi lenei o loo i ai ni mea e mafai ona fesoasoani i faiaoga e faia ai ni faatusatusaga lelei.</p> <p>Faaaoga le laupapa</p>
Faatinoga	<p>Ia faamatala atu o le laupapa e mafai ona faaaogaina lelei ina ia faapupulaina ai manatu autu, taula’i atu i ai mafaufau o tagata o le vasega, ma faafaigofieina ai mataupu faigata. Ia fai atu i tagata o le vasega o le a e faatinoina atu le ala e faaaogaina ai le laupapa. Ona faia lea o le faatinoga na e sauniaina (tagai “Sauniuniga,” lona 3).</p>
Talanoaga	<p>Ia fai atu i tagata o le vasega fesili nei:</p> <ul style="list-style-type: none"> ▪ O le a le mea na e aoaoina mai i lenei faatinoga? Pe na faapefea ona fesoasoani le faaaogaina o le laupapa ia te oe i le aoaoina o nei mea? ▪ Mai le faatinoga lenei, o le a le mea na e aoaoina mai e uiga i le ala e tatau ai ona tatou faaaogaina le laupapa o se mea faigaluega e aoao atu ai? <p>Afai e le i tauina mai e tagata o le vasega fautuaga nei, ona e tuuina atu lea e oe lava:</p> <ol style="list-style-type: none"> 1. Ia tusi manino ma faamatamata tetele ina ia iloa uma atu. E masani lava ona aoga le tusi o ni nai upu autu nai lo o fuaiupu atoatoa. 2. Ia tautala atu ao e tusiina. O le a fesoasoani lea ia te oe e faaua’i atu ai le vasega. 3. Ia aloese mai le faaaogaina o taimi uumi i le laupapa. 4. Ia fuafua mamao. Faataitai le tusiina o foliga, faafanua, poo ata o loo e fuafua e faaaoga. 5. Aua e te faatoese atu mo lau tusitusi poo le lē lelei o lau tusiata. 6. Ia faaaoga atatusi faa’auivi faigofie ma foliga o mea e faamalamalamaina ai tala ma mataupu. 7. Faataga i nisi taimi tagata o le vasega e tusitusi i luga o le laupapa. O lenei mea e mafai ona fesoasoani e faateleina ai le sagisagi atu. <p>Ia faailoa atu e mafai e tagata o le vasega ona maua ni fautuaga faaopoopo i itulau 171–74 o lenei tusi.</p> <p>A o tatou sauniuni e aoao atu, e mafai ona tatou filifili mai i auala eseese e aoao atu ai.</p>
Aoaoga a le Faiaoga	<p>Ia faailoa atu e mafai ona faalauteleina ma faaolaola le aoaoina atu ma le aoaoina o le talalelei i ni metotia eseese. Ae peitai, e le tatau ona tatou faaaogaina metotia eseese ina ia tau ina ia felanulanua’i ai. E tatau ona tatou filifili metotia e (1) fesoasoani ia i latou o loo tatou aoaoina atu ia maua se malamalamaaga manino ma manatua o mataupu faavae ma mataupu o le talalelei ma (2) talafeagai ma mea o loo aoaoina i le lesona ma le matutua o i latou o loo tatou aoaoina atu.</p>
Faaaogaina	<p>Ia fai i se tagata o le vasega e tuuina atu se mataupu faavae patino poo se mataupu mai se lesona o loo ia sauni e aoao atu. Ona fai atu lea i tagata o le vasega e susue i le itulau 167 ma iloilo le lisi o metotia. Ia valaaulia i latou e tuuina mai ni metotia atonu e faaaogaina ia aoao lelei atu ai le mataupu faavae poo le mataupu. A o tuuina mai e tagata o le vasega ni metotia patino, ia fai atu ia i latou e faamatala mai pe aisea ua latou fautuaina mai ai na metotia.</p>

Faaiuga

Upusii

Ia fai atu i se tagata o le vasega e faitau le saunoaga lenei a Elder Boyd K. Packer:

“Pe a tatou aoaoina atu mataupu mama ma faaleagaga, ua tatou aoaoina atu mea e le mafai ona vaaia e mata. Masalo e leai se aoaoga e faigata ona faataunuu, pe le matua tauia foi pe a faia i le lelei. O loo i ai auala e faia ai ma meafaigaluega e faaaogaina. O loo i ai mea e mafai ona faia e faiaoga ia saunia ai i latou lava ma a latou lesona ina ia aoaoina . . . tamaiti aoga, ma tuuina atu a latou molimau o le tasi i le isi” (*Teach Ye Diligently*, 62).

Ia faamamafa atu e taua metotia ae e le tatau ona avea ma mea e taula’i i ai lesona tatou te aoaoina atu. O auala na e fesoasoani ai i e o loo tatou aoaoina atu e tulimata’i atu ai i mataupu lavea’i o le talalelei ma faaaogaina i o latou olaga.

Molimau

Ia tuuina atu le molimau ao musuia e le Agaga.

Tofiga po o Mea e Fai

Ia uunaia tagata o le vasega ia:

1. Mafaufau i metotia e mafai ona latou faaaogaina e aoao lelei atu ai mataupu faavae o le talalelei.
2. Tusi i a latou api o latou lagona ma mea na oo i ai i le filifiliina ma faaaogaina o metotia eseese o le aoao atu.
3. Ia iloiloaina le vaega o le tusi lenei ua faaulutalaina “Faaoga Metotia Lelei” (itulau 96–102). Ia iloiloaina foi le Vaega F, “Metotia Faafaiaoga” (itulau 167–94).

FAAAGOGA METOTIA LELEI

Vaega 2

Lesona 9

Faamoemoega Ina ia fesoasoani i tagata o le vasega ia faaogaina mataupu faavae na latou aoaoina i le lesona 8.

Faaaliga mo le Faiaoga O lenei lesona o se faaauuina lea o le lesona 8. I sauniuniga mo lenei lesona, o le a e valaauliaina ni nai tagata o le vasega e aoao atu mataupu o le talalelei e ala i le faaogaina o metotia nei: tuuina atu o tala, faia o fesili, ma le faia o talanoaga (tagai i le “Sauniuniga” i le 1, o loo i lalo). E tatau ona e mautinoa o lenei tulaga o loo faamalosi atu ai ia i latou ma fesoasoani ia latou maua le malamalamaaga i lo latou faaogaina o metotia eseese o le aoao atu. E tatau ona faapitoa lou nofouta i mea e manaomia ma lagona o tagata o le vasega o ē faalē tele se tomai faafiaoga.

Sauniuniga

1. Ia vave talanoa ma ni tagata se toatolu o le vasega, ma fai atu ia i latou taitasi ia saunia se tasi o faatinoga o loo lisiina atu i lalo. Ia uunaia i latou e suesue i mau ma *Mataupu o le Talalelei (31110)* mo se fesoasoani i le mataupu autu o faatinoga ma suesue foi i le tusi lenei mo se fesoasoani i le ala e faaogaina ai metotia ua ta’uina atu ia i latou.

Faatinoga 1: Ia faamatala atu se tala moni e aoao atu ai e uiga i le mana o tatalo a le tagata lava ia. Ia sauni e tuuina atu ni nai faamatalaga i le ala e faaogaina lelei ai tala i le aoaoina atu o le talalelei.

Faatinoga 2: Ia faaoga fesili e aoao atu ai e uiga i faamanuiaga i le faapaiaina o le Sapati. Ia sauni e tuuina atu ni nai faamatalaga e uiga i le ala e faaogaina lelei ai fesili i le aoaoina atu o le talalelei.

Faatinoga 3: Ia faia se talanoaga e aoao atu ai pe aisea e tatau ai ona tatou naunau e faia taulaga. Ia sauni e tuuina atu ni nai faamatalaga e uiga i le ala e faaogaina lelei ai le faia o talanoaga i le aoaoina atu o le talalelei.
2. Pe a talafeagai, ia fesoasoani atu i tagata o le vasega na tofia e sauni a latou faatinoga.

Faalautelega Fautuaina o le Lesona Ia faamanatu atu i tagata o le vasega i le lesona na se’i mavae, na latou vaavaai ai i faatinoga o le faaogaina o lesona faatino, faatusatusaga, ma le laupapa i le aoaoina atu o mataupu o le talalelei. I le asō, o le a latou vaavaai ai i faatinoga e faia e tagata o le vasega na tofiaina, ia aoao atu ai mataupu o le talalelei e ala i le tuuina atu o se tala, faia o fesili, ma le faia o se talanoaga.

Fetufaa’i o tala

Faatinoga ma le Talanoaga Ia valaaulia le tagata o le vasega na tofi e tuuina le faatinoga muamua (tagai i le “Sauniuniga,” 1). A maea le faatinoga lenei, ia fai atu i tagata o le vasega e talanoaina fesili nei:

- E faapefea ona fesoasoani ia te oe le faaogaina o lenei tala e malamalama atili ai i le mana o tatalo a le tagata lava ia?

	Ia valaaulia le tagata o le vasega na tofi e fetufaai atu ni nai manatu ua ia mauaina e uiga i le ala e faaogaina ai tala i le aoaoina atu o le talalelei.
Aoaoga a le Faiaoga	Ia fai atu i tagata o le vasega e susue i le vaega ua faaulutalaina o “Tala” o loo i itulau 189–90. Ia iloilo “Taiala mo le Sauniaina ma le Tuuina Atu o se Tala,” itulau 191.
Faatinoga ma le Talanoaga	<p>Faia o fesili</p> <p>Ia valaaulia le tagata lona lua o le vasega na tofi e faia le faatinoga lona lua (tagai i le “Sauniuniga,” 1). A maea le faatinoga, ia fai atu i tagata o le vasega e talanoaina fesili nei:</p> <ul style="list-style-type: none"> ▪ O a ala na fesoasoani ai fesili o loo i lenei faatinoga ia te oe ia malamalama atili ai i faamanuiaga o le faapaiaina o le Sapati?
Aoaoga a le Faiaoga	<p>Ia valaaulia le tagata o le vasega na tofiaina e fetufaai atu ni nai manatu na ia mauaina e uiga i le ala e faaogaina ai fesili e aoao atu ai mataupu o le talalelei.</p> <p>Fesoasoani i tagata o le vasega ia malamalama o fesili tatou te faaoga e avea ma ala o le aoao atu e tatau ona:</p> <ol style="list-style-type: none"> 1. Faaosofia ai manatu ma faia ai ni talanoaga. Ina ia iloa pe o a mea o iloa e tagata, o latou manatu, poo lagona, ia faia fesili e amataina i le <i>o le a, o fea, o anafea, aisea, e faapefea</i>, po o le <i>o a ni auala</i>. I le tulaga lautele, o fesili e mafai ona taliina i le <i>ioe</i> poo le <i>leai</i> e le o ni fesili lelei sei vagana ai e taitai atu ai i nisi fesili poo tautinoga. 2. Fesoasoani i tagata o le vasega ia iloa le ala e faaogaina ai mataupu o le talalelei i o latou olaga. 3. Ia uunaia tagata o le vasega e fetufaai manatu faaletagata lava ia ma mea na oo i ai e fetau ma mataupu o loo aoaoina.
Faatinoga ma le Talanoaga	<p>Ia faailoa atu e le tatau ona tatou popole pe a le tali mai i ni nai sekone i latou o loo tatou aoaoina atu pe a uma ona fai atu se fesili. Atonu latou te manaomia se taimi e mafaufau ai i a latou tali.</p> <p>Ia fai atu e mafai e tagata o le vasega ona maua ni fautuaga faaopoopo i le “Aoa Atua i Fesili,” o loo i itulau 71–73 o lenei tusi.</p> <p>Faia o talanoaga</p> <p>Ia valaaulia le tagata o le vasega na tofi e faia le faatinoga lona tolu (tagai i le “Sauniuniga” 1). A maea lenei faatinoga, ia fai atu i tagata o le vasega e talanoaina fesili nei:</p> <ul style="list-style-type: none"> ▪ Na faapefea ona fesoasoani lenei talanoaga ia te oe e te malamalama atili ai pe aisea e tatau ai ona tatou naunau e faia taulaga?
Aoaoga a le Faiaoga	<p>Ia valaaulia le tagata o le vasega na tofia e tuuina atu ni nai manatu ua ia mauaina e uiga i le ala e faia ai talanoaga.</p> <p>Fesoasoani i tagata o le vasega ina ia malamalama i le faia o talanoaga, e tatau ona tatou:</p> <ol style="list-style-type: none"> 1. Fesoasoani i tagata o le vasega ia lagona le mafanafana i le tuuina atu o molimau, mafaufauga, o lagona ma mea na oo i ai, o fesili, ma manatu. 2. Faailoa atu le talia fiafia ma le faaloalo o le tuuina mai o sao o tagata o le vasega.

3. Manatu i lagona o tagata o le vasega o ē e faalē tautatala mai i talanoaga. Atonu e fesoasoani le talanoa taitoatasi ma i latou ia iloa ai o latou lagona e uiga i le faitau leotele poo le tuuina atu o manatu i totonu o le vasega. Atonu e fesoasoani foi le faatagaina o i latou e saunia mo talanoaga i le vasega e ala i le tuuina atu i ai o mau e mafai ona latou faitauina ma manatunatu loloto i ai a o le i faia le vasega.
4. Toe tuuina atu tali ma fesili a tagata o le vasega i isi tagata o le vasega mo ni a latou tali.

Ia faailoa atu e mafai ona maua e tagata o le vasega ia fautuuga faaopoopo i le “Taitaia o Talanoaga,” i itulau 66–68 o le tusi lenei.

Faaiuga

Aotelega

Faaali atu lou loto faafetai mo faatinoga a tagata o le vasega.

Ia faamanatu atu i tagata o le vasega e taua metotia ae e le tatau ona avea ma mea e taula’i i ai lesona tatou te aoaoina atu. O auala na e fesoasoani ai i e o loo tatou aoaoina atu e tulimata’i atu ai i mataupu laveai o le talalelei ma faaaogaina i o latou olaga.

Ia faailoa atu o lo tatou sagisagi e aoao atu, o le a faateleina pe a faaauau pea ona tatou saili e faateleina lo tatou malamalamaaga i le faaaogaina o metotia eseese. Atonu tatou te lagona le fefe ma le le masani ao tatou taumafai ni metotia fou, ae peitai e mafai ona tatou faaailaloina na lagona.

Upusii

Na masani lava ona ta’ua e Peresitene Heber J. Grant ia Ralph Waldo Emerson, o le na faapea mai, “O le mea tatou te finafinau e faia pea o le a avea ma mea e faigofie ona tatou faia; e le ona ua suia le natura o lena mea, ae ona ua faateleina lo tatou malosia e faia ai” (i le *Gospel Standards*, tuufaatasia e G. Homer Durham [1941], 335).

Molimau

Ia tuuina atu le molimau a o musuia e le Agaga.

Tofiga po o Mea e Fai

Ia uunaia tagata o le vasega ia:

1. Taumafai ia faaaoga metotia eseese e aoao atu ai mataupu o le talalelei. Ia fai atu ia i latou e tusi i a latou api o latou lagona ma mea na oo i ai.
2. O mai i le vasega i le vaiaso a sau ua saunia e faia se ata fuafuaina mo se lesona o le a latou aoaoina atu i se taimi lata mai. O lenei lesona e mafai ona avea ma se vaega o se tofiga e aoao atu ai i le afiafi faaleaiga, i le Ekalesia, poo se isi avanoa e aoao atu ai. Aumai mea e faaaogaina i le lesona, e pei o tusitusiga paia ma tusi lesona.

Lesona
10

IA SAUNIA MEA TATAU UMA

Faamoemoega Ina ia fesoasoani i tagata o le vasega e saunia lesona lelei.

**Faaaliga mo
le Faiaoga**

E ao i faiaoga o le talalelei ona fesili ia i latou lava i fesili e tolu ao latou sauniaina lesona:

1. O a mea e ao ona tutupu i olaga o i latou o loo o’u aoaoina ona o se taunuuga o lenei lesona?
2. O lē fea o mataupu faavae patino e tatau ona aoaoina atu?
3. Pe faapefea ona aoaoina atu nei mataupu faavae?

O le fesili muamua o nei fesili e fesoasoani lea i faiaoga ia taula’i atu le lesona i man-aoga o ē o loo latou aoaoina atu. I le i ai o lena manatu i le mafaufau, e mafai ai e faiaoga ona filifili poo a mea e aoaoina atu. O se filifiliga taua le mea lenei, aemaise lava e masani ona tele atu mea e faaaogaina i le lesona nai lo o mea e mafai e faiaoga ona aoaoina atu i totonu o se vasega e tasi. I le filifiliina pe faapefea ona aoaoina atu, e tatau i faiaoga ona filifili metotia e talafeagai ma mea o loo faaaogaina, e o faatasi ma le taitaiga a le Agaga, ma o loo valaauliaina ai le aoaoina ma le maelega.

A o e aoaoina atu lenei lesona, ia fesoasoani i tagata o le vasega ia malamalama i le ala e saunia ai lesona lelei ma taita’ia e le Agaga. Ia manatua o au sauniuniga mo lenei lesona e mafai ona faia ma faataitaiga i tagata o le vasega a o latou sauniuni e aoaoina atu.

Sauniuniga

1. Suesue le vaega o le tusi lenei o loo faaulutalaina “Saunia Mea Tatau Uma” (itulau 104–112).
2. Ia faamanatu i tagata o le vasega ia o mai i le vasega i le vaiaso a sau ua saunia e faia se ata fuafuaina mo se lesona o le a latou aoaoina atu i se taimi lata mai. Ia uunaia i latou e aumai mea e faaaogaina i le lesona, e pei o tusitusiga paia ma tusi lesona. (O lenei mea na tuuina atu i le faaiuga o le lesona 9.)
3. Aumai i le vasega se kopi o se tusi lesona na gaosia e le Ekalesia mo le taimi nei, e pei o se tusi lesona a le Peraimeri poo se tusi lesona o le Mataupu Faavae o le Talalelei, o loo i ai ni lesona e i ai ni faamatalaga o faamoemoega ma metotia fautuaina faafaiaoga.
4. Ao le i faia le vasega, ia tusi le siata lenei i luga o le laupapa:

- | | | |
|---|---|---|
| <p>1. O a mea e ao
ona tutupu i
olaga o i latou o
loo o'u aoaoina
ona o se
taunuuga o lenei
lesona?</p> | <p>2. O lē fea o
mataupu faavae
patino e tatau
ona aoaoina
atu?</p> | <p>3. Pe faapefea
ona aoaoina atu
nei mataupu
faavae?</p> |
|---|---|---|

**Faalautelega
Fautuaina o
le Lesona**

E taua tele sauniuniga a le tagata lava ia ina ia mafai ai ona tatou aoaoina atu le talalelei.

Upusii

Ia valaaulia se tagata o le vasega e faitau atu le saunoaga a Elder Dallin H. Oaks o loo i le itulau 103.

Laupapa ma le
Aoaoga a le Faiaoga

Ia taitai atu mafaufau o tagata o le vasega i le siata na e tusiaina i luga o le laupapa. Ia fai atu i tagata o le vasega e kopi le siata i a latou api.

Ia faamatala atu o fesili taua nei e tolu e tatau ona tatou fesili ai ia i tatou lava a o tatou sauniaina se lesona.

Ia faamatala atu i le taimi o lenei lesona o le a tali atu ai tagata o le vasega i nei fesili e tusa ai ma mea e faaaogaina i lesona na latou aumaia.

1. Ia mafaufau poo a mea e ao ona tutupu i olaga o e o loo tatou aoaoina atu ona o se taunuuga o lenei lesona.

Gaoioiga i le Api ma
le Aoaoga a le Faiaoga

Ia fai atu i tagata o le vasega e tagai i mea e faaaogaina i lesona na latou aumaia i le vasega. Ia fai atu ia i latou e tusi le autu o a latou lesona i le pito i luga o le siata. Afai o latou faaaogaina se poloka o mau e aoao atu ai, ia fai atu ia i latou e tusi mataupu ma fuaiupu.

Ia faamatala atu o le i ai faatasi ma se autu i le mafaufau, e mafai ona tatou filifili ai pe faapefea ona aafia ē o loo tatou aoaoina atu i le lesona. Mo se faataitaiga, i le aoaoina atu o se lesona e uiga i le sefuluai, atonu e filifili se faiaoga o le Peraimeri e tatau i tamaiti ona malamalama po o le a le sefuluai ma pe aisea tatou te totogi ai le sefuluai. I le aoaoina atu o se lesona e uiga i le malumalu, atonu e filifili matua e tatau i a latou fanau ona lagona se manao ia ola agavaa e faaiipoipoina i le malumalu. I le aoaoina atu o se lesona e uiga i afiafi faaleaiga, atonu e filifili se peresitene o le korama a le au toeaina e tatau ona uunaia e le lesona ia tagata o le korama ina ia faia i vaiaso taitasi se afiafi faaleaiga 'anoa.

Ia faailoa atu o le tele o tusi lesona ua saunia e le Ekalesia o loo aofia ai faamatalaga o faamoemoega faatasi ma lesona. Ia faailoa atu le tusi lesona na e aumaia i le vasega,

ma faaali atu i tagata o le vasega le faamatalaga o le faamoemoega i se tasi o lesona. Ia faamatala atu e tatau ona tatou faaaogaina ia faamatalaga e fai ma taiala a o tatou sauniaina lesona.

Ia valaaulia tagata o le vasega e mafaufau i manaoga o tagata o loo latou aoaoina atu. Ona fesili lea ia i latou lava i fesili nei:

- O a mea e te lagona e ao ona tutupu i olaga o i latou o loo e aoaoina atu ona o se taunuuga o lenei lesona?

Ia faamatala atu o se tali a le faiaoga i lenei fesili atonu e aofia ai mea e tatau ona malamalama i ai tagata, o lagona, o manaoga, poo mea e faia e tagata i le avea ai ma se taunuuga o se lesona. Ona tuuina atu lea o le taimi i tagata o le vasega e manatunatu loloto ai i le fesili. Ia fai atu ia i latou e tusi a latou tali i le siata o loo i totonu o a latou api.

Talanoaga

A maea ona tusia e le vasega a latou tali, ia valaaulia nisi o i latou e tuuina atu a latou tali ma mafuaaga ua latou tuuina atu ai na tali.

Ia faamamafa atu a o tatou sauniaina se lesona, e tatau ona tatou mafaufau i manaoga o i latou o loo tatou aoaoina atu. I le taitaiga a le Agaga, e mafai ai ona tatou iloa pe faapefea ona faaaafiaina e le lesona i latou o loo tatou aoaoina atu. O lea malamalamaaga o le a fesoasoani ia i tatou e filifili ai poo a mea e aoao atu ma pe faapefea foi ona aoao atu.

2. Filifili po o a mea e aoao atu i le lesona.

Aoaoga a le Faiaoga

Ia faailoa atu e masani lava ona tele atu mea e faaoga nai lo mea e mafai ona tatou aoaoina atu i le taimi o loo tuuina mai ia i tatou. E moni lenei mea poo lo tatou aoao atu mai i tusi lesona i lesona ua saunia poo isi risosi, e pei o le *Liahona* poo lauga o le konafesi aoao. I mea faapena, e tatau ia i tatou ona filifili ma le agaga tatalo ia mea e faaaogaina e pito sili ona fesoasoani i ē o loo tatou aoaoina atu.

Ia faamamafa atu pe a tatou aoaoina atu le talalelei, e tatau ona tatou faia ia sili atu nai lo le na’o le tuuina atu o ni faamatalaga. O le mea pito sili ona taua e le o le tele o mea e aoaoina ae o le aoga o le lesona ia i latou o loo tatou aoaoina atu.

Laupapa ma le Talanoaga

- O a mea e mafai ona tatou faia o le a fesoasoani ia i tatou e filifili ai poo le fea o mataupu faavae patino e tatau ona aoaoina atu? (E aunoa ma le tapeina o le siata, ia tusi tali a tagata o le vasega i luga o le laupapa. Ia manatua o loo i ai nisi o manatu taua o loo lisiina atu i lalo. Ia ta’uina atu nei manatu pe afai e le i ta’uina mai e tagata o le vasega.)

- a. Ia suesue ma le agaga tatalo mea o loo i le lesona.
- e. Ia faia se lisi o mataupu faavae autu e aoaoina i le lesona.
- i. Ia manatua pea manaoga ma tulaga o i latou o loo e aoaoina atu.
- o. Ia mulimuli i le taitaiga a le Agaga.

Ia uunaia tagata o le vasega ia amata ona saunia se lesona ia lē itiiti ifo i se vaiaso pe ia sili atu foi a o le i oo i le aso latou te aoao atu ai. O lenei mea o le a maua ai e i latou le taimi e manatunatu loloto ma tatalo ai e uiga i mea e faaoga, ma malamalama i ai, ma faia ni auala faatosina e tuuina atu ai.

Gaoioiga i le Api

Ia fai atu i tagata o le vasega e tagai i mea e faaoga i le lesona na latou aumaia i le vasega. Ia uunaia i latou ia mafaufau i manaoga o e o loo latou aoaoina atu a o latou taliina fesili nei. Ia uunaia foi i latou ia mafaufau poo a mea o loo sauni i ai tagata o loo latou aoaoina atu ia mauaina.

- I lenei lesona, o a manatu pito sili ona taua mo tagata o loo e aoaoina atu?

Ia tuuina atu le taimi i tagata o le vasega e manatunatu loloto ai i le fesili. Ia fai atu ia i latou e tusi a latou tali i le siata o loo i a latou api i lalo o le “O lē fea o mataupu faavae patino e tatau ona aoaoina atu?”

Talanoaga

A maea ona tusia e tagata o le vasega a latou tali, ia valaaulia nisi o i latou e tuuina atu a latou tali ma mafuaaga ua latou tuuina atu ai na tali.

3. Filifili pe faapefea ona aoaoina atu le lesona.

Talanoaga

Ia faamatala atu a maea ona tatou filifili poo a mea e aoao atu, e tatau ona tatou filifili pe faapefea ona aoao atu. O lenei mea e aofia ai le filifilia o metotia o le a fesoasoani i tagata ia malamalama i mataupu tatou te aoaoina atu.

- O a nisi o metotia e mafai ona tatou faaaogaina e aoao atu ai le talalelei? (Ia fesoasoani i tagata o le vasega ia tomanatu i metotia na faatinoina i lesona 8 ma le 9. Ia faamanatu atu foi ia i latou le lisi o metotia o loo i le itulau 167 o lenei tusi.)

Ia faamanatu atu i tagata o le vasega o metotia faafaiaoga e tatau ona siitiaina ai i latou o loo tatou aoaoina atu, valaauliaina le aoao ma le maelega, ma fesoasoani i tagata o le vasega ia malamalama ma faaaogaina mataupu o le talalelei.

Gaoioiga i le Api

Ia fai atu i tagata o le vasega ia toe tilotilo i siata o loo ia latou api. Ia fesili atu ia i latou e mafaufau i se mataupu e tasi o loo latou tusiina i lalo o le “O lē fea o mataupu faavae patino e tatau ona aoaoina atu?” Ia tuuina atu ni nai minute ia i latou e mafaufau ai i se metotia atonu latou te faaaogaina e aoao atu ai lena mataupu ma ia aofia ai lena metotia i a latou siata.

Ia faaali atu le tusi lesona na e aumaia i le vasega. Ia fai atu o nisi tusi lesona o loo aofia ai fautuaga i le ala e aoao atu ai ni mataupu. Atonu e faaaogaina e faiaoga nei fautuaga, pe latou te mafaufau foi i ni a latou lava auala e fuafua i manaoga o ē o loo latou aoaoina atu.

A maea ona tusia e tagata o le vasega a latou api, ia valaaulia nisi o i latou e fetufaai atu o latou manatu.

Faaiuga

Upusii

Ia faitau le saunoaga lenei a Peresitene Tavita O. Makei:

“E i ai mea e tolu e ao ona taialaina ai faiaoga uma: Muamua, ia aoao e uiga i le mataupu . . . ; lona lua, ia faaoga mataupu na i o outou olaga; lona tolu, ia taumafai e taitai [i latou o loo e aoaoina atu] ia faaaogaina mataupu i o latou olaga—e le o le saputu atu ia i latou, ae o le taitai atu o i latou ia vaai i mea o loo e vaai, ia iloa mea o loo e iloaina, ia lagona mea o loo e lagonaina” (*Gospel Ideals* [1953], 424).

Ia uunaia tagata o le vasega ia faaoga mataupu faavae o loo talanoaina i lenei lesona. Ia faamautinoa atu ia i latou a’o latou faia lena mea ma le agaga tatalo, o le a mafai ona latou fuafuaina lesona o le a fesoasoani i isi e aoao ai mataupu o le talalelei ma faaaogaina i o latou olaga.

Molimau

Ia tuuina atu le molimau a’o musuia e le Agaga.

Tofiga po o Mea e Fai

Ia uunaia tagata o le vasega ia:

1. Faamae’a sauniuniga o le lesona na latou amataina i le vasega. Ia tusi i a latou api o latou lagona ma mea na oo i ai i le sauniaina ma le aoaoina atu o le lesona.

2. Iloiloina mataupu na aoaoina i lenei lesona e ala i le suesue i le vaega o le tusi lenei o loo faaulutalaina “Saunia Mea Tatau Uma” (itulau 104–112).
3. Saunia mo le lesona i le vaiaso a sau e ala i le suesue i le Mataio 7:1–5. Ia mafaufau pe i ai se isi mea o loo latou faia e fesoasoani atu ai i luitau o loo latou feagai i le avea ai ma ni faiaoga. Ia mafaufau e uiga i suiga atonu latou te faia. Ao latou faia lenei mea, e ao ona latou manatunatu loloto i apoapoaiga a le Alii o loo i le Eteru 12:27, 37 e uiga i faamanuiaga e mafai ona oo mai a o tatou iloa ma le agaga o le lotomaulalo o tatou vaivaiga.

FAALELEIA ATILI O AU TALENI

Lesona
11

Faamoemoega Ina ia fesoasoani i tagata o le vasega ia malamalama i le ala e faaleleia atili ai pea i le avea ai ma ni faiaoga.

Faaaliga mo le Faiaoga A o malaga atu Enoka i lona nuu, na ia faalogo ai i se siufofoga mai le lagi o poloaiina o ia e talai atu le salamo i tagata. “Ma ina ua faalogo Enoka i ia upu, ona ia ifo toele ai lea i luma o le Alii ma fai atu ia te Ia, ua faapea atu: Se a le mea ua tauaogaina ai au i lau silafaga, aua o au ua na o se taulealea, ma ua inoino foi tagata uma ia te au; ona o le gese o lau tautala; o lea, aisea ea ua avea ai au ma au auauna?” (tagai Mose 6:26–31).

“Ona fetalai mai lea o le Alii ia Enoka: Ina alu ia ma faia e pei ona ou poloaiina ai oe. . . . Ina tatala ia lou gutu o le a faatumuina, ma o le a ou avatu ia te oe upu e te tautala atu ai. . . . Faauta ua i ou luga lou Agaga, o le mea lea, o le a ou faamaonia au upu uma lava; . . . ma o le a e mafuta ma au, ma au foi ia te oe; o lea, ia ta savavali ai ma au” (Mose 6:32, 34).

Na alu atu Enoka e pei ona poloaiina ai o ia, ma na faamanuiaina o ia e le Alii i le malosi e aoao atu ai ma le mana.

Atonu e lagona e nisi tagata o le vasega e pei o Enoka ina ua ia mauaina lona valaauga e talai atu—latou te manatu i o latou vaivaiga ma faalemautonu i mea e mafai ona latou faia. O lenei lesona ua fuafuaina e fesoasoani ia i latou ia iloa le ala e mafai ai ona latou alualu i luma i le avea ai ma faiaoga. E taulai atu le lesona i le fesoasoani o loo maua mai risosi e pei o mea e faaaogaina i mataupu tau aoaoga a le Ekalesia, o le lagolagosua a taitai, ma fonotaga o le faaleleia o faiaoga. Ae peitai, e taua lou faamanatu atu ia i latou o le Alii o lo latou fesoasoani sili lea. A o faamaualaloina i latou lava ma faatuatua i le Alii, o le a Ia “faia . . . mea vaivai ma mea malolosi ia te i latou” (Eteru 12:27).

- Sauniuniga**
1. Ia logo mamao atu se tagata o le vasega poo se taitai o le uarota ia sauni e faitau le saunoaga a Peresitene Polika Iaga o loo i le itulau “00” [235]. Ia fai atu foi i le tagata lena ia sauni e talanoa e uiga i se mea na tupu ia te ia ua ia iloa ai le moni o lenei saunoaga.
 2. Ia fai atu i se faiaoga mai se tasi o perisitua poo se ausilali e susū mai i le vasega ma fai se tautalaga mo le tolu i le lima minute pe na faapefea ona fesoasoani ia te ia le lagolagosua atu a se taitai.
 3. Ia fai atu i se taitai perisitua poo se taitai ausilali e susū mai i le vasega ma fai se tautalaga mo le tolu i le lima minute pe faapefea ona lagolagosua atu taitai i le galuega a faiaoga. Ia fai atu i lenei tagata ia saunoa e faatatau i faamatalaga o loo i le itulau 29 o le tusi lenei. Ia mautinoa ua saunia lenei tagata e talanoaina le taua o le faafesootaiina e faiaoga o taitai ina ia tuuina atu ni mea na oo i ai, talanoaina manaoga o tagata taitoatasi i le korama poo le vasega, ma saili le fesoasoani ma fautuaga. (Atonu e lelei le fai atu i se taitai o loo galulue faatasi ma le faiaoga o loo tuuina atu le aoaoga e pei ona tuuina atu i luga.)

4. Ia suesue le vaega o le tusi lenei o loo faaulutalaina “Faaleleia Atili o Au Taleni” (itulau 23–31).
5. Ia iloilo le faamatalaga e uiga i fonotaga o le faaleleia o faiaoga o loo i itulau 7–9 o lo o i le *Faaleleia o le Aoaoina Atu o le Talalelei: O se Tusi Taiala a le Taitai*. Ia sauni e faia se tautalaga mo le tolu i le lima minute e uiga i le ala e mafai ona fesoasoani ai fonotaga o le faaleleia o faiaoga i faafetaia’ia ai mea e manaomia e faiaoga taitatasi. O se vaega o lenei tautalaga, ia ta’u atu i tagata o le vasega pe o afea e faia ai isi fonotaga o le faaleleia o faiaoga o loo sosoo ai ma o ai foi e tatau ona auai i ia fonotaga. (Afai e le o oe le faiaoga o fonotaga o le faaleleia o faiaoga, atonu e te manao e fai atu i le faiaoga o le fonotaga e faia lea aoaoga.)
6. Ia sauni e fetufaai atu se mea e tasi pe lua foi o le a e faaopoopoina atu i le siata o loo i le itulau 26.
7. A o le i faia le vasega, ia setiina se tulaga e faaali atu ai ni risosi faafaiaoga na gaosia e le Ekalesia mo le taimi nei o loo maua i lo outou eria. Ia sauni e faaalu le tolu i le lima minute e faamatala atu ai nei risosi. Afai o loo maua mea o loo lisiina atu i le itulau 112, ia aofia ai i mea o loo faaali atu.

Faalautelega Fautuaina o le Lesona

I a tatou taumafaiga e aapa atu i tagata taitasi o loo tatou aoaoina atu, e ao ona tatou tauivi pea ia faaleleia atili.

Faatomuaga

Ia fai atu i le tagata o le vasega poo le taitai uarota na tofiaina e faitau le saunoaga lenei:

Na saunoa mai Peresitene Polika Iaga o le Alii “na te aumaia i le asō se mea itiiti i tagata e mulimuli ia te ia, ma afai latou te alualu i luma i lena mea, na te aumaia a taeao se mea itiiti faaopoopo, ma le aso e sosoo ai o se mea itiiti e faaopoopo atu. Na te le faaopoopoina atu se mea latou te le o faaleleia” (*Discourses of Brigham Young*, sel. by John A. Widtsoe [1941], 90).

Ia fai atu i le tagata na tofia ia faamatala atu se mea na oo i ai na ia iloa ai le moni o lenei saunoaga.

Aoaoga a le Faiaoga

Ia faailoa atu o lenei mataupu na aoaoina atu e Peresitene Iaga e faaaogaina i a tatou taumafaiga i le aveai ai ma faiaoga o le talalelei. Tatou te mauaina le fesoasoani a le Alii a o tatou faaauau pea ona faaleleia mea o loo ia tuuina mai ia i tatou. O lenei lesona o loo taulai atu i mea e mafai ona tatou faia e faaleleia atili ai lo tatou aoao atu. O loo talanoaina ai foi risosi o loo maua i le Ekalesia e fesoasoani ia i tatou i nei taumafaiga.

Ua saunia e le Ekalesia risosi e fesoasoani ia i tatou ia faaleleia atili ai le aveai ma faiaoga.

Lipoti

Potutusi i le Falelotu

Ia faamatala atu ua saunia e le Ekalesia mea e mafai ona fesoasoani ia i tatou i le aoaoina atu o lesona lelei. Ia taitai atu mafaufau o tagata o le vasega i le tulaga na e setiina a o lei amataina le vasega (tagai “Sauniuniga,” lona 7). Ia faaaluina ni nai minute e faamatala ai risosi, ma ia tuuina atu le avanoa i tagata o le vasega e fesili ai e uiga i risosi. Ia uunaia tagata o le vasega e asiasi atu i le potutusi o le falelotu e aoao atili e uiga i nei risosi ma isi risosi atonu e fesoasoani ia i latou i a latou lesona.

Ia faamatala atu i le faaopoopo atu i risosi faaleaoaoga, ua saunia e le Ekalesia isi risosi e fesoasoani ia i tatou ia faaleleia atili ai le avea ma faiaoga. Ia talanoaina nei risosi e pei ona faaali atu i lalo.

O le Lagolagosua a Taitai i Faiaoga

Ia fai atu i le taitai ma le faiaoga na tofiaina e tuuina atu a la tautalaga e uiga i le lagolagosua a taitai i faiaoga (tagai “Sauniuniga” lona 2 ma le 3).

A maea lenei tautalaga, ia valaaulia tagata o le vasega e fesili ni fesili e uiga i le lagolagosua a taitai i faiaoga. Ia valaaulia foi i latou e talanoaina auala e mafai ai ona fesoasoani atu lena lagolagosua i le faaleleia atili o i latou i le avea ai ma taitai ma faiaoga.

Ia faailoa atu ou lagona e uiga i le taua o le lagolagosua a taitai i faiaoga.

Fonotaga o le Faaleleia o Faiaoga

Ia faamatala atu i tagata o le vasega e uiga i fonotaga o le faaleleia o faiaoga (tagai “Sauniuniga,” lona 5).

Vasega o le Aoaoina Atu o le Talalelei

Ia faailoa atu o lenei vasega o le isi risosi lea ua saunia e le Ekalesia e fesoasoani ia i tatou ia faaleleia atili ai le avea ma faiaoga.

E tatau ona tatou manatunatu pea lava pea i aafiaga lelei i le avea ai ma faiaoga.

Gaoioiga i le Api

Ia faamatala atu e tatau ona tatou manatunatu pea lava pea i ala o loo fesoasoani ai a tatou taumafaiga ia i latou o loo tatou aoaoina atu. Ona fai atu lea i tagata o le vasega e susue i le siata o loo i le itulau 26 o le tusi lenei. Ia fai atu ia i latou e kopi le siata i a latou api.

Ia fai atu i tagata o le vasega e toe mafaufau i tua i vaiaso ua tuanai talu mai le amataga o le vasega lenei. Ia fai atu ia i latou e mafaufau i mea na tuuina atu e suesue i ai mai lesona ua mavae. Ona fesoasoani lea ia i latou e faaoga le siata e iloiloaina ai lo latou alualu i luma i le avea ai ma faiaoga. Ia fai atu ia i latou e tusi se mea e tasi o lelei ai ma se mea e tasi o faalē lelei ai. Ia uunaia i latou e tusi se mea e tasi e mafai ona latou faia nei e faaleleia ai ma se tomali e tasi e manaomia le atina'eina. (Mo se faamatalaga i le ala e faia ai lenei iloiloaga, tagai i le faataitaiga o loo i le itulau 26.)

Ia faamatala atu o le a fesoasoani lenei mea ia i latou e amata ai. E tatau ona latou faatumuina le siata e i latou lava. Ao latou faia lena mea, atonu latou te mananao e iloiloaina le “Faia o se Fuafuaga ina ia Faaleleia Atili Ai Lou Aoaoina Atu,” o loo i itulau e 25–28 o le tusi lenei.

Aoaoga a le Faiaoga

A maea ona tuuina atu le taimi i tagata o le vasega e tusi ai i a latou siata, ia faailoa atu ou lava manaoga e faaleleia atili ai i le avea ma se faiaoga. Ia fetufaai ma tagata o le vasega se mea e tasi pe lua o le a e faaopoopoina atu mo oe lava i lenei siata (tagai “Sauniuniga,” lona 6).

Upusii

Ia faamautinoa atu i tagata o le vasega o le a fesoasoani le Alii ia i latou i a latou taumafaiga ia faaleleia atili. Ia fai atu i se tagata o le vasega e faitau le saunoaga a Peresitene James E. Faust o loo i le itulau 22 o le tusi lenei.

Faiiuga

Aoaoga a le Faiaoga Ia toe tuuina atu le saunoaga a Peresitene Polika Iaga. Ia faaali atu ou lagona e uiga i le taua o le mataupu faavae. Afai e lava le taimi, ia faamatala atu le mea na oo ia Enoka e pei ona tuuina atu i le faaaliga mo le faiaoga o loo i le itulau 244.

Molimau Ia tuuina atu le molimau ao musuia e le Agaga.

Tofiga po o Mea e Fai Ia uunaia tagata o le vasega ia:

1. Faafesootai taitai taitoatasi o a latou faalapopotoga e tuuina mai ni lagona ma mea na oo i ai, talanoaina manaoga o tagata taitoatasi o le korama poo le vasega, ma saili le fesoasoani ma fautuaga. (Afai e leai ni tofiga faafaiaoga o tagata o le vasega, ia uunaia i latou e talanoa ma se tagata o le aiga, poo se faiaoga o fonotaga o le faaleleia o faiaoga, poo oe foi e talanoaina ai ni mea na latou aoaoina i lenei vasega.)
2. Iloiloina mataupu na aoaoina i lenei lesona e ala i le suesue i le vaega o le tusi lenei ua faaulutalaina “Faaleleia Atili o Au Taleni” (itulau 23–31). Ia faaauau pea ona galue i a latou fuafuaga ina ia faaleleia atili.
3. Sau i le vasega i le vaiaso e sosoo ai ua saunia e faia ni tautalaga i mea ua latou aoaoina poo faapefea foi ona latou tuputupu a’e e tusa ai ma lenei vasega. E tatau ona tolu i le lima minute le umi o tautalaga, e fuafua lava i le numera o tagata o le vasega. E tatau ona aofia ia latou lipoti ia (*a*) pe faapefea ona suia i latou i le avea ai ma faiaoga ona o mea na latou aoaoina ma (*e*) mea na latou fuafua e faia ia faaauau ai pea le faaleleia atili i le avea ai ma faiaoga.

O ATU IA MA AOA ATU

Lesona 12

Faamoemoega Ina ia tuuina atu i tagata o le vasega le avanoa e faamalosiā ai le tasi i le isi i a latou taumafaiga ia faaleleia atili i le avea ai ma faiaoga.

Faaaliga mo le Faiaoga Na aoao atu e le Alii se mataupu taua o le talalelei ina ua Ia fetalai, “Ia tofia mai ia te outou lava le faiaoga, ma aua nei failauga uma faatasi, a ia tuuina atu i tagata taitoatasi e lauga ma ia faalogo uma i ana upu, ina ia faamalamalaina uma i lauga a tagata uma, ina ia tutusa le avanoa i tagata uma” (MFF 88:122).

O le lesona i le asō, o le lesona mulimuli i le vasega o le Aoaoina Atu o le Talalelei, ua saunia se avanoa mo tagata o le vasega ia aoao atu ma faamalamalamaina e le tasi le isi a o latou fetufaai o latou lagona e uiga i mataupu faavae, mataupu, tomai, ma metotia na latou aoaoina i lenei vasega. Ia faatulagaina ma le faaeteete le lesona ina ia maua e tagata taitasi o le vasega le taimi e tuuina atu ai ni manatu.

Sauniuniga

1. Ia logo mamao atu, e faamanatu i tagata o le vasega le tofiga na tuuina atu ia i latou e sauniuni ai mo le lesona lenei (tagai i le lona 3 o tofiga po o mea e fai i le itulau 247–48).
2. Ia mafaufau pe o faapefea ona alualu i luma tagata taitasi o le vasega i le vaitaimi o faia le vasega ma o a mea ua e aoaoina mai i tagata taitasi. Ia sauni e fetufaai atu nisi o nei manatu e avea o se vaega o le lesona.

Faalautelega Fautuaina o le Lesona Ia tuuina atu sau molimau puupuu e uiga i le taua o le aoaoina atu o le talalelei faapea le taua o le avanoa e galue ai o se faiaoga. Ona faitau lea o le saunoaga o loo i lalo a Elder Jeffrey R. Holland, ma fai atu i tagata o le vasega ia faalogo faalelei ia iloa ai pe faapefea ona avea lenei saunoaga ma se aotelega o lenei vasega:

“Pe a tatou aoaoina a tatou fanau i le aiga, pe tu foi i luma o se aofia i le lotu, ia ‘aua lava tatou te faafaigataina ona maua lo tatou faatuatua. Ia manatua—e ao ona avea i tatou ma ni faiaoga e ‘o mai mai le Atua.’ Aua lava nei luluina fatu o le masalosalo. Aloese i lou auauna ifo ia te oe lava. Ia saunia lelei lesona. Ia tuuina atu ni lauga autu faaleagaga. Aoao atu le mataupu ua faaaliga. Tuuina atu se molimau e lagona i le lotu. Tatalo ma faataitai ma taumafai e faaleleia. I a tatou fonotaga faaleautaitai, ia tatou ‘faatonu atu ai ma faamalosiā’ e pei ona fai mai faaaliga, ma e oo lava i nei mea e tatau ai i a tatou aoaoga ona sau ‘mai luga.’ O le a avea le Ekalesia ma mea lelei mo lona tulaga, ma o le a faapena foi oe, aua e pei ona fai atu Paulo i tagata Roma, “O lenei foi, o oe le aoao atu i le tasi tagata, e te le aoao ea oe ia te oe?” (*Liahona*, Iulai 1998, 31).

Ia valaaulia tagata taitasi o le vasega, ia tuuina atu a latou tautalaga (tagai “Sauniuniga,” 1).

Faaiuga

O Mea Na Maitauina A lava le taimi, ia tauina atu mea na e maitauina o le alualu i luma o tagata o le vasega i le vaitaimi o le vasega (tagai “Sauniuniga,” lona 2). Ia faia se tautalaga e uiga i nisi o mea na e aoaina mai i tagata o le vasega.

Molimau Ia tuuina atu le molimau ao musuia e le Agaga. E mafai foi ona e faaofia ai ni faa-matalaga e uiga i lagona maumaututu, o uunaiga, ma le lagolagosua a’o o atu tagata o le vasega e aoao atu le talalelei.

FAASINO UPU

- A**
- Aafiaga**
fetufaaiga talafeagai, saofagā i se atemosifia e aoao ai, 81
fetufaaiga talafeagai, valaaulia ai le Agaga, 47
- Afiafi faaleaiga, aoaoga i, 146**
- Afioga ale Atua**
faataitaiga a Alema i le faaaogaina o le, 52
i tusitusiga paia ma afioga a perofeta soifua o aso e gata ai, 51
mana o le, 52-53
mauaina. *Tagai* Mauaina o le upu
- Agaga**
aafiaga o le, ia i tatou, 13
aoao atu i le, 42–50, 210–214
auala e valaaulia ai le, 47–48, 211
faiaoga moni, 43–44
fesoasoani i isi ia iloa le, 50, 149
iloaina o le, 49–50
maua ia le, 13, 210–11
molimau o le, uunaia le faaaogaina, 78
ola agavaa mo le, 13, 19, 212–214
saunia lesona i le, 50, 104, 106
taua mo le lelei o le aoao atu, 43–44
ta'uina atu le upumoni, 43
- Agaga, e ao ona fafagaina le aoao atu, 5–7**
- Agaga Paia. *Tagai* Agaga**
- Agamalu, aoao atu ma le, 213–14**
- Aiga, aoaoga i le, 135–51**
- Aiga**
aoaoga e tatau ona faamalolosi ai, 115, 125, 132
faatuuina ai le faatulagaga e ola ai i le talalelei, 143–44
- Alofa**
aafiaga i le aoaoga, 12, 33–34, 205–206
faaalua, mo i latou tatou te aoaoina, 33–41, 205–09
mo i latou tatou te aoaoina ma le Alii, o se uiga taua, 12, 33–34, 205–209
saofagā i se atemosifia e aoao ai, 81
valaaulia le Agaga, 48
- Alofa mama**
faauigaina o le, 12, 37
mauaina o le meaalofo o le, 12
- Amataina o se lesona**
faataitaiga o le, 100
lelei, e saofagā i se atemosifia e aoao ai, 85
taiala mo, 100
- Amio faasoesa, tali atu i, 92–94**
- Amio, i le potuaoga, fesoasoani i le i ai o se atemosifia e aoao ai, 230**
- Anapogi, ia maua le afioga a le Alii, 14–15**
- Aoao ma le maelega**
faataunuuina o tiutetauave o faiaoga, 63–64, 220–25
fautuaga mo le faataunuuina, 64, 226–27
tiutetauave o tagata taitasi le, 63–64, 220–23
- Aoao atu**
aafiaga o matua matutua i, 150
aafiaga o tagata o le aiga i, 150–51
aafiaga o uso ma tuafafine i, 150–51
ala i suesuega faaleaiga o tusitusiga paia, 135, 145–46
ala i tatalo faaleaiga, 135, 145
amata i le muai olaga, 3, 201
faatasi ma le lotomauualalo ma le alofa, 12, 33–34, 48, 205–209
faatasi ma le paia ma le agamalu, 210–11
fafagaina le agaga, 5–7
i afiafi faaleaiga, 135, 146
i aufono faaleaiga, 147
i faataitaiga, 18–19, 128, 135, 203
i faatalanoaga, 161
i fonotaga faaleautaitai, 160
i le Agaga, 42–50, 210–14
i le aiga, 133–51
i taimi e le'i fuafuaina, 129, 135, 148–49
i talanoaga patino ma lau fanau, 147
i taumafataga faaleaiga, 146–47
matafaioi o, i le fuafuaga a le Tama Faalelagi, 2–4, 199–202

mea masani mo, i le aiga, 135, 145–47
 pe a leai se tusi lesona, 107–108
 Risosi faale-Ekalesia mo, 112
 taua mo le faaogaina ma le amiotonu o le saolotoga, 3, 226
 taua o le, 2–4, 199–204
 tiutetauave o tagata uma, 3–4, 201–202
 tulaga gafatia o tamaiti i le, 150

Aoaoga a faiaoga asiasi
 filifilia o le savali, 155–56
 sauniaina ma le tuuina atu o le savali, 50

Aoaoga i aiga
 manatu fou mo, 153
 saunia ma le tuuina atu o le savali, 154
 filifilia o le savali, 153

Archibald, Dallas N., aoao atu ma le alofa e faalateleina ai le agaga o lē faalogo, 33

Asiasiga. *Tagai* Asiasiga a taitai i potuaoga
 Asiaisga a taitai i potuaoga, 30

Asiasiga po o talatalanoaga patino, ma le fanau, avanoa faafaiaoga o matua i taimi o, 147

Ata, 185–86
 Ata faatutu e fai i pepa, 185
 Ata tusi po o ata malamalama, 174
 Atamu ma Eva, na poloaiina e aoao a la fanau, 3, 201

Atemosifia e aoao ai
 aoaoina atu o isi e uiga i se, 83–84, 228–33
 faalateleina i le saunia o potuaoga, 82
 faataitaiga o le aoga mo perofeta, 226–27
 faateleina e ala i talanoaga, 65
 faatupuina o se, faatasi ma tamaiti, 86–87, 93
 fautuaga mo le faatupuina, 82–93
 ki i le amio pulea i le potuaoga, 81, 233
 tiutetauave o faiaoga mo se, 85–93, 226–33
 tiutetauave o tagata taitoatasi mo, 83–84, 227–31
 uiga o se, 83, 227

Auai i le faatinoga o mea e fai
 metotia e uunaia ai tagata aoao, 74–76
 tiutetauave o tagata taitoatasi mo le, 76
 uunaia, i le vasega o le Aoaoina Atu o le Talalelei, 199

Auauna atu, taua o le mauaina o le meaalofa o le alofa, 12

Aufono faaleaiga, avanoa e aoao atu ai i, 147

Autalavou
 aoao atu, e ala i gaoioiga faavaega, 128–130
 manaomia le fafagaina atili i le talalelei nai lo faafiafiaga, 6
 malamalama, 125–27
 naunau e suesue le talalelei, 6, 217
 o mea latou te manaomia mai tagata matutua, 127

B

Ballard, M. Russell
 aoaoina o le talalelei i le aiga, 136
 faatuatuaga ua tuu atu i faiaoga mo le fanau, 114
 gaoioiga e tatau ona aoao atu ai ma faamalamalamaina, 124
 saili e faateleina le atamai faaleagaga, 16

Benson, Ezra Taft
 aafiaga o le Agaga, 13
 aoao atu mai tusitusiga paia ma perofeta o aso e gata ai, 54, 56
 aoao fanau e faapelepele i le talalelei, 217
 e aupito sili ona taua le Agaga, 210–11
 e faalateleina e le Alii Ana auaua, 20
 faamoemoega o le aoga a perofeta, 227
 faatosinaga faafaiaoga a tina, 139–40
 fautuaga mo faiaoga o aiga, 153
 ia maua muamua le upu a le Alii, 14
 lapatai mai e uiga i le toe faaliliuina o le talafaasolopito o le Ekalesia, 55
 suesue tusitusiga paia i aso taitasi, 15
 taitaiga amiotonu a tamā, 137–38
 tumasani amiotonu e fusia faatasi ai aiga, 143–44

C

Caldwell, C. Max, e taiaina e le agaga le sauniuniga o lesona, 50

Clark, J. Reuben, Jr.
 Mauaina e le Peresitene o le Ekalesia ia faaaliga mo le Ekalesia, 55
 naunau le tupulaga talavou e aoao le talalelei, 6, 216–17
 tulaga taua lē mafaatauina o le aoaoina atu o le talalelei, 2

Cook, Gene R.
 Agaga o le faiaoga moni lea, 43
 aoaoina atu taitoatasi o a tatou fanau, 147

E

Eyring, Henry B
 lotogatasi ma le alofa e taua mo le aoaoina, 83
 lotomauualalo e taitai atu ai i le faalagolago i le Agaga, 212

F

Faaogaina
 metotia faafaiaoga e uuna'ia ai, 80, 168–69
 tiutetauave o faiaoga e uuna'ia ai, 80

- Faaloalo
 e sau mai le ava i le Atua, 86
 faauigaina, 86
 taua o le, 86–87, 160
 faatuina o se faataitaiga o le, 86–87
 auala e aoao atu ai, 87
- Faaloalo, e saofagā i se atemosifia e aoao ai, 84
- Faafanua
 faaaogaina, e aoao atu ai, 180
 o se fesoasoani e suesue ai i tusitusiga paia, 59
- Faafesootai. *Tagai* Fesootaiga faiaoga-taitai
 Faafesootai mau, 60
- Faafiafiaga, e lē lava e faafailele ai le agaga, 6
- Faafitauli tau i le amio. *Tagai* amioga faaesoasoa
- Faaiuina o se lesona
 faamatalaina o faaiuga lelei, 101
 faataitaiga o, 101–02
 tuu se taimi mo le, 101
- Faalagolago o le tagata ia te ia lava, i le aoaoina o le talalelei. *Tagai* aoao ma le maelega
- Faalauteleina, faauigaina o le, 20
- Faalavelave
 e masani ona puipuia i le tausisia o se atemosifia e aoao ai, 234–35
 fautuaga mo le faaititia, 234–35
- Faaleagaga, natura maaleale o le, 13
- Faaleleia
 faatasi ma le fesoasoani a le Alii, 26–27
 faatuina sini mo, 25
 faia se fuafuaga mo, 24–27
 siata o fuafuaga, 25
- Faaleleia fonotaga. *Tagai* Fonotaga mo le faaleleia o faiaoga
- Faaliliuga, lapataiga e uiga i faaliliuga a le tagata lava ia ma le lē faavaea, 55, 217
- Faalogologo
 fautuaga mo faiaoga, 68–69
 mulimuli i faataitaiga a le Faola, 69
 taua o le, i aoaoga, 66–69
- Faamanuiaina i se tofiga
 maua ai le malosi ma le taitaiga, 20
 taua e faataunuu ai valaauga aloaia, 20
- Faamatalaga e tusia i autafa o mau, 60–61
- Faamatalaga faaopoopo i lalo, o se fesoasoani mo suesuega i tusitusiga paia, 58
- Faataitaiga
 meafaigaluega mamana e aoao ai, 18–19, 128, 135, 201
 manaomia ai tautinoga faaletagata, 18–19
- Faataitaiga, o se metotia faafaiaoga, 176–77
- Faatalanoaga, ta'ita'i e aoao atu i, 161
- Faatatauina, faaaogaina, e fai ma metotia faafaiaoga, 179–80
- Faatauloto, 187
- Faatino i se tala
 faaaogaina, 174–75
- lapataiga e faatatau i, 175
- Faatinoga, 173–74
- Faatinoina i taga, 188
- Faatuatua, manaomia e maua ai le afigoa a le Alii, 14
- Faatatusasaga, faaaogaina, o se metotia faafaiaoga, 172–73, 238–39
- Faaulutala, o se fesoasoani e suesue ai tusitusiga paia, 58
- Faiaoga
 aafiaga o le, 2–4, 200–202
 aapa atu i isi, 37–38
 aoao atu mataupu mama atoatoa, 54–55, 215–19
 faafesootai taitai, 28
 faamalolosi aiga, 115
 fafagaina le agaga, 5–7
 lapataiga mo, 54–55
 malamalama ia i latou o loo e aoaoina, 35–36
 meafaigaluega i aao o le Alii, 43
 risosi o loo maua mo, 111, 250–51
 saofagā i se atemosifia e aoao ai, 82–93, 225, 21
 sui o le Alii, 8
 uiga taua e afaina tele mo, 26
 uunaia le aoao ma le maelega, 62–76, 220–25
- Faiaoga asiasi
 taua o, i olaga o tagata o le ekalesia, 155, 202
 tiutetauave o, 155–56
- Faiaoga o aiga
 taua o, i olaga o tagata o le ekalesia, 153–54, 202
 tiute o, 153–54
- Failauga, 179
- Faitauga fetalai'i, 172
- Fanau
 aoao atu, mai tusitusiga paia, 61, 134, 145–46
 aoao atu, mai ata faataatitia o le ola ai i le talalelei, 6, 143–44
 aoaoina e matua o, i talatalanoaga patino, 147
 aoaoina e matua o, i taimi e le'i fuafua e aoao atu ai, 148–49
 auala e faatupuina ai se atemosifia e aoao ai mo, 86–87, 93
 fautuaga mo le faamatalaina o tala i, 191–92
 mafai ona aoaoina atu matua i le tele o mea, 151
 manaomia le aoaoina o upumoni o le talalelei, 134
 metotia lelei o le aoao atu, 61, 84–85
 o mea e tatau ona aoaoina atu e matua, 134–35
 taiala mo le malamalama ma le aoaoina atu, 84–85, 114–23
 tautala lelei i, 84–85

uiga o vaitausaga o, 116–23
 uuna'ia le auai o le, 85
 Fanau ua ta'ifitu tausaga le matutua, uiga o, 120
 Fanau e ta'i ono tausaga, uiga o, 119
 Faust, James E.
 galue le Alii e ala i le lotomauualalo ma le maelega, 21
 meaalofa o le saolotoga, 223
 Talanoaga Fesagisagia'i, 170
 Fesili
 aloese mai, fesili faafitauli, 71
 aoga e taulimaina ai talanoaga, 65
 faaaoga i faiga fou, 72
 ioe/leai, 70
 moni, 70
 mulimuli i faataitaiga a le Faaola, 70
 saunia o tagata aoao e tali atu, 71
 taiala, 70–72, 243
 taialaina ai le sauniuniga o lesona, 130–31, 245–48
 tulitatao, 71
 uunaia ai le faaaogaina, 71
 uunaia ai mafauaiga loloto, 70–79
 Fesoasoani e suesue ai, i tusitusiga paia, 58–59
 Fesootai o faiaoga-taitai
 manatu mo talanoaga, 29
 taiala mo, 29
 Fesootai i mata, e faateleina ai le ua'i atu o tagata aoao, 74
 Filosofia o tagata, aloese mai le aoaoina atu o, 216
 Fonotaga, aoao atu i fonotaga faale-autaitai, 160
 Fuaiupu faagaoioiga, 167

G

Grant, Heber J., aoao atu i faataitaiga, 18
 Gaoioiga
 faafaigofieina mo fanau iti, 124
 taiala mo le fuafuaina, 128–29
 tatau ona aoao atu ma faamalamalama, 124
 vaega, mo le aoaoina o le autalavou, 128–29
 Gaoioiga e faaua'i mai ai, 168
 Gaoioiga faavaega, mo le aoaoina o talavou, 128–29
 Gaoioiga faatusiata, 175–76

H

Hales, Robert D.
 tatau i matua ona fesoasoani i fanau ia iloa le Agaga, 149
 tatau i matua ona aoao atu ma le lotomauualalo, faatu-
 atua, tatalo, 136
 Hinckley, Gordon B
 a'oa'i ma le alofa, 88

aoao atu mai le loto, 199
 aoao atu mataupu faavae mai tusitusiga faavae, 56
 aoaoga lelei o se uiga taua faale-auta'ita'i, 158, 202
 aoaoga ma asiasiga faaleaiga, 152
 faatuatua e pei o se musele, e malosi pe a faaaoga, 238
 fia taumamafa le lalolagi i meaai faaleagaga, 5, 203
 mafai ona sili atu mea tatou te fai, 201
 manaoga o uso fou, 39
 mana o musika e valaaulia ai le Agaga, 182
 mua'i taua o le aoaoina atu o le talalelei, 3
 tausisia le mama atoatoa o mataupu, 56
 tiutetauave o tama i o latou aiga, 137
 tiutetauave paia o tina, 140
 uiga o le *faalateleina*, 20
 uiga o le *agamalu*, 213
 Holland, Jeffrey R.
 aoao atu i fonotaga faaleautaitai, 160
 avea ma faiaoga "sau mai le Atua," 253
 leai se isi valaauga e sili ai nai lo le faiaoga, 3, 200
 matafaioi taua a tina, 140
 Hunter, Howard W.
 faali mai le Agaga i le tele o auala, 49
 faaoga fesoasoani e suesue ai i tusitusiga paia, 58
 faatu se taimi masani mo suesuega faatusitusiga paia, 16
 Galue le Atua i le faaoleole, onosai, faapalepale, 233–34

I

Iaga, Polika
 a'oa'i atu i le alofa, 93
 faaauau ona faaleleia atili le malamalama mai le Alii, 250
 aoao tamaiti mai tumasani, 143
 mana o le molimau, 45
 Iesu Keriso
 aoao atu e uiga ia, e saofagā i se atemosifia e aoao ai, 84
 faataitaiga maoae o se ta'ita'i, 158–59
 omai ia, faamoemoega aupito mauualuga o le i ai o le
 tagata, 3, 200
 sosia o meaai e tumau, 5
 Iesu Keriso, afioga a
 afai e le maua e outou le Agaga aua tou te aoao atu, 9,
 210
 afai e i ai se tagata e faia lona finagalo, o le a iloa e ia
 lana mataupu, 14, 19
 aoao ma faamalamalama e le tasi le isi, 160
 aoao fanau i le talalelei, 134
 aoao atu ma le maelega ona i ai lea o lo'u alofa tunoa, 8
 aoao atu mea na tusia e perofeta ma aposesitolo, 8
 aoao atu mataupu ole malo, 215

aoao atu mataupu faavae o la'u talalelei o loo i le Tusi Paia ma le Tusi a Mamona, 9
 e lē sao atu i le malo o le lagi i latou uma e faapea mai, le Alii e, le Alii e, 80
 e leai se tasi e mafai ona fesoasoani i le galuega vagana ua lotomauualalo ma tumu i le alofa, 33, 91, 204
 e na o le faaoleole, faapalepale, agalelei, ma le agamalu e tausiona ai le mana, 92
 fafaga a'u mamoe, 5
 filifili mai ia te outou lava se faiaoga, 83, 253
 folafola atu la'u talalelei i le Agaga, 9
 ia fealofani, 12, 85
 manatunatu loloto i mea ua ou fai atu ai, 103
 o ai se inu i le vai ou te avatu e le toe fia inu ia, 5–6
 o a'u o le areto o le ola, 5
 o a'u o le malamalama e tatau ona ou uuina i luga, 3
 o la'u galuega lenei ma lo'u mamalu, 4
 o lē aoao atu ma lē e taliaina, e olioli faatasi, 9, 49
 O le a ou avea mea faatauavaa ma mea malolosi, 24, 245
 o le agaga o le tauaimisa e lo a'u ia, 76
 o le aoga o le agaga e sili i le silafaga a le Atua, 37, 90
 o mea mai luga e paia, 97
 o na upu e le ni o le tagata, ae o a'u, 47
 pe auina atu i lo'u leo po o leo o a'u auauna, 20
 saili muamua ia maua la'u upu, 8, 14
 saili e aoao e ala i le suesue ma le faatuatua, 14
 suesue i tusitusiga paia, 8
 tatalo e le aunoa, 47
 tautino atu le tala lelei, ma le lotomauualalo uma, 43
 teuina e le aunoa upu o le ola, 14, 162
 ua e i ai i le galuega a le Alii, 8
 Iloiloina o le faiga o au lesona, 110–11, 251
 Ituaiga eseese
 aoao atu i, 95–96, 236
 o metotia faafaiaoga, e saofagā i se atemosifia e aoao ai, 78, 86
 siata mo le tulimata'ia, 96

J

Jack, Elaine L., auauna atu i le Alii e ala i asiasiga faaleaiga, 155

K

Kaseti vitio. *Tagai* mea e vaai ma faalogologo ai
 Keriso. *Tagai* Iesu Keriso
 Kimball, Spencer W.
 aafiaga o faiaoga asiasi ma faiaoga o aiga, 202
 aloese mai aoaoga lē faavaea, 55, 217

faaloalo o le malosiaga mo le lelei, 88
 iloiloina o a tatou aoaoga, 110
 manaomia le suesue ina ia iloa upumoni natia, 224–25
 ola i mea e te aoao atu, 18
 puipuia o fanau mai aoaoga sese i fafo atu, 6
 saga iloina pea lava pea o tusitusiga paia, 218
 taua o le faamanuaina i se tofiga, 20

L

Lagiina-se-tala. *Tagi* Musika ma le faamatalaga
 Lapataiga, mo faiaoga e tausiona le mama atoatoa o mataupu, 54–55
 Lauga o le konafesi, faavaeina o lesona mai, 107–108
 Laupapa, faaogaina o le, 171–72, 239
 Laupapa iemamoe, 177
 Lē faaloalo. *Tagai* amio faasoesa
 Lee, Harold B.
 mautinoa e leai se tasi e lē malamalama i le talalelei, 54
 uiga taua mo faiaoga, 26
 Lesona Fetuutuunai
 faataitaiga o, 109
 fuafua i manaoga o vaega i vaitausaga, 35
 Lesona
 auala e amata ai, 100
 auala e faaiu ai, 101–02
 fetuutuunai, 109
 iloiloina o le faiga o, 110–11
 sailia o, i aso faisoo o le olaga, 22–23
 Lesona faatino, 171–72, 237–238
 Lipine pue faalogologo. *Tagai* mea e vaai ma faalogologo ai
 Lomifefiloi o le Tusi Paia, o se fesoasoani e suesue ai mo tusitusiga paia, 58
 Lotomauualalo
 faatosina mai o isi e ala i le, 43–44, 231
 taua le mauaina o le fesoasoani a le Alii, 212

M

Makaina o mau, 59–61
 Makei, Tavita O.
 Faaugaina o le faaloalo, 89
 molimau e maua ai le ola mo le aoaoina, 46
 taitai o tagata aoao ia iloa ma lagona mea tou te faia, 248
 tiutetauave o faiaoga e filifili ai le faiga aupito sili, 96
 Malamalama
 iloiloina o tagata aoao, 79
 faateleina i talanoaga, 65
 Malosiaga, iloiloina o au lava, 24

- Manatu, faaputupu ma pu'eina, 23
- Manatu palepalealuga
faaosofia ai manatu, 168
faapefea ona faaaoga, 168–69
- Masini malamalama, 184
- Matua
faaluina o le taimi e fuafuaina ai faatasi o ni, 141
fautuaga mo, i le auala e aoao ai fanau, 135–51
fautuaga mo le faatuina o faatulagaga o le ola i le talalelei, 143–44
fesoasoani i tamaiti ia iloa le Agaga, 151
galulue faatasi ma faiaoga o a latou fanau, 90, 91
paaga faafaiaoga, 141–42
risosi faafaiaoga o loo maua mo, 112
taimi e aoao atu ai i le olaga faaleaiga, 148–49
taua o le lotoatasi i, i le aoaoina o fanau, 142
tiutetauave faafaiaoga, 135–36
- Matua matutua, aafiaga faafaiaoga o, 150
- Mataupu
lapatai e tausisia le mama atoatoa o, 54
mana o, 52–53, 215–19
maua ai le puipuiga faaleagaga, 53, 238
mataupu moni, e suia ai uiga ma amio, 53, 216
tiutetauave o faiaoga le aoaoina atu o mataupu mama, 54–55, 215–19
- Mauaina o le upu
ala i le tatalo ma le anapogi, 14–15
ala i le usiusitai, 14
apoapoaiga ia Ailama Samita, 14
i le suesue ma le faatuatua, 14
taua mo le aoao atu ma le mamana, 14–15
- Mausa faaletalalelei
aloese i le aoaoina, 55
faauigaina, 55
- Maxwell, Neal A., manaoga o tagata taitoatasi tou te aoaoina, 35–36
- McConkie, Bruce R.
aoga mo perofeta, 225
aoao atu i le mana o le Agaga Paia, 9
aoao atu mataupu o le faaolataga, 5
aoao atu mataupu faavae o le talalelei, 8–9
aoao atu mai tusitusiga faavae, 8–9
faaaoga mataupu faavae i manaoga o tagata e faalogologo, 9–10
faatatauina o mau i o tatou aafiaga, 190
faiaoga osui o le Alii, 8
leai se tau e maualuga tele e maua ai le Agaga, 13
lototoa e molimau ia Iesu, 18
mana o le molimau, 45
matafaioi paia a le faiaoga, 8–10
molimau i le aoao atu, 10, 45
tiutetauave o tagata taitoatasi e aoao ai le talalelei, 63
- McConkie, Joseph F., lapataiga mo faiaoga o le talalelei, 54–55
- Mea e matamata ma faalogologo ai
Aiaiga a le Ekalesia i le faaaogaina o, 168
fautuaga mo le faaaogaina, 168
- Meaai
Iesu Keriso o le sosia moni o, 5
luitau i le sauniaina o, faaleagaga, 5–7
tiutetauave o faiaoga i tagata faalogologo, 5–7
- Metotia e Aoao Atu Ai., *Tagai* Metotia faafaiaoga
Metotia faafaiaoga
ata, 185
ata faatutu e fai i pepa, 185
ata tusi po o ata malamalama, 173
faaaogaina o auala, 167–68
faaaogaina o auala, 167–68
faaaogaina o mea eseese, 78, 86, 95–96, 239
faafanua, 180–81
faapefea ona filifili, 97–98
faataitaiga, 176–77
faatauloto, 187
faatinoga i taga, 187
faatinoga, 173–74
faatatauina, 179–80
faatusatusaga ma lesone faatino, 171–72, 237–39
failauga faapitoa, 179
faitauga fetalia'i, 171
gaoioiga faafuaiupu, 167
gaoioiga faatusi ata, 175–76
gaoioiga e faauai mai ai, 168
laupapa, 170–71
laupapa iemamoe, 177
manatu palepalealuga, 168–69
masini malamalama 184
mea e faalogo ma vaai i ai, 168
mea e vaaia, 168
musika, 181–83
musika ma faamatalaga, 183–84
nofoaga, 124, 188
papeti, 186
pepa o galuega, 193–94
pusa e faasolo ai ata, 188
siata o, 97
taaloga, 177–79
tala, 189–92, 241–42
tala e faitauina, 187
tala faatino, 174–75
talanoaga faavaega, 184–85

talanoaga fesagisagia'i, 169
 tauloto, 180–82
 tatau ona fesoasoani i tagata aoao ia malamalama, man-
 atua, ma faaoga mataupu faavae, 94, 105, 234–35
 tautalaga, 179
 tulaga faatusa e aoao ai, 169–70

Molimau

faamalolosia i aafiaga, 47
 faataitaiga o, 45–46
 faauigaina, 45
 mana o le, o se vaega o le aoao atu, 10, 45–46
 mauaina ma faamalolosia, 46
 saofagā i se atemosifia e aoao ai, 86
 tuuina atu, valaaulia le Agaga, 45–46, 47

Monson, Thomas S.

aafiaga faafiaoga o taitai, 159
 aapa atu e fesoasoani i isi, 38
 aoao atu i faatalanoaga, 161
 aoao atu i potuaoga o le Ekalesia, 200, 201–02
 faamalolosia e le Atua i latou ua valaauina, 20, 214
 mana o faataitaiga, 18
 tala mai le olaga faatamaitiiti e fesoasoani e faatupuina ai
 se atemosifia e aoao ai, 229–30
 tiutetauave o matua i le aoaoina o fanau, 136

Muai olaga, na i ai le muai aoaoga i le, 3, 200

Musika

faaaogaina, e aoao atu ai fanau, 183
 faaaogaina, o se meafaigaluega faafiaoga, 47–48, 182–85
 fautuaga mo le taita'ia o pese, 183
 filifilia ma le sauniunia, 182
 siitia ai le faaaloalo, 89
 talafeagai, valaaulia le Agaga, 47–48, 89, 181–82

Musika ma faamatalaga, 183–84

N

Naunautai, saofagā i se atemosifia e aoao ai, 86

Naunautai, faateleina e ala i talanoaga, 65

Nelson, Russell M.

aafiaga puipua o aoaoga o le talalelei, 53, 238
 tulaga gafatia o tamaiti e aoao atu ai isi, 151

Nofoaga

faaaogaina, o se metotia faafiaoga, 188
 fesoasoani mo le aoaoina o vaitausaga eseese, 124

O

Oaks, Dallin H.

aoao atu i le Agaga, 42
 faaaogaina ma le migao o suafa o le Atua, 89–90

iloaina o le Agaga, 49
 manaomia le usiusitai e aoao atu ai i le Agaga, 13
 sauniuniga e manaomia mo le taitaiga a le Agaga, 103
 suesue tusitusiga paia i aso taitasi, 14
 tulai atu taumafaiga faafiaoga i isi nai lo oe lava,
 223–24

viiga o ni risosi taua, 181–82

O mea e faatino ai, 192–93

P

Packer, Boyd K.

mataupu moni e suia ai amioga, 53, 217
 aoaoina atu o mataupu lavelave, 99, 172, 240
 e faalagiina foi le Atua o le Tama, 138
 faamoemoega o le aoaoina atu o le talalelei o le tuufaata-
 sia o aiga, 135

faatatusa le aoaoina o le talalelei i le tufatufaina o se
 keke, 236–37

Iesu o le taitai e faataitai i ai, 159

iloiloina o le malamalama o tagata faalogologo, 77

mafai e tusitusiga paia ona tali fesili uma, 53

musika e aoao atu ai ma pa'i atu i le agaga, 48

musika e faatupuina atemosifia e tapuai ai, 90

natura maaleale o le faaleagaga, 13

paaga faafiaoga a matua, 141

taitai e auauna atu o ni faiaoga, 158

tala e uiga i le aoaoina o se tamaitai talavou e faaletonu
 le tautala, 40

tiutetauave o tagata o le Ekalesia e manaomia ai le
 aoaoina ma le aoao atu, 203–04

tulaga faavae o le lelei o tagata, 91

valaaulia e le faaaloalo faaaliga, 90

Palota e lagolago ai, mai le faapotopotoga, maua ai le mal-
 osi, 20

Papeti, 185–86

Pearce, Virginia H.

tala i le fesoasoani atu i tamaitai talavou e i ai se ate-
 mosifia e aoao ai, 231

uunaia le aoao ma le maelega, 63–64

Pepa o galuega, 193–94

Pepa mo gaoioiga. *Tagai* pepa o galuega

Perofeta

afioga a, valaaulia le Agaga, 47

aso e gata ai, suesue i aoaoga a, 16

valaau e aoao atu, 3

Perry, L. Tom

faaaloalo e faaaliga ai le ava i le Atua, 89

tiutetauave o matua e aoao atu ai fanau, 136

Pese. *Tagai* Musika

Potutusi, falelotu, 112, 250

Pusa e faasolo ai ata, 188

R

Risosi, e fesoasoani ai i matua, taitai, ma faiaoga, 112, 250–51

Romney, Marion G., aloese mai le aoao atu o faaliliuga a le tagata lava ia o le talalelei, 217

S

Samita, Ailama, apoapoai ia maua muamua le afioga a le Alii, 14

Samita, Iosefa

faaogaina o faamatalaga e malamalama ai i mau, 56
mana o le agalelei ma le alofa, 30

Samita, Iosefa F.

aloese i mausa faaletalalelei, 55

aloese i taumatematega, 55

aoao atu upumoni laveai, 51

Samita, Iosefa Filitia

aloese mai filosofia faafaiaoga o tagata, 216

manaomia le usiusitai e aoao atu ai i le Agaga, 19

sili atu le mamana o le tuuina atu e le Agaga o upumoni
nai lo vaaiga faalelagi, 43

Saolotoga

aoao atu e mafai ai e tagata aoao ona faaoga le, 3, 222–23

meaalofa sili mai le Alii, 223

mulimuli i faataitaiga a le Alii, 223

Sauniuniga, a le tagata lava ia. *Tagai* sauniuniga a le tagata lava ia

Sauniuniga a le tagata lava ia

faaaluina o se taimi mo, 104

fautuaga mo, 12–20

Sauniuniga, faaleagaga. *Tagai* sauniuniga faaleagaga

Sauniuniga faaleagaga

faataitaiga a atalii o Mosaea, 11

saofagā i se atemosifia e aoao ai, 85

Sauniuniga, lesona. *Tagai* sauniuniga o lesona

Sauniuniga o le lesona

faaogaina o lauga o le konafesi ma isi risosi, 107–108

faaogaina o mea e gaosia e le Ekalesia, 112

faasaoina se taimi mo, 23, 104

fetuutuunai, mo i latou o loo e aoaoina, 23, 35–36, 109

mauaina o le olioli i, 104

fesili taiala taua, 105–106, 245–48

taitaiga mai le Agaga i le, 50

Sauniuniga, potuaoga. *Tagai* sauniuniga o potuaoga

Sauniuniga o le potuaoga

e saofagā atu i se atemosifia e aoao ai, 82

fautuaga mo, 82

Scott, Richard G.

fesoasoani i tagata faalogologo e iloa ai le Agaga, 50

manaomia le lotomaulalo e aoao atu ai i le Agaga, 42–43

ola i aoaoga a le Agaga, 19

Sii sese mai, aloese mai ai, ina ia tausisia le mama atoatoa o mataupu, 55

Sini, faatutuina, mo le faaleleia atili, 25

Snow, Lorenzo, mana o faataitaiga i le aoao atu, 202

Suesue

atinaeina o fuafuaga faaletagata lava ia, 16–17

faatulagaina o se taimi mo, 16

manatu e faalautele ai, 17

manaomia e sailia ai upumoni natia, 14

mau ma afioga a perofeta o aso e gata ai, 14–17

taua mo le mauaina o le upu a le Atua, 14

Suesue faaleaiga i tusitusiga paia, avanoa e aoao atu ai i, 15, 135, 145–46

Sui, o faiaoga o sui o le Alii, 8

T

Taaloga

o se metotia faafaiaoga, 177–79

taiala mo le filifiliaina, 177–78

Tagata o le aiga, aafiaga faafaiaoga o, 150–51

Tagata, fou. *Tagai* tagata fou o le ekalesia

Tagata, e le atoatoa. *Tagai* Tagata e i ai tulaga le atoatoa

Tagata, lē toaaga. *Tagai* tagata lē toaaga

Tagata e i ai tulaga le atoatoa

alofa o le Faaola mo, 40

faaletonu le vaai, 41

faaletonu le gagana ma le tautala, 41

le atoatoa le mafaufau, 41

le mafai ona faitau, 41

logonoa, 40

risosi mo, 41

Tagata e le toaaga mai, fesoasoani i, 39

Tagata fou o le ekalesia, manaoga o, 39

Tagata matutua

aoaoga, 131–32

eseesega o tagata taitoatasi, 132

uiga masani o, 131–32

Taiala faaulutala, (Topical Guide) o se fesoasoani e suesue ai i tusitusiga paia, 59

Taimi e aoao atu ai, e lei fuafuaina, 130, 136, 148–49

- Taimi, puleaina, i le vasega, 101
- Taitai
- asiasiga i potuaoga a, 28
 - tiutetauave a aoao atu ai, 28, 158–63
 - tiutetauave e lagolagoina faiaoga, 28, 162–63, 250–51
 - tiutetauave e fesoasoani ai i faiaoga fou, 28,
 - fautuaga mo, e aoao atu ai i fonotaga faale-autaitai, 160
 - fesootai atu o faiaoga i taitai, 28
 - mataupu faavae e aoao atu ai i faatalanoaga, 161
 - risosi o loo maua mo faia o aoaoga, 112
- Tala
- aloese mai tala faafiafia, 55, 190
 - faaaoga o, faatusi paia, 57
 - faamatalaina, i fanauiti, 191–92
 - ituaiga o, 190–91
 - taiala mo le filifiliaina, 190–91
 - taiala mo le sauniaina ma le faamatalaina, 191
- Tala e faitauina, 187
- Talafaasolopito o le Ekalesia, lapatai mai e uiga i le toe faia pe toe faaliliuina, 55
- Talanoaga
- aoga i le iloiloaina o le malamalama o le tagata aoao, 66, 79
 - faaiuina o, 68
 - taiala mo le faia, 66–68, 243–44
 - tulaga manuia o, 56, 66
- Talanoaga faavaega, 184–85
- Taleni
- faaleleia atili au lava, 21–28, 249–51
 - o le Alii e mafai ona faalauteleina au, 249, 250
- Tali e lē sa’o, fautuaga mo le tali atu i, 67–68, 72
- Tama
- fautuaga mo taitaiga amiotonu, 137–38
 - tiutetauave faafaiaoga o, 137–38
- Tamaiti e ta’i fa tausaga le matutua, uiga o, 118
- Tamaiti e ta’i iva tausaga le matutua, uiga o, 121–22
- Tamaiti e ta’i sefuluvalu masina le matutua, uiga o, 116
- Tamaiti e ta’ivalu tausaga le matutua, uiga o, 121
- Tamaiti e ta’i sefulutasi tausaga le matutua, uiga o, 122–23
- Tamaiti e ta’isefulu tausaga le matutua, uiga o, 122–23
- Tamaiti e ta’i lima tausaga le matutua, uiga o, 118–19
- Tamaiti e ta’i lua tausaga le matutua, uiga o, 116–17
- Tamaiti e ta’itolu tausaga le matutua, uiga o, 117–18
- Tali, tali atu i mea sese, 67–68, 71
- Tatalo
- faaleaiga, avanoa e aoao atu ai i le, 136, 145
 - manaomia e mauaina ai le alofa, 12
 - taua i le molimau, 46
 - taua le mauaina o le upu a le Alii, 14–15
 - valaauliaina o le Agaga e ala i, 47, 211, 212
- Tauloto, o se metotia faafaiaoga, 180–82
- Taumafataga faaleaiga, avanoa e aoao atu ai i, 146–47
- Taumatemate, aloese mai le, tausisia le mama atoatoa o mataupu, 54–55
- Tautalaga, o se metotia faafaiaoga, 179
- Teila, Ioane, molimau o le tagatavaleina o Iosefa ma Ailama Samita, 54
- Tina
- fautuaga i, mo le aoaoina atu o fanau, 139–41
 - matafaioi paia o, 139
 - tiutetauave o, mo le aoaoina atu, 139–40
- Tino o le mataupu, fesoasoani e malamalama ai i mau, 56–57
- Tiutetauave o, tagata taitoatasi, mo le aoaoina o le talalelei. *Tagai* aoao ma le maelega
- Tulaga Faatusa e Aoao Ai, 79, 169–70
- Tulaga lē atoatoa. *Tagai* Tagata e i ai tulaga lē atoatoa
- Tumasani, amiotonu, tuufaatasia aiga, 143–44
- Tusitusiga paia po o mau
- aisea na faasaoina ai, 54
 - aoao atu le fanau mai, 61, 134
 - aoao atu mai, valaaulia le Agaga, 47, 211
 - faamatalaga e tusia i autafa o, 60–61
 - fesoasoani e suesue ai o loo maua i, 58–59
 - fesootai, 60
 - makaina, 59–61
 - manatu mo le aoao atu mai, 56–61
 - maua ai tali i fesili uma, 53
 - suesue, o se aiga, 15, 135, 145–46
 - taua o le aoao atu mai, 56
- Tusi o talaaga, po o se api, e aoga e faamaumau ai malamalamaaga, 17, 23, 106
- Tusi po o mau e fefaamaonia’i ai, o se fesoasoani e suesue ai i tusitusiga paia, 58

U

- Ua’i atu
- auala e faatumauina ai le uai atu o tagata aoao, 77–78
 - faateleina e ala i talatalanoaga, 65
 - maitauina o tagata aoao, 77
 - valaaulia, e ala i amataga lelei o lesona, 100
- Uiga o vaitausaga, faamatalaga o uiga o fanau, 117–23
- Usiusitai
- taua e maua ai le afioga a le Alii, 14
 - taua e aoao atu ai i le Agaga, 13, 19
- Uso ma tuafafine, aafiaga faaleaoaoga o, 150–51
- Uso ma tuafafine, aafiaga faaleaoaoga o, 150–51

V

Vaega o vaitausaga, aoaoina faatasi o fanau

Vaivaiga

faia se fuafuaga e faamalosi ai, 25

fesoasoani le Alii e faamalosi, 24, 26–27

iloiloina ou lava, 24–25

Valaauga

e sau mai le Alii, 20

faalauteleina lou, 20

faamanuiaina i se tofiga e atoatoa ai, 20

faataitaiga o Iakopo ma Iosefa i le faalauteleina, 20

lagolagoina i le palota o se vaega o le, 20

o se avanoa e galue ai, 20

Vasega o le Aoaoina Atu o le Talalelei

faamoemoega ma le vaaiga aoao, 196–97

lesona, 199–244

saunia e aoao atu le, 196

W

Warner, Susan L.

aafiaga o aoaoga a matua matutua, 150

manatua e tamaiti aoaoga faaleaiga, 6

Wirthlin, Joseph B

alofa o se vaega taua o le talalelei, 208

faatusaina tagata faamaoni o le Ekalesia i laau mafala,
238

O LE EKALESIA A
IESU KERISO
O LE AU PAIA O ASO
E GATA AI

